



BIBLIOTHECA
UNIV. JAGELL.
CRACOVENSIS


587785

Mag. St. Dr.

I

20
MXX $\frac{2}{20}$

Mag. St. Dr.



587785

I

-4

11

2130

9
12

EXEMPLAR
VITÆ SPIRITUALIS ET PERFECTIONIS,
SEU

EXERCITIA

HUIUS VITÆ

PRACTICA

Pro Tironibus CARMELITIS DISCALCEATIS.

Et aliis pie & spiritualiter volentibus vivere
in CHRISTO.

CONSCRIPTA.

Liber In duas partes distincta. Les. de J. P. de J.
Cadmy De J. Ex quibus 1748 25 May

PARS PRIMA

Tractat de triplici EXERCITIO, Vitæ Spiritualis
V. De Oratîone, de Mortificatione, & de Virtutibus.

PARS SECUNDA

Actus internos variarum virtutum complectitur.
olim

Per P. F. SEBASTIANUM

ab Omnibus Sanctis

CARMELITAM DISCALCEATUM.

nunc verò

Sumptibus Provinciæ Lithvanæ

REIMPRESSA.



V I L N Æ

Typis S. R. M. Academicis Soc: JESU An: 1741.



Num putas te virum esse Spiritu-
alem, quia statutis horis in Choro
oscitanter psallis, aut per aliquam
horulam quotidie Divina mysteria,
tepida mente consideras? Cum
tamen levia peccata non time-
as? tuos immoderatos affectus
non ordines? virtutes & animi
puritatem non quæras? & aut in va-
nis studiis, aut in supervacuis col-
loquiis, tempus & vitam impendas?
Toto Cœlo erras, si hoc putas.
Lucherius in 1. Reg: 10.




587785

Mag. 87. 57.

Bibl Jag

St. Dr. 1948. K. 1110/68 (156)



BEATISSIMO
JOSEPH,
Sanctissimæ DEIGenitricis Virginis
MARIAE
SPONSO,

Ac
Specialissimo Ordinis CARMELITARUM
PATRONO.

*Q*uod rudî Minervâ concinna-
tum est pro Tironibus Car-
melitis, hoc Tibi, ô Specialissime
post Beatissimam Virginem MARI-
AM Sponsam Tuam, Religionis no-
stræ Patrone, S. IOSEPH, præ-
sen-

sentatur ac offertur, ita, ut & ipsi
simul Tibi præsententur & offeran-
tur. Nam si ex speciali DEI pro-
videntia & ordinatione, nos omnes
Carmelitæ Tui sumus; id etiam in
votis habemus, ut & Tirones Ordi-
nis sint Tui, ut eorum curam in edu-
catione spiritali suscipias, quatenus
verè Spirituales servi DEI, Deoꝝ
placantes efficiantur. Cui enim eos
commendare potiùs debemus, quàm
Tibi, cuius tutelæ & educationi e-
tiam Filius DEI à Patre Æter-
no Cœlesti commissus fuit. Et si ipse
Unigenitus DEI Filius factus Ho-
mo, Te in suum Patrem Putativum,
& suæ carnis humanæ Nutritium
in terris elegit; quis igitur mortali-
um viventium in terris, Te Nutri-
torem suum habere non exoptabit?
Ecce nutrimenta spiritalia pro ju-
ven-

ventute Carmelitana parata sunt,
Tu, ut illi prosint ad vitam spiri-
tuale, ipsius Nutritium Te Fide-
lem exhibeas: immò de Tui cordis
penu alia salubriora alimenta pro
nobis omnibus depromas, ut nos omnes
melius per Te enutriti citò spiritu-
ales reddamur. Fatemur nondum nos
multos incepisse spiritu vivere, &
quibus solidus cibus compete-
bat, adhuc lacte opus est. Quapropter suppli-
ces Tibi vota nostra & preces offe-
rimus, ut unicuique nostrum cibum
eius modi provideas, qualis ipsi se-
cundum etatem spiritualem conve-
nit: ut iuenculos in spiritu, & in-
cipientes, lacte lacrymarum & pœ-
nitentiæ; iam verò adultos & Pro-
ficientes, solidiori cibo virtutum;
grandævos autem & Perfectos deli-
catioribus eduliis amoris DEI enu-

trias: & ut omnes ad perfectionis
culmen pertingant, Tu, ô fidelissi-
me Patrone, Tuis precibus apud
DEVM obtineas, atq; Te verum
& faventem nobis Tutelarem no-
strum, & in vita: & in morte
ostendas.





A P P R O B A T I O.

Illustrissimi Excellentissimi ac Reverendissimi Domini, Domini Loci Ordinarii.

Ad Reimprimendum Librum cui titulus *Exemplar Vitæ Spiritualis & Perfectionis* ab A.R.P MARTIALI à Protectione S. JOSEPH Provinciali per Majorem Poloniam & M. D. Litthv: Ordinis Carmelitarum Discalceatorum Autoritate nostra Ordinaria facultatem damus & impertimur. In quorum fidem Datt: Vilnæ in Palatio nostro Episcopali A. D. 1741. Die 26. Junii.

MICHAEL JOANNES
ZIENKOWICZ
Episcopus Vilnensis

mpp.





FACULTAS ORDINIS

*Fr. Ambrosius ab Assumptione Vicarius
Generalis Carmelitarum Discalceato-
rum Congregationis S. ELIÆ Ordinis
Beatissimæ Virginis MARIÆ de Mon-
te Carmelo.*

Tenore præsentium facultatem Cō-
cedimus ut possit reimprimi liber, cui
titulus est: *Exemplar Vitæ Spiritualis
& Perfectionis.* à R.P.F. Sebastiano ab
Omnibus Sanctis Carmelita Discalcea-
to compositus. In quorū fidē præsen-
tes dedimus,, manu propria subscri-
ptas, & sigillō officii nostri munitas.
Datt: Romæ in Conventu SS. There-
siæ & Joannis à Cruce Die 12.
Augusti 1741.

*Fr. Ambrosius ab Assumptione Vicarius
Generalis*

Locus † Sigilli

F. Bernardus à SS. Trinitate Secretar.





INDEX CAPITUM

Hujus primæ partis & eorum quæ in
eis tractantur.

PRIMUM EXECITIUM

Vitæ Spiritualis est Oratio.

CAPUT I.

*De Divisione Orationis in Vocalem &
mentalem pag: 7.*

CAPUT II.

*De Officio Divino piè & fractuose
persolvendo. 9.*

CAPUT III.

*De Oratione Mentali & de prima
parte quæ est præparatio. 23.*

CAPUT IV.

*De secunda parte Orationis Mentalis
quæ est lectio. 27.*

CAPUT V.

*De tertia Parte Orationis Mentalis
quæ est Meditatio. 31.*

*In eodem Capite agitur de modo
meditandi. 35.*

Index Capitulorum.

<i>Ibidem</i> & <i>modus meditandi de Deo.</i>	36.
<i>Modus Meditandi de Christo.</i>	38.
<i>Modus meditandi de Sanctis.</i>	39.
<i>Modus meditandi de Virtutibus.</i>	40.
<i>Modus meditandi de Vitiis.</i>	43.
<i>Modus meditandi de Homine.</i>	45.
<i>Modus meditandi S. Scripturæ.</i>	48.

CAPUT VI.

<i>De quarta parte Orationis Mentalis quæ est gratiarum actio.</i>	49.
--	-----

CAPUT VII.

<i>De quinta & sexta parte Orationis Mentalis videlicet Oblatione & peti- tione.</i>	61.
--	-----

CAPUT VIII.

<i>Exempla Orationis Vespertinæ & imo pro feria 2. de odio peccati.</i>	66.
<i>In eodem Exempla pro aliis Feriis de odio peccati.</i>	99.

<i>Item Exemplum unum Orationis Matutinæ de odio peccati juxta quod Omnibus feriis Oratio fiet.</i>	105.
---	------

CAPUT IX.

<i>Exemplum Orationis Vespertinæ pro</i>	
--	--

Index Capitulorum.

pro feriâ 3tia de Vita misera. 106.

CAPUT X.

Pro feria 4. de contemptu sui. 114.

CAPUT XI.

Pro Feria 5. de Timore DEI. 121.

CAPUT XII.

Pro Feria 6. de Pœnis Corporalibus. 128.

CAPUT XIII.

Pro Sabbatho de Puritate Cordis. 137.

CAPUT XIV.

Pro Dominica de Cognitione sui. 144.

CAPUT XV.

Exemplum Orationis Matutinæ

Pro Feria 2. de Superbia & humilitate. 152.

CAPUT XVI.

Pro Feria 3. de Avaritia & Paupertate. 160.

CAPUT XVII.

Pro Feria 4. de Luxuria & Castitate. 165.

CAPUT XVIII.

Pro Feria 5. de Invidia & Charitate. 171.

Index Capitum.

CAPUT XIX.

Pro Feria 6. de Gula & abstinencia. - - 176.

CAPUT XX.

Pro Sabbatho de Ira & Mansuetudine. - - 181.

CAPUT XXI.

Pro Dominica de Acedia & diligentia. - - 187.

CAPUT XXII.

Exemplum pro Proficientibus de Obedia. - - 192.

Juxta hoc Exemplum Orationes de omnibus virtutibus fiant.

CAPUT XXIII.

Exemplum Compassionis Christi. 203.

CAPUT XXIV.

Exemplum Compassionis Beatissimæ V. Gratulationis & Imitationis. 213.

CAPUT XXV.

Exemplum Orationis de S. M. N. Theresia. - - 232.

CAPUT XXVI.

Exemplum de quocunq; Sancto. 235.
CA-

Index Caputum.

CAPUT XXVII.

De Præsentia DEI. - 238.

CAPUT XXVIII.

*Praxis Præsentia DEI Intellectu-
alis pro Incipientibus* 241.

*In eodem Praxis Præsentia DEI
ejusdem pro Proficientibus.* 245

CAPUT XXIX

*Praxis Præsentia DEI Imaginaria
pro Incipientibus.* - 249.

*In eodem Praxis serviens Profici-
entibus.* - 251.

*In eodem de Præsentia DEI vari-
is temporibus serviente.* 256.

*In eodem actus varii SS. pro Præ-
sentia DEI.* - 257.

*In eodem pro Festivitatibus SS.
Virginis Præsentia DEI.* 260.

EXERCITIUM II.

Vitæ Spiritualis est Mortificatio.

CAPUT I.

Quid & quotuplex sit mortificatio. 262.

CAPUT II.

*Motiva ad Mortificationem etiam
in*

Index Caputum.

in minimis. - - 265.

CAPUT III.

Quamdiu nos mortificare debeamus. - - 269.

CAPUT IV.

De Mortificatione sensuum externorum. - - 271.

CAPUT V.

De Mortificatione sensuum internorum. - - 276.

CAPUT VI.

De Mortificatione Passionum. 283.

CAPUT VII.

De Mortificatione propriae Voluntatis. - - 297.

CAPUT VIII.

De Mortificatione amoris proprii. - - 302.

CAPUT IX.

De Mortificatione Intellectus & iudicii proprii. - - 306.

CAPUT X.

De Vitiarum Extirpatione. 308

EXER-

Index Caputum.

EXERCITIUM III.

Vitæ Spiritualis est Virtus.

CAPUT I.

De Virtutis necessitate. 316.

CAPUT II.

De Virtutis definitione & Divisione. 318.

CAPUT III.

De modo acquirendi Virtutes. 323.

CAPUT IV.

De Virtutibus Theologicis de Fide. 337.

CAPUT V.

De Spe. 361.

CAPUT VI.

De Charitate. 381.

CAPUT VII.

De Virtutibus Intellectualibus. 417.

CAPUT VIII.

De Virtutibus Moralibus. 425.

CAPUT IX.

De Prudentia. 431.

CAPUT X.

De Iustitia. 442.

CA-

Index Capitem.

CAPUT XI.

De Fortitudine.

461.

CAPUT XII.

De Temperantia.

470.

CAPUT XIII.

De Donis Spiritus Sancti.

489.



PRÆ-



P R Æ F A T I O

In qua ad cognoscendam vitam Spiritualem & perfectionem scitu digna proponuntur.

Qui vitam spirituale ducere volunt opus est, ut sciant, in quo *hec vita consistit*: Consistit namq; *habitualiter, seu radicaliter, & in Actu primo*, in gratia DEI Sanctificante, quæ est donum DEI præstantissimum animæ nostræ inditum, illam faciens DEO gratam, ac vivificans ad vitam æternam; per quam homo fit Filius DEI, & hæres Regni cœlestis; sine qua anima nostra licet naturaliter vivat, tamen coram DEO mortua est, & inimica DEI, ac jure cœlestis regni privata. Incipit autem vivere, dum ei Gratia à DEO infunditur: quod fit per Sacramentū Baptismi, aut Pœnitentiæ; vel per amorem DEI, vel per Contritionem. Hæc gratia per quodlibet peccatū mortale amittitur: conservatur autem per fugam peccatorum, & per speciale Perseverantiæ DEI donum, quod homo obtinere potest à DEO per orationem, & mortificationem; augetur verò per exercitium virtutum, maxime charitatis; item per rectum usum Sacramentorum, præcipuè Sanctissimæ Eucharistiæ.

PRÆFATIO.

Hæc vita spiritualis in actu secundo consistit in continuo orationis, & mortificationis, vitiorum extirpationis, ac virtutum, bonorūq; operum exercitio, ad amorem DEI proximiq; directo. *Cujus vite spiritualis finis ultimus, est vita æterna,* quæ consistit in clara visione DEI; quàm desiderare debemus principaliter propter amorem DEI, ejusq; beneplacitum; ut non tam nobis bene sit in Cœlo, quàm ut Dominus DEUS habeat suam gloriam, suasq; delicias ex nobis, quos ad imaginem suam creavit, redemit, & variis donis exornavit: possumus tamen expetere vitam æternam secundariò, propter bonum & commodum nostrum; videlicet, ut fruamur DEO in æternum.

Finis autem non ultimus, & intrinsecus vite spiritualis est, perfectio Christiana, quæ consistit in charitate DEI, & proximi, per quam unimur DEO, tanquam fini ultimo.

Et quoniam status Religionis est, quædam disciplina, vel exercitium tendendi ad perfectionem, ut docet Sanctus Thomas; ideò omnes Religiosi tenentur semper tendere ad habendam perfectionem charitatis, quæ est finis status Religiosi.

Hæc perfectio Charitatis consistit essentialiter, & primariò in observatione mandatorum dilectionis DEI, & proximi: secundariò verò in aliis præceptis: quorum observantia charitatem cōservat; quæ ordinantur ad removenda ea, quæ sunt charitati contraria, cum quibus charitas esse non potest; ut sunt peccata mortalia. Instrumentaliter autem

PRÆFATIO.

3

autem consistit in consiliis; quæ ordinantur ad removenda impedimenta actuum Charitatis, quæ tamen Charitati non contrariantur.

Porro *Charitas est duplex: Alia de præcepto*, quam præcipit DEUS, quæ excludit omne illud, quod est contrarium Charitati, scilicet, peccatum mortale: & iste gradus charitatis est infimus, quæ consistit in observantia mandatorum DEI; & est omnino necessaria omnibus ad salutem. *Alia Charitas est de consilio*, quæ non solum excludit illud, quod est contrarium charitati, scilicet peccatum; sed etiam omne illud quod impedit, nè affectus mentis totaliter dirigatur in DEUM. Impedit autem nos, tum affectus ad temporalia, & occupatio circa eadem, à quibus per consilia, videlicet, per obedientiam, Castitatem, & Paupertatem avertimur: tum inordinatæ passionēs, quarum vehementiam sedant virtutes. *Et in hac duplici Charitate perfectio religiosa consistit*, quæ requirit à nobis observantiam mandatorum DEI, & consiliorum, mortificationem passionum, & acquisitionē omnium virtutum, ad quod multum conducit Oratio.

Sunt autem *tres gradus Charitatis primus est*: initium Charitatis; dum homo conversus ad Deum, & ab eo per gratiam infusam justificatus, incipit amare DEUM; & ex amore DEI dolet de peccatis, fugit, & odio habet illa, extirpat vitia, mortificat sensus, & passionēs, ex quibus immortificatis nascuntur vitia. *Secundus est*: Augmentum charitatis; dum homo crescit in charitate; & ex illa

fugit minimas offensas DEI; proficit in mortificandis passionibus: in abnegatione, & contemptu sui; & in acquirendis virtutibus. *Tertius est:* Conservatio charitatis, dum homo firmiter unitur DEO per charitatem.

Secundum quos gradus charitatis dantur *tres status hominum ad perfectionem aspirantium.* *Primus est Incipientium;* in quo homines dant operam, ut peccata gravia evitent, & passionibus vehementibus, & vitiis adversus charitatem militantibus resistent. Ita; tam diu in hoc statu incipientes versantur, donec moderatas passiones, & inclinationem, pravosq; habitus ita repressos habeant, ut facile à peccatis mortalibus sint liberi.

Secundus status est Proficientium, qui hoc potissimum intendunt, ut in charitate, & in aliis virtutibus progressum faciant, cum à vitiis, & concupiscentiis, seu passionibus non adeò oppugnentur. In quo statu tam diu consistit homo, donec passionibus ita sint ei subiectæ, ut facile, si se moveant, reprimantur, & peccata non tantum gravia, sed etiam venialia citò effugiat. Quod cum finè virtutū exercitio fieri nequeat; idèo proficientium potissima cura est, ut eas continuis exercitiis acquirant.

Tertius est Perfectorum, qui hoc præcipuè curant, ut DEO se uniant, eoq; fruantur. In quo statu homo per vitiorum expugnationem, passionū, & concupiscentiarum compressionem, ac virtutum comparisonem, à rebus temporalibus abstractus, sublimem quandam gradum pacis, & amoris DEI adipi-

adipiscitur, per quem intimè unitur DEO, ipsiq; immergitur, quo flagrans amore, se se totum pro gloria DEI procuranda, quidvis agendo, & patiando, secundum oblatas occasiones expendit, & nihil desiderat, nisi pati pro DEO, & contemni.

Secundum hunc triplicem statum datur triplex via perfectionis, Purgativa, Illuminativa, & unitiva.

Via purgativa, Incipientium est, quorum præcipuum studium est, animam suam à peccatorum suorum maculis purgare, & emundare: quod fit per veram contritionem, per ætus externos poenitentiae: videlicet, per abstinentiã, jejunia, vigiliis, cilicia, disciplinas; præterea per mortificationem passionum, & vitiorum eradicationem; ad quod est necessarium, circa quatuor novissima, & damna, quæ nobis asferunt peccata, orationis exercitium. Itaq; hæc sunt propria viæ purgativæ exercitia; ejus fundamentum debet esse Timor DEI, qui nascitur in nobis ex consideratione mortis, judiciorumque DEI, atq; poenarum inferni.

Via illuminativa, est Proficientium, quorum omne studium in veris virtutibus, seu animæ luminibus (quæ lumina sunt virtutes cum majori cognitione DEI conjunctæ) conquiendis consistit; quibus conveniunt exercitia ad illuminandum idonea; uti sunt meditationes de vita, & Passione Christi Domini Redemptoris nostri, ut hinc per imitationem ejus ad virtutes comparandas moveamur.

Unitiva via, Perfeetorum est, qui Domino va-

care, & arctissimè se illi conjungere semper conantur; quorum exercitia propria sunt, Contemplatio Divinæ Majestatis, & perfectionum ejus. atq; ipsius Amor, nec non usus orationū jaculatoriarum, quæ omnia animam DEO uniunt.

Et quoniam *omnium Religiosorum finis est, Perfectio*: ideo ad hunc finem alii tendunt per vitam Contemplativam; alii per vitam activam; alii per compositā ex his, seu mixtā: quemadmodum & nostra Sacra Religio tendit ad *Perfectionem per vitam Contemplativam, & Activam simul*, ita tamen, ut potissima sit ejus pars Contemplativa vita.

Satisfacimus autem Contemplative vite per diligens orationis exercitium, & Præsentiaē DEI; per Actus anagogicos, & frequentes aspirationes, per lectionem librorum spiritualium, crebras tunc elevationes cordis ad DEUM faciendo; per cultum silentii, & solitudinem, de qua Regula nostra præcipit: *Maneant singuli in cellulis suis, vel juxta eas die, ac nocte in lege Domini meditantes, & in orationibus vigilantes.*

Jam verò *vite Activæ* satisfacimus per mortificationem sensuum, & passionum; per actus tam internos, quam externos virtutum; & per actiones ab obedientia injunctas, pro salute, & comodo proximi peragendas; videlicet, ut causā proximi studeamus, prædicemus, confessiones excipiamus, & manibus laboremus.



EXERCITIUM PRIMUM

Vitæ Spiritualis est,

O R A T I O.

CAPUT I.

De divisione Orationis in Vocalem, & Mentalem.

UT satis fiat intentioni Religionis nostræ, quæ potissimam partem instituti sui vult esse Contemplationem: præterea viæ Purgativæ, seu Incipientium, quæ in purgatione animæ consistit, tam quo ad partem cognoscitivam, quàm quo ad partem affectivam: ad purgandam autem partem cognoscitivam, est optimum medium Oratio, per quam à memoria excluduntur vanæ apprehensiones, & nocivæ, ac inutiles notitiæ, pias meditationes, & sanctos discursus formando in orationis exercitio: ideò hic dicitur, quod primum exercitiū vitæ Spiritualis est, Oratio. *Est autē oratio duplex: Mentalis, & Vocalis, Mentalis* Oratio est, quæ interno actu mentis perficitur: seu quæ solā mente peragitur. *Vocalis est*, quæ externā voce exprimitur; utraqū essentialiter consistit in Petitione.

Et licet utraqū oratio sit necessaria viro spirituali, magis nihilominus Mentalis, sinē qua parum prodest Vocalis. Dū enim oramus lingvā, debemus & Spiritu, & mente orare secundū Apostolū. Ideò consultissimum est unicuiquē proficere in spiritu volenti, ut vocalibūs orationibūs non se occupet, nisi quantum indiget ad excitandum aliquando mentis torporem; aut quantum ex debito sui status, &

professionis tenetur. Itaque utriusq; orationis tam Mentalis, quàm vocalis rectè faciendæ modus Ti-ronibus vitæ spiritualis est proponendus.

Dividitur autem Vocalis oratio, in publicam, & Privatam. Publica est, quam Ecclesia per Ministros suos, vel quam Ministri nomine Ecclesiæ faciunt, licet non publicè, sed occultè fiat. Privata est, quam quælibet persona nomine suo pro se, vel pro aliis profert, quamvis in publico faciat. Oratio publica ab ipsa Ecclesia est præscripta, ut sciremus, quomodo DEUM laudare, & quid ab ipso petere deberemus. Unde nihil aliud est hæc Oratio, quàm certa ratio publicè laudandi, & orandi DEUM, Ecclesia auctoritate statuta. Et Vocatur Officium Divinum; quia in DEI honorem est institutum. Vocatur etiã Horæ canonice; quia secundum Ecclesiæ sanctiones, seu Canones certis, & designatis horis recitandæ sunt: ex quibus, aliæ dicuntur Nocturnæ: ut Matutinū, & Laudes. Aliæ diurnæ: ut Prima, Tertia, Sexta, Nona, Vesperæ, Completorium.

Sunt autem Septem, propter multas rationes, præcipuè verò ob septem mysteria Passionis Domini nostri, juxta hos versus.

*Hæc sunt, septentes, propter quæ, psallimus ho-
ris, Matutina ligat Christum, qui crimina pur-
gat: Prima replet sputis: causam dat Tertia
mortis: Sexta cruci necit; latus ejus Nona bi-
pertit: Vespera deponit: tumulto Cōpleta reponit.
Quas horas Canonicas, omnino curent omnes, qui
ad*

ad Chorū tenentur, cum aliis recitare, proter majus meritū, & fructū; tūm ex intentione Ecclesiæ, in cuius persona, & nomine fiunt: tūm ex loci sacri, in quo fiunt, devotione: tūm etiam, ex eorum, qui simul psallunt, mutua communicatione, per quam fit, ut unius distractio, vel negligentia non voluntaria, nec affectata, suppleatur, & excusetur aliorum attentione, & devotione.

CAPUT II.

De Officio Divino piè, & fructuose persolvendo.

TRia sunt servanda circa Officium Divinum. Alia ante officium Divinum. Alia in ipso Officio. Alia post Officium Divinum.

Ante Officium Divinum facienda est Præparatio, Intentio, & Oblatio.

Præparatio consistit in consideratione infinitæ Majestatis Divinæ, & nostræ vilitatis, & indignitatis.

In intentione exprimitur finis nostræ orationis; videlicet, gloria, & beneplacitum DEI.

Oblatio est quædam præsentatio laudis nostræ DEO pro certis rebus: ut in gratiarum actione pro omnibus beneficiis: in satisfactionem pro peccatis: pro impetrandis donis necessariis ad vitam æternam consequendam; & pro variis necessitatibus, tam publicis, quàm privatis. Poterunt quoq; istæ laudes Officii Divini in honorem alicujus mysterii Passionis Domini nostri offerri.

*Exemplum Preparationis, Intentionis, &
Oblationis pro Officio Divino.*

O Superamandissime DEUS meus, Quis, & Quantus es Tu, quem nunc alloqui, & laudare intendo! Credo, quia tu es Dominus infinitæ magnitudinis altissimus. Confiteor, quia tu es Rex immensæ Majestatis potentissimus, mihi quæ præsentissimus: & ideo adoratione, & affectu omnium Angelorum, & Sanctorum, & electorum, te adoro, & me coram tua Divina Majestate humilio, & prosterneo, Agnosco quoque, & fateor, quod ego sum creatura vilissima, pulvis, & cinis, & peccator maximus, indignus, ut loquar ad te Dominum meum, ob peccata mea gravissima, de quibus expuro amore tui doleo, ac emendationem propono, & à te veniam spero. Cupio tamen, & volo te nunc laudare, benedicere, & deprecari; quia tu vis; ut voluntatem tuam faciendo, gratissimum tibi obsequium exhibeam, tibi quæ quàm maximè placeam: ad quas laudes, omnes creaturas convoco, uniendo mihi laudes, orationes, & merita Domini nostri JESU Christi, & Beatissimæ Virginis Mariæ, omniumque Angelorum, & Sanctorum, ut te cum iis laudem. Immo te laudare exopto, ipsomet ore sacratissimo, & corde dulcissimo dilecti Filii tui, ejusque Virginis Matris, eorumque cunctorum, quorum laudes tibi placuerunt unquam, & placebunt in æternum.

Quas laudes, atque hoc servitutis meæ obsequium, omnium Beatorum, & electorum triumphantium, & militantium, omniumque creaturarum possibilem
omni

omni possibili affectu offero, ad maximam gloriam, amorem, & beneplacitum tuum: in protestationē, & recognitionē excellentiæ tuæ, & supremi Dominii, & omnimodæ subjectionis nostræ, & dependentiæ à te: in gratiarum actione pro omnibus beneficiis nobis, & aliis, præcipuè electis, collatis, & conferendis in æternum, in satisfactionem omnium peccatorum nostrorum; & pro omnibus donis impetrâdis, quibus egemus ad vitam æternam consequendam; maximè pro impetrâda mortificatione passionis N. Pro extirpando vitio N. & acquirenda virtute N. pro obtinenda vera de peccatis contritione, peccatorum remissione, & ab omni peccato præservatione, atq; charitatis perfectione, dono quoq; finalis perseverantiæ, & bona morte: pro infidelium Hæreticorum, Schismaticorum conversione, & peccatorum justificatione, benefactoribus nostris æterna retributione: pro omnibus statibus Ecclesiæ, præsertim nostræ Religionis in sua observantia conservatione, ejusquæ augmento, & omnium Religiosorum nostrorum perfectione, & Sanctitate: deniq; pro impetranda fidelibus defunctis æterna requie.

Suscipe Domine DEUS meus, & perface hoc obsequium meum, juxta beneplacitum tuum, ad tuâ æternam gloriam, & honorem, animarumq; nostrarum salutem.

O MARIA Virgo purissima, Mater DEI Sanctissima, & gloriosissima: o Sancti Patroni mei, & hujus diei, omnesq; Beati, istas laudes offero in honorem, & augmentum gloriæ, gaudiorumq; vestrorum,

rum, & obsecro vos, orate pro nobis, & magnificate Dominum nobiscum, nostrasq; Orationes, vestris adjungentes, supplete, perficite, offerte, & impetrate nobis omnem gratiam, & misericordiam, sicut expedit ad DEI honorem, nostramq; salutem: atq; in hora mortis nobis assistite, & misericorditer succurrite.

Quod si alicui non vacabit hæc omnia recensere, poterit subsistere in illis verbis: Offero ad maximam gloriam, amorem, & beneplacitū tuum.

Vel si tempus adhuc cupiam defuerit, utatur formā Directionis ex Disciplina claustrali, vel illā, quæ est in principio Breviarii. Aperi Domine os meum ad benedicendum Nomen Sanctum tuum.

Quod si quis vellet plus adhuc meritū lucrari: possit hæc formā oblationis uti: Superdilectissime Pater Cœlestis, æternæ DEUS, in unione meritōrū, orationum, cogitationum, verborum, & actionum Domini nostri JESU Christi Filii tui, & Virginis Sanctissimæ, omniumq; Sanctorum, istas laudes, & actum, & in his laudibus, & actu, omnes cogitationes meas, verba, syllabas, & literas, omnes cordis mei, & animi, & corporis motus, omnes respirationes meas, omnia momenta temporis, omni possibili affectu, ad maximam gloriam, amorem, tuumq; beneplacitum offero, & volo, ut hæc singula sint, quàm perfectissimi actus Fidei, Spei, Charitatis, Laudis, Gratiarum actionis, Contritionis, Humilitatis, Obedientiæ, Resignationis, & omnium aliarum

rum virtutum. *Habetur etiam Oblatio Horarum Canonicarum egregia Par: 2. pag: 418.*

*Aliud exemplum brevius Præparationis pro
Officio Divino.*

O MARIA Sanctissima Virgo, & Mater DEI, & nostra! O Angeli, & hujus diei Sancti, Patroni mei speciales, & omnes Beati, magnificate nunc dominum mecum, eundemq; nobiscum exorate.

Et tu benignissime JESU, nos omnes te laudare, & orare gestientes, sanctifica, excita, conforta, reple, illumina, & adjuva, ut propter te, per te, & tecum has orationes, & laudes, cæteraq; exercitia nostra, per suavissimum Cor, & Spiritum tuum, ex affectu, & devotione, tuæ Virginis Matris, omniumq; Beatorum Angelorum, & Sanctorum, persolvamus: in unione omnium laudum, & orationum, quas tu, & prædicti Sancti fecistis in terris, & nunc facitis in Cælis, ad tuam, & Sanctorum gloriam, nostramq; & omnium, pro quibus tu vis, aut tencor, vel intendimus orare, salutem præsentem, ac perpetuam. *Adduntur Oblationes à DEO inspirate.*

S. Mechtildi Christus dixit: qui horas incubat, dicat ore, vel corde: Domine, in unione illius devotæ intentionis, quâ ipse in terris laudes DEO Patri persolvisti, hanc tibi horam persolve.

Eandem docuit, ut orans ita diceret, & alios doceret: JESU bone, laudo te; & quidquid minus est in me, rogo, ut suppleas pro me: JESU Bone, amo
te;

te; & quicquid minus est in me, rogo, ut cordis tui amorem DEO Patri offeras pro me.

Eidem hanc Oblationem commendavit: O æterne Pater, omnia desideria mea, intentionem, & orationem offero tibi, in unione desideriorum, intentionum, & Orationum Filii tui DEI mei JESU, ut placeant tibi amore illius, Amen.

OBLATIO DIVINI OFFICII.

In honorem Passionis Domini nostri.

AD MATUTINUM.

A Mantissime JESU Christe, infinitas tibi gratias ago pro omnibus, quæ fecisti, & sustinuiisti totâ nocte, omnibus diebus vitæ tuæ; maxime pro illa oratione, quam in horto angustiatu Patri tuo obtulisti, & omnibus tormentis, quæ Passionis nocte pertulisti: supplico tibi, recipe has laudes, dulcissimo corde tuo, meq; semper facias tuam laudare Divinam Majestatem, secundum beneplacitum tuum, & me ab omni peccato, nocte, & die, totâq; vitâ liberare.

AD PRIMAM.

Benignissime JESU, infinitas tibi gratias ago, pro immensa charitate, & pro omnibus, quæ hæc horâ passus es: maxime quod injustè accusari, examinari, & condemnari voluisti: supplico tibi, infunde mihi gratiam, ut nunquam temerè proximū meum judicem, & vana hominum judicia, atque iniquissimam opinionem conceptam de me pro nihilo ducam.

AD

AD TERTIAM.

Domine JESU, infinitas tibi gratias ago pro omni molestia, quam sustinuisti hâc horâ omnibûs diebûs vitæ tuæ, maximè pro eo, quòd voluisti pro nobis flagellari, spinis coronari, & opprobriis vexari: supplico tibi, defende me contra lenocinia, & blanditias carnis; item ab omni fastu, & vana gloria: gratiamq; largire, quâ te adorem in spiritu, & veritate; tuamq; Passionem cum mærore & compassione contempler.

AD SEXTAM.

Domine JESU, ago tibi infinitas gratias pro omnibus, quæ hâc horâ passus es; maximè verò pro ea charitate, quâ mortis sententiam suscepisti, crucem humeris tuis, cum summa fatigatione deportasti, probroso in patibulo suspendi voluisti: supplico tibi, libera me à sententia mortis æternæ; da mihi gratiam, ut crucem feram pœnitentiæ: confige animâ meam clavis amoris, & timoris tui.

AD NONAM.

Infinitas tibi gratias ago pro immensa charitate, & pro omnibus, quæ hâc horâ passus es; maximè pro atrocissimis tormentis, & doloribus, quos trium horarum spatio pendens in cruce sustinuisti: supplico tibi per hunc amorem, dona mihi donum perseverantiæ finalis, usq; ad mortem: memor sim amarissimæ Passionis tuæ, & ex ea cordialissimè compungar; nè moriatur anima mea morte immortalis, quam quodlibet peccatum mortale operatur.

De Oratione
AD VESPERAS.

Domine JESU, infinitas tibi ago gratias pro tua Charitate; maximè, quia permiffisti lanceâ latus tuû aperiri, & de cruce deponi voluiffi, & recipi brachiis caftiffimæ Virginis Matris tuæ incredibili dolore fauciatae: supplico tibi, confige cor meû plagâ amoris tui, & animam meam illâ aquâ, quæ de latere tuo dimanavit, expurget ab omni labe peccati: faciasq; me participem lacrymarum, & immenfi doloris Matris tuæ Sanctiffimæ.

AD COMPLETORIUM.

Domine JESU, infinitas tibi ago gratias, pro omni eo, quòd feciffi omnibûs diebûs vitæ tuæ; maximè quia in fepulchrum inferri voluiffi: supplico tibi, præpara in anima mea conveniens fepulchrum, in quo deponaris unctiõne aromatica virtutum cõditus, adhibeas cuftodes, nè fortè vana gloria fuffuretur opes, quas in ea collocaveris.

In Officio Divino quæ funt fervanda?

Innoceñtius Papa, qui, ut Divinum Officiũ recitaretur, inffituit, *vult nos ftudiofè, & devotè benedicere Domino.*

Studiosè tunc fiet, fi debito tempore, & modo abfolvetur: unde orare ante tempus, eft prudentia: in tempore, obedientia; poft tempus, negligentia S. Auguftinus.

Horas dicere ante tempus, eft fecuritas; in hora dicere, eft iuftitia; poft horam, negligentia S. Gregorius.

Qui orat ante tempus, timet DEUM, qui orat in tempo-

Vocali.

tēpore, laudat DEUM: qui orat post tēpus, reddet rationem *S. Bernardus.*

Est autem Divinum Officium recitandum, *Primò*, absq; syncopa, id est, verborum omissione. *Secundò* absq; verborum mutilatione, non abscindendo ultimas syllabas. *Tertiò*, absq; interruptione. *Quartò*, absq; transpositione horarum, & finè acceleratione: nisi interrompere, vel transponere, sit justa causa.

Devotè ut Officium Divinum dicatur, ad hoc requiritur *Reverentia & Attentio.*

Reverentia exigit *Primò*, ut cum humilitate, & cum timore DEI, laudemus ejus Divinam Majestatem: nam revereri, est actus doni Timoris.

Secundò, ut in loco decenti; Locus quidem Officii Divini publici, est Chorus: privati verò, sit cella, vel alius decens locus. Licet enim Oratio Mentalis ubiq; haberi possit; Vocalis tamen requirit locum decentem, & quietum, nisi necessitas excuset.

Tertiò, ut situs corporis, vel cōposito sit honesta, & humilis: unde in choro sit talis, qualis ibi est in usu: si autē privatim dices; vel genuflexus, vel stans, vel humiliter, & modestè sedens; librum, vel aliquā piā imaginem aspiciens; apertoq; capite Officiū Divinū recitabis: Nam immodestè sedendo, aut huc, illuc temerè circumcursando, aut in lecto cubando, signum est modicissimæ fidei, & cordis irreverentissimi, quod nescit Divinæ Majestatis præsentia ponderare. Poterunt tamen aliquæ mortificationes parvæ exerceri; ut, aliquando Breviarium
B
elevant-

elevando, unâ manu magis illud sustentando, nec ipsum pectori applicando; vel pedem elevando; non innitendo parieti; in extremitate scamni sedendo, citò assurgendo; tardiùs parum ad sedendum se cōponendo.

Quartò, ut exactissimè servantur omnes ceremoniæ: id est, inclinationes, genuflexiones, prostrationes &c. & omnes vitentur errores: propter quam causam, prævidenda semper omnia, quæcunq; erunt dicenda.

Attentio est multiplex: alia est *Externa*: alia *Interna*.

Externa est, quæ abstinet ab operibus externis, cum quibus attentio interna consistere nequit, ut scribere simul, & orare.

Interna est,, quâ quis attendit, vel ad verba, vel ad sensû verborum, vel ad DEUM, & res Divinas.

Attentio Interna est triplex: alia *Habitualis*, alia *Actualis*; alia *Virtualis*.

Habitualis est, dum quis recitat aliquid ex habitu, & usu, nihil ad illud attendens, quod recitat, ut si quis in somnis cantet.

Actualis est, quâ quis actualiter attendit, vel ad verba, vel ad sensum.

Virtualis est, dum aliquis cum actuali incipit orare, & virtute illius prosequitur.

Actualis rursus est triplex: ut ait S. Bonaventura, *Superficialis*, quâ orans ad sola verba attendit; ut benè, & sine errore illa proferat.

Literalis, quâ orans ad sensum literalem Psalmorum, vel Lectionum attendit.

Spi-

Spiritualis, quā orans ad pios affectus, v. g. Amoris DEI, Spei, doloris, timoris &c. attendit: & DEUM ipsum, quem alloquitur, cum magno motu reverentiæ, & humilitatis inuenerit.

Prima est sufficiens: *2da* utilior, & perfectior: *3tia*, utilissima, & perfectissima; & in hac vera devotio consistit. Ille enim devotè orat, qui pios in Oratione, & humiles eructat affectus.

Modum ostendit S. Augustinus: Si, inquit, Psalmus orat, orate: & si gemit, gemite, si gratulatur, gaudete: & si sperat, sperate: & si timet, timete.

Quomodo Attentio paranda?

Primò, cogitando te coram Christo Salvatore nostro, vel coram Sanctissima TRINITATE stare.

Secundò, considerando suas necessitates, & miseriam, & DEI Misericordiam, atq; clementiā. Nihil enim efficacius hominem ad orandi studium excitat quam miseria, quā premitur; & Misericordia conditoris sui, ad quam cum fiducia recurritur.

Tertio, Septem horas Canonicas ad mysteria Passionis Domini nostri applicando: ut *Matutinū*, Christo in horto oranti, cujus imago orantis pro DEI præsencia formari potest.

Primam. Christo flagellato. *Tertiam*, Spinis coronato, *Sextam*, Crucem bajulanti, *Nonam*, Cruci affixo, *Vesperas*, de Cruce deposito, *Completorium*, Christo Domino sepulto.

Quintò, attendendo ad sensum verborum, & illis verbis, ac si non essent aliunde accepta, sed ex corde

de proprio deprompta, DEUM alloquendo.

Quinto, ut hoc versetur in corde, quod profertur in voce.

Sexto, observando nomina, quæ tribuuntur Divinæ Majestati, ut sunt, DEUS, Creator, Rex, Dominus &c. & pronomina, ut Tu, Tuus, Qui & verba, quæ ad ipsum diriguntur: ut, *Tu mandasti, mandata tua custodiri nimis*. Ad quæ verba cor statim elevandū exprimendo aliquem affectum; v.g. ad hoc Nomen DEUS, vel Creator &c.&c. potest dici in corde; *Sit benedictus in æternum*; & ad Nomen Rex: *utinam omnia serviant tibi*. Vel ad hoc pronomen Tu; *Quis es tu Domine, & ego, quis sum, ut loquar tui*? Præcipue verò notentur verba, quibus petitur aliquid à Domino DEO: ut, *DEUS in adjutorium meum intende: DEUS in Nomine tuo saluum me fac*, & similia, quæ sunt frequentissima in Officio Divino. Aliqui post quælibet versum in quantum fieri potest in mente actus Fidei, Spei, & Charitatis faciunt, dicentes in corde: *O DEUS meus in te credo & spero, te amo super omnia*. Vel actus Adorationis, Laudis, & Amoris, erga JESUM, & MARIAM, addendo Nomina laudis secundum Alphabetum, vel substantiva; ut te adoro, laudo, & amo amor noster JESU, & MARIA: vel bonum nostrum, consolatio, dulcedo, exultatio, felicitas, gloria nostra &c. Vel adjectiva: Te adoro, laudo, & amo amantissime JESU, & MARIA: Vel, Benignissime, Clementissime, Dulcissime, &c. quæ omnia supradicta exerceri possunt cum

cum aliis recitando Officium Divinum in choro; præsertim dum Psalmi cantantur.

Septimò, Notentur verba, quæ exprimunt laudem DEI, & illa cum magno affectu proferantur: v.g. *Gloria Patri, & Filio, & Spiritui Sancto. Benedicamus Domino: DEO gratias. Alleluja. Sit nomen Domini Benedictum: & similia.* Notentur & similes Psalmi, quales sunt: *Jubilate DEO. Laudate Dominum Omnes gentes. Laudate pueri Dominum. Laudate Dominum de Cælis. Notetur & Cantica: Benedicite omnia opera Domini Domino. Benedictus Dominus DEUS Israël. Te DEUM Laudamus. Magnificat anima mea Dominum.*

Post Officium Divinum quid faciendum?

Observentur defectus commissi in Officio Divino; an sit festinanter dictum? an sint verba mutilata? an minùs reverenter, minùs attentè, minùs devotè? an aliquid omisù? *Cognitis defectibus, eliciatur Actus contritionis dicendo DEUS propitius esto mihi peccatori.* Doleo ex amore tui, quicquid nunc deliqui in tuo Sancto servitio, emendationem propono, & desidero ab hinc, cū debita reverentia, attentione, & devotione te semper laudare. *Qua de re S. Mechtildis orans pro alio, qui querebatur de horis parùm attentè persolutis, tale responsum accepit à DEO: semper post finem horarum hoc adjungat: DEUS propitius esto mihi peccatori: vel hoc.*

O Agne mitissime miserere mei!

Si enim, inquit, hoc verbum, DEUS propitius &c. in publicano tantum prevaluit, cur non in alio veniam impetrabit? Nam misericordia mea tantæ clementiæ nunc est, quantæ tunc fuit.

Deinde pro supplendis defectibus dicatur: Laudate Dominum omnes gentes &c. & versus; Salvos fac servos tuos Domine, DEUS, meus sperantes in te. Domine exaudi orationem meam &c. & Oratio. Prætede Domine famulis tuis dexteram cœlestis auxilii, &c. Vel, Sub tuum presidium &c. & versus. Ora pro nobis Sancta DEI Genitrix &c: & Oratio. Famulorū tuorum, quæsumus Domine, delictis ignosce, ut qui tibi de actibus nostris placere non valemus, Genitricis Filii tui Domini nostri JESU Christi intercessione salvemur. Per eundem Dominum nostrum, &c.

Vel illud ex Breviario: Sacrosanctæ & Individuæ TRINITATI &c.

Vel illud S. Gertrudi à Christo Domino innuaturn: Bone JESU, propitius esto mihi peccatori; ego distractum, ac tepidum hoc servitium meum mellifluo cordi tuo commendo emendandum, ac perficiendum: tibiq; ipsum offerro, ad salutem omnium; in unione illius perfectissimæ attentionis, quā tu Patrem tuum orasti, & laudasti in terris. Responde, quæso, satisfac, & supple pro me plenissime.

Vel, Suscipe, Clementissime DEUS, precibus & meritis B.M. semper Virginis, & omnium Angelorum, & Sanctorum ac Sanctarum, Officiū hoc servi-

Mentali.

23

servitutis, laudis, & Obedientiæ nostræ; & si quid dignum laude egimus, propitius respice, & quod negligenter actum est, clementer ignosce: qui in **TRINITATE** perfecta vivis & regnas **DEUS**, per omnia sæcula sæculorum, Amen.

Quicumq; ergo modus supplendi suos defectus in Officio Divino alicui placuerit, ipso utatur.

Ad supplendos autem defectus Officii Divini, non oportet illud repetere, si recitatum sit, sine voluntaria distractione: quia hoc esset in infinitum procedere. Unde imprudenter, & scrupulosè nimis agunt, qui Officium Divinum repetunt, eò quòd non fuerit rectè, aut cum debita attentione dictum: sed sit contentus supplere suos defectus per aliquam Orationem, ex prædictis, & magis confidat in **DEI** misericordia, quàm in sua iustitia.

CAPUT III.**DE ORATIONE MENTALI**

Et definitione ejus: & de Prima parte, quæ est Preparatio.

Orationis Mentalis exercitium proprium est hominum spiritualium, & servitio **DEI** micipatorum, atq; ad perfectionem tendentiũ. Est enim hoc exercitium efficacissimum medium, & instrumentũ, ad evacuationem peccatorum, ad eradicationem vitiorum, & passionum mortificationem, virtutum acquisitionem, & ad consequendã intimam cum **DEO** unionem; in quibus exercitiis vita spiritualis consistit, & per quæ ad perfectionem facile pervenire possumus.

B₄

Est

Est autem Mentalis Oratio, Mentis ad DEUM elevatio. Quia per hanc orationem mens nostra ad DEUM Altissimum cognoscendum, & amandum elevatur. Quamvis enim de aliis rebus, præter DEUM, in oratione mentali aliquando cogitaverimus, ut de peccatis, de quatuor novissimis, de virtutibus, & de aliquibus creaturis: nihilominus, hæc omnia considerata sunt in ordine ad DEUM. Nam de peccatis cogitare debemus, ut illa propter DEUM detestemur; quia sunt offensa DEI: de novissimis, ut timeamus DEUM: de virtutibus, ut illas exercendo DEO placeamus, & Christo Domino conformemur: de creaturis, ut illas propter DEUM contemnamus; vel pro illis Domino DEO gratias agamus. Itaque consideratio omnium istorum, erit mentis nostræ ad DEUM elevatio. *Fit autem hæc elevatio, per intellectum, & voluntatem,* quibus quasi duabus pennis mens nostra supra terrena ad cœlestia, ad superna, & ad DEUM sustollitur: per intellectum quidem, dum DEUM, & cœlestia, vel alia in ordine ad DEUM considerat: per voluntatem verò, dum per considerationem intellectus excitata DEUM amat, peccata ex amore DEI odio habet, vitia extirpare, virtutes exercere, & sanctè vivere desiderat.

Sed istæ duæ potentiae *Intellectus, & voluntas;* ut bene se gerant in oratione mentali, indigent auxiliis supernaturalibus Divinis ad hoc, ut ad sublimes ac supernaturales suas operationes in oratione exercendas eleventur. Et imprimis *Intellectus* indiget

diget duplici lumine: hoc est lumine fidei, & lumine donorum Spiritus Sancti; Sapientiæ, Intellectus Scientiæ, & Consilii. *Voluntas* quoque indiget auxilio gratiæ Divinæ, & donis Spiritus S. Fortitudinis, ad vincendas difficultates, & proposita ardua facienda, & exequenda: dono Timoris, ad minimas imperfectiones detestandas & fugiendas: dono Pietatis, ad concipiendum ferventem zelum honoris DEI, & salutis animarum. Unde bonum est ante Orationem dicere: *Veni Creator Spiritus*, &c

Sed & nos debemus cooperari gratiæ, & auxiliis DEI prædictis, ad quod requiritur, ut intellectus habeat perfectam cognitionem orandi mentaliter, secundum omnes partes Orationis Mentalis: habeat quoque perfectas rationes & motiva, quibus voluntas ad bonos affectus excitari potest: insuper habeat notitiam virtutum, & vitiorum, quoad naturam, proprietates, & actus earum. Requiritur etiam, ut voluntas habeat vehemens desiderium, affectus pios in oratione exercendi, & proposita firma faciendi, & exequendi, atque bonam præparationem pro Oratione mentali instituendi, & singulas Orationis partes rectè exequendi.

Sunt autem Partes orationis Mentalis, sex, secundum usum consuetum nostræ Religionis; *Præparatio, Lectio, Meditatio, Gratiarum actio, Petitio & Oblatio*. Et quia hæc *Oratio* dividitur in *Intellectivam & Affectivam*, ideo in meditatione, est *Oratio Intellectiva*, & in reliquis partibus, est *Affectiva*.

Prima pars Orationis Mentalis est Preparatio.
 Hæc preparatio est duplex Remota & Proxima.
 Remota consistit, tùm in fuga distractionum, &
 abdicatione curarum: tùm in continuo Præsentia
 DEI exercitio: tùm in puritate vitæ, ac munditia
 cordis, cum intima compunctione. Hæc puritas
 requirit fugam peccatorum, etiam minimorum, &
 abstractionem affectus nostri à rebus terrenis.

Proxima consistit in consideratione magnitudi-
 nis Divinae Majestatis, propriae vilitatis, & in Acti-
 bus Adorationis, Humilitatis. Contritionis,
 & Petitionis auxilii Divini, & donorum Spiritus
 Sancti. Hinc unusquisq; potest seipsum alloqui mē-
 taliter hoc modo: O homo considera. Quis, &
 Quantus est iste Dominus, cum quo nunc agere
 vis? agnosce quoq; tuam vilitatem, & indignita-
 tem propter innumera peccata tua. Adora igitur
 hunc Dominum: humilia te coram ipso: veniam
 peccatorum, & auxilium ab eo pete: quod fiet mo-
 dō hic propositō, ex libro Schola Orationis dicto,
 desumpto.

Exemplum Preparationis.

O Altissima Majestas, supreme Dñe ac DEUS
 meus! ego vilissimus peccator tecū locuturus
 sum. Magnum quid hoc est, Domine:
 Minimè autē dubiū est, quin tu ex infinita bonitate, &
 dulcedine permittas, ac digneris, ut ego, qui abjectus
 quidam sum vermiculus, quiq; æternā quadam re-
 pulsā à te deberem repelli, cum Divina tua loquar
 Majestate, accessumq; inveniam cum eadem pro-
 pius

pius; ac de plano agendi. Ego te, potentissime Regum Rex, adoro, & me coram immensa tua magnitudine prosterno, tibiq; cor meum consecro, ut ipsum vacet tibi: quin meorum me ex amore tui maximè pœnitet peccatorum; & ex toto corde meo te deprecor, ut ea mihi propitius digneris ignoscere, mihiq; adesse, ut horam hanc fructuosè Orationi queam impendere.

Domine miserere mei sicut potes, scis, & vis: da mihi quidquid volueris, & fac mecum secundùm gratissimā voluntatem tuam.

Qui autem vult, ut ei benè succedat oratio, præter dictam Præparationem, debet quoq; præparare Meditationis materiā ante Orationem. *Præterea* debet habere præcognitas vehementiores Passiones & tērationes, à quibus vexatur; & culpas, in quas sæpius labitur; & virtutes, quibus indiget; ut sciat, quid proponere, & quid petere debeat. *Insuper* debet excitare maximū in se orandi desiderium, ad quod hæc sunt quatuor necessaria; *primò*, indigentia alicuius rei experimentalis cognitio. *Secundò*, desiderium rem eandem consequi. *Tertio*, agnoscere solum DEUM esse, qui nostræ necessitati succurrere possit. *Quartò*, Seipsum coram DEO humiliare, simulq; DEI opem, ut ea, quæ nobis desunt largiatur, in oratione implorare.

CAPUT IV.

De secūda parte Orationis mentalis, quæ est Lectio.

Hæc adhibetur ad inveniendam Orationis materiam. Sicigitur. *Primò*, attenta; ut benè

benè percipiatur, quid legitur. *Secundò*, debet esse lenta; ut memoriæ imprimatur id quod legitur, in qua debet seligi punctum, quod judicatur majorem vim habere, ad excitandos in voluntate nostra bonos, & necessarios affectus, videlicet amoris DEI, Odii alicujus vitii, vel desiderii alicujus virtutis.

Debent autem ab Incipientibus, qui sunt in via Purgativa *legi libri* tractantes de peccatis; de vitæ humanæ miseriis, quarum sunt causa, peccata: de vanitate mundi: de quatuor novissimis: de ultimo fine hominis: de abnegatione sui; de mortificatione sensuum externorum, & internorū, passionū, amoris proprii, judicii proprii, & voluntatis.

A Proficientibus debent legi libri, de vita Christi Domini nostri, actionibus, & virtutibus ejus, de vita Beatissimæ Virginis MARIE; & aliorum Sanctorum; explanationes Regulæ, & constitutionum Ordinis nostri.

A Perfectis verò versentur libri de Theologia Mystica tractantes: de perfectionibus, & beneficiis Divinis: de actibus Anagogicis, & de modo perveniendi ad Christianam perfectionem.

Notandum Quòd præter hanc Lectionem, quæ fit proximè ante orationē mentalem, est alia librorum spiritualium Religiosis contemplativis maxime necessaria, qui omninò singulis diebus certo tempore sunt legendi. Nam Sanctus Thomas Doctor Angelicus docet: *Lectionem hanc, ad vitam contemplativam, ut dispositionem, pertinere.*

Legendi autem libri sunt tales, qui nobis adjumento

mento sint comparandæ perfectionis, & qui magis nostro Instituto sunt conformes. *Quidam Asceticus Auctor, illos legere suadet libros qui hæc tria habent: Præcepta, Exempla, & Motū; Præcepta* seu doctrinam, ut instruamur. *Exempla*, ut ea imitemur. *Motum*, ut ad devotionē, & aliquos pios affectus moveamur.

Qua de re Dionysius Cartusianus in Institutione Novitiorum sic ait: Debent legere salubria, & suo proposito magis accomoda ut pote ea, quæ cōpunctionem inducunt, devotionem nutriunt, & inflāmant, timorem DEI in corde stabiliunt, & quæ ad vitiorum horrorē, ad mundi contemptū, ad sui ipsius aspersionē, & humiliationem vehementiūſ incitant, atq; erudiunt. Ea quoque, quæ efficacius docent modū, ac ordinem spiritualis profectūs, reformationē passionum, remedia, & triumphū tentationum.

Modus legendi sit talis, *Primò*, ut præcedat directio brevis, & oratio, quā postulemus gratiā ad intelligendum, & fructū percipiendū, *dicendo cum S. Ephrem:* Domine JESU Christe, aperi aures, & oculos cordis mei ad audiendum, & intelligendū sermonē tuum; faciendamq; voluntatem tuā. O Domine, quoniam incola ego sum in terra, non abscondas à me mandata tua. Revela oculos meos, & considerabo mirabilia de lege tua. In te enim spes mea, DEUS meus, ut tu mentem meam illumines.

Secundò, ut non sit fortuita, & varia lectio, & quasi

Quasi casu reperta: sed consulto assumpta, certi libri, & Auctoris, & tempore determinato.

Tertio, ut non requiratur curiositas, sed animæ nostræ utilitas.

Quarto, ut non sit ideo, ut scias, sed ut facias.

Quinto, ut sit attentæ, lenta, & sæpius oratione brevi interrupta, quâ vel aliquod malum vitare, vel aliquod bonum facere statuamus. ut si legamus de humilitate, vel obedientia, &c. easdem exercere virtutes proponamus: & quod finis superbi, aut inobedientes &c. doleamus.

Fructus hujus lectionis spiritualis, *Primus* est, animarum salus; ut *S. Augustinus* expertus est, qui ex lectione libri spiritualis fuit conversus.

Secundus est, mundi contemptus; ut *S. Fulgentius* fecit.

Tertius est, instrumentum perfectionis, ut *S. Gregorius Nazianzenus* cognovit.

Quartus est, Orationis cibus & alimentum; ut *S. Damascenus Papa* ait.

Quintus est, animæ nutrimentum, ut ait *S. Sanctus Augustinus*.

Sextus est, armamentarium, atq; thesaurus medicamentorum: ut inquit *S. Ephrem*.

Septimus est fons, pratum, & hortus; ut *S. Sanctus Chrysostomus*.

Octavus est, speculum; ut *S. Sanctus Augustinus*.

Nonus, quia hinc maximus acquiritur virtutum fructus; ut quidam senex in *Prato spirituali* de se testatur.

Deci-

Decimus, nam lectio est æquè nobis necessaria ac oratio; sic *S. Damianus*; Animæ, ait, oratione crescunt, lectione pinguescunt; & *S. Bernardus*; Lectio & Oratio, sunt arma quibus diabolus impugnatur.

Undecimus, per Lectionem discimus, quid facere, quid cavere, quò tendere debeamus; *ita docet Sanctus Bernardus*.

Duodecimus, per hanc, familiaritatem cum DEO contrahimus: Nam qui vult cum DEO semper esse, frequenter debet orare, frequenter & legere; *monet Sanctus Augustinus*.

CAPUT V.

De Tertia Parte Orationis mentalis, quæ est Meditatio: & de modo meditandi.

Meditatio, est quædam pia intellectus exercitatio, quod fit, tum per Cogitationem bonam, tum per ipsam propriè dictam Meditationem, tum per Contemplationem; per quæ omnia Oratio mentalis Intellectiva exercetur. Nam *Cogitatio*, est oratio Incipientium; & est infimus orationis gradus. *Meditatio*, est Proficientium; quæ est medius orationis gradus,

Contemplatio, est sublimis gradus, & Perfectorum. Et quamvis nonnunquam hæc tria circa eandem materiam occupentur; aliter tamen agit cogitatio; aliter meditatio; aliter contemplatio. In cogitatione enim est evagatio: in meditatione veritatis investigatio: in contemplatione veritatis admiratio. Cogitatio, veritatem à longè aspicit; meditatio ad ipsam

ipsam pervenit; contemplatio illius pulchritudine perfruitur. *Quomodo hæc tria circa eandem materiam possunt exerceri, patet ex hoc exemplo.* Si enim intellectus noster circa Christi Domini Passionem, sine ordine & diuturna cogitatione per multa, & varia, quæ in illa Passione contigerunt, discurret; tunc cogitatus attendit & profundè causas, & fructus illius inquirat; tunc meditatur, si cognita per discursum illum una veritate; ut, DEI erga nos charitate? in Passione Christi ostensâ, illam sine discursu inspiciat & intueatur; tunc contemplatur.

Est igitur Cogitatio, quedam mentis agitatio ad aliquid cognoscendum: seu secundum Richardum, Est improvidus animi respectus ad evagationem prout: seu, Est transitoria & brevis consideratio, vel ex memoria, vel ex aliquo sensu orta, in qua cum nihil profundè, & diligenter consideretur, necesse est mentem, per multa vagari: quia, ut ait Gerson, formatur vel ex actualibus sensationibus, quæ sine labore fiunt; vel ex phantasmatibus passim occurrentibus, quæ evagantur præsentanturq; nobis etiam invitis.

Et quod dictum est de cogitatione generaliter accepta, hoc debet intelligi de cogitatione bona & sancta, à qua incipiunt suam Orationem mentalem, qui se studio Orationis tradunt; quæ Cogitatio dicitur *Incipientium Oratio, estq; nihil aliud, quam improvisa ac brevissima rerum Divinarum vel spiritualium consideratio, ad bonos affectus in voluntate excitandos ordinata.* Dicitur impro-
visa;

visa; hoc est, non prævisa, nec præcognita: dicitur *Brevissima*; quia parùm durat. Mens enim tunc ex uno cogitatu, ad alium facillè transiit, & per multa sine ordine ullo vagatur, & in nullo stabilitur; ex eo, quòd non nititur profundius investigare veritatem.

Et ideo talis *Cogitatio* dicitur esse cum modico labore, & cum modico fructu. *Meditatio* autem fit cum labore, & fructu. Sed *Contemplatio* sine labore, cum insigni fructu.

Meditatio proprie sumpta est discursus Intellectus voluntatem nostram ad bonum hortantis, vel à malo debortantis. Dicitur discursus, quasi per multas considerationes cursus, quas facit intellectus investigando veritatem: ut, si hanc veritatem vellemus habere notam, quòd virtus humilitatis sit amplectèda, & exercenda; debemus expendere hujus virtutis naturam, proprietates, & effectus ejus, quæ considerationes ostendunt nobis hanc veritatem; quòd necessariò debemus amplecti, & quærere hanc virtutem humilitatis.

Eodem modo, ut habeamus cognitam hanc veritatem, quòd vitium superbiæ est nobis fugiendū; examinanda est nobis natura hujus vitii, proprietates, causæ, & effectus.

Dicitur *voluntatem nostram ad bonum hortantis, vel à malo debortantis*: ut sciamus, quòd ideo illum discursum facere debemus, ut excitemus voluntatem nostram ad aliquod bonum amplectendū; & retrahamus eam ab aliquo malo; ita, ut *Incipientes*

entes excitentur ad odium, & fugam peccati, ad vitia extirpanda, ad pœnitentiam, & verum dolorẽ de peccatis, ad mortificandos sensus, & inordinatos affectus, ex quibus vitia nascuntur. *Proficientes* verò ad exercendas virtutes. *Perfecti* autem ad amorem DEI.

Hinc patet *summa necessitas meditationis rectè instituendæ*: tum propter quotidianam renovationem, & emendationem vitæ, quæ consistit in fuga, & extirpatione vitiorum, & acquisitione virtutũ: tum propter acquirendam perfectionem, & sanctitatem, quæ requirunt eadem: tum propter excitandam in nobis Devotionem, quæ nihil est aliud, quàm prompta voluntas offerendi se ad obsequiũ DEI. Hæc *Devotio nascitur in nobis* ex consideratione bonitatis, & beneficiorum DEI, quæ excitat in nobis dilectionẽ eius, ex qua proponimus, vitare mala, & quidquid displicet DEO; & facere bona, seu in virtutibus nos exercere, passiones cohibere, & secundum vocationem nostram DEO servire; & per hoc facimus gratum obsequium DEO: ex eadem Devotione, & bona meditatione oritur debita Gratiarum actio, & prompta Oblatio, & fervens Petitio.

Et quoniam Meditatio non fit propter se, verum propter excitandos affectus bonos in voluntate: *Sciendum est*, quòd aliquando affectus citò excitatur, & citò evanescit; & tunc resumenda est meditatio; ad quod plurimũ conducit breves qualdã meditationes ultimis partibus intermiscere, ut sic affectus

Etus identidem excitentur. Aliquando non statim affectus per meditationē movetur; & tunc aliquantulum in ea persistendum, rogando DEUM, ut nos adjuvet. Sed si media hora Orationis transierit; relinquatur meditatio, atq; ad alias partes Orationis transeundum: videlicet, ad Gratiarū actionē, Oblationem, & Petitionem, Et idem dicendum; si nulum aliquis potest facere discursum.

De modo Meditandi.

Modus Meditandi, *alius est ex parte personæ meditantis; Alius ex parte materiæ meditandæ. Ex parte personæ meditantis modus meditandi est*, ut facturus aliquis meditationē de quacunq; materia assūpta: *Primo*, faciat sibi præsentem Dominū in illa imagine, in qua Præsentiam DEI diurnam habet. Quodsi contigat Meditatio de alio mysterio Passionis Christi, non verò de illo, de quo habetur Præsentia DEI diurna, tunc relietā dici Præsentia, & imagine Christi, assumatur imago illius mysterii, de quo quis meditatur. Formentur autem istæ imagines, intra nos, hoc est in corde; vel propè nos, propter maiorem recollectionem. Si verò aliquis in hoc difficultatē senserit, & per experientiam didicerit, ex modo alio Præsentiaē DEI, maiorem fructum se percipere in Oratione, tunc potest illum modum tenere. Aliqui svadent, ut orantes imaginentur Cælum esse apertum, & Sanctissimā TRINITATEM cum omnibus Sanctis illum aspicientem, & Angelos orationes nostras eidem offerentes: Alii,

ut concipiant DEUM, ut lucem splendidissimā totum mundū illuminantem, & replentem, & eū qui orat illā luce esse circumdatū, & in ea permanentē.

Secundō, ut meditationem faciat aliquando seipsum alloquendo: v.g. dum considerat Christū Dominū flagellatum ad seipsum dicendo: *Considera anima mea. Quid passus est Christus, pro te in illa crudeli & ignominiosa flagellatione?* quos tunc dolores pertulit pro te, dum à tot impiis tortoribus flagellaretur? &c. Præterea considera. *Quis est iste, qui pro te flagellatus est?* &c. Deinde considera, *Cur flagellatus est?* hoc est; ex qua causa, ob quā causam &c. Considera quoque, *Quomodo se gessit Christus in illa flagellatione?* quanta cum humilitate, patientia, mansuetudine? &c. omnes tunc dolores & tormenta pertulit? &c. *Qui modus Meditandi Incipientibus convenit.*

Aliquando meditationē instituere aliquis potest, alloquendo DEUM, sicut jam exercitati in oratione faciunt. Qua in re unusquisq; seipsum probet, qui modus meditandi melius ipsi succedit.

Alius modus meditandi est, ex parte materie meditandæ; ut sciamus quomodo meditationē formare debeamus, de personis, & actionibus earū: videlicet, de DEO, Virgine Sanctissima: & aliis Sanctis? quomodo de virtutibus & vitiis? quomodo de Sacrae Scripturae verbis?

Modus Meditandi de DEO erit.

UT consideremus tres in una Divinitate Personas: Patrem, Filium, & Spiritum Sanctum,

Etiam, secundum symbolum S. Athanasii; præterea
 Perfectiones Divinas, quæ quia sunt infinitæ, sal-
 tē magis notas; ut Omnipotentiam, Sapientiam, Bonita-
 tē, Providentiam, Infinitatem, Immenfitatē, Æterni-
 tatem, Pulchritudinem, Immutabilitatem, Veritatē,
 Justitiam, Misericordiam, & alias: *quæ considera-
 tiones Perfectis competunt*, ex quibus, moventur
 ad amorem DEI, ad exercendos actus Fidei, Spei,
 Adorationis, Laudis, Gaudii de bonis DEI, Gra-
 titudinis, & Resignationis.

*Proficientibus quoque convenit considerare il-
 las DEI Perfectiones*, ex quibus moventur ad
 formandam in se similitudinem DEI, per exerciti-
 um virtutum. Ad hoc enim creatus est homo, ad
 imaginem & similitudinem DEI, ut sicut DEUS
 Creator, teste S. Ambrosio *Lib. de Parad. c. 3.* Qui
 hominem ad similitudinem suam creavit, est cha-
 ritas, est bonus, & justus, patiens, atq; mitis,
 mansuetus atq; misericors: (*sunt verba S. Doct.*)
 ita homo creatus est, ut charitatem haberet, &
 bonus esset & justus, ut patiens atq; mitis, & mun-
 dus atq; misericors foret. Quas virtutes, quantò
 plùs quis habet in se, tantò majorem sui conditoris
 gerit similitudinem. Imago, itaq; DEI est, in ipsa
 animæ spiritali substantia: similitudo verò DEI in
 virtutibus illis, per quas DEO similes efficimur.

*Incipientes etiam possunt expendere aliquas
 Perfectiones Divinas*, ex quibus moventur, ad cō-
 tritionem, ad odium, & fugam peccati, ad extir-
 panda vitia, ad mortificandas passiones, ad timorē

DEI, & ad Spem in Misericordia DEI. Igitur ad Incipientes pertinet considerare Bonitatem DEI. Iustitiam, & Misericordiam ejus. Bonitatem, quam offenderunt, ut de peccatis suis doleant; Iustitiā, ut DEUM timeant: Misericordiam, ut non desperent.

Modus meditandi de Christo Domino nostro erit.

UT aliquando consideremus ejus nomina Sanctissima, quæ plurima in Sacra Scriptura reperiuntur: ut quòd vocetur, Filius DEI, ante Luciferum genitus in splendoribus Sanctorum, Verbum Patris, Splendor, & Figura substantiæ ejus, Candor Lucis æternæ, Sol Iustitiæ, Rex gloriæ, Rex regum, Dominus Dominantium, Sanctus Sanctorum, Verbum Caro Factum, Princeps pacis, Lux mundi, Via, Veritas, & Vita, Pastor bonus, Agnus mansuetus, Leo de tribu Juda, Aquila magnarum alarum, & alia: sub quibus nominibus diversis, possumus meditari de Christo, pro diversitate solemnitatum & temporum; videlicet, in *Sacratissima ipsius Nativitate*, quòd sit Pastor bonus, qui venit in mundum, quærere, & congregare oves dispersas, & ideò in stabulo nasci dignatus est. In *festo Circumcisionis*, ut Agnus mansuetus. *Epiphaniæ*, ut Rex Regū. *Resurrectionis*, Sol, aut Leo, de quo scriptum est: *Vicit Leo de tribu Juda: Ascensionis*, ut Rex gloriæ, vel, ut Aquila provocās ad volandū pullos suos; *Aliquando* verò immò sæpissime expendemus ejus vitam Sanctissimā, cujus Historia in quatuor Evangeliiis est descripta; ubi expressæ sunt actiones ejus, ut eas imitemur: & doctrina,

Grina, ut eam amplectamur: de quo S. Basilius in
Const. Monast: cap: 2. sic ait. Omnis actio, om-
 nis item sermo Salvatoris nostri JESU Christi,
 excolendæ pietatis, virtutisq; obeundæ Regula est;
 propter hoc enim etiam humanam naturam susce-
 pit, ut in se velut in tabula quadam, verâ nobis pie-
 tatem ac virtutem depingeret, eamq; omnibus no-
 bis ante oculos statutam unicuiq; pro viribus imi-
 tandam ceu Archetypum proponeret.

Dum verò aliquis considerare vellet Christi Do-
 mini actiones, vel ejus sacratissimam Passionē, hoc
 faciet, examinando circumstantias istas. *Quis, Quid,*
Cur, Quomodo: hoc est, personam, Opus, causam,
 & Modum. Possumus etiam aliquando meditationē
 instituere, de fine actionum, & passionum vitæ, &
 mortis Christi Domini nostri, qui duplex fuit: *Glo-*
ria, scilicet, *Patris æterni;* & *humani generis*
utilitas; ut exemplo ejus, gloriam DEI in omni-
 bus actionibus nostris, & salutem nostram proxi-
 morumq; nostrorum quæramus.

Modus Meditandi, de quibuscunq; Sanctis erit.

Considerando eorum nomen, statum, dignita-
 tem, vitam, virtutes, actiones, afflictiones,
 labores, doctrinā, gratias, & beneficia DEI;
 præsertim gratiam electionis, vocationis, justifica-
 tionis, & sanctitatis: & quomodo sint cooperati
 gratiæ DEI. Insuper mortem felicissimam, & glo-
 riam sempiternam, & miracula.

Etiam posset aliquis meditationē instituere de San-
 ctis, secūdū illas circūstantias omnibus notas. *Quis,*
Quid,

De Oratione

40

Quid, ubi, Quibus auxiliis, Cur, Quomodo, Quando.

Modus meditandi de virtutibus moralibus erit.

Considerando earum nomen, naturam, causas, affectus, actus, proprietates, media ad illas acquirendas.

Nomen virtutis deducitur à viro. Nam significat robur, & fortitudinem, quæ est viris propria.

Natura virtutū cognoscitur ex definitione earū.

Causa virtutum prima, & universalis est DEUS; nos autem causa proxima per actus internos virtutum. Et ideo facilis est virtus: quia ad eam acquirendam nobiscum concurrit DEUS, nos excitando, & adjuvando.

Effectus virtutis sunt innumeri, qui recensentur, cum proprietatibus virtutis.

Actus virtutum sunt modi, & instrumenta, quibus acquiruntur; quorum actuum exercitia, per Férias distincta, & per hebdomadas divisa inferius habentur in Par: 2.

Proprietates Virtutum sunt Honestas, Utilitas, Delectabilitas, & Pulchritudo; ex quibus sumuntur incitamenta virtutum; & quæ præcipue in meditatione considerandæ sunt, ut excitetur voluntas nostra ad amorem, & desiderium virtutis. Voluntatem enim nostram nihil potest moveri, nisi bonū, quod dividitur in honestum, utile, & delectabile: Pulchrum quoq; idem est in virtute, ac bonū, Itaq; cum virtus sit honesta, utilis, delectabilis, & pulchra, habet in se omnem rationem boni; quod cū
in

in Meditatione expendetur, facile voluntas ad virtutem amandam, & desiderandam inclinabitur.

Honestas est virtus, immò ipsa honestas: quia sola hominem honestat, & decet. Est enim naturæ rationali propria, ipsiq; conformis: quia omnes actiones nostras condecorat, ac honestat: facit nos quodq; similes DEO, ac DEI-formes: præterea venerabiles, ac omni honore dignissimos, efficit, Ipsa est Mater gloriæ, honoris, & nominis immortalis. Ipsa nobilitas animarum, nostrarum. Sola est laudabilis, sola per se appetibilis; cū simpliciter in se sit bona. Est enim participatio Divinæ Perfectionis, & Bonitatis.

Utilitas est virtus: quia nos bonos, & opera nostra bona facit, evacuat peccata, eradicat vitia, pronitatē ad malum moderatur, difficultatē ad bonum vincit, vehementiam passionum in nobis impedit, partem inferiorem superiori totaliter subdit, perficit potentias animæ nostræ, ut operationes suas perfectas producat.

Non solum autem utilis, sed etiam necessaria est virtus: quia finē illa neq; placere DEO, neq; finem nostrū, qui est vita æterna, consequi possumus: quia per illam benē, & sanctē vivimus, vitā, & gloriam æternam promeremur: quia est pretium, quo regnum Cælorum emitur: est vis: quā violenter rapitur: est jus; quō in hæreditatem homo assumitur; est character, quō Filii DEI ad Cælū admittuntur; est vestis nuptialis, quā decorari oportet eos, qui ad Cœnam Regis æterni vocantur.

Jucunda seu delectabilis est virtus, non tātū; ut jam acquisita, & adepta; sed etiam; ut est in ad-
 patione, & acquisitione: Nā exercendo virtutes gau-
 demus, & quia scimus, quòd exercitio virtutis DEO
 placemus; & propter conscientiam rectè facti; &
 propter spem præmii gloriæ cœlestis à DEO fideli
 promissæ; & propter instinctum naturæ rationalis,
 quæ delectatur in operibus bonis. Delectabilis est
 quoq; virtus jam adepta, & acquisita; quia illa so-
 la possessores suos, pura & perpetua delectatione
 perfundit, sola vera voluptate animum nostrum sa-
 tiat, & quietat; sola plenam lætitiā, jucunditatē,
 tranquillitatem, & quietem nobis affert. *Unde S.*
Chrysostomus Hom: 1. ad Rom: Si, inquit, volu-
ptate frui volumus ante omnia alia, fugiamus vi-
tia, virtutemq; sectemur; aliter enim nobis non li-
cet voluptatis, participes fieri. Et bene: Nā volu-
ptas ex præsentia rei convenientis nascitur; nihil
autem convenientius est naturæ rationali, quā
virtus; & ideo ex nullare, tantummodò ex virtute
sola voluptatem, & delectationem veram, & purā,
atq; hominē dignam habere possumus. Et quamvis
à longè conspecta virtus, aliquando nobis incutiat
timorem, & amara videatur, tamen gustata dulce-
scit, & sui amorem nutrit.

Pulchra est quoq; virtus: quia est ornamentum
 animæ nostræ, propter quod anima dicitur. *Cant:*
 6. Pulchra, & decora, & amica DEI, id est, Charis-
 sima: quia est vestis nuptialis, sinè qua DEO pla-
 cere nemo potest: quia rebus pulcherrimis compa-
 rantur

ratur, ut soli, lunæ, stellis, & lapidibus pretiosis, Sol est, inquit S. Bernardus *serm: 27. in Cant:* fervens charitas; Luna continentia; stellæ, aliæ virtutes. Hæc unica virtutis est pulchritudo, quam si oculis carnis homines viderent, omnium amorẽ in se concitaret. Hanc cœlestis Sponsus amat, qui respiciens humilitatem ancillæ suæ; id est, Virginis MARIÆ, hujus amore captus, descendit de Cœlis. Hanc diligunt Angeli Sancti, de quibus dicitur; *Recti diligunt te:* Angeli Sancti omninò sunt recti: ait S. Bernardus *serm: 24. in Cant:* qui animam virtute pulchram diligunt, dum eam sibi similem esse conspiciunt.

Modus meditandi de vitiis erit.

Considerando eorum nomen, naturam, causas, effectus, proprietates, actus, remedia, seu media ad illa exstirpanda, & ad excitandum odium vitiorum.

Nomen vitii deducitur à vitando; quia significat malum, quod vitari debet.

Natura cognoscitur ex descriptione ejus, quæ est talis: Est prava dispositio mentis ad peccatum inclinans.

Causa vitii, ut sumitur pro actu vitioso seu peccato, est Dæmon svadens malum, & voluntas nostra ipsi obediens: ut autem vitium sumitur pro habitu, seu pro illa prava dispositione, tunc vitii causa sunt præcedentia peccata, seu actus vitiosi.

Effectus vitii recensentur cū proprietatibus vitii.

Actus quoq; vitiorum, præsertim septem Capitali-

talium habentur inferiùs per Férias distincti, primâ Hebdomadâ, Par: 2.

Proprietas vitiorum est, malitia habens in se trinam rationem mali, quod sit malum inhonestum, inutile, invave, & amarum.

Inhonestū est: quia de decet hominē rationalē. Est enim disconveniēti & disforme naturæ rationali; & ideo est contra naturā rationalem: quod infames & ignominiosos homines reddit, & ipsum omni vituperatione, & odio est dignum. *Præterea est deformitas animæ*, ejus pulchritudinem deturpans, quā super carbones sit denigrata super omnem immunditiem sædata, omni execratione digna, & maximopere displicens DEO. *Et turpitudine erubescenda; est feditas vilissima*, quæ dehonestat animam. *Est contumelia nobilitatis nostræ*.

Inutile, propter summum damnum DEO illatum, privans illum debito honore: quia est injuria infinita DEO facta; quia peccando legem DEI contemnimus, & nos à DEO, Creatore, summo & incommutabili bono avertendo, ad infimum, & incommutabile bonum creaturæ convertimus, in quo est infinitus DEI contemptus. Est quoq; inutile, propter damnum nobis illatum: quia nos spoliatur gratia sanctificante, & omnibûs Spiritûs S. donis, ac virtutibûs infusis: privat nos jure regni cœlestis; causat reatum pœnæ æternæ: facit animam diaboli captivam, & inferni incolam; quia nos inclinat semper ad malum: quia per peccatum amittitur nitor, & pulchritudo animæ, & inducitur turpis macula, per affectū inordinatū ad creaturas. *In-*

Insuave est, & amarū: Est enim venenum. Quis enim lætō animō cibum & potum venenō imbutū sumeret? *Est dirus Tyrannus; ut ait S. Chrysostomus,* qui nostrā animam continuō crudeliter torquet. *Est demon,* qui animam in peccato hærentē possidet; & ideo, quot vitia habuerit homo, tot dæmones, ut *B. Cæsarius testatur:* qui ut animarum nostrarum ferocissimi hostes, eas, ut captivas, supra modum affligunt. *Est crux: ut S. Bernardus de vitio ambitionis asserit:* O ambitio, inquit, ambientium crux, quomodo omnes torques? nil enim acrius cruciat, nil molestius inquietat. *Est vermis* diu noctuq; rodens animam. Præterea est vitium insuave; quia privat nos consolationibus Divinis, quas solet DEUS communicare iustis; tum etiam serenitate ac lætitiā, quam actus boni & virtuosi nobis adferunt; tum cordis tranquillitate, incutiens nobis timorem judiciorum DEI, ac poenarum inferni, commemorans quoq; nos, esse inimicos DEI, factos odibiles ei, & Angelis ejus.

Modus meditandi de seipso, ad cognitionē sui erit.

Considerando hominis nomen, naturam, causas, proprietates, vitæ miseras, actiones, ejus novissima.

Nomen hominis est ab humo desumptum: quia de humo, seu de terra factus est; & ideo homo humilis, & sui contemptor esse debet.

Natura hominis ex definitione patet: quia est animal rationale. Nam hoc totum habet, quod animal: videlicet, sensus externos & internos,
per

per quos cognoscit suæ naturæ, & vitæ necessaria: habet quoq; appetitum, per quem appetit illa. Præterea habet rationem, per quam differt ab animalibus. Hinc homo est compositus *ex parte inferiori sensitiva*, ad quam pertinet sensus, & appetitus sensitivus; & *ex parte superiori rationali*; inter quas partes, est continua pugna; quia ut homo per peccatum factus est rebellis DEO in paradiso, sic etiam in homine factus est pars inferior rebellis superiori.

Ab aliis describitur homo, quod sit *centrum univ ersi*: quia sicut lineæ à circulo deductæ ad centrum ibi copulantur, ita omnium creaturarum perfectiones in homine congregantur. Deinde quod sit *Compendium omnium operum DEI*, qui dedit homini esse cum elementis, & rebus non viventibus: vivere, cum plantis, & arboribus: sentire cum piscibus, avibus, & animalibus: & intelligere cum Angelis. Insuper est *parvus mundus*, in quo DEUS perfectiones repertas in hoc visibili toto mundo inclusit.

Causa efficiens hominis est DEUS, Creator noster; ipse enim creat animas nostras; ipse quoq; creavit limum terræ, de quo formavit corpus primi hominis, de quo limo & nos sumus.

Causa Materialis hominis est terra, pulvis, & cinis.

Causa formalis hominis est anima rationalis, quæ est forma hominis: sed forma animæ, est imago DEI.

Causa

Causa finalis primaria est DEUS: ipse enim est finis noster ultimus, qui nos creavit propter se, ut ei serviamus, ut eum diligamus tanquam summum bonum, propter se super omnia appetibilia: *secundaria Causa finalis est æterna beatitudo,* quæ est finis noster ultimus secundarius: seu finis Cujus, est DEUS: & finis Quo, est æterna beatitudo, in qua est DEI fruitio,

Actus hominis, ut est naturæ rationalis sunt illi proprii, qui sunt convenientes & conformes rectæ rationi, quales sunt actus virtuosus, & boni. Nam tales sunt secundum rationalem naturam: Mali autem, & vitiosi, sunt contra naturam humanam.

Proprietates hominis sunt relinquendæ Philosophis; sed nos consideremus in meditatione proprietates animæ rationalis: videlicet quòd sit spiritus; quòd sit incorporea, immortalis, in partes quantas; quòd sit tota in toto corpore, & in qualibet parte corporis; quòd sit capax æternæ beatitudinis. *Dignitas hominis* consistit in eo, quòd sit ad imaginē & similitudinem DEI factus; quòd sit rationalis; quòd sit post Angelos omnium creaturarum nobilissimus; quòd sit Præses à DEO cōstitutus, super omnes creaturas hujus mundi; quòd DEUS clementissimus ex summa dilectione erga hominem pro eius salute, Unigenitum Filium suum misit in terrā, ut homo fieret, & pro ipso moreretur; quòd DEUS hanc homini potestatem dedit, ut Filius DEI fieret; quòd sit capax gratiæ DEI sanctificantis, quæ est participatio Divinæ naturæ; insuper, quòd natura

humana-

humana in Christo Domino nostro, supra omnes Angelorum choros, usq; ad thronum gloriæ, ad dexteram cœlestis Patris sit exaltata.

Conditio hominis præsens est, pronitas ad malum & peccatum, & multæ miseriæ vitæ ipsius: tandem mors, quam sequitur iudicium DEI, tandè vel infernus, vel gloria cœlestis.

Modus meditando Sacram Scripturam.

Frequens est in nostra Religione usus considerandi Sacram Scripturam: partim cum super Evangelia pro diebus Dominicis, & Festis Sanctorum meditationes leguntur: partim cum præparatione ad Sanctissimæ Eucharistiæ sumptionem, punctum aliquod ex Evangelio currentis Festi, vel diei Dominicæ consideratur. Igitur, ut cum majori fructu istæ meditationes circa Sacram Scripturam fiant, *Sciendum nobis est, Verborum S. Scripturæ esse multiplicem sensum: primò Literalem: deinde triplicem Mysticum seu spiritualem; videlicet, Tropologicum seu Moralem, Allegoricum & Anagogicum.*

Sensus Literalis Significatur per verba, aliquando secundum propriam significationem; ut dum dicitur, DEUS iudex, justus, fortis, & longanimis. Aliquando, secundum significationem figurativam, seu metaphoricam; ut cum de Christo Domino dicitur, Quod sit Leo: quia est fortis: vel Petra; quia est immobilis, & constans: vel Agnus; quia mansuetus,

Sensus Tropologicus seu Moralis est, quando

res dicta vel facta, dat nobis exemplum, quid agere debeamus. *Allegoricus est*, quando res aliqua gesta, est figura, vel signum alicujus, quod fiet in Ecclesia, vel Christi Domini. *Anagogicus est*, quando illa, quæ geruntur hîc in Ecclesia, sunt signum illorum, quæ erunt in gloria. Itaq; quando aliquæ sententiæ in Sacra Scriptura, non possunt, secundum proprium sensum verborum accipi, sed exponendæ sunt vel de Christo, vel de Ecclesia; *hic sensus est Allegoricus*; vel de virtutibus, ac moribus hominum Christianorum, sicut multæ parabolæ Christi, & multæ cerimonie veteris testamenti; *hic sensus dicitur Anagogicus*. Patet hoc, in hoc nomine *Jerusalem*, quod in multis Sacræ Scripturæ sententiis intelligitur *de civitate*, quam inhabitavit populus Judæorum; & *hic sensus est literalis*. In quibusdam verò sententiis intelligendum est, de *Ecclesia Christi*, sic sensus est *Allegoricus*. In aliis sententiis de *anima Fideli* quæ est spiritualis civitas, in qua habitare oportet justitiam & sanctitatem; & sic sensus *Tropologicus*. Deniq; in nonnullis sententiis intelligendum est *de cœlesti civitate*, quæ dicitur nova civitas *Jerusalem* & iste sensus est *Anagogicus*. Inter hos Sacræ Scripturæ sensus, *Literalis* & *Tropologicus* competit Incipientibus. *Allegoricus* verò & *Anagogicus* Proficientibus & Perfectis.

CAPUT VI.

De Quarta parte Orationis Mentalis, quæ est Gratiarum actio.

D

Hæc-

HAecenus dictum est de pia intellectus exercitatione, seu de intellectiva Oratione: nunc autem agendum est, de voluntatis devoto exercitio, quod sit per affectus in quo consistit affectiva Oratio.

Est autem affectus, inclinatio seu motus appetitus, quo aliquid prosequimur vel vitamus. Hic appetitus est in nobis duplex: Sensitivus, qui sequitur sensuum apprehensionem; & Rationalis, qui sequitur intellectus cognitionem, & qui dicitur voluntas; duplices quoque sunt in nobis affectus; voluntatis scilicet, & sensitivi appetitus. Affectus voluntatis, est inclinatio seu motus ad aliquid, quod intellectus judicat conveniens: vel aversio ab aliquo, quod intellectus decernit inconveniens: qui affectus fit sine ulla immutatione corporis; quia est actus spiritualis, & a potentia spirituali procedit, & in ea recipitur. Affectus appetitus sensitivi, est inclinatio, seu motus ad aliquid, & aversio ab aliquo quod sensus internus conveniens, vel inconveniens judicat: qui motus fit, cum immutatione corporis; & propterea passio vocatur. Sunt autem Passiones in nobis undecim; videlicet, Amor, desiderium, Gaudium seu Delectatio, Odium, Fuga, Tristitia, Spes, Desperatio, Audacia, Timor & Ira. Totidemque sunt affectus voluntatis, qui iis nominibus appellantur: Nam voluntas, dum sibi in bono complacet, & est Amor; aut appetit bonum absens, & est desiderium; aut in bono adepto quiescit, & est Delectatio; aut malum ei displicet, & est Odium; aut renuit ad hærere

hærere illi, & est Fuga; aut si præsens est invita sustinet, & est Tristitia: similiter voluntas, aliquando appetit bonum futurum difficile, sed adipisci possibile, & est Spes; vel ad illum consequendum, per cōveniētia media se erigit, & est Audacia; quod si bonum aliquod consequi non possumus, nec evadere malum, est Desperatio; si verò instat malum, quod vitari non potest, est Timor; deniq; si excandescimus, ob injuriam nobis illatam ad inferendam à nobis vindictam, est ira.

Et quoniā per Meditationē excitandi sunt affectus voluntatis nostræ, ad bonū prosequendū, & ad malū fugiendū; hoc est, ad Desideriū boni, & Odiū mali: ideo in quacunq; Oratione, hos præcipuē affectus exercere debemus, primò Odii alicujus vitii: deinde amoris & desiderii virtutis illi vitio contrariæ. Primò enim debet esse recessus à malo; postea accessus ad bonum. *Et Incipientes quidem*, quorum minus est Purgatio animæ, debent in suis orationibus concitare in voluntate odium peccatorū, atq; dolorem; postea desiderium emendationis, fugæ peccatorum, exstirpationis vitiorum, mortificationis, & pœnitentiæ externæ, seu afflictionis corporis sui; tandem faciant gratiarum actionem Divinæ Majestati, quod eos per suam bonitatem, tamdiu in mundo sustinuit, nec eos in gehennam misit, & pro aliis beneficiis.

Proficientes quoq; hoc idem facere debent; primò commoveant in voluntate odium suorum vitiorum & defectuum: deinde amorem, & desiderii

virtutum oppositarum: ut, si quis consideraret humilitatem, Obedientiam, Paupertatē, Patientiam, & alias virtutes Christi Domini nostri, agnoscens, quod ille sit superbus, inobediens, impatiens, &c. tunc concipiendum esset ei odium istorum vitiorum: deinde amor & desiderium illarum virtutum, quas in Christo cognovit, ut ipsum imitetur. Hinc Gratiarum actionem Redemptori nostro instituere pro illius humilitate, obedientia, patientia, & aliis virtutibus, quarum nobis exemplum reliquit, & pro omnibus aliis beneficiis *Similiter & Perfecti* suas imperfectiones advertentes habebunt justam causam, ad odium suarum imperfectionum, & ad desiderium vitandi ea, quæ displicent DEO, & quæ illos ad intimam unionem cum D E O impedire possunt.

Ut autem vehementius & efficacius concipiamus odium alicujus vitii nostri, expendenda est natura ejus, proprietates, & motiva; quæ jam sunt suprà posita de modo meditandi de vitiis, & ex his facienda est *dilatatio odii* per *Accusationē sui* coram Divina Majestate: per *Admirationem*, per *Confusionem*, per *Reprehensionem sui*, per *Expostulationem*, per *Exsecrationē*, per *Abominationē*, quæ est ipsum odiū, quod subsequitur *dolor*, *spes*, & *propositū vitandi illud vitium*; seu ut odiū majus habeamus vitii cujuscūq; ante ipsum actū odii, præmittuntur isti actus, videlicet, Accusatio sui, Admiratio, Confusio, Reprehensio, expostulatio, Exsecratio.

Post

Post tale exercitium affectus odii, exercendus erit affectus amoris, & desiderii virtutis illi vitio oppositæ, quod desiderium, ut sit cum majori efficacia & fructu, debemus cognoscere naturam ejus, proprietates, & motiva, de quibus suprà dictum est de modo meditandi, de virtutibus; ex quibus dilatabitur affectus desiderii illius virtutis: quia, scilicet, justum & æquum est, ut ita faciamus, ut pro vitio per virtutem DEO à nobis læso, satisfaciamus quia est honesta, necessaria, utilis, jucunda, & DEO placens, & propter exemplum Sanctorum, præsertim Christi Domini nostri.

Primus modus dilatandi affectum odii per Accusationem sui. in qua accusabimus nos corā DEO, de vitiis & peccatis, cum aliqua exaggeratione recensentes frequētes lapsus in peccata vel tale peccatū, diuturnitatē temporis, in permanēdo in illo, negligentia in eo vitādo, & varios actus illius peccati.

Modus autem Accusationis poterit esse hujusmodi, Fateor, Domine DEUS meus, & me accuso, quia adversum te peccavi, & te his vitiis pessimis NN. vel hoc vitio N. offendi quod feci non semel, sed iteratō, & sæpissime, ita ut videar ex inolita consuetudine peccare.

O quā dudum his vitiis laboro? ô quot jam menses, quot anni, quot ætates transferunt, ut in hoc vitiorum cæno hæreo! nec ullam vim mihi in illis evitandis adhibeo; quia etiam ipse occasiones ad ea perpetranda ex industria quæro; aut etiam oblatas admitto. Hinc fit, ut, quotquot istorum

vitiorum actus dantur, hos ego vel omnes, vel multos commiserim, & adhuc committam.

Notandum quòd hæc, exempli gratiâ, posita sunt, quibus unusquisq; secundum suæ conscientiæ notitiam, & veritatem utatur.

Quòd si quis videns Christi Domini virtutes, in se verò agnoscit contraria vitia, tunc seipsum sic, vel modo simili accusabit. Heu me miserum! qui tam longè sum ab exemplo tuæ hujus virtutis, v. g. Humilitatis, qui sæpius te per meam superbiam offendo; qui nullam vim mihi adhibeo, ut exemplo tuo, sim humilis, de quo me coram Divina tua Majestate accuso.

Secundus modus dilatandi odium est, per Admirationem. Fit autem admiratio propter magnitudinem alicujus rei; vel quia est aliquid rarum, inusitatum, inauditum, ultra spem, & opinionem humanam.

Sunt autem modi Admirationis. O quanta mea, & quàm intoleranda malitia fuit, per quam adeò gravia & innumera peccata in te DEUM meum perpetravi! ô quis non obstupescat super hanc enormitatē & multitudinem iniquitatū mearum? ô quanta bonitas tua, Domine DEUS meus! ô quàm inaudita miseratio tua, per quam mihi tam diu pepercisti:

Tertius modus per Confusionem, Quæ fit propter defectum timoris DEI, in cujus oculis homo peccat: propter ingratitudinē erga DEUM: & quòd videat homo Filiū DEI, tam humilem, obedientem, patientem

patientem, ipse verò sit superbus, impatiens, inobediens, &c.

Sunt autem modi Confusionis: Pudore suffundor, quia peccavi coram te; quoniam tu præsens eras, & oculi tui super me, quando ego transgredebam legem tuam.

Confundor, Domine, de tanta impietate, quòd ausus sum, tuam infinitam lædere Bonitatem, & offendere te amabilissimum Patrem, & summū Benefactorem meum.

Erubescor, quòd propter vilissimas creaturas te DEUM infinitæ magnitudinis, potentiæ, dignitatis sæpius contempsi.

Pudet me, Domine, dum te video humilem, obedientem, patientem, &c. ego autem sum superbus, inobediens, impatiens, &c.

O me impudentem hominem, qui tantam humilitatem Domini mei cernens, ego superbiam meam non desero!

Verè ego sum perfrictæ frontis homo, qui videns Dominum altissimæ Majestatis sic humiliatum; ego tamen adhuc vilis creatura superbire audeo.

Quartus Modus per Reprehensionem. Quæ fit propter rem tam sædam & abominabilem, & quæ dedecet hominem; propter tantam impietatem, & scelera, propter quæ homo quilibet vituperio & omni pœnâ dignus esse censetur. Hæc Reprehensio potest fieri propter illa, quæ sunt suprâ dicta, de modo meditandi de vitiis, scilicet, quòd vitium, sit inhonestum &c.

Sunt autem Modi Reprehensionis. Jure me reprehendere debeo in conspectu tuo, Domine DEUS meus: meritò me arguere, vituperare, objurare, tanquam hominem nequam, impium, & sceleratum, qui non sum veritus rem tam fœdam, & abominabilem, prout est quodlibet peccatum, & quæ dedecet me ratione Te à DEO Conditore meo ornatum, committere; meritò acriori reprehensione, & vituperio, immò & pœnâ acerbissimâ me dignum esse censeo. Fateor nihil mihi deberi, nisi afflictiones, opprobria, immò omnes totius mundi ac inferni cruciatus, atq; tormenta.

Verè non sum dignus premere terram pedibus meis, Cœli pulchritudinem oculis contemplari, & inter homines communem ducere vitam.

Quintus Modus per expostulationem. In qua conqueritur homo, apud seipsum de damnis, quæ affert nobis aliquod vitium: hæc damnâ recensentur suprà de modo meditando de vitiis, ubi ostensū est, quòd vitium sit inutile & insuave.

Sunt autem Modi Expostulationis. Heu me miserū, quid ego feci; qui te Dominū meū offendendo, non tantum te injuriâ infinitâ affeci, sed etiam mihi gravissima damna intuli? quia tuam gratiam & amicitiam amisi, Cœli aditum mihi præclusi; portam inferi mihi reſeravi; & mancipium diaboli me feci.

Hei mihi, quid lucri habeo, de mea superbia, per quam DEI inimicus factus sum, & mihi injurias, ut potè ipse auctor pœnarum æternarum, infabiles feci!

Heu

Heu me infelicem, quid ago, quòd tanta animæ meæ damna, quæ illinc sequuntur parvi pendo?

Sextus Modus per Exsecrationem. Quæ est quasi ejuratio alicujus vitii, seu abominatio tanquã rei maledictæ, Bonitati Divinæ contrariæ, DEO invisæ & injuriosæ.

Sunt autem Modi Exsecrationis. Exsecror, Domine mi, ex amore tui, omnia scelera mea, vel superbiam meam; quia est tuæ Bonitati, vel humilitati contraria.

Sint maledicta peccata omnia; quia tibi Domine mi, invisæ sunt, & injuriosa.

Pereat de terra universũ peccatum, vel superbia.

Septimus Modus per Actus ipsius Odii. est autẽ odiũ, quædã displicentia, & averfio animi à malo.

Potest autem Odium sic exerceri. Jam mihi displicent omnia peccata mea; vel superbia: quia tibi displicet.

Detestor, abominor, odio habeo omnia scelera, vel superbiam: quia tu Domine mi, eadem odio habes; & quia sunt offensa tua; abhorreo ab illis propter te.

O utinam prius occubuissem, quàm peccassem!
ô utinam te per superbiam nunquam offendissem!

Octavus Modus per actus doloris ejusmodi. Doleo, Dulcissime DEUS meus, ex puro amore tui, quòd unquam offenderim te peccatis meis multis; vel superbia.

Pœnitet me graviter peccatorum meorũ: quia te DEUM meũ summè dilectum, & infinitè bonum offendi.

No-

Nond post hæc Spes veniæ elicietur. Et quamvis me terreat scelera mea, & pœnas mihi æternas inferni minentur: nihilominus quia credo infinitè maiorem tuam esse bonitatem, quàm meam malitiã; ideo confido in hac tua bonitate, quia veniam indulgebis: immò si solus ego omnium peccatorum, quæ ab ineunte mundo commissæ fuere, reus essem, tu benignissime Domine, libenter ignosceres.

Spero, ò Domine infinitæ misericordiæ, quòd facies mecum misericordiam, & veniam dabis meæ superbiæ.

Deinde fiat Propositum emendationis. Nolo te, dulcissime Domine mi, ampliùs offendere tuã Divinã adjutus gratiã, in qua sola confido, & quam humiliter à te peto.

De Modo dilatandi amorem, & desiderium alicujus virtutis.

A Mor nihil aliud est, quàm complacentia & conversio voluntatis ad aliquod bonum, seu virtutem amplectendam.

Amamus verò & desideramus aliquod bonum, vel virtutem; quia est res excellens, seu præstâtissima, & honesta, necessaria, utilis, jucunda, pulchra, DEO grata, & propter DEI voluntatem, atq; ob exemplum Christi Domini nostri & Sanctorum.

Sunt autem modi Amoris. Placet mihi mirũ in modum hæc virtus.

Æstimo, appetio, & amo summoperè hanc virtutem.

Toto corde & voluntate propensum me sentio in hanc virtutem. Amo

Amo ex animo & amplector hanc virtutem.

Modi verò Desiderii sunt.

DEsidero ob amorem tuum, Benignissime JE-
SU, humilis esse.

O si jam incipiam te in hac virtute humili-
tatis imitari, prout summopere percipio.

Verè justum & consentaneum est, ut ita faciam;
ut per humilitatem pro vitio superbiæ, quo te sæ-
pissimè offendi, tibi aliquam satisfactionem exhibe-
am. O quando id faciam?

Utinam auferatur à me cæcitas mentis, ut co-
gnoscam hanc virtutem esse mihi ad salutem maxi-
mè necessariam!

O quantus tepor meus, quòd negligam hanc
virtutem, adeò mihi utilem ad extirpandum elati-
onis vitium, & ad perfectionem acquirendam!

O quando istam virtutem sedulo exercebo, sicut
hominem ratione præditum decet, & amplectar
tanquam rem præstantissimam, excellentissimam,
honestissimam & omni laude & amore dignissimam?
O quid ago?

Cur non quæro, illam jucunditatem, tranquilli-
tatem, & puram delectationem, quam exercitium
hujus virtutis animo nostro asferre solet?

Cur tam parvi æstimo gemmam istam pretiosissi-
mam & pulcherrimam, Deoq; gratissimam, quæ
est singulare ornamentum animæ nostræ?

O quando tibi, Domine mi, per hanc virtutem
placebo, sicut placuit tuæ Divinæ Majestati, Bea-
tissima Virgo, & multi alii Sancti, cujus tu exem-
plum

plum nobis dedisti pro quo sis infinities benedictus.

Gratiarum actio.

HÆc consistit in affectibus gratitudinis: erga DEUM excitandis, & amoris, & laudis DEI. Debemus autem gratias agere primò pro illo beneficio, quod in meditatione occurrit: deinde pro aliis beneficiis DEI, ut Creationis, Conservationis, Redemptionis, Vocationis ad fidem Catholicam, & ad Religionem Sanctam, & pro omnibus, tam pro naturalibus, quàm pro supernaturalibus donis.

Modus Gratiarum actionis.

Infinitas tibi gratias ago v. g. pro crudeli Flagellatione; vel spinea Coronatione; vel Crucis bajulatione, & pro omnibus doloribus tuis, quos pro nobis pertulisti & pro tua humilitate, quam tunc ostendisti; similiter tibi infinitas ago gratias, & pro aliis beneficiis in me collatis, præsertim pro beneficio Creationis, Conservationis, Redemptionis, Vocationis ad Fidem, & Religionem Sanctam. Itaque pro omnibus his beneficiis, gratias, & donis infinitas tibi gratias ago, ô æternum bonum meum! quin infinita corda habere vellem, ut iis omnibus opulentissimam misericordiam tuam, charitatem, & bonitatem decantare, ac celebrare queam. Reliqui actus laudis ponuntur infra in exemplo Orationis Mentalis. *Fer: 2. de Odio Peccati pag: 86. & 109.*

CAPUT VII.

De Quinta & Sexta parte Orationis mentalis de Oblatione & Petitione.

Quia gratitudinis virtus gratiam referre molitur: ideo gratiarum actionem sequitur Oblatio, per quam homo gratiam Domino DEO, pro beneficiis ejus, rependere conari debet. Et imprimis offerre Personam Christi Domini nostri, ac Beatissimæ Virginis, & omnium Sanctorum, cum eorum meritis, ac universa corda, quæ DEO unquam placuerunt, placent, & placebunt.

Deinde seipsum cum omnibus cogitationibus, verbis, & operibus suis in hostiam laudis, & gratiarum actionis.

Præterea proponere aliquam passionem, magis molestam mortificare: vel in virtute aliqua magis necessaria sibi, tam per internos, quam per externos actus sese exercere. Faciendo autem hæc proposita; possunt statim actus interni virtutum propositarum exerceri. Sed hoc advertendum est, nè id solum ore tantum fiat: verum ut ab initio cordis affectu procedat. Nam signum veræ hujus oblationis est, si quis postmodum, occurrentibus occasionibus, virtutem propositam, propter DEUM, exerceat.

Modus Oblationis.

Verum ut tuæ infinitæ Charitati, & beneficiis tuis aliquatenus reciproca gratitudine respondeā, cum nihil habeā, quod tibi dignius offerā præter teipsum, igitur quo pacto possū, offero, tibi infini-

infinitam tuam Divinitatem, immensas perfectiones tuas, & omne bonum quod habes, & illud totum, quod es. Offero tuam sanctissimam Humanitatem, tuamq; Sacratissimam Passionem & omnia merita tua: offero Beatissimam Virginem, omnes Angelorum Hierarchias, & Beatorum omnium, atq; iustorum animas. Offero universa corda, quæ tibi unquam placuerunt, placent, & placebunt. Deniq; offero meipsum totum corpus & animam, cum omnibus potentiis viribuscq; suis, totum esse meum totamq; vitam, ac æternitatem meam, omnes quoq; cogitationes meas, singulas actiones, minimosque motus: vellem quoties respiro, ferventissimos amoris tui actus exhalare, ut tantæ charitati tuæ possem, aliquatenus gratitudine mutuâ respondere. Præterea firmiter statuo fidelissimè tibi servire, & propter te summè dilectum hanc Passionem N. mihi magis molestam mortificare, & in hac virtute N. me exercere.

Sexta Pars Orationis Mentalis Petitio.

IN hac parte petendum est auxilium DEI, ad acquirendam virtutem propositam, & passionem superandam.

Petenda quoq; est peccatorum venia, & vitæ emendatio, & universa bona illa, quibus egemus ad vitam æternam consequendam; præsertim, ut serviamus Domino DEO secundum nostram vocationem. Præterea petendum est cum Obsecratione. Est autem Obsecratio per sacras res, videlicet, per merita Christi, & aliorum Sanctorū, & ipsam DEI Bonitatem, petitio.

Deinde

Deinde orandum est pro tota Ecclesia, ac universo genere humano.

Insuper petendum est cum fide, sancta fiducia, piè, perseveranter; & illa, quæ ad salutem sunt nobis necessaria.

Modus Petitionis.

Verùm quia finè te nihil prorsus facere possū, Domine ideò rogo te per tuā infinitam Bonitatē, & Misericoridam; per tua Sacratissima vulnera, &c. adjuva me, & gratiam concede, ut hæc proposita mea adimpleam, quàm perfectissimè. *Reliqua habentur pag: 92. 94. & III.*

Post Orationem hæc servanda.

Primò, Renovanda sunt proposita.
Secundò, Notanda puncta, quibus aliquis fuit perimotus ad bonos affectus.

Tertiò, Eadem puncta sæpius per diem in memoriam renovanda, ut unusquisq; ad propositorum executionem facilis incitetur:

Quartò, Ut affectus concepti in oratione diu conserventur, cavenda est oculorum immodestia, & verba inutilia.

Notandum. Quòd licet per hæc, quæ hætenus dicta sunt, demonstratum sit, qui affectus circa malum aliquod, vel vitium, & circa bonum, vel virtutem haberi possunt: cavendum tamen in affectuum inquisitione & ampliatione; nè artificiosè, & detestabiliter, conquirantur, sed ita recipiantur, prout Dominus DEUS illos nobis communicare, dignabitur, qui per simplicitatem, & voluntatis abundantiam

dantiam potiùs, quàm arte Rhetorica fovendi sunt, multos virtutum actus, & benè vivendi proposita concipiendo.

E X E M P L A

Orationis Mentalis.

TYronibus hujus exercitii spiritualis, seu studii Orationis Mentalis, non satis est dare præcepta, secundum quæ debeant facere hanc Orationem; sed necesse est proponere illis ob oculos, ipsa exempla ejusmodi Orationis, ut alienâ operâ ad tempus aliquod utentes, faciliùs postea ipsimet cum fructu insigni animæ suæ, ad normam sibi iam notam, Orationem mentalem instituere possint. Itaq; dabuntur hîc exempla pro Incipientibus, qui sunt in via purgativa, quorum munus est purgare animam; ad quod juvabit eos cognitio sui, Odium peccati, institutio bonæ & spiritualis vitæ, contemptus sui, Timor DEI, Mortificatio seu castigatio sui, Puritas cordis, vitiorum extirpatio. Ideo propter illos exempla Orationis Mentalis per Ferias disposita ponuntur, imprimis pro tempore vespertino, de Odio peccati, de vita benè seu spiritualiter instituenda, & de aliis suprà dictis: pro tempore verò Matutino de septem vitiis capitalibus extirpandis & simul de virtutibus his vitiis oppositis,

Præmonentur autè hîc Incipientes, ut à principio tam manè, quàm vespere, faciant Orationem de Odio peccati, saltem per unum Mensem, postea facient per menses aliquot ordine præscripto, donec fu erint dispositi ad viam Illuminativam, mortificatis sensibus,

sensibus, & passionibus. & vitiis extirpatis; ita ut non tantum gravia peccata, sed etiam venialia facile videntur.

Pro Proficientibus unum & alterum exemplum proponitur: praesertim pro matutino tempore. Nam vespertinae Orationis exemplis poterunt etiam Proficientes & Perfecti uti. In qualibet enim via, debemus odium habere nostri & peccati, sancte vivere, contemnere nos ipsos, DEUM timere, ne unquam eum offendamus, & ab illo separemur, à mortificatione & poenitentia nunquam cessare, & puritati cordis acquirendae semper incumbere.

Qui vult cito proficere, in hoc exercitio Orationis praesertim Incipientes, habeant jam memoriae impressum modum hic datum Praeparationis, Gratiarum actionis, oblationis & Petitionis, quibus semper uti possunt in qualibet Oratione. Totum negotium erit nostrum in Meditatione, in qua habentes jam modos perspectos hic datos, nihil difficultatis sentimus, si diligentiam adhibere voluerimus, in repellendis vanis cogitationibus: ubi ita nos geramus, prout ageremus, dum aliquod negotium maxime necessarium, & magni momenti tractaremus: ut, si literas ad aliquem Principem scriberemus. Itaque dum ad locum Orationis venimus, rejiciamus tunc omnes curas, & officia nobis commissa, cogitantes tantummodo illa, quae tempus & locus à nobis tunc requirit: hoc est, de Praeparatione ad orationem faciendam, si nondum illam fecimus: postea consideremus punctum Meditationis assum-

sumptū, in qua consideratione persistamus, donec notum sit nobis, quod malum sit nobis vitandum, vitiumq; evellendum, & quod bonum amplectendū, seu in cujus virtutis cultum sedulo incumbendum. Deinde facta meditatione, accedemus ad Colloquiū cum DEO, in cujus principio ponatur illud, quod in consideratione fuit, videlicet: Si quis consideravit damna peccati & injuriam DEI, ponat hoc in principio Orationis: si verò consideravit aliquod mysterium Passionis Domini nostri, cujus causa peccatum nostrum fuit, inde incipiat Orationem suam: si aliquam virtutem Christi Domini nostri, hoc ponatur primò inchoando Colloquium cum DEO: postea Accusatio sui, & reliqua juxta formas & modos, in variis exemplis sequentibus præscriptos. Sic igitur dum faciemus diligenter id quod ad nos pertinet, aderit nobis Clementissimus DEUS, illuminando nos ad cognoscendum in quo emendare vitam nostram, quos defectus corrigere, cujus virtutis exercitio magis incumbere debeamus, & inflammādo voluntatem nostram ad desiderandum eadem & perficiendum.

E X E M P L U M
Orationis Vespertinae.
PRO FERIA SECUNDA
De Odio Peccati.

UT Odium & veram abominationem peccatorum habeamus, consideremus ea, quæ de modo meditationis, de vitiis sunt dicta, præsertim proprietates vitiorum, maximè injuriam & offensam

offensam DEI infinitam, & animæ nostræ damna, ex quibus incitamenta ad hoc odium, & ad desiderium emendandi vitam percipiemus. Ut autem hoc odium sit magis efficax facta in principio Orationis, seu Colloquii cum DEO commemoratione injuriæ DEI, cui addatur Admiratio super infinitam bonitatem DEI, fiat Accusatio sui, Admiratio, Confusio, Reprehensio, Expostulatio, Exsecratio, Abominatio. Dolor de peccatis, Spes Veniæ: postea desiderium fugiendi peccata, afferendo rationes istius fugæ, tandem Gratiarum actio, Oblatio, & Petitio, secundum hanc vel similem formam.

COLLOQUIUM CUM DEO.

Commemoratio injuriæ DEO per peccata factæ.

O Dulcissime Domine JESU Christe, Judex supreme, & super omnia tremende, cui ego semper maximam injuriam irrogavi, quoties in te, & coram te peccavi: dum te Creatorem, Redemptorem, ac Benefactorem meum super omnia colendissimum, & amandum offendi: quandoquidem tunc infinitam Majestatem tuam contempsi, ineffabilem Potentiam tuam vilipendi, inæstimabilem Sapientiam tuam inhonoravi, tuam immensam Bonitatem pro nihilo duxi.

Admiratio super Bonitatem DEI. O quanta Clementia tua, Domine DEUS meus, erga me peccatorem hætenus fuit! eò quòd me in oculis tuis peccantem patienter sustinuisti, nec pro injuria tua infinita, justam vindictam de me sumpisti.

Accusatio sui. Heu me miserum, qui à primo

rationis usu nihil boni feci, sed multa mala, & scelera in te, DEUS meus, commisi. Nam quod est præceptum, quod ego non fregerim? quod peccatū, quod ego non perpetraverim? quod flagitium, quod non admiserim? Non dilexi te ex toto corde, ex tota mente, ex omnibus viribus meis. Non dilexi proximos meos tanquam me ipsum; quorum aliquos etiam hodie habui, & malum illis concupiui, & aliquando feci. Mandata tua multoties prævaricatus sum. Beneficiis tuis, & tam naturæ, quam gratiæ Donis, ad tuam offensam, frequenter abusus sum. O quoties per sensus meos externos & internos, per iudicium, voluntatem, & amorem proprium, per indomitas passiones, & inordinatos affectus turpiter peccavi! O quoties per cogitationes malas, stultas, insanas, per desideria impia, effrenata & perversa per locutiones meas mendaces, noxias mordaces, per opera diversa injusta, flagitiosa, iniqua, graviter in te DEUM meū deliqui! O quoties per septem capitalia peccata, & novem aliena, per transgressionem votorum meorum, Regulæ Ordinis nostri, Constitutionum, & Observantiæ Regularis, ac per infinita alia peccata, quæ multiplicata sunt super capillos capitis mei, & super numerum arenæ maris, tuam Majestatem Sanctissimam ad iracundiam peccando provocavi!

Admiratio super malitiam nostram. O quanta mea, & quam intoleranda malitia fuit per quam a deo gravia & innumera peccata, in te Dominum meum infinitæ magnitudinis, perpetravi: O quis non

non obstupeſcat, ſuper hanc enormitatem, & multitudinem iniquitatum mearum?

Confuſio Equidem pudore ſuffundor propter tantam rei indignitatem: quòd ego tam vilis creatura, contra te Creatorem meum, ſervus contra Dominum Altiffimum, ingratus cliens contra Benefactorem ſummum peccàdo inſurrexi. Confundor, Domine, de tanta impietate, quòd auſus ſum tuam infinitam lædere bonitatem, & te amabiliſſimum Patrem offendere. Erubeſco, quòd propter viliffimas creaturas, te DEUM infinitæ Potentiæ, Dignitatis, Excellentiæ ſæpiùs contempſi. Pudet me vehementer, quoniam expers timoris tui, in oculis tuis peccavi, & malum coram te feci.

Reprehenſio ſui. Ac proinde meritiffimo jure reprehendere me debeo in conſpectu tuo, Domine DEUS meus: meritò me arguere, vituperare, objurgare, tanquam hominem nequam, impium, & ſceleratum, qui non ſum veritus rem tam fædam & abominabilem, prout eſt quodlibet peccatum, & quæ dedecet hominem ratione à te Creatore ſuo ornatum, committere. Meritò acriori reprehentione & vituperio, immò & pœnâ acerbiffimâ me dignum eſſe cenſeo. Fateor, nihil mihi deberi niſi afflictiones, opprobria, & omnes totius mundi, ac inferni cruciatus atq; tormenta. Verè non ſum dignus premere terram pedibus meis, Cœli pulchritudinem oculis contemplari, & inter homines communem ducere vitam.

Expoſtulatio. O me infelicem! quid lucri habeo

beo de meis vitiis & peccatis? quibus non tantum te Dominum meum infinita injuria affeci; sed etiam mihi ipsi gravissima damna feci; me ipsum Divino consortio privavi: DEI gratiam & amicitiam amisi: Coeli aditum mihi praeclusi: portam inferni reſeravi: & mancipium Diaboli me effeci. O insipientiam meam totius mundi irrisione dignam!

Execratio. Exsecror, Domine mi benignissime, omnia scelera mea, non tamen ideo, quia mihi sunt noxia; sed quia tibi Dño meo sunt odiosa & injuriosa. Exsecror illa, quia sunt tuae Bonitati, & Honori tuo Divino contraria. Sint maledicta in æternum.

Abominatio, seu ipsius Odii Actus. Displicent mihi valde: abominor illa, detestor & summo odio habeo, plus quam omne malum cujusvis pœnæ, tam temporalis quam æternæ, quia sunt offensa tua. O utinam nunquam te offendissem! Utinam prius occubuisssem, quam peccassem!

Dolor de peccatis. Doleo ex amore tui, quod unquam offendi te infinitè bonum, atque summo amore dignum. Doleo ex toto corde non quia immensas pœnas promerui, ad quas etiam tibi si placeret me mittere, libenter eas pro tuo Honore, & Beneplacito acceptare. Non quia sempiternam ignominiam, & infamiam dignus factus sum, cui etiam, si volueris, me submitto. Sed quia te DEUM Sanctissimum, Patrem piissimum, Redemptorem benignissimum offendi: quia te, quem nunc unice diligo, & reveor, contempsi: quia tibi gravissime displicui, & tuam indignationem provocavi.

Spes

Spes veniæ. Et quamvis terreant me peccata mea, & pœnas æternas mihi minentur: nihilominus quia credo infinitè majorem tuam esse Bonitatem, quàm meam malitiam: ideo spero in hac tua bonitate, quia veniam indulgebis. Immò si solus ego omnium peccatorum, quæ ab ineunte mundo commissa fuère, reus essem, tu, benignissime Domine DEUS meus, libenter ignosceres. Ego autem omnia & singula peccata, atq; delicta mea, depono in charissima vulnera tua, & pretiosum Sangvinè tuum: proicio in immensum ignem amoris tui: de-mergo in exuberantium meritorum tuorum pelagus: & abscondo in abyſſo infinitarum misericordiarum, & miserationum tuarum, ut ibi, per merita sanctissimæ Humanitatis tuæ, & acerbissimæ Passionis, nec non per merita, & preces Beatissimæ Matris tuæ Virginis Mariæ, Beatorumq; Angelorum, & omnium Sanctorum, ac electorum tuorū expientur, absorbeantur, & in nihilum redigantur.

Desiderium pœnitentiæ & fugiendi peccata. Jam veram agere pœnitentiam, & pro delictis meis, tuisq; offensis, benignissime Domine, lacrymas copiosas fundere desidero. O quis dabit capiti meo aquam, & oculis meis fontem lacrymarum, ut plorè die ac nocte meam erga te ingratitudinem, meam iniquitatem? Quis dabit mihi intimos gemitus, & suspiria cordis? quis me planctum, & lamenta amara edere docebit? O utinà fiant mihi lacrymæ meæ panes die ac nocte! Utinam continuò exitum aquarum deducant oculi mei, quia non custodierunt le-

gem tuam! Utinam, & millies utinam totum mare
versum in lacrymas, per oculos meos ducere possem;
ut aliquatenus meam à te aversionem, & infideli-
tatem tibi compensarem. Equidem Beati Petri, &
S. Mariæ Magdalenzæ, cæterorumq; omnium verè
penitentium, contritionem & dolorem semper ha-
bere percipio. Jam desidero, ob amorem tuum, fuge-
re omnia peccata. Utinam non amplius te offen-
dam? Utinam nullum delictum committam, quod
non solum est turpe, sædum, & abominabile, sed
etiam perniciosum: quod non solum turpiter sædat
animam meam, verum etiam cruciat & ad bara-
thrum præcipitat! O si jam nunquam transgrediar
mandata tua, sicut hætenus feci, nè tuam Divinam
Majestatem injuriâ afficiam!

Gratiarum actio.

ET quoniam hucusq; mihi pepercisti, & me
hætenus te offendentem, & ad iram provo-
cantem tolerasti, nec pœnis æternis, prout
merui addixisti, multisq; modis, ac beneficiis ad
te revocasti. Quoniam gratiam & opportunitatem,
& tempus ad pœnitentiam mihi indulges: & nunc
de peccatis meis contritionem, & firmum proposi-
tum ea cavendi donasti, fiduciamq; impetrandi à
te, non solum de illis veniam, sed etiam gratiam
& gloriâ infudisti: ideo immensas tibi, ô Dulcissime
Domine JESU, gratias refero, teq; in æternū glo-
rificare volo.

Præterea gratias tibi infinitas ago, & pro aliis
innumeris immensiq; beneficiis, quæ ex momento
con-

conceptionis meæ, usq; in hanc horam de tua benignitate suscipio; pro infinitis quoque, quæ usque in finem vitæ meæ, ac per totam æternitatem meum accepturus.

Specialiter verò gratias tibi ago pro ineffabili beneficio prædestinationis: quia me sine ullis meis præviis meritis ab æterno amasti, elegisti, ac prædestinasti vocare, justificare, & glorificare, prout spero in bonitate tua, & meritis tuis.

Et pro beneficio Creationis: quia me ex nihilo creasti creaturam rationalem, ad imaginem & similitudinem tuam, atq; æternæ beatitudinis capacem.

Et pro beneficio Cōservationis? quia me hæcenus conservasti, nè in nihilum reciderem, sicut ex nihilo creatus sum, & ab innumeris periculis per Angelicum ministerium præservasti, & sæpius etiam mirabiliter liberaisti: & quia ea, quæ victui meo, & cæteris hujus vitæ necessitatibus erant necessaria benignissimè mihi providisti.

Et pro beneficio Redemptionis: quia tu solus non per aliam aliquam creaturam, sed per te, & Passionem, ac mortem atrocissimam, & ignominiosissimam me redimere: à diaboli misera captivitate liberare: & ad tuam gratiam, atq; gloriam æternam reparare: & salutaria nobis Sacramenta, inter quæ, præcipuum Sanctissimæ Eucharistiæ Sacramentum, cujus sæpius me participem effecisti instituere dignatus es.

Et pro beneficio Vocationis ad hanc fidem Catholicam, quia me de parentibus Catholicis nasci,

& per Baptismum ab omni peccato mundari, Filiū tuum adoptivum fieri, & ad agnitionem Sancti Nominis tui, atq; Catholicæ fidei, me à puero pervenire, & salutaribus doctrinis erudiri fecisti.

Et pro beneficio Justificationis: quia ut gratiam & justitiam in Baptismo acceptam, eam verò sæpius per peccata amissā recuperarē, me multis modis excitasti, ad te revocasti, attraxisti, illuminasti, compunxisti, & redeuntem ad te benignè suscepisti, sanasti, justificasti, & spem veniæ, & gratiæ mihi tribuisti: & quia me quotidie peccantem, & te multipliciter offendentem tolerasti, à damnatione, & pœnis æternis præservasti.

Et pro beneficio Perseverantiæ, quæ est conservatio gratiæ tuæ, quam ut conservarem, ab innumeris peccatis me custodisti, sæpè à tentationibus liberaisti, & in tentationibus resistendi, virtutem dedisti, & ad multa bona opera, tuis inspirationibus excitasti, & adjuvisti.

Et pro beneficio Vocationis ad Religionem: quia me à mūdi vanitate, & à multis mundi periculis, ad statum Sacræ Religionis Beatissimæ Virginis *MARIÆ* de Monte Carmelo; mihi salutarem & convenientem vocasti, & misericorditer suscepisti, & hucusq; in eo conservasti: & quia tepidum, & negligentem in vita spirituali, & exercitiis meis nunc toleras patienter, & excitas, nè abutar hoc tam singulari tuo beneficio.

Deniq; pro beneficio Glorificationis, quod licet nondum acceperim, tamen me illud accepturum, ex
tua

tua immensa bonitate, exspecto, spero, & desidero, & ferventissimè peto, ad tuam gloriam sempiternam non verò propter meum bonum.

Insuper tibi, superbenignissime JESU, gratias ago infinitas, pro omnibus talentis, ac donis. tum naturalibus, tum supernaturalibus, & pro omnibus, ac singulis beneficiis, & gratiis tuis, tibi solùm plenè cognitis mihi indignissimo famulo tuo collatis.

Et pro omni plenitudine bonorum, & gratiarum, atq; ipsius Divinitatis, tuæ Sanctissimæ Humanitati communicata.

Et pro universis beneficiis, ac donis, Sanctissimæ Genitrici tuæ Virgini Mariæ collatis: præsertim quòd eam ab æterno in Matrem tuam elegisti ab omni macula peccati præservasti: omni gratiæ plenitudine replevisti: eandem in corpore & anima Beatificatam in Cælum assumpsisti: Cæli & terræ Dominam & Reginam instituisti, & in Matrem nostram & advocatam fidelissimè nobis dedisti.

Et pro omnibus gratiis & donis, quibus S. Josephum: & Sanctam Matrem Nostram Tereciam, & alios Sanctos Patronos meos, ac omnes Beatos & justos, universas quoq; creaturas, etiam damnatos affecisti.

Et pro omnibus quibuscunq; beneficiis tuis, pro quibus tu, Domine mi clementissime, vis à me laudari.

Actus Gratiarum actionis. Itaq; pro omnibus his recensitis beneficiis, gratiis, & donis, infinitas tibi gratias ago, ò æternum bonum meum: quin
infini-

infinita corda habere velim, ut iis omnibus opulentissimam misericordiam, tuamq; charitatem ac bonitatem decantare, ac celebrare queam.

Ætus Laudis. Laudo te ex toto corde meo Domine DEUS meus, & magno applausu exalto, glorifico, benedico, magnifico, & veneror, atq; utinam hoc absq; cessatione præstare possim, semper & in omni loco terrarum, quantum te exaltant, magnificant, honorant, honorarunt, honorabunt, ac honorare potuerunt simul omnes homines, qui sunt, fuerunt, & futuri sunt. Immò cupio simul reddere tibi omnes illas laudes, quas potuissent; possunt, poterūtq; Sāctissima Humanitas tua, & Beatissima Virgo Mater tua, omnes Angeli, Sanctiq; DEI omnes, & iusti, & tantum quantum possunt deferre innumeri mundi, & infinitæ creaturæ, tam visibiles, quàm invisibiles, quas omnipotens manus tua creare potest.

Et tantas laudes, tantosq; honores desidero tibi exhibere, quantos nosti exhiberi posse, & quantos mereris.

Ætus Amoris Dulcissime JESU, te solum in omnibus, & omnia in te solo, & propter te solum, teq; super omnia amo, & amplector, & sic semper amare volo, & per te propono.

Amo & amare te desidero, & quidquid tu amas, propter te, purissimè, intensissimè, constantissimè, infatigabilissimè, omni possibili dilectionis excessu, super omnia, nunc & semper in æternum & ultra.

Tibi, propter te, placere in omnibus concupisco.

Tibi

Tibi gratum amoris obsequium semper, & ubiq;
præstare desidero.

Tuam beneplacentem voluntatem nosse, & ex amore tuo, eam perficere volo, & per te, decerno.

Tuum beneplacitum in me, de me, per me, & in omnibus semper, & ubiq; perfici, & impleri, in tempore & æternitate, in adversis æque, ac in prosperis opto, & postulo.

Te super omnia appetio, præeligo, appeto, & quæro, paratus cæteris omnibus, propter te, abrenuntiare, quotiescunq; & quomodocunq; volueris.

Tibi omne bonum potius quàm mihi, cupio & faveo.

De omni bono tuo, pleno Dominio ac beatitudine, deq; tuo honore, & voluntatis tuæ impletione, magis gaudeo, tibiq; congratulor, & semper magis gaudere volo, & per te, decerno quam de quocunq; meo, vel cujuslibet mihi amicissimi bono.

Profectò, Domine mi dilectissime, si per impossibile aliquid possiderem, quo tu careres, illud tibi omne cederem, & tribuerem. Immò si possem esse DEUS, nollē tantummodò ideò ut tu solus esses, nec parem haberes.

Volo deniq; cupio, & in te confidenter expecto, pervenire ad tuæ Divinitatis claram visionem, & continuam laudem, perfectam dilectionem, & beatificam, fruitionem, ac æternam & securam possessionem, & inseparabilem unionem: idq; non propter meum bonum, & commodum, quod inde mihi provenire posset, sed purè propter te, ut sic gratissi-

tissimum tibi, & perfectissimum obsequium exhibeam, & gaudium tuum in me sit, & sicut vis impleatur.

Nota. Quòd possumus optimè & laudabiliter uti Gratiarum actione, ex Sacra Scriptura desumptra, ut pote à Spiritu Sancto inspirata dicendo vel Psal: Laudate Dominum de Cœlis &c. Vel Canticum trium puerorum. Benedicite omnia opera Domini Domino. &c. vel Psalm: Benedic anima mea Domino, & omnia quæ intra me sunt Nomini Sancto ejus. Vel Te DEUM laudamus.

Vel invitando omnes Angelos, & omnes Sanctos, ut nobiscum laudent Omnipotentem DEUM, dicendo.

Benedicant te Domine omnes Angeli tui, Archangeli, & Principatus: laudent, & glorificent te in sæcula.

Benedicant te Potestates, Virtutes, Dominationes: laudent & glorificent te in sæcula.

Benedicite Patriarchæ, & Prophetæ Dominum: laudate, & glorificate eum in sæcula.

Benedicite Apostoli, & Evangelistæ Dominum: laudate & glorificate eum in sæcula.

Benedicite Martyres, & Confessores Dominum: laudate, & glorificate eum in sæcula.

Benedicite Virgines, & Sancti omnes Dominum: laudate, & superexaltate eum in sæcula.

Oblatio.

UT autem tuæ infinitæ charitati, & beneficiis tuis, aliquatenus reciproca gratitudine respon-

respondeam, ô Dulcissime JESU, cum [nihil habeam, quod tibi dignius offeram, præter te ipsum: igitur] quo pacto possum offero tibi infinitam tuam Divinitatem, immensas perfectiones tuas, & omne bonum, quod habes, & illud totum, quod es.

Offero tuam Sanctissimam Humanitatem, tuâq; Sacratissimam Passionem, & omnia merita tua.

Offero Beatissimam Virginem MARIAM, omnes Angelorum Hierarchias, & Beatorum omnium, atq; justorum animas, cum meritis eorum.

Offero universa corda, quæ tibi unquam placuerunt, placent, & placebunt, præsertim Cor tuum suavissimum, ac dulcissimæ Matris tuæ Virginis MARIE.

Offero tibi omnes cogitationes, verba & opera bona, quæ fecerunt, faciunt, facturiq; sunt omnes homines, qui fuerunt, sunt, futurivè sunt unquam in hoc mundo: immò quæ possent habere infiniti homines, quotq; creari possunt à tua Omnipotentia, ita ut si possem, ex amore tuo, eadem facere vellem illâ efficacîâ, quâ tu scis maximâ fieri posse: & illo modo, qui Majestati tuæ Divinæ gratissimus esset.

Deniq; offero me ipsum totum, corpus & animam meam, cum omnibus potentiis & viribus suis, totum esse meum, totamq; vitam meam, omnes quoq; cogitationes, singulas actiones, minimosq; cordis corporis, & animi mei motus, in tempore, & Æternitate.

Quæ omnia tibi desidero, Domine mi dulcissime,
me,

me, offerre illo cordis affectu, quo tu nosti posse flagrantissimo: & toties, quoties vivens in terris spiritum ducam.

Proposita. Præterea firmiter propono fidelissimè tibi Domino meo servire, & omnia peccata semper vitare, paratus mori potius, quàm scienter, & ex proposito te offendere. Statuo nunquam transgredi Sanctissima præcepta tua.

Decerno ex corde intimo, cum auxilio gratiæ tuæ, universam legem tuā implere: & ut hoc idem exequar fideliter, omnem vim mihi inferre, omnem curam adhibere, & omnes difficultates superare conabor.

Volo potius, Dñe mi, quolibet bono privari, & quodlibet malū etiā mortisignominiosissimæ & crudelissimæ perpeti, quā à te summo & unico bono averti: quàm tuæ rectissimæ voluntati contraire, quàm à tua gratia & amicitia, quam summè exopto, & omnibus creatis præfero, excidere, & tuam inimicitiam, ac indignationem incurrere.

Præterea, amore tui, & zelo justitiæ, propono dignos pænitiæ fructus facere, atq; tantas offensas tuas ulcisci, & in me punire, austeritates quoq; omnes, propter te, libenter assumere, & hilariter tolerare, jam verò oblectamenta omnia non necessaria, nec spiritali profectui accomoda fugere, & abijcere.

Deniq; me totum tibi prosterno, offero, & plenè resigno in omne tuum beneplacitum, ad omnia tam prospera, quàm adversa, propter te, toleranda, obsecrans

obsecrans tuam Bonitatem ut des mihi, omnia de manu tua paterna, libenti animo semper suscipere, & in unione omnium passionum tuarum, quamdiu duraverint, ea, cum laude, charitate, & gaudio sufferre:

PETITIO SPECIALIS

Huius Orationi serviens.

Verum quia sine te nihil facere possum, Domine, ideo rogo te, per tuam infinitam Bonitatem, & Misericordiam, per tua Sanctissima vulnera, tuumque sanguinem pretiosum, & amararam Passionem, per tuum Nomen Sanctissimum, per tua merita, tuæque dulcissimæ Matris Virginis MARIE, Sancti Iosephi, & Sanctæ Matris nostræ Terefiæ, atque Sancti Nostri Patris Joannis à Cruce, & Sanctorum Patronorum meorum, omniumque electorum tuorum, adjuva me Rex liberalissime, & gratiam concede, ut hæc proposita mea adimpleam quam perfectissime, & ut te non amplius offendam, non tibi amplius displiceam, non amplius gratiam, & amicitiam, tuam amittam, non amplius ut canis ad vomitum, ad mea præterita peccata redeam. De quibus peccatis meis, sicut potes, scis, & vis, toties, quoties, & quantum ad salutem meam expedit, cordi meo infundere, augere, conservare, & perficere digneris, verum amorosum, & maximum dolorem, zelumque ferventem ea ulciscendi, & præcavendi.

O Domine DEUS meus, da mihi semper tantam contritionem peccatorum meorum, quantam dignam noveris peccatis meis deberi: magisque in præfenti

F

punias

punias & castiges, quàm in futuro iudicio mala mea reserves, & condemnes.

Sed & nunc miserere mei DEUS, & veniam delictorum meorum plenissimam, mihi indignissimo peccatori concede. Miserere mei secundum magnam misericordiam tuam: & secundum multitudinem miserationum tuarum dele omnem iniquitatem meam; Non intres in iudicium cum servo tuo, quoniam non justificabitur in conspectu tuo omnis vivens. Remitte pœnas gehennæ intolerabiles, quas merui. Fac me tibi servum in omnibus acceptabilem, & per omnia tibi placentem.

PETITIO COMMUNIS.

Quæ potest fieri in quacumq; Oratione.

PRæterea da, Domine mi, & fac, ut serviam tibi Domino meo secundum vocationem meam; Et quoniam vocasti me ad vitam religiosam, cum obligatione tendendi semper ad perfectionem charitatis, ut per eam uniar tibi, ad quam tendere debeo, ex vi instituti Religionis nostræ, per exercitia vitæ Contemplativæ & Activæ, seu per exercitium Orationis, ac Præsentiae tuæ, & per mortificationem, ac virtutum perennem acquisitionem: ideo supplex rogo, da, ut tempus orationi designatum, cum fructu semper expendam: ut in Oratione cognoscam te, cognoscam me, & quid mihi fugiendum sit, quidve amplectendum, & quæ vitia potius extirpanda, quæ virtus magis quærenda.

Ut semper te præsentem habeam in anima, ut nunquam obliviscar tui, ut cor meum sæpius ad te eleve,

De Odio peccati.

23

elevem, ut libenter de te, & de rebus spiritualibus audiam, loquar & legam, ut omnes actiones meas, ad gloriam honoremq; tuum dirigam, & in omnibus tibi soli placere, tuamq; voluntatem perficere, & gratum tibi obsequium præstare, toto conatu studeam.

Da mihi, Domine DEUS meus, veram abnegationem mei ipsius, & perfectam mortificationem: & imprimis sensuum meorum externorum, ut in videndo, audiendo, gustando, loquendo, odorando tangendo, non meam jucunditatem, immò non tam meam utilitatem, sed potius tuum beneplacitū, & honorem intendam: deinde sensuum interiorum inquietudinem reprime in me, Domine, ut me non perturbent.

Contine in me vehementiam passionum, seu inordinatorum affectuum; dirige eos ad prosequenda vera bona, & fugienda vera mala; abstrahere eos ab illicitis, & in licitis, da ut modum servem, & aliquando, propter te, ab illis abstineam.

Fac, Domine, partem inferiorem animalem, obedire superiori parti rationali; rationem quoq; meam semper illumina, & conforta, ad gubernandam partem inferiorem, & cætera omnia, & ad resistendum tentationibus: nè, quæso, omnia, & ad tentationem, sed libera me à malo.

Da mihi veram abnegationem proprii judicii, ut proprium sensum relinquens, illud bonum, & rectum credam esse, quod tu, & Superiores mei judicaveritis. Da & voluntatis meæ perfectissimam ab-

negationem, ut semper sit conformis tuæ, & Vicariorum tuorum voluntati. Da odium amoris proprii, ut omnem fugiam commoditatem, & æstimationem, & illa amplectar, propter te, quæ sunt aspera, & ingrata sensualitati.

Vocâsti me quoq; Domine, ad exercitium virtutum, sinè quibus tibi nemo placere potest, virtutes verò acquiri non possunt, nisi prius vitia extirpentur, ad quorum extirpationem, te suppliciter rogo, ut me adjuvare digneris.

Da mihi igitur, Domine, perfectum odium & implacabilem adversus omnia vitia indignationem, veluti adversus meos capitales hostes. Da robur fortissimum, ad resistendum omnibus oppugnationibus, ac vitiis insurgentibus, ut nunquam in vitia priora relabar. Da, ut contrariis actibus virtutum vitia expugnem: videlicet superbiam per humilitatem, avaritiam per paupertatem, luxuriam per castitatem cordisq; munditiam: invidiam per charitatem: gulam per abstinentiam: iram per patientiam: acediam per fervorem: & alia vitia, per contrarias virtutes. Et fac ut sublati vitiis, virtutum acquisitioni sedulò incumbam, in quo timeo, nè sit irritus labor meus. Ideò peto, Domine DEUS virtutum, sicut potes, scis, & vis, ad tuam gloriam, & meam salutem, ut tu ipse animam meam omnibus ornare virtutibus digneris. Et imprimis orna animam meam virtutibus Theologicis, quæ à te solo nobis infunduntur. Infunde itaq; mihi fidem rectam, vivam & firmam, per quam credam

te Unitrinum DEUM esse, qui Es, & Remuneratorem esse: credam tibi, ut infallibili veritati: Credā in te amando te. Et ut vitā & factis comprobem hanc fidem meam, faciendo, quod fides dicat faciendum, & fugiendo, quod docet fugiendum, & sperando, quod proponit sperandum.

Infunde mihi spem humilem, certam & ardentem, ut sperem à te consequi peccatorum veniam, optatam gratiam, & salutarium petitionum exauditionem, tandem beatitudinem æternam.

Infunde mihi Charitatem erga te, quā te solum propter te, teq; summum bonum diligam super omnia toto corde, desiderio, affectione, & voluntate, totaq; mente, intelligentiā, ratione, & intentione: & ex tota anima, omnibusq; viribus & sensibus corporis & animæ. Infunde etiam mihi charitatem erga proximum, quā omnes tuæ beatitudinis capaces, amem propter te: hoc est, quia tu vis, & tibi placet; amem eos in te, quatenus aliquid tui sint, ad imaginem, & similitudinem tui creati, tuiq; Filii, & à te dilecti: amem eos per te: hoc est, per infusam à te in cordibus nostris charitatem ordinantem, & ad te referentem omnem alium amorem naturalem, acquisitum, rationalem, & mercenarium.

Da mihi etiam morales virtutes necessarias, ad perficiendas animæ meæ potentias, ad benè agendum, & conversandum cum proximis, ad passiones benè regendas, & componendas. Et imprimis, da mihi, Domine mi clementissime, Prudentiam, ad perficiendum intellectum meum, ut in omnibus

medium teneam, nè propter excessum, aut defectũ, actus virtutum sint mali. Da, ut in omnibus finem bonum & honestum mihi proponam: videlicet, tui solius gloriam & honorem, & beneplacitum tuũ, nostramq; salutem & beatitudinem; & in quolibet speciali opere, propriũ virtutis finem, & ad hos fines, ut per consilium bonum media opportuna inquiram, & inveniam; deinde per iudicium rectum convenientiora cognoscam, & assumam; tandem ut sollicitudinem & diligentiam adhibeã ad executionem.

Da mihi, Domine, & iustitiam, ad perficiendã voluntatem meam, ut per eam tribuam unicuique, quod suum est. Et imprimis tibi supremo Domino nostro summum honorem, seu cultum Patriæ purissimum, per Religionis virtutem, & pro peccatis meis debitam satisfactionem, per Pœnitentiam. Beatissimæ Virgini cultum Hyperdulciæ specialissimum, & omnibus Sanctis debitam Dulciæ veneratorem. Consanguineis Pietatem. Omnibus dignitate, virtute, sapientiã antecellentibus Observantiam. Superioribus meis Obedientiam. Benefactoribus Gratitude. Erga alios omnes, ut servem in dictis Veritatem, in promissis Fidelitatem, in conversatione Amicitiam vel Affabilitatem.

Præterea da mihi fortitudinem, ad perficiendũ appetitum irascibilem, ad moderandas passiones ejus, in rebus arduis & periculis, & ad superandas omnes difficultates, in omni genere virtutum. Da Magnanimitatem, ut magna, & heroica opera, propter

propter te viriliter aggrediar. Da Magnificentiam, ut illa incepta perficiam, da Patientiam, ut tristitiā non opprimar; Constantiam, ut propter difficultates & impedimenta bene agere non cessem: Perseverantiam, ut ad finē in incepto persistam: Longanimitatem, ut dilationē boni desiderati sustineā.

Insuper da mihi Domine, Temperantiam, ad perficiendum appetitū concupiscibilem, ad refrenandas passiones illius vehementes, circa sensuum delectabilia, præcipuē gustus, & tactus. Da Verecundiam & Honestatem, ut fugiam omnia turpia semper, & sequar honesta Castitatem & Pudicitiam, ut corpus meum, quod est Templum tuum, semper sit mundum & immaculatum. Da Mansuetudinem & Clementiam, ut per eas iram & indignationem cohibeam. Continentiam, ut per eam detineatur mea voluntas, nē impetum passionum sequar. Da & Modestiam ad moderandos affectus meos, & actiones omnes, & motus tam internos, quam externos, ut moderetur in me Appetitum excellentiæ, seu spem in excellentiam tendentem, per Humilitatem; Appetitum sciendi, per Studiositatem: Appetitum habendi, per Paupertatem: Appetitum loquendi, per Silentium, seu per Taciturnitatem. Deniq; ad moderandos omnes motus & gestus externos, ac corporis cultum, in visu, incessu, vestitu, ornatu, atq; commoditatibus, per modestiam morum & cultus.

O benignissime JESU, digneris quoq; me reple-
re Donis Spiritus Sancti, ut prompte sequar motio-

nem & instinctum ejus, ad heroicos actus virtutum, & æternam beatitudinem consequendam. Videlicet *Dono Intellectus*, ad mysteria fidei sanè capi-enda, & penetranda. *Scientiæ*, ad rectè judican- dum de rebus creatis & terrenis, & rectè utendū illis in honorem tuum, meamq; salutem. *Sapien- tiæ*, ad cognoscendum te, tuasq; perfectiones, & sa- nam æstimationem illarum. *Consilii*, ad invenien- dum, quid fieri oporteat, in rebus necessariis ad sa- lutem. *Fortitudinis*, ad persistendum in quocunq; bono opere inchoato usq; ad vitæ finem, & eva- gendum quæ vis pericula salutis. *Pietatis*, ad exhi- bendum cultum debitum, amorem, & officium ti- bi DEO nostro, ut Patri amantissimo, & aliis San- ctis. *Timoris* deniq; tui filialis, ut te reverear, & me tibi subducere refugiam; & ut te offendere, & à te seperari timeam.

Da mihi fructus Spiritus Sancti tui, & imprimis illos excellentissimos, qui Beatitudines vocantur; *Paupertatem spiritus*, *Mansuetudinem*, *Pium lu- ctum*, *Esuriem* & *sitim justitiæ*, *Misericordiam*, *Munditiem cordis*, *Pacem*, & *Pati* propter justitiā. Da & alios fructus ejus, qui sunt *Charitas* & *Gau- dium*, *Pax* & *Patientia*, *Longanimitas* & *Man- suetudo*, *Bonitas* & *Benignitas*, *Fides* & *Modestia*, *Continentia* & *Castitas*.

O Clementissime JESU, qui me à sæculi vani- tate conversum, ad bravium supernæ vocationis per iter disciplinæ regularis capessendum accendisti, da mihi ad Vota tibi promittenda diligenter me præ-

præparare (Professus dicat. Da mihi vota promissa) & vocationis meæ exercitia fideliter implere. Fac me igitur Superioribus meis obedire, velociter, libenter, simpliciter, hilariter fortiter, humiliter, & perseveranter. Paupertatē quoq; Religiosā sic amplecti, ut nihil prorsus mihi proprium dicam, vel sine licentia aliquando, accipiam, dem, & retineam, nihil quoq; superfluum, pretiosum, & curiosum habeam. Ex necessariis quoq; viliora appetam: immò si hæc defuerint, ut inde gaudeam. Castitatē etiam perfectē servare, ut nihil cogitatione, verbo, & opere aliquo contrarium huic Angelicæ virtuti committam.

Insuper da mihi per tuam infinitam bonitatem omnem virtutem, & gratiam, ut quod præcipis, aut consulis fideliter adimpleam, quidquid verò dissuades, aut prohibes, recusem, & fugiam. Præcipue da donum Perseverantiæ, ut nunquam per aliquod crimen à te separer, sed usq; ad mortem, & in æternum in gratia tua perseverem.

Da mihi bonam mortem, ut in te moriar, morte justorum: aufer à me nimium amorem hujus vitæ, nimium ac immoderatum mortis timorem, Da ut ita vivam, ut possim dicere cum Apostolo tuo: Cupio dissolvi, & esse cum Christo. Da veram Resignationem in tuam rectissimam voluntatem, ut quando, & quomodo disposueris, hinc abscedam. Suscipe spiritum meum gratiā tuā & charitate vestitum, ut tibi in æternum adhæream; Aufer deniq; à me, quidquid me in afflictione perfectionis detinet,

net, & efficacia auxilia ad Sanctè vivendum, & feliciter moriendum tribue.

O Rex tremende Majestatis:
 Qui salvandos salvas gratis,
 Salve me fons pietatis.
 Recordare JESU pie,
 Quòd sum causa tuæ viæ,
 Nè me perdas mortis die.
 Quærens me sedisti lassus
 Redemisti Crucem passus
 Tantus labor non sit cassus.

Hæc sunt, DEUS meus, petitiones meæ, hæc sunt desideria mea, quæ impleri cupio, & peto per miserationes tuas non solum in me, sed in omnibus quoq; proximis meis, ut semper tibi placeamus, ac in hac vita, & infutura tuo lætemur aspectu.

Petitio pro necessitatibus aliorum.

Memor etiam esto, Domine, Ecclesiæ Sponsæ tuæ, eiq; Fidem, Spem, Charitatem adauge: hottium ejus contere superbiam: extirpa omnes hæreses; populis à fide Catholica alienis, veritatis tuæ lucē infunde, eosq; adduc in ovile tuū, nè pereant tot animæ ad imaginē tuam creatæ & sanguine tuo pretioso redemptæ. Provide Ecclesiæ tuæ Præsules, & Pastores fideles, qui sollicitè vigilet, in custodia sibi commissi gregis. Da universis, quos ad Cleri, seu religiosæ vitæ statum vocare dignatus es morum ac vitæ sanctitatem, accende in eis zelū, pro honore tuo, ac proximorum salute, ut fideles, inveniantur ministri tui, ac dispensatores Mysteriorum

orum DEI Miserere Domine omnium Religionum
Sanctarum, & præcipuè hujus nostræ; tribue omni-
bus Religiosis, ut secundum suam vocationem vi-
vant, & ut Prælati verbo, & sollicitâ curâ guber-
nent: subditi verò, ut sæcularibus dent bonam ædi-
ficationem, & exactissimè Paupertatem, Castitatē;
& Obedientiam custodiant. Conserva, Domine, in
hac Religione nostra & Provincia, observantiam
regularem atq; Spiritum Sanctæ Matris nostræ Te-
resię, & Sancti primi Patris nostri Joannis à Cru-
ce: da augmentū Fratrū nostrorum: adjuva nos ad
quærendam sedulò perfectionem, eamq; obtinendā.

Supplico etiam tibi, ô Rex Regum, pro Regi-
bus, Principibus, & Magistratibus Christianis, ut
des eis pacem, & concordiam, & Zelum, & amo-
rem justitiæ, fidelem subditorum curam in fide, &
Ecclesia tuenda constantiam. Respice propitiū su-
per omnes congregationes sibi commissas: & omnia
membra Ecclesiæ clemens protege, ut quā quis vo-
catione vocatus est, in ea tibi dignè; & laudabili-
ter serviat. Da justis perseverantiam, proficientibus
fervorem, sed præcipuè peccatoribus poenitentiam.
Trahe cor eorum ad te funiculis charitatis tuæ, nō
enim venire poterunt, nisi charitas tua traxerit illos.

Exaudi, Domine, omnium vota & desideria pro
quibus orare debeo, ut fratrum meorum, parentū,
consanguineorum, amicorum, & Benefactorum no-
strorum, quibus redde centuplum & vitam æter-
nam: dirige omnes, quæso, in viam salutis æter-
næ, ut te donante tibi placita cupiant, & tota vir-
tute perficiāt.

In-

Intuere omnes tentatos, ægros, in angustiis & periculis positos. Eſto benignus conſolator, & Pater pauperum: Eſto clemens Protector omnium fidelium Chriſtianorum. Inimicis quoq; noſtris parce Domine, fac ut ament te ſuper omnia & proximos propter te, fac cum eis ſemper tuam miſericordiam, & da eis vitam ſempiternam.

Reſpice quoque, Domine, ad animas in purgatorio detentas omnium fratrum, propinquorum, & Benefactorum noſtrorum, & aliorum omniũ, quorum nulla eſt apud homines in terris memoria, nullumq; habent ſubſidium. Requiem æternam dona eis Domine, & lux perpetua luceat eis. Requieſcant in pace, Amen.

CAUTIO.

NEminem terreat, hoc tam prolixum exemplum Orationis datum. Hoc enim conſultò factum eſt, ut Incipientes videant, quomodo affectus ſuos dilatare valeant: & quia facilis erit ipsis, ex hac longiori forma breviorẽ facere, ut mox oſtendetur, quàm excompendioſa longiorẽ: cùm adhuc ignorent, quomodo hæc in re ſe gerere debeant. Nam poſſunt poſt Accuſationẽ fui, ſtatim Abominationem alicujus vitii, & dolorẽ, & reliqua facere: Gratiarũ actionẽ quoq; & Oblationẽ, & Petitionẽ, compendioſiori modo inſtituere. Aliquando etiam poſt Meditationem in Colloquio principio commemoratione facta illius beneficii DEI, quod meditando perſpeximus, Gratiarum actionem, Oblationem, & Petitionem ſubjungere, ſive longiori, ſive breviori modo.

EXEM-

De Odio peccati.

93

E X E M P L U M.

Brevius Orationis Mentalis.

De Odio Peccati.

Colloquium cum DEO.

In cujus initio fit.

Commemoratio injuria DEI. O dulcissime JESU, Judex supreme, super omnia tremende, cui ego semper maximam injuriam irrogavi, quoties te Creatorem, Redemptorem, & Benefactorem meum super omnia colendum, & amandum offendi.

Admiratio super bonitatem DEI. O quanta bonitas tua erga me peccatorem hætenus fuit! quod me in oculis tuis peccantem, patienter in terris sustinuisi, nec pro injuria tua infinita justam vindictam de me sumpsisisti.

Accusatio sui. Heu me miserum, quid ego feci, qui tam multa & gravia scelera in te DEUM meum cogitatione, verbo, & opere commisi, de quo me coram te accuso. Verè confiteor, quia multiplicata sunt peccata mea, super capillos capitis mei, quibus tuam Majestatem Sanctissimam ad iracundiam provocavi.

Abominatio. Displicent nunc mihi valdè: abominor illa, detestor, & summo odio habeo, plùs quàm omne malum cujusvis pænæ, quia sunt offensa tua. O utinam nunquam te offendissem! Utinam priùs occubuissem quàm peccassem!

Dolor de peccatis. Doleo ex amore tui, dilectissime DEUS meus, quod unquam offenderim te infinitè bonum atq; summo amore dignum.

Spes

Spes venia. Et quamvis terreant me peccata mea, & poenas æternas mihi minentur; nihilominus spero in tua infinita bonitate: quia veniam indulgebis: imò si solus ego omnium peccatorum, quæ abineunte mundo commissa fuere, reus essem, tu, benignissimæ Domine DEUS meus, ignosceres.

Desiderium fugiendi peccata. Jam desidero, ob amorem tuum, fugere omnia peccata, & pro præteritis veram agere poenitentiam. O utinam non amplius te offendam! Utinam nullum delictum committam! quod non tantum turpiter fedat animam meam, verum etiam eam cruciat, & ad balthrum præcipitat.

O si jam nunquam transgrediar mandata tua! ne tuam Divinam Majestatem injuriâ infinitâ afficiam, sicut hætenus feci.

Gratiarum actio.

ET quoniam huc usq; mihi pepercisti, nec poenis æternis, prout merui, addixisti: ideo immensas tibi, ô dulcissime JESU, gratias refero, teq; in æternum glorificare volo.

Præterea gratias tibi infinitas ago, & pro aliis innumeris immensisq; beneficiis, quæ ex momento conceptionis meæ, usq; in hanc horam de tua benignitate suscepi: & pro iis, quæ nunc, & in hoc momento temporis suscipio: ac pro infinitis, quæ usq; in finem vitæ meæ, & per totam æternitatem sum à te accepturus. Specialiter verò gratias tibi ago, pro beneficio Creationis, Redemptionis, Vocationis ad Fidem Catholicam, & Beatissimæ Vir-

ginis

ginis Religionem, ac Justificationis, Perseverantiæ in gratia tua, quam nē sæpius amittam, ab innumeris peccatis me custodisti, & Glorificationis, quam ex tua infinita bonitate expecto, & spero.

Et pro omni plenitudine bonorum. & gratiarū, atq; ipsius Divinitatis, tuæ, Sanctissimæ Humanitati communicata.

Et pro universis beneficiis ac donis, Sanctissimæ Genitrici tuæ Virgini MARIE collatis & Sancto Josepho, Sanctæ Matri nostræ Terefiæ, Sancto Patri nostro Joanni à Cruce, & aliis Sanctis Patronis meis, ac omnibus Beatis, & justis, universis quoq; creaturis, etiam damnatis,

Et pro omnibus quibuscunq; beneficiis tuis, pro quibus tu, Domine mi clementissime, vis à me laudari.

Actus Gratiarum actionis. Itaq; pro omnibus his recensitis beneficiis, gratiis, & donis, infinitas tibi gratias ago: quin infinita corde habere velim, ut, iis omnibus opulentissimam misericordiam, tuamq; charitatem, & bonitatem decantare, ac celebrare queam.

Actus Laudis. Laudo te, ex toto corde meo, Domine DEUS meus, & magno applausu benedico, exalto, glorifico, magnifico, & veneror: atq; utinam hoc absq; cessatione præstare possim semper, & in omni loco terrarum, quantum te exaltant, magnificant, honorant, honorarunt, honorabunt, ac honorare poterunt, simul omnes Sancti, & justis, omnes homines, & universæ creaturæ, quæ sunt, fuerunt, & futuræ sunt.

Actus

Actus Amoris DEI. O Dulcissime JESU, amo te, & quidquid amas, purè propter te, infinitè, super omnia, in æternum, & ultra. Simili affectu te super omnia appetio, præeligo, appeto, & quæro, tibiq; omne bonum cupio, & faveo: de omni bono tuo summopere gaudeo omne beneplacitum tuum amplector, & exosculor, illudq; exequi, omni meliori modo tibi placito, desidero.

Immò omnes pios sensus, affectus, atq; desideria, te amandi & glorificandi, ab omnibus electis tuis unquam elicitæ, aut eliciendæ, immò etiã quæcunq; possibilia, si fieri posset, optarem à me, & omnibus etiam possibilibus creaturis renovari, purè propter te, intensissimè, singulis momentis temporis, & æternitatis.

utinam ego, & omnes mecum, perfectissimè tibi per omnia placere sciamus, velimus, possimusq; in tempore, & æternitate, sicut ardentissimo desiderio, exopto.

OBLATIO.

UT autem tuæ, infinitæ charitati, & beneficiis tuis, aliquatenus reciproca gratitudine respondeam, ô dulcissime JESU, offero tibi totum corpus, animam meam cum omnibus potentiis, totum esse meum, totamq; vitam ac æternitatem meam, omnes quoq; cogitationes, verba, & actiones totius vitæ meæ, minimos quoq; cordis corporis animiq; motus nec non universa corda, quæ tibi unquam placuerunt, placent, & placebunt, *Proposita.* Præterea fidelissimè tibi servire, &
omnia

omnia peccata, ac minimas offensas tuas vitare firmiter propono; paratus mori potius, quam scienter, & ex proposito, te offendere. Statuo, nunquam transgredi mandata tua.

Decerno, ex corde intimo, cum auxilio gratiæ tuæ, universam legem tuam implere.

Volo potius quolibet bono privari, & quodlibet malum perpeti, quam à tua gratia, & amicitia ex-cidere, & tuam indignationem incurrere.

Præterea, amore tui, & zelo justitiæ, statuo dignos poenitentiae fructus facere, atq; tor, & tantas offensas tuas ulcisci, & in me, variis modis corpus meum affligendo, punire.

Petitio.

Verum quia nihil prorsus finē te facere possum, o Domine DEUS meus: ideo rogo te, per tuam infinitam bonitatem, adjuva me Rex liberalissime, & gratiam concede, ut hæc proposita mea adimpleam quam perfectissime, & ut te non amplius offendam, gratiam tuam amittam, & ut veram de peccatis meis poenitentiam, toto vitæ meæ decursu, agam.

Sed & nunc miserere mei DEUS secundū magnā misericordiam tuam, & veniam delictorum meorum plenissimam, mihi indignissimo peccatori concede.

PETITIO COMMUNIS.

Quæ fieri potest in quacunq; Oratione.

Præterea da Domine, ut serviam tibi secundū vocationem meam, & semper ad perfectionem tendam, per exercitia vitæ contemplativæ, &

G

activæ.

activæ. Da, ut tempus Orationi designatum cum fructu semper expendam; ut in ea facta proposita fideliter exequar: & ut nunquam die ac nocte tui obliviscar, sed te præsentem mihi in animo habeam.

Da mihi veram abnegationem, & mortificationem amoris proprii, voluntatis, & judicii, sensuum quoq; meorum, & passionum, præsertim **N** Da mihi omnia ad salutem necessaria. Da virtutes Theologicas: videlicet, Fidem rectam, spem firmam, Charitatem perfectam. Da & Morales virtutes, & imprimis Prudentiam, ad perficiendum intellectum meum: ut in omnibus medium teneam, finem bonum mihi proponam, media opportuna inveniam, & sollicitè exequar.

Da Justitiam, ad perficiendam voluntatem meam, ut unicuiq; quod suum est tribuam, ut, scilicet, tibi supremo Domino cultum debitum Patriæ; Sanctissimæ DEI Genitrici Virgini MARIE Hyperdulæ; & omnibus Sanctis Dulæ exhibeam. Da cor vere pœnitens, ob injurias tibi illatas: erga consanguineos pium; erga Superiores subiectum; erga benefactores gratum; erga amicos affabile, in dictis simplex, in factis verum.

Da mihi Fortitudinem, ad appetitum irascibilem perficiendum, ad moderandas passiones ejus, & ad superandas difficultates in rebus arduis, & periculis, in acquisitione virtutum.

Da & alias virtutes ad Fortitudinem spectantes, nimirum Magnanimitatem, Patientiam, Constantiam, Perseverantiam & Longanimitatem.

Insuper

Insuper da mihi Temperantiam, ad perficiendum appetitum concupiscibilem, ad refrenandas passionnes illius vehementes, circa sensuum delectabilia. Da verecundiam & Honestatem Pudicitiam & Castitatem, Mansuetudinem & Clementiam, Modestiam & Humilitatem, Silentium & Paupertatem.

Digneris me quoq; replere donis Spiritus Sancti tui, ut promptè sequar motionem ejus ad heroicos actus virtutum: videlicet dono Sapientiae, Intellectus, Consilii, Fortitudinis, Scientiae, Pietatis ac Timoris tui.

Da mihi fructus Spiritus Sancti tui, & imprimis illos excellentissimos, qui Beattitudines vocantur: nimirum Paupertatem spiritus, Mansuetudinem Pium luctum, Esuriem & sitim justitiae, Misericordiam, Munditiam cordis, Pacem, & Pati propter justitiam. Da & alios fructus ejus, qui sunt Charitas & Gaudium, Pax & Patientia, Longanimitas & Mansuetudo, Bonitas & Benignitas, Fides & Modestia, Continentia & Castitas. *Reliqua ut insuperiori exemplo, pag: 88.*

ADMONITIO.

Quia incipientium servire DEO, praecipuum exercitium est odium & fuga peccati, atq; contritio: ideo in qualibet Oratione, tam matutina, quam vespertina, debet conari in voluntate excitare hoc odium peccati, atq; dolorem de peccatis. Quare hic ap-ponuntur hanc de re exempla.

E X E M P L U M.
PRO FERIA TERTIA.

DE OUDIO PECCATI

Pro Oratione Vespertina.

HAc die proponuntur ad considerandum multæ miseriæ vitæ humanæ, quarum causa est peccatum, & idè odio summo habendum, de quo fieri potest tale cum DEO Collòquium.

COMMEMORATIO.

Quomodo DEUS ab initio liberum, ab omni miseria hominem fecit.

O Amantissime JESU, qui postquam creaveris hominem, ad imaginem & similitudinẽ tuam, posuisti eum in paradiso voluptatis, ut ibi jucundam, delitiosam, securam, longævam, & ab omnibus miseriis, curis, & æumnis liberam ageret vitam.

Admiratio. O quanta bonitas tua erga genus humanum hæc fuit! Sed infelix homo, propter maledictam prævaricationem præcepti tui, & propter peccatum, non tantum ex paradiso expelli meruit; sed etiam omnibus bonis illis, se ipsum spoliavit, atq; in multarum miseriarum, & æumnarum, infirmitatum, anxietatum, laborum, & dolorum, sollicitudinum, & afflictionum incidit abyssum.

Accusatio sui. Heu me miserum, qui cū sciam omnium malorum, tam spiritualium, quàm temporalium, omnium miseriarum atq; tuæ injuriæ causam esse peccatum: nihilominus peccare non cesso, & antea tam multa & gravia scelera in te DEUM meum commisi, de quo me coram te accuso. *Reliqua vide superius pag: 68. & pag: 93.*

EXEM-

De Odio peccati.

101

E X E M P L U M
PRO FERIA QUARTA
DE ODIO PECCATI.

HAc die fieri solet meditatio de morte cuius
causa est peccatum, & propterea odio ha-
bendum.

Colloquium Animæ cum DEO

COMMEMORATIO.

*Quòd non DEUS est causa mortis, sed homo per
peccatum.*

O Beatissime JESU! ô Clementissime Creator
noster! qui primo homini Protoparenti no-
stro Adæ, in paradiso posito præcepisti di-
cens: Ex omni ligno paradisi comede, de ligno au-
tem scientiæ boni & mali nè comedas. In quocunq;
enim die comederis ex eo, morte morieris.

Admiratio. O admirandam bonitatem tuam,
Domine, erga hominem, quem præmonuisti, ut
mortem evitaret! sed homo ingratus præceptū tuū
non custodivit: verū de ligno fructum tulit, & co-
medit, & ideo audire tuā justissimā mortis sententiā
promeruit: Pulvis es; & in pulverem reverteris.

Accusatio sui. Heu me miserum, quia quamvis
non ignoraverim, quòd peccatum, nihil generat,
nisi mortem Æternam, & nisi offensam, atq; inju-
riam tuam infinitam; tamen te offendo; & antea, tā
multa & graviora scelera, in te Dominum meum,
commisi. *Reliqua ut superius pag. 68. & pag. 93.*

E X E M P L U M
PRO FERIA QUINTA.

G₃

DE

DE ODIO PECCATI.

HAc die proponitur ad meditandum DEI Judicium, in quo strictè examinabuntur, & rigidè judicabuntur peccata nostra; proinde illa abominari, & vitare debemus.

Colloquium Animæ cum DEO

COMMEMORATIO JUDICII DEI.

O Rex tremendæ Majestatis! O Judex æquissime, & sapientissime, & severissime, qui unumquemq; nostrum judicaturus es in fine vitæ, cui reddituri sumus omnes de factis propriis rationem!

Admiratio. O Quàm strictè examinabuntur omnia opera nostra, ita ut nihil omittatur! quàm rigidè judicabuntur, hoc est, juxta rigorem justitiæ! O quàm severè punientur omnes iniquitates nostræ, scelera nostra, etiam minima delicta nostra, etiam otiosa verba nostra!

Accusatio sui. Heu me miserum, qui immemor judiciorum tuorum tremendorum, tam multa & gravia scelera, in te DEUM meum, commisi, de quo me coram te nunc accuso. *Reliqua superius pag: 69. & pag: 93.*

E X E M P L U M
PRO FERIA SEXTA.
DE ODIO PECCATI.

HAc die facile potest excitari in nobis odium maximum peccati, considerando pœnas inferni atrociissimas, & æternas, quibus puniuntur peccatores.

Collo-

COMMEMORATIO PÆNARUM INFERNI:

O Rex & Judex æquissime, qui ut satis fiat
justitiæ tuæ Divinæ pro infinita injuria, im-
mensæ tuæ Majestati per peccata creaturarū
rationalium illata, certum locum pœnarum, videli-
cet, infernum, in corde terræ instituisti, ubi omnia
scelera & peccata, per veram pœnitentiam non de-
leta puniuntur.

Admiratio. O quā atrocia ibi supplicia sunt,
quibus animæ damnatorum cruciantur iustissimè,
& cruciabuntur in æternum! verè nec oculus vi-
dit, nec auris audivit, nec in cor hominis ascendit,
quanta tormenta parata sunt offendentibus te.

Accusatio sui. Heu me miserum, qui hæc non
ignorabam, tamen te offendere, & injuriā summā
afficere, peccatis meis, per totam vitam ausus sum,
de quo me nunc accuso. *Reliqua ut supra pag:*
68. & pag: 93.

E X E M P L U M
PRO DIE SABBATI.

Eodem modo potest haberi odium peccati,
considerando, quomodo peccatum aditum
nobis ad cœlestem gloriam præcludit.

COMMEMORATIO GLORIÆ COELESTIS
à DEO NOBIS PRÆPARATÆ.

O Dulcissime JESU, ô Largitor omnium bo-
norum & Remunerator munificentissimè, qui
diligentib9 te, & fideliter serviētib9 tibi ma-

gna præmia in cœlis, atq; gloriam ineffabilem præparasti.

Admiratio. O admirandam bonitatem tuam, ex qua id factum est! Nam omnes labores nostri, fationes, & passionem non sunt condignæ, ad illam futuram gloriam, quæ revelabitur in servis tuis, ad quam maledicta peccata aditum nobis præcludunt.

Accusatio sui. Heu me miserum, cui hæc optime sunt nota, tamen nullum finem offendendi te facio, & antea tam multa & gravia scelera, in te DEUM meum, commisi, de quo me coram te accuso. *Reliqua ut supra pag: 68. & pag: 93.*

PRO DIE DOMINICO.

HAc die pro Meditatione proponuntur beneficia DEL, pro quibus peccando, summam ingratitude, erga DEUM ostendimus, & simul injuriâ infinitâ eum afficimus, atq; ideo maxime odisse peccatum debemus.

Colloquium Animæ cum DEO

COMMEMORATIO BENEFICIORUM DEL.

O Domine DEUS meus misericordissime, ô Benefactor liberalissime, a quo innumerabilia & infinita beneficia accepi, & modo accipio, & usq; ad finem vitæ, & per totam æternitatem accepturus sum. Sunt autem hæc præcipua beneficia tua, Prædestinationis, Creationis, Cōservationis, Redēptionis, Vocationis ad fidem, Justificationis Perseverantiæ, Vocationis ad Religionem, Æternæ beatitudinis, & alia innumera naturæ, & gratiæ tuæ dona.

Admiratio. O quis non obstupescet, super hanc mun-

munificentissimam liberalitatem, & ineffabilem bonitatem tuam, per quam in me ingratiſſimum olim hæc beneficia contulisti!

Accusatio sui. Heu me miserum, qui oblitus horum bonorum omnium, quæ à te accepi, tam multa & gravia scelera, in te Benefactorem meum benignissimum, commisi, & me ingratiſſimum exhibui, de quo me coram te nunc accuso. *Reliqua ut supra pag: 68. & 93.*

E X E M P L U M

De Odio Peccati

PRO TEMPORE MATUTINO.

Hoc tempore matutino proponuntur nobis ad meditandum Myſteria Paſſionis Chriſti Domini noſtri, & quoniam eorum omniũ, quæ paſſus eſt Chriſtus, cauſa fuit peccatum, ideò hæc conſiderando contritionem veram, & abominationem peccati concitare in nobis debemus.

*Colloquium Animæ cum DEO.*COMMEMORATIO EORUM QUÆ PAS-
SUS EST CHRISTUS.

O Dulciſſime JESU, ô dilectiſſime ſalutis noſtræ Amator, ô ſuper benigniſſime Redemptor noſter, qui vivens in hoc mundo, & in terra cum hominibus converſatus, in laboribus à juventute tua fuiſti, & multas in commoditates, paupertatem, vigilias, jejunia, fatigationes pertuliſti: tandem in fine vitæ, ô quanta tormenta, quantas anguſtias, quantos dolores, ſuſtinuiſti! quando in horto copioſum ſanguineũ ſudorem effudiſti, poſtea

stea à Juda tuis inimicis traditus, & ab eis ligatus, confusus, colaphis & alapis cæsus, flagellatus, spinis coronatus, cruce ignominiosâ operatus, demum crucifixus fuisti. Ecce quanta pati dignatus es in terris, tu DEUS Omnipotens, tu Dominus omnium supremus tu Rex Cœli & terræ Altissimus. At cur hoc? Certè pro peccatis nostris. Nam si homo non peccasset, neq; tu in hunc mundum venisses, quem propter scelus populi percussit, & morti crudelissimæ tradidit Pater æternus.

Admiratio. O quanta, quàm admirabilis Bonitas tua fuit, per quam hæc pati pro nobis voluisti!

Accusatio sui. Heu me miserum, qui horû nullam rationem habens, tam multa & gravia scelera, in te DEUM meum, commisi, & peccando, iterum cum Juda te inimicis tradidi, flagellavi, conspui, cruci affixi, de quo nunc me coram te accuso. *Reliqua ut supra pag: 68.*

E X E M P L U M

Orationis Vespertinæ

PRO FERIA TERTIA.

De misera seu mala vita, & de alia feliciore seu bona & Spirituali vita.

Hodie solet fieri Meditatio de miseriis vitæ humanæ. Quia est brevissima: videlicet, septuaginta, vel octoginta annorum, & amplius labor, & dolor.

Quia est incerta: nescitur enim, an in pueritia, an in adolescentia, an in senectute abrumpetur.

Quia est fragilis: cui sol, frigus, cibus, potus, & alia plurima nocent.

Quia

Quia inconstans & mutabilis; nunc benè valens, nunc imbecillis: nunc in lætitia, nunc in tristitia, nunc in prosperitate, nunc in adversitate; & quæ semper consumitur.

Quia fallax: quæ multos decipit, qui putant hanc vitam jucundissimam, cum sit amaritudinis plenissima: credunt & sperant longissimam, cum sit puncto simillima: cum sit pelagus miseriarum, amant eam, ut omnium deliciarum matrem.

Quia innumeris molestiis tum corporalibus, tum spiritualibus subjecta, propter quas totum tempus vitæ nostræ, tempus fletus & lacrymarum dici deberet. Et ideo hæc præsens mortalis vita, misera existimatur esse vita.

Sed illa omnino verè dicenda est misera vita, quam ducunt homines illi, qui malè vivunt; qui sordido multorum vitiorum sunt immersi cæno; qui prava desideria sua & concupiscentias sectantur: qui suas pessimas inclinationes, affectus, & passiones refrenare negligunt: qui quidquid libet appetitui suo perverso faciunt: quorum finis est perditio, & miseria in inferno æterna. Isti ergo homines sunt miseri omnes, miseram vitam agentes, quam effugiunt, qui ad DEUM sincero corde conversi, aliam vitam, beatam scilicet vitam, seu spiritualem vitam amplectuntur: qui pro præteritis peccatis poenitentiam veram agentes, nova totis viribus vitare satagunt: quorum summa cura & sollicitudo est, mortificare omnes sensus, & passiones suas, desideria prava & cupiditates cohibere, inclinationibus pessimis resistere,

tere, exstirpare vitia, exercitio, virtutum ac bonorum operum incumbere, & Orationi atq; Divinae familiaritati die ac nocte vacare, quod propriū Religiosorum est, quos clementissimus DEUS à sæculo abstractos, ex sua benignitate, illas miseras humanæ vitæ contemnere fecit, & ab aliis miseriis spiritualibus, quæ sunt veræ miseriæ, liberavit, & ad vitam spiritualem ex mundo vocavit. Itaq; illis præcipuè curandum est, ut hanc teneant vitam, per quam ad perfectionem charitatis pervenire debent.

Colloquium Animæ cum DEO

COMMEMORATIO EORUM QUÆ NOBIS,
CREANDO NOS PRÆSTITIT DEUS.

O Amantissime JESU, qui hominem ad ostensionem tuæ infinitæ Bonitatis, ad imaginem & similitudinem tuam condidisti, eumq; in paradiso in loco deliciarum posuisti, & ab omnibus miseriis, infirmitatibus, doloribus, afflictionibus immunem fecisti: vitam eiq; felicē, diuturnam, immortalem, atq; immutabilem tribuisti, cujus vitæ felicitatem & jucunditatem semper habuisset, si præceptum tuum, de non gustando pomo vetito, servasset. Sed ingratus homo malo cibi prohibiti desiderio seductus, tuum mandatum transgressus est: & ideo justo judicio tuo Divino, ex loco paradisi deliciosissimo à te expulsum, illa vitæ jucunditate, & felicitate privatus est.

Hinc modò experitur vitam amaritudine plenissimam, brevissimis periodis circumscriptam, nemini de ipsius duratione certam, fragiliorem vitro, multis

multis calamitatibus, doloribus, afflictionibus mutationibusq; obnoxia, & variis mortis periculis exposita, propter quæ mala, putatur ab hominibus hæc præfens vita, misera vita. Sed ego illam omnino miseram censeo esse vitam, quam homines agunt illi, qui male vivunt: qui sordido turpium vitiorum sunt immerfi cæno: qui prava desideria sua, & concupiscentias sectantur: qui suas pessimas inclinationes, & passiones refrenare negligunt: qui omne illud, quod appetitui suo perverso placet, faciunt: qui serviunt peccato, & cupiditatibus suis: isti ergo homines sunt miseri omnes miseram vitam ducentes.

Admiratio de bonitate DEI. O bone JESU, quanta bonitas tua erga me fuit, quæ me ab his miseriis liberavit, & ad vitam beatam, hoc est, vitam spiritualem, seu Religiosam ex mundo vocavit!

Accusatio sui. Heu me miserum, qui huic tanto beneficio tuo correspondere non curo: quia vitæ spiritualis exercitia, ferventi animo peragere negligo, qui more mundanorum hominum vivo, de quo me accuso coram te Domino meo. Accuso me, quia nec de præteritis peccatis dignos pœnitentiæ fructus facio, nec futura præcavere, prout debeo, diligentiam adhibeo, in quæ, nisi me tua Divina gratia protegeret, sæpius me labi necesse esset.

Confiteor, quia modicam curam & sollicitudinē habeo, circa mortificandos sensus, & passiones meas, circa prava desideria, & inclinationes coercendas, circa acquisitionem omnium virtutum, & exercitium bonorum operum.

Fateor

Fateor verè, quia familiaritatem tuam Divinam subterfugio: dum ab Oratione me levi de causa subtrahò, aut etiam in Oratione magna cum animi mei tepiditate permaneo: dum lectionem librorum spiritualium vel sermonem de rebus salutaribus fastidio: dum præsentiæ Divinæ nobis intimæ faciliè obliviscor, & per aspirationes frequentes, cor meum ad te elevare non conor:

Admiratio. O admirandam ingratitudinem meam, per quam abutor tam singulari beneficio tuo vocationis, ad hanc Sanctam & beatam vitam! O cæcitatem animæ meæ deplorandam, per quam nò video bonum salutis meæ, nec perditionem!

Confusio. Erubescò, Domine mi, quòd ego extra mundum à te vocatus, adhuc mundanus sum. Confundor valde, quòd personam & vestitum religiosum gero, sed vitam & moribus adhuc sæcularis sum.

Reprehensio. Et propterea me ipsum arguo coram te, tanquam hominem improbum, & nullius frugi, & omni pœnà dignum esse judico.

Expostulatio. O homo quid agis? qualem vitam ducis? certè similem brutis ratione carentibus: siquidem non secundum rationem, seu non secundum spiritum vivis, sed secundum carnem. Et quid inde lucri habebis, nisi pro tali vita, hoc est, mala, mortem similem, id est, pessimam? An ignoras, quid Sanctus Apostolus dicat? si secundum carnem vixeritis, moriemini: si autem spiritu facta carnis mortificaveritis, viveritis.

Execratio. Sed jam amore tui, Domine mi dul-

cissimi-

De misera & felici vita.

III

cissime, execror hanc vitam carnalem, tanquā profanam, & tibi displicentem.

Actus Odii. Jam & mihi displicet, detestor, abominor, & odio habeo illam. Utinam id pridem fecissem! Utinam Sanctē & spiritualiter semper vixissem!

Dolor. Doleo, dilectissime JESU, quia te DEUM meum summo amore dignum offendi, dum impiē vixi: doleo, quòd multa scelera in te commisi, quem nunc unice, & supra omnia diligo.

Spes. Spero tamen, ob tuam infinitam bonitatem, me veniam peccatorum meorum, & emendationem à te obtenturum.

Desiderium vitæ spiritualis, ob ejus necessitatem, utilitatem, jucunditatem & Christi Domini, Beatissimæ Virginis, & aliorum SS. exemplū. Ego autem multum desidero, priorem vitam pessimam secundum carnem deserere, & novam secundum spiritum incipere.

O si jam possim tutā conscientiā dicere: Nunc cæpi! hoc est, verè jam cæpi servire tuæ Divinæ Majestati, atq; placere, fugiendo consuetudines pessimas, & vitia inveterata, quod quidem, pro salute mea, me facere est necesse.

O utinam non segniter hanc vitam spiritualem arripiam, sinè quā perfectionis culmen attingere nullā ratione possum!

O si jam ab illa inquietudine, & amaritudine animæ meæ sim liber, quam mihi inordinati affectus, & inordinatæ passionēs hactenus afferebant,

ut

ut tandem desiderata & jucunda subsequatur pax,
in qua est locus tuus & habitatio tua Domine mi
benignissime!

O utinam, tua adjuvante gratia, ita sanctè, justè,
& piè vivam, in hoc sæculo, sicut tu propter nos
nostramq; salutem descendens de cœlis vixisti in ter-
ris, & Beatissima Virgo MARIA Mater tua, & a-
lii omnes Sancti, quorum ut sequar exemplum, ad
statum religiosum me vocasti!

Gratiarum Actio. Pro quo sis infinitè benedi-
ctus.

Præterea sis benedictus, quòd mihi hunc statum
spiritualis vitæ providisti.

Sis benedictus, quòd mihi opportunitatem bene
agendi dedisti.

Sis infinitè benedictus, quòd mihi ad emendati-
onem vitam longiorem indulgeas.

Sis quoq; infinitè benedictus, & pro aliis innu-
meris immensisq; beneficiis, quæ ex momento con-
ceptionis meæ usq; in hanc horam de tua benigni-
tate suscepi. *Reliqua supra habentur de odio pec-
cati, pag: 73. & pag: 94.*

Oblatio. Ut autem tuæ infinitæ charitati, & be-
neficiis tuis, aliquatenus reciproca gratitudine re-
spondeam, ô dulcissime JESU, cum nihil habeam,
quod tibi dignius offeram, præter te ipsum. *Reliqua
ut supra, pag: 79. & pag: 96.*

Actus propositorum. Præterea firmissimè propono,
non jam secundum carnē, sed secundū spiritum
vivere, & spiritū facta carnis in me mortificare,
pro-

prout à me exigit hæc vita Religiosa, ad quam vocatus sum.

Propono castigare in me præterita delicta mea, & nunquam deinceps animo deliberato te Dominum meum offendere, non tantum gravi, sed etiam minimo peccato.

Curabo semper à rebus terrenis, caducis, & vanis, cor meum avertere, rebus autem cœlestibus atq; salutaribus, toto corde, & animo inhærere.

Non me finam imburis sensuum oblectamentis, nec ullis cupiditatibus carnis ac desideriiis, à te summo bono abduci.

Non sequar unquam affectus in ordinatos, & appetitum, in rebus agendis: verum sanæ rationis dictamen, seu potius tuam Sanctissimam voluntatem.

Omne studium meum erit semper in vitiis extirpandis, & pravis cogitationibus coercendis.

Non patiar reliquum tempus vitæ meæ, sine bonis operibus, & sine diligenti virtutum exercitio præterire.

Volo vitare illa omnia, quæcunq; meæ saluti & profectui nocere, atq; Oculis tuis Divinis displicere possent.

Dabo operam, ut per Orationem, conversatio mea sit semper in Cœlis, ut tui nunquam obliviscar, ut de te cogitem, de te loquar, de te legam, de te audiam, tibi fideliter serviam, & omnia propter te, amorem, honoremq; tuum, atq; tuum beneplacitum faciam.

Conabor, tuâ gratiâ adjutus, in tui amore profice-

ficere semper, & præ oculis meis habere, tuam Sanctissimam vitam, & actiones, tuæq; Sanctissimæ Matris V. MARIE, atq; Beatorum omnium, ut ad exemplar eorum, meam institutam vitam.

PETITIO.

Sed quia ego infirmus sum, ut aliquid boni faciam, ideo te supplex rogo, & obsecro, per viscera misericordiæ tuæ, per tuam mortem, & Passionem, per merita, & intercessionem Beatissimæ Matris tuæ Virginis MARIE, & omnium Sanctorum, imple, Domine, hoc propositum meum, quod modò feci: corrobora hanc voluntatem meâ: adjuva me, ut reparem, quæ vitâ meâ priori destruxi, & restaurem diligenter, quæ per negligentiam amisi.

Fac, domine, ut novam, Sanctam, tibiq; placetem incipiam vitam, in eaq; usq; ad mortem perficiam. Non permittas, Domine DEUS meus, ut hoc tempus reliquum vitæ meæ, sinè fructu bonorum operum transigam. Da, ut dum tempus est, semper operemur bonum, hoc est, illud solùm, quod tu vis, quod jubes, quod tibi gratum est. Da, ut veram pœnitentiam agam, & nunquam tuam bonitatem, vel minimo peccato, deliberatâ mente offendam.

Præterea da, Domine mi clementissime, & fac, ut serviam tibi secundum vocationem meam. *Reliqua ut supra pag: 82. & pag: 97.*

E X E M P L U M
P R O F E R I A Q U A R T A .

De Contemptu sui.

Hic

Hic contemptus ut habeatur, fiat consideratio hominis mortui, cujus prior pulchritudo & decor mutatur, in turpitudinem & livorem; gloria & splendor, in abominationem & fætozem; robur & vires, in hominum contemptum; divitiæ & omnium rerum abundantia, in summam paupertatem & nuditatem: cujus corpus exanime sit esca vermium, bufonum receptaculum, nidus serpentis; quod omnes homines, etiam quicumq; amicissimi abominantur, ab eo procul diffugiunt, oculos avertunt, nares retorquent, & illud quam occysime de medio viventium tollunt, & linteo vilissimo involutum in foveam projiciunt, terrâ cooperiunt, ne retro & pestilenti odore inficiat, & interimat viventes.

Et hæc fors manet universos mortales, siue fuerint Cæsares & Imperatores, siue Reges & Principes, siue mancipia & calones siue Domini & divites, siue servi & pauperes, siue docti & sapientes, siue rudes & insipientes, omnium istorum cadavera fætent, omnium in cineres vertuntur, omniū computrescunt. Ex quorū consideratione, plurimi facti sunt mundi, & sui contemptores.

COLLOQUIUM ANIMÆ CUM DEO.

Fiat primo Commemoratio creationis primi Parentis nostri, quem Deus de limo terre formavit.

O Superamantissime JESU, qui primum hominem protoparentem nostrum, de limo terræ formasti, & ex eodem limo, seu ex pulvere terræ, universos mortales fieri, & in pulverem

post mortem reverti voluisti, ita ut siue fuerint Cæsares & Imperatores, siue subditi, & vilissimi homines &c. pulvis sint universi, & in pulverem revertantur, immò recedente anima à corpore limus modò fætidus sunt, gleba putris & sordida, esca vermium & tinearum, busonum receptaculum, serpentum hospitium, abominatio viventiu,

Admiratio de Divina Sapientia. O admirandam sapientiam tuam Divinam! per quam sic factū est, cum omnibus, hominibus, ut non gloriatur omnis caro; quia pulvis est: ut unus non inflatur super alium; quia sicut alii, ita & ipse limus est: ut nemo tantam habeat curam, sollicitudinem, & cultum carnis suæ; quia gleba sordida est: & ut qui libet nostrum agnoscens hanc suam vanitatem, vilitatem & indignitatē, nunquam audeat te DEUM suum, Creatorem suum, & Dominum infinitæ Majestatis offendere.

Accusatio sui. O me miserum! qui hucusq; totā vitā meā penē mei oblitus vixi, nec meipsū introspecti, nec ob oculos proposui, ut quis sim, verè & sincere perspectum haberem, & ideò non me ita vilem, prout sum reputavi, & me ab aliis, vel minimo indicio vilipendi, sæpius ægre tuli: ideò me cæteris prætuli, & digniorem aliis existimavi; jam verò subiici cæteris nolui: ideò honorari ab aliis volui, sed aliis honorem exhibere grave duxi: & quod pejus est, eò stultitiæ deveni, ut ego adeò vilis homo ausus fuerim contra te DEUM, & Dominum insurgere, & peccando tuæ Divinæ Majestati me opponere, ac tuā jussa contemnere, tuamq; Sanctis-

simam voluntatem nihili facere, finē debito honore, & timore, in conspectu tuo, me gerere, non te revereri, non me coram te humiliare, non tibi plenē subijci.

Admiratio de nostra Superbia. O stupendam meam stultitiam, & cæcitatem, vel potius, ô stultam meam superbiam & elationem, per quam obcæcatus, vilitatem meam non cognovi, illiusq; immemor fui, & ideò hæc mala tam gravia feci.

Confusio. Erubescio ob hanc fatuitatem meam, quòd ego pulvis & cinis, sicut & cæteri homines, supra gemmas & lapides pretiosos, hoc est, supra bonos homines, me extollo: quòd ego limus & terra, contra Cælum, seu contra te Dominum Altissimum, caput meum erigo.

Expostulatio. Quid lucri habes, ô homo insane de hac tua elatione? an ignoras, quòd omnis homo, qui se exultat, humiliatur, & qui contemnit alios, ab omnibus contemnitur, & qui se extollit, à Domino DEO deprimitur, atq; in barathrum deijcitur?

Execratio. Exsecror, Domine mi benignissime, omnē animi elationem; quia sublimissimæ tuæ Majestati est contraria; quia est tibi injuriosa, ingrata, & odiosa; quia est origo omnium scelerum, & offensarum tuarum.

Odium Elationis, & Dolor & Spes. Jam illam propter te abominor, detestor, & summo odio habeo; & doleo amorem tuum, quòd unquam offendi te DEUM meū, summo honore & amore dignissimū, mea elatione, & aliis innumeris peccatis. Sed quia

infinitè major est bonitas tua, quam mea malitia, & peccata: idè spero me à te venià, & emendationem obtenturum. Ego autem, tuo fretus auxilio Divino, quod humiliter peto, & in quo solo confido. nolo te amplius hoc scelere, & aliis omnibus offendere.

Amor & Desiderium contemptus sui. Jam mihi placet contemptus, mei ipsius, Jam desidero meipsum vilipendere, contemnere, & nihili facere, & ab omnibus nihili æstimari, & contemni; jam verò alios omnes homines magnificare mihiq; præponere.

O utinam id, quod in votis habeo, fiat! ut ego secundum æquitatem, & justitiam, omnibus debitum honorè, mihi verò omnes, prout dignus sum, contemptum exhibeant.

Utinam aperiantur oculi animæ meæ! ut verè agnoscam indignitatem meam, nè super id quod sum, me extollam, & animam meam perdam.

O si jam clarè sit mihi notum! quod contemptus, est magnus honor, corà te, & Angelis Beatis.

O si jam ex corde me vili pendam! ut per hoc tibi placeam, & in hoc tuam Sanctissimam voluntatem adimpleam, quam declarasti; dicens. Discite à me, quia mitis sum & humilis corde.

Gratiarum Actio.

PRo quo sis millies, & infinities benedictus. Gratias tibi ago, Dulcissime Domine DEUS meus; quia me superbum, & elatum hominè, cum Lucifero superbissimo, in infernū præcipitem non dedisti: & quia hucusq; vitam ad poenitentiam
&

& bene agendum mihi concessisti, mortemq; distulisti. Præterea infinitas tibi ago gratias. ô misericordissime JESU, & pro aliis innumeris, immensisq; beneficiis tuis, quæ ex momento conceptionis meæ, usq; in hanc horam, de tua benignitate suscepi. *Reliqua habentur supra. pag: 73. & pag: 94.*

OBLATIO.

UT autem tuæ infinitæ charitati, & beneficiis tuis, aliquatenus reciproca gratitudine respondeam ô dulcissime JESU, cum nihil habeam, quod tibi dignius offeram, præter te ipsū. *Reliqua ut supra pag: 79. & pag: 96.*

Actus propositorum. Præterea firmissimè statuo penitentiam agere, pro mea elatione, & omnibus delictis meis, quibus te infinitum bonum totâ vitâ offendi.

Volo semper præ oculis habere vilitatem meam, & sic de me sentire, quod nihil sum aliud nisi cadaver fætidum, & dignum, ut illud omnes abominentur.

Abstia me, ut me aliis unquâ præferam, memor, quod æqualiter ego sum pulvis & cinis, sicut aliî omnes.

Propono mortis memoriam habere semper, & sic me ab elatione, & omni peccato retrahere: quia tu dixisti per Prophetam: Memorare novissima, & in æternum non peccabis.

Nolo unquam oblivisci, qualis sim post mortē futurus; nimirum, esca vermium, bufonum ludibrium, hominum abominatio: ut justam agnoscam rationem, cur vilipendi, & contemni ab omnibus desiderare debeam.

Fugiam delicatè nutrire, aut molliter vestire corpus meum, vel nimiam curam ipsius habere, utpote rei vilissimæ, quod nihil aliud est, quàm sacculus omnis immunditiei abominabilissimæ.

Recordabor semper vanitatis meæ & vilitatis, ut non me supra id, quod sum, extollam.

Gaudebo semper, si quando alii mecum tanquàm cum omnium vilissimo processerint.

Conabor hilarem vultum exhibere erga illos, quicumq; mihi exprobraverint indignitatem meam.

Volo semper superiorem locum aliis cedere, tanquam dignioribus, & omnes honore prævenire.

PETITIO.

Sed quia ego prorsus infirmus, & impotens sum &c. *ut supra, pag: 81. & pag: 97.*

Per tuam infinitam bonitatem obsecro, Domine mi benignissime, porrige mihi dexteram cælestis auxilii, ut, quod te inspirante proposueram, fideliter adimpleam. Da mihi gratiam tuam, sine qua nihil possum, ut hanc veritatem, quam cognovi, de mea vilitate, vanitate, & indignitate, custodiam: & defectus meos emendare, atq; pia desideria meâ perficere, omnem quoq; elationem, superbiam, & peccata, tuamq; offensam evitare possim. Da obitus mei præsentem memoriam, ut tempestivè domui animæ meæ disponam.

Præterea da Domine mi clementissime, & fac, ut serviam tibi, secundum vocationem meam. *Reliqua ut habentur superius in Exemplo Orationis pro Feria Secunda, pag: 82. & 97.*

EXEM-

De Timore DEI.
E X E M P L U M
Orationis Vespertinae.
PRO FERIA QUINTA.
De Timore DEI.

121

TImor DEI alius est *Servilis*, alius *Filialis*, *Servilis* est, duplex. *Primus* est, quo aliquis timet poenam: hoc est, quo aliquis timet offendere DEUM, nè ab ipso puniatur, & *hic timor est proprie Servilis*. *Alius* est, quo aliquis timet privationem mercedis: hoc est, quo aliquis timet offendere DEUM, nè ipsum excludat, à Regno Cœlesti: & *hic timor est Mercenarius*. *Filialis timor* est quoq; duplex *Primus* dicitur *Initialis*, quo aliquis ita timet DEI offensam ut simul etiam timeat poenam: qui timor est *Filialis* imperfectus: vel mixtus ex timore filiali & servili. *Secundus* est *proprie Filialis*, quo aliquis timet solam DEI offensam, ex quo timore fugit omne peccatum: idè, quia est offensa DEI summè boni, & summè dilecti, à quo etiam timet separari, & gratiâ ejus excidere. Incipiunt autem homines timere DEUM primo timore *Servili*, deinde *Mercenario*, hinc procedunt ad timorem *Filialem Initialem*, postea ad verè *Filialem*, in quo usq; ad finem vitæ perseverare debemus.

Et quoniam timor servilis est bonus & necessarius: quia est initium salutis, melior autem *Filialis initialis*: idè adhuc timorem utrumq; habendum, multum juvabit nos consideratio tremendi iudicii DEI, prout docet nos S. Basilii in Psal. 33.

Hj

Ti-

Timor, inquit, salutaris, & timor sanctificationem faciens, qualis sit, vis exponam? cum ad peccatum aliquod progredi voles, cogita mihi horrendum illud, & non ferendum Christi iudicium,

Sunt autem necessario considerandæ nobis iudicii Divini hæ circumstantiæ: *Quis, Quid, Quomodo.* Primo *Quis iudicabit?* nimirum, Iudex Sapientissimus. Iustissimus, Potentissimus, Severissimus, Terribilissimus, & summe metuendus. Secundo *Quid iudicabit?* Omnia verba, cogitationes, & opera totius vitæ nostræ, omnem transgressionem legum, mandatorum, ac voluntatis suæ Divinæ, transgressionem Votorum nostrorum, Regulæ, Constitutionum Religionis, & Observantiæ regularis: omnes negligentias, omissiones, & minus rectas intentiones: omnium beneficiorum, talentorum, atq; donorum DEI abusum: & alios minimos quoque defectus, & imperfectiones. Tertio. *Quomodo iudicabit?* Verè strictè examinabit omnia: hoc est, minima quæque, Præterea rigidè iudicabit: hoc est, secundum rigorem iustitiæ suæ Divinæ. Insuper severè puniet: hoc est, supra omnem nostram opinionem.

COLLOQUIUM ANIMÆ CUM DEO.

In principio ejus ponitur Commemoratio Iudicii:

Quis, Quid, Quomodo nos iudicabit.

O Iudex Sapientissime, Domine DEUS meus, quem nemo fallere potest. Potentissime, cujus voluntati & potentiæ nemo Resistere valet: iustissime, qui nullius personam accipis, & nul-

nullum peccatum impunitum relinquis; Supreme à quo appellare non licet: Patientissime, qui peccata nostra dissimulas, & ad pœnitentiam longanimitè nos expectas; Severissime erga omnes superbos, & pœnitere nolentes: Terribilissime, & summè metuende, in cujus manus incidere horrendum est, qui omnia verba cogitationes, & opera, totius vitæ meæ, omnem transgressionem legum, mandatorũ, ac voluntatis tuæ, omnes negligentias, omissiones, & minus rectas intentiones, omnium beneficiorum talentorum, atq; donorum tuorum abusum diligenter expendes, & rationem horum universorum à nobis requires: & cuncta strictissime examinabis; hoc est, minima quæq; omnia rigide examinabis, id est secundum rigorem justitiæ: omnia severe punies; hoc est, supra omnem opinionem nostram.

Admiratio. O quàm stupenda, quàm tremenda sunt judicia tua Domine! O quis hominum non expavescet? Quis ad memoriam tui tremendi judicii horrore non concutietur? Quis te tam terribilem & severum Dominum non timebit? Quis amplius te offendere, & quod tibi displicet attentare præsumet? Quis absq; sancto timore tuo vivet?

Accusatio sui. O me infelicem! qui sæpius immemor judiciorum tuorum fui, qui raro te districtum Judicem mihi ob oculos mentis proposui; non consideravi, quod de te Propheta Nahum enarravit: Quia tu es DEUS æmulator, & ulciscens Dominus in hostes tuos, & irascens ipse inimicis tuis. Ante faciem indignationis tuæ quis stabit? & quis resistet
in

in ira furoris tui? indignatio tua effusa est ut ignis, & petrae dissolutae sunt à te. Sed quia haec in animo expendere non curavi; ideo absq̃ timore tuo vivens multa scelera commisi, tuam legem Divinam conculcavi, tua mandata praevaricatus sum, tuam voluntatem Sanctissimam contempsi. Non sum veritus peccare, timendo poenam à te tremendo Iudice mihi infligendam: vel timendo culpam & offensam tuam: vel timendo privationem gratiae tuae & gloriae, ac aeternam à te summo bono separationem: unde omnis timoris expers fui.

Admiratio. O admirandam meam malitiam, per quam, memoriâ tui tremendi iudicii saepe ab anima mea exclusâ, te offendere non expavi.

Confusio. Propterea confundor, & erubescor, ob tantam rei indignitatem, quod ego tam vilis creatura, contra te Dominum altissimum, in cujus conspectu etiam columnae Caeli contremiscunt, saepius insurrexi.

Reprehensio sui. Idcirco me acriter arguo, & reprehendo coram te, tanquam hominem impium & sceleratum, meq̃ poenis aeternis dignum esse iudico.

Expostulatio. Vide nunc ô anima mea, quomodo peccando in DEUM & Dominum tuum, thesaurizasti tibi iram DEI, in die irae, & revelationis iusti iudicii ejus, qui reddet unicuiq̃ secundum opera ejus? An ignoras, quia tribulatio & angustia praeparata est, in omnem animam hominis operantis malum, ut nos monet Sanctus Paulus Apostolus.

Exse-

Exsecratio. Exsecror, Domine mi, hanc meam audaciam, præsumptionem, & tui timoris oblivionem; quia hæc sunt contra honorem tuum. Exsecror simul & omnes iniquitates & peccata ob hunc defectum timoris tui commissa, tanquam maledicta, atq; tuæ bonitati opposita.

Abominatio seu Odium. Displicent mihi hæc omnia; quia tibi displicent. Abominor illa; quia sunt offensa tua. Utinam te nunquam offendissem! Utinam semper te DEUM meum, ac Dominum supremum pertinuisssem!

Dolor. Doleo nunc vehementer, ex puro amore tui, quòd unquam offenderim te infinitè bonum. Doleo quòd honorem debitum non exhibui tibi.

Sed quia major est misericordia tua, quàm iniquitas mea; ideo spero me à te, veniam omnium peccatorum meorum, ac emendationem: vitamque æternam, obtenturum. Ego autem nolo te amplius offendere, tuâ Divinâ gratiâ adjutus quam humiliter peto, & in qua sola confido.

Desiderium Timoris DEI. O superdilectissime Domine JESU, jam placet mihi vehementer timor tuus. Desidero ex toto corde meo in hoc timore tuo Sancto vivere semper. Verè enim justum & æquum est ut timeam te tremendum Judicem, ut servus bonus. Verè decentissimum est, ut timeam te Patrem meum piissimum, ut verus Filius: Verè convenientissimum est, ut timeam te Dominum meum Altissimum, Potentissimum atq; Supremum, sicut te timet Cælum. & terra, & omnia quæ in eis sunt: timent

timēt Angelicæ potestates: timent omnes Sancti: timent & Principes tenebrarum.

O utinam hic timor tuus, Domine nunquam recedat à corde meo, adeò mihi ad salutem necessarius, & summopere mihi utilis! tum ut retrahat me ab omni opere malo, & offensa tua: tum ut fugiã quidquid displicet tuæ Divinæ Majestati: tum ut mandata tua velim nimis: tum ut misericordia tua, Domine, sit semper super me, sicut promisit mihi de te servus tuus fidelis David: dicens. *Psalms: 117.* Misericordia Domini ab æterno, & usq; in æternum, super timentes eum. Utinam igitur juxta beneplacitum tuum timeam te, ut misericordiam tuã inveniã!

Gratiarum Actio.

Sed hæc Misericordia tua est magna, per quam sinẽ timore tuo me viventem, & te offendentem tam diu tolerasti, pro quo sis infinities benedictus. Sis benedictus, quòd non me hætenus ad iudicium tuum vocasti, & reddere rationem nondũ jussisti, ut interea ego me ipsum iudicem, & severe puniam.

Insuper sis infinities benedictus, & pro aliis innumeris immensisq; beneficiis tuis. *Reliqua ut suprà pro Feria secunda, pag: 73. & 94.*

OBLATIO.

Hujus Exemplum habetur suprà pag: 79. & 96. cui addatur hæc specialis Oblatio seu Proposita.

Præterea firmissimè statuo servire tibi Domine meo

meo in timore, & exultare tibi cum tremore.

O DEUS meus, timeo te; quia potens es mittere in gehennam & in æternum me à te exulem efficere: simul tamen protestor; quòd quamvis nulla mihi esset propter peccatum inferenda pœna, adhuc me ab illo abstinere; nè Divinam tuâ Majestatem offenderem.

Timeo te; quia tu Dominus meus es; & quia dixisti: Si ego Dominus, ubi est timor meus.

Timeo te; quia nescio an odio, an amore dignus sim.

Timeo te; quia incomprehensibilia sunt judicia tua, Domine, & investigabiles, viæ tuæ, ut nesciam, quid de me sit futurum.

Timeo te, non ut servus emptitius ob pœnam, sed ut filius charissimus, nè tuam Divinam offensam incurram.

Timeo te, nè à te separer, in quo omne bonū est.

Timeo te timore reverentiali, & instar Beatorū, revereor infinitam tuam Majestatem, ac Omnipotentiam, ex toto corde me tibi subdens, ac me velut nihilum in conspectu tuo agnoscens.

Scio, Domine mi, quòd peccatum maximū malum tuum; ideò ad quodlibet exhorrescere statuo, illudq; magis timere, quàm mortem, aut ignominiam, aut ipsam gehennam. Nolo, Domine mi Altissime, aliquid, quòd tibi displicet, committendo te offendere.

O Domine DEUS meus, qui dixisti per Prophetam: Qui timet DEUM, nihil negligit, & membra,

bra, & sensus, & linguam ab omni actu illicito cohibet: ideo & ego sic te timere volo.

Quando quidem qui timet te Dominum in mandatis tuis volet nimis, eodem modo te timebo semper, ut nunquam transgrediar mandata tua, sed illa adimplere, quàm perfectissimè conabor.

PETITIO.

Verùm quia sinè te nihil prorsus facere possum, Domine: idcirco rogo te per tuam infinitam Bonitatem. *Reliqua ut supra pag:*

31. *quibus hæc addantur.*

Adjuva me, Rex benignissime, ut te supremum Dominum reverear; ut judicia tua horreâ tuâ offensam pertimescam; quidquid tibi displicet fugiam; tua mandata fidelissimè adimpleam; & ut cum timore, & tremore me semper in oculis tuis geram. Confige, Domine, timore tuo carnes meas, à iudiciis enim tuis timui. Non intres in iudicium cum servo tuo: quia non justificabitur in conspectu tuo omnis vivens. Delicta juventutis meæ nè memineris, Domine. Quis novit potestatem iræ tuæ, & præ timore tuo, iram tuam dinumerare? Domine, nè in furore tuo arguas me neq; in ira tua corripas me.

His addatur Petitio communis, quæ supra habetur. pag: 82. & 97.

E X E M P L U M

Orationis.

PRO FERIA SEXTA.

De Pœnitentia interna & externa, seu spontanea afflictione sui, & Mortificatione.

Hac

HAc die proponuntur ad meditandum Poenæ inferni atrocissimæ, gravissimæ, & in omnē æternitatem duraturæ. Istæ autem poenæ sunt duæ: *Pœna sensus* quâ damnatorū sensus omnes tam externi, quam interni sustinebunt: & *Pœna Damni*, quæ est privatio Visionis DEI. Ex quarum poenarum consideratione debemus excitari ad severam Poenitentiam, & Mortificationē corporis.

COLLOQUIUM ANIMÆ CUM DEO.

In cujus principio damnatorum Poenæ Commemoratio ponitur.

O DEUS meus, supreme Domine, Iudex æquissime, cujus recta sunt judicia: qui sicut præmia æterna præparasti bonis in Cælis; ita malis supplicia sempiterna in inferis; & quæadmodum nec oculus vidit, nec auris audivit, nec in cor hominis ascendit, quæ præparasti diligentibus te: simili modo quæ præparasti offendentibus te: nimirum, *Pœnam sensus*, quâ omnes sensus torquebuntur; & *Pœnam damni*; seu exclusionem à bonis æternis, à Regno cœlesti, & dulcissima visione tua: pro quibus infernum creasti latum sinē mensura, profundum sinē fundo, plenum ardore incomparabili; ibi miseria, ibi tenebræ, ibi ordo nullus, ibi horror æternus, ibi perpetuus fletus, & stridor dehinc, ibi fames inextinguibilis, sitis insatiabilis, morsus aspidum, & draconum crudelium, intuitus dæmonum & larvarum horribilium, ibi nulla spes boni, nulla desperatio mali.

Admiratio. O clementiam admirandam tuam,

I

Domi-

Domine mi benignissime, per quam nondum his malis me sceleratum hominem involvisti: necdum in barathrum inferni horrendum detrustisti: neq; tortoribus crudelissimis me tradidisti: nec æternis gehennæ ignibus, ac infinitis cruciatibus quos per infinita peccata promerueram, me deputasti: expectando, cum tanta tua longanimitate, meam ad te veram conversionem, & pœnitentiam, atq; perfectam vitæ emendationem.

Accusatio sui. Heu me hominem insanum, faxis & petris duriorem, qui sciens me illos æternos cruciatus, innumeris sceleribus meis promeruisse, non ignorans tantam acerbitatem pœnarum inferni mihi peccatori præparatam esse, si dignam pœnitentiã non egero, prout debeo. Nondum tamen veram pœnitentiam ago, prout debeo. Nam ubi sunt lacrymæ, ubi gemitus, ubi jejunia, ubi vigiliæ, ubi afflictio & congeminata corporis mei castigatio? si enim per quæ quis peccat, per eadem puniendus est; si per visum quis offendit te Dominum suum potētissimum, vel si per auditum, gustum, odoratū, & tactum, vel per abominabile corpus suum, iisdem sensibus & corpori pœnam convenientem, seu pœnitentiam indicere debet; de quo ego me coram tua Divina Majestate accuso, quia id non facio. Sed post tot crimina, quæ per sensus meos commisi, & te Dominum meum offendi sensus meos freno mortificationis non retineo, nec à placitis eorum objectis cohibeo: corpus quoq; meum, auctorem multorum scelerum à me perpetratorum, adhuc indul-

gen-

genter tracto, omnes ei commoditates quæro, & nè quid molestum patiatur procuro; quâ in re, quid aliud ago, nisi pabulum ignibus inferni sempiternis præparo.

Admiratio. O quis non obstupescat super hanc meam dementiam, & à recta ratione defectionem? eò quòd negligam opportunitatem, quæ mihi nunc à te Clementissimo Domino datur, effugiendi illa gehennæ tormenta, si modò punirem in me, quod in inferno puniendum esset.

Confusio. Erubesco Domine, DEUS meus, & ingenti pudore suffundor, dum perspectum habeo tã gravem meum abusum tuæ Divinæ patientiæ supra me & adeò diuturnæ expectationis meæ pœnitentiæ.

Reprehenfio. Unde jure meritò me arguere, & reprehendere cogor, tanquam hominem iniquissimum, qui læsum tuum jus meis peccatis per pœnitentiam veram resarcire, non satago, nec pro injuria infinita, quam tuæ Majestati peccando irrogavi, satisfacere conor.

Expostulatio. O anima mea quid agis? quid moraris? quamdiu cæcuties? an pericula, & maxima tua damna non vides? ecce peccata tua te ad infernũ trahunt, & in ignẽ æternũ compellunt: ecce jã infernus fauces aperit, ut te devoret: ecce hostes tui, qui æternam mortem tibi machinantur jam te comprehendunt, ut te in abyssum inferni detrudãt: evigila igitur, & te ipsam punias, castiges, mortifices, ut per infinita sæcula non puniaris.

Exsecratio. Exsecror, Domine hunc teporem in castigando & affligendo corpore meo, & exercenda mortificatione mei ipsius; exsecror illum, utpotè justitiæ Divinæ contrarium: sit jam anathema apud me.

Abominatio. Abominor illum ob amorem tuū.

Dolor. Doleo, quòd dignos fructus pœnitentiæ pro tuis offensis nondum egi, propter te, quem nunc amo super omnia. Doleo quòd justam vindictam pro tua injuria de me usq; modo non sumpsi. Insuper doleo, quòd offenderim te, infinito amore, & honore dignissimum gravissimis & innumeris peccatis meis, totā vitā meā.

Spes veniæ. & quamvis me perturbet gravitas, & multitudo iniquitatum mearum: tamen solatur me magnitudo misericordiæ tuæ, & multitudo miserationum tuarum, ad quas refugio, atq; spem meam totam in eis colloco, firmissimè sperans me à te veniam, & emendationem, tuūq; Divinum auxiliū ad seriam pœnitentiam internam & externam seu ad veram cordis compunctionem & mei corporis afflictionem obtenturum.

Desiderium pœnitentiæ. Jam, dulcissime DEUS meus, desidero vehementer me totum pœnitentiæ exercitiis variis, & mortificationis dare, & sic injurias in me vindicare.

Opto ex animo crucis mortificationem jugiter in meo corpore, pro tui nominis honore, & pro delictis meis, sicut justum & æquum est portare.

Cupio pro pœnis æternis, quas merui, toto vitæ
meæ

meæ decursu, temporales pœnas propriâ sponte salutis meæ causâ subire.

O si mihi hæc daretur facultas, ut cum Propheta David cinerem tanquam panem semper manducarem, ut potum meum cum fletu miscerem: ut non tantum media nocte surgerem ad confitendum tibi, sed totam noctem in Orationibus, in gemitu & planctu, in castigando corpore meo ducerem, & lacrymis meis stratum meum, pro tuis, Domine DEUS, offensis, rigarem!

O si possem, exemplo Beatæ Mariæ Magdalenæ verè pœnitentis, in horrido antro aliquo me includere, & ibi reliquum vitæ meæ tempus, in lacrymis, in vigiliis, & jejunis transigere!

Paratus sum, Domine mi, antiquorum Eremitarum more, in desertis, & solitudine, cum draconibus & basiliscis, cum leopardis & bestiis ferocissimis habitare, & ibi in fame & siti, in frigore & nuditate, in ciliciis & disciplinis vivere.

Hæc sunt, Domine DEUS meus, vota mea, hæc desideria, per quæ tibi summopere placere desidero, tuumq; mandatum ad implere: qui dixisti. Pœnitentiam agite, appropinquavit enim Regnum Cœlorum.

Gratiarum actio.

GRatias tibi ago infinitas, benignissime JESU, pro tam svavi mandato, nobisq; ad vitam æternam consequendam necessario. Præterea gratias ago tibi, quòd tam longanimiter, ut verè pœnitentiæ meæ opera agerem, expectasti: quòd ad hoc, & tempus, & opportunitatem, & statum,

& locum competentem mihi providisti: quòd non me ligatis manibus projecisti in tenebras exteriores, tibi erit perpetuus fletus, & stridor dentium: non me cum maledictis misisti in ignem æternum: non me infensissimis hostibus meis flammis infernalibus cruciandum demandasti.

O quàm multi criminum meorum focii jam atrocissimas exolvunt pœnas in inferis! o quàm multi pro paucioribus & levioribus peccatis torquentur nunc immanissimè à nostris inimicis. Et ego adhuc sum liber ab omnibus. Et unde hoc mihi?

O clementiam & benignitatem tuam infinitam erga me peccatorem! An non meritò te amare ex toto corde tam bonum Dominum debeam? an non iustis de causis, prorùpere in laudes tuas, & gratiarum actiones fit me necesse?

Benedictus sis, Domine DEUS meus, in æternum; quia benignus & misericors es super malitià meam, & non fecisti mihi secundum peccata mea, sed secundum multitudinē misericordiarum tuarum, me ab æterna damnatione præservasti.

Gratias igitur tibi ago millies, centies millies, & infinities pro his, & pro aliis innumeris, immensisq; beneficiis tuis, quæ ex momento conceptionis &c. ut *suprà*, pag: 73. & 94.

OBLATIO.

HÆc fieri potest, ut *suprà* habetur; pag: 79. cui addantur ista Proposita.
Præterea firmissime statuo vitare omnia peccata, etiam minimas offensas tuas: omnem trāsgressionem

sionem mandatorum tuorum, legis, ac voluntatis tuæ Divinæ; omnem ingratitudinem, ac infidelitatem.

Volo contra me ipsum insurgere: volo mihi indignari, & irasci, & tuâ injuriam, variis corporis mei afflictionibus, in me ulcisci.

Certè mihi non parcam. Inimicus ero mihi propter tuam offensam. Faciam me contrarium mihi; quia contrarius fui tibi, & meipsum castigando, siam mihi met ipsi gravis.

Vivet ab hinc in amaritudine anima mea, quæ prius, propter sua oblectamenta, offendit te.

Volo, ut pœniteat animam meam vitæ meæ præteritæ pessimæ.

Et quia per excessum sensuum meorum sæpius deliqui: ideo hos in me punire propono, cohibendo eos, ab omni vanitate, eisq; omnia oblectamenta subtrahendo.

Dabo operam refrenare semper passiones meas, & affectus meos, nè ferantur ad illicita; & à licitis aliquando, ob amorem, honoremq; tuum, abstinere, & in usu illorum necessario, nè sit aliquis excessus, modum tenere.

Insuper pro transgressione legum, ac mandatorum tuorum, voluntatisq; tuæ Divinæ, & pro omnibus delictis, atq; peccatis meis dignos fructus pœnitentiæ facere, firma & integra voluntate decerno.

Immò centies me crucifigi permittam, & in quolibet corporis mei articulo specialem pœnam sentire vellem, ad ultionem peccatorum meorum, quibus læsi honorem tuum.

Nihil est tam durum, nihil tam asperum, tã sensui meo, & voluntati contrarium, quod non subire paratus essem, ut injuriam, quam tuæ Bonitati feci, resarcirem.

At infirmus sum, Domine mi benignissime; carnem fragilem gesto; vires corporis impares desiderio habeo: ideò non quantum vellem, sed quantum potero, tuo fretus auxilio, tantum pœnarum, & doloris, ad satisfactionem & ad solvendas inferni, quas promerui pœnas, assumere conabor.

PETITIO.

Sed quia sine auxilio tuo Divino, nihil possum; non sum, Domine, sufficiens sine te aliquid boni cogitare, multo magis aliquid boni præstare: ideò pulso precibus meis supplex viscera misericordiæ tuæ, ut ad exequenda hæc proposita mea, & desideria complenda, dexteram Cœlestis auxilii tui mihi præstendere, & me ab æterna damnatione eripere digneris, sicut hætenus fecisti.

Nè, quæso, tradas bestiis infernalibus animam meam consistentem tibi, & tuo sanguine pretiosissimo redemptam. Nè recorderis iniquitatum mearum: cito anticipent misericordiæ tuæ, & ego misericordias tuas in æternum cantabo. Domine, hîc me ure, hîc seca, & in æternum parcas, sicut in tua infinita bonitate spero.

Interea dum spiritum in vivis duco, supplico tuæ Divinæ Majestati, da, tu serviam tibi Domino meo, prout exis à me, nimirum, juxta regulas, vocationis meæ. *Addatur Communis Petitio, ut supra,*
pag. 82. ac 97. EXEM-

E X E M P L U M

Orationis Vespertinae.

PRO DIE SABBATI.

De Puritate Cordis.

HAc die solet proponi ad considerandū Gloria cœlestis. Itaq; considerando magnitudinem præmii vitæ æternæ, quod Sanctus Apostolus describit, dicens: nec oculus vidit, nec auris audivit, nec in cor hominis ascendit, quæ DEUS præparavit diligentibus se. Præterea considerando, quod vita æterna consistit in clara Visione DEI, teste Beato Joanne Apostolo: Hæc est, inquit, vita æterna, ut videant te: ad quam visionem DEI soli admittuntur, qui sunt mundo corde, ut ipsemet Christus Dominus noster nos docuit, dicens: Beati mundo corde, quoniam ipsi DEUM videbūt: facile cognoscere unusquisq; potest, munditiem, & puritatem cordis esse necessariam ad vitam æternā, & gloriam Cœlestem consequendam; quæ cordis puritas requirit pœnitentiam, & lacrymas, fugam peccatorum & occasionum, extirpationem vitiorum, abstractionem affectuum & amoris à rebus temporalibus & creatis, requirit quoq; rectam intentionem.

Itaq; ex consideratione istorum, debemus excitare in nobis desiderium, & curam puritatis cordis.

COLLOQUIUM ANIMÆ CUM DEO

Fiat primo Commemoratio, quod creati sumus ad claram Visionem DEI in Cœlis, ad quam pervenitur per Puritatem cordis.

O Superamantissime JESU, qui nos ab æterno amasti, & tuæ beatitudinis participes facere proposuisti, ac propterea nos ad imaginem, & similitudinem tuam, ejusdem gloriæ tuæ capaces, & tuæ claræ visionis creasti, & ad hanc consequendam, media nobis providisti, & ostendisti, inter quæ, Puritatem nobis commendasti, dicēs: Beati mundo corde, quoniam ipsi DEUM videbunt: ut hujus puritatis specialem curā haberemus, eāq; amaremus, & quæreremus.

Admiratio. O bonitatem admiratione summa dignam! cui non sufficiebat nos ex abyſſo nihili educere; & ad gloriam illam sublimem cœlestem destinare, sed quomodo illud summum bonum deberemus obtinere, nos edocuit.

Accusatio sui. Heu me miserum hominem; cujus cor est immūdius ipsā cloacā totius mundi, fædius vase immunditiei, aut sterquilinio, tetrius Æthiope nigro, propter multitudinem iniquitatum mearum, quibus illud, totā vitā meā inquinavi, fædavi deturpavi.

Fatcor enim, & me accuso, quod in multa flagitia incidi, innumera scelera perpetravi, multorum peccatorum sordes & immūditias contraxi; quia illa non vitabam, occasiones non fugiebam, quæ minora videbantur flocci pēdebam: non custodiebam sensus meos, non resistebam inclinationibus ad malum, vitiis extirpandis non incumbēbam, affectus inordinatos à rebus terrenis non abstrahebam, vana solatia in rebus creatis quærebam, non avertebā cor meum

meum ab inutilibus curis, nec pura intentione, tibi soli Domino supremo in omnibus placendi, cuncta faciebam. Et quòd pejus est, post tanta delicta commissa, dignos pœnitentiæ fructus nondum feci, non veris lacrymis conscientiam meam lavare studui, cor meum per sinceram compunctionem mundare neglexi.

Admiratio. O quis non obstupescat super hanc tantam meam negligentiam, socordiam, incuriam, de re adeò necessaria ad salutem, de puritate animæ acquirenda?

Confusio. Verè pudore suffundi debeo, & erubescere, quòd ego gratiâ tuâ Divinâ vocatus ad Religionem, ad statum pœnitentiæ, ad locum lacrymarum, ad lavacrum animarum, adhuc inquinatus maneo; quia nondū antiquas peccatorum maculas ablui, immò novas acquisivi, quibus me tuæ Divinæ Majestati abominabilem reddidi.

Reprehensio. Ac propterea est, ut me coram te arguam, tanquam hominem improbum, & iustas pœnas de me ipso sumam.

Expostulatio. O quid agis anima mea, quid agis? quid lucri habes de sordibus tuis? quibus, dum peccas, inquinaris, & te non tantum DEO, sed etiam Angelis odiosam, invisam, ingratam reddis, atq; indignam consortio purissimorum spirituum, incolarum Cœlestium, atq; ipso Cœlo efficis? Nihil enim inquinatum intrabit in regnum cœlorū: nullus immundus admittetur ad illam supernam civitatem, quæ est aurum mundū simile vitro mundo: nullus

habi-

habitabit in tabernaculo DEI, nisi innocens manibus, & mundo corde.

Exsecratio. Exsecror Domine JESU, omnem impuritatem, propter te: quia tibi est ingrata; quia est contraria tuæ infinitæ puritati, Mundi enim sunt Oculi tui, nè videas malum, seu aliquod immundum.

Odium Impuritatis. Displicet mihi omnis impuritas, omnis immudities cordis, quia tibi displicet; abominor illam, & detestor, ex amore tui.

O utinam nunquam inquinasset animam meam sceleribus multis! utinam nunquã oculis tuis displicissem per meã cordis immunditiẽ!

Dolor. Deseo ex toto corde meo, ob amorẽ tuum, quòd unquam offenderim te Dominũ infinitæ bonitatis, & quòd cũ displicentia tua, sædis maculis scelerũ multorũ animã meã inquinavi.

Spes veniæ & auxilii. Tamen spero in tua bonitate, quòd secundũ multitudinẽ miserationũ tuarũ delebis iniquitatẽ meã, & amplius lavabis me, & mundabor & super nivem dealbabor.

Propositũ emendationis. Ego autẽ nolo te amplius offendere tuã gratiã adjutus, quam peto humiliter, & in qua sola confido.

Amor & desiderium cordis puritatis. Et quoniam displicet mihi cordis impuritas, ideò amo, propter te, omnem puritatem; desidero eam uti rem utilissimam, pulcherrimã & necessariam, & tibi placentem quærere, illaq; omnia, quæ ipsi sunt contraria, summopere vitare.

O utinam

O utinam nulla ab hinc peccati labes inficiat
cor meum, ut in eo tanquam in templo tuo per-
maneas semper !

O si jam pulchritudinem animæ meæ, quā ipsi
in ejus creatione contulisti, illum nitorem, quæ à
gratia Divina tua haberi solet, illam formam, per
quam fit in oculis tuis formosa, per aliquod scelus,
per inordinatum affectum ad creaturas, sinistram
intentionem in omnibus actionibus meis non un-
quam amittam.

O si hanc vestem nuptialem pretiosissimam citò
acquiram, ut in illa tibi Domino meo semper pla-
ceam, sinè qua ad nuptias tuas cælestes nemini in-
trare licet.

Gratiarum actio.

Gratias tibi ago infinitas benignissime JESU,
quòd mihi ad comparandam hanc vestem nu-
ptialem, seu cordis munditiem, ad abluen-
das animæ meæ maculas, per veras cordis lacry-
mas, tempus indulges.

Gratias tibi ago, quòd me peccantem, & te Do-
minum meum offendentem tam diu in terris susti-
nuisti.

Gratias tibi ago, quòd me in sordibus peccato-
rum jacentem à te in æternum non repulisti.

Præterea gratias tibi ago infinitas & pro aliis in-
numeris immensisq; beneficiis tuis, quæ ex momē-
to conceptionis meæ usq; in hanc horam de tua
benignitate suscepi. *Reliqua ut supra pag: 73. &*

Actus Gratiarum actionis Laudis, & Amoris DEI. Itaq; pro omnibus his recensitis beneficiis, gratis & donis tuis infinitas tibi gratias ago ô æternum bonum meum. *Reliqua ut supra pag: 75.*

OBLATIO.

UT autem tuæ infinitæ charitati, & beneficiis tuis, aliquatenus reciproca gratitudine respondeam, ô dulcissime JESU, cum nihil habeam, quod tibi dignius offeram, præter te ipsum. *Reliqua ut supra pag: 79. & 96.*

Proposita. Præterea firmissimè statuo solo intuitu placendi tibi, & quia tu vis, & es superdignissimus, vitare omnia peccata, non solum gravia, sed etiam levissima, nè amplius inquinem animam meam.

Nolo unquam etiam minimum peccatum flocci facere, sed quasi à facie colubri ab omni peccato fugere decerno.

Placeat tibi, Domine JESU, ut priùs hoc corpus meum vitâ destituatur, quàm anima lethali culpâ maculetur.

Rigabo semper lacrymis stratum cordis mei, ducam jugiter exitus aquarum ex oculis meis, ut per eas, unâ cum sanguine tuo sacratissimo, mundaetur cor meum ab omnibus sordibus peccatorum.

Custodiam diligenter sensus meos, nè per illos, tanquam patens ostium irrumpat aliqua sæda iniquitas, & maculet animam meam.

Omnes cogitationes meas à malis & pravis apprehensionibus emundare, & ab aliis abstrahere, nè

cor meum, in quo tu vis in habitare maculetur, semper sollicitus ero.

Observabo sedulò inclinationes meas ad malum, illisq; resistere fortiter curabo.

Etiā inolita vitia, & pravos habitus, quæ me sollicitant ad antiqua scelera, penitus eradicare conabor.

Non solum ab omnibus rebus illicitis, sed etiam à licitis oblectamentis cor meum abstrahere, ut fiat purum habitaculum tuum, propter te propono.

Omnē amorē rerū visibilium & creaturarum, ex amore tui, depono, & nē cor meum illis adhæreat, operam dabo.

Affectum nimium, erga me ipsum, & erga hanc vitam, salutemq; temporalem, ob amorem tuum, abijcere volo.

Mundissime JESU, tibi soli verò DEO meo, & Cœlestibus, tota mente inhærere cupio, & decerno.

Et quoniam vera puritas cordis haberi non potest, nisi habeatur intentio recta & pura: itaq; hanc purissimam in omnibus cogitationibus, verbis, & actionibus meis habere, atq; tibi soli in illis placere, tuam voluntatem facere, tuamq; gloriam, & honorem intendere volo semper.

PETITIO.

Sed quia ego homo infirmus sum, & sinē te nihil prorsus facere possum, Domine DEUS meus: ideò rogo te, per tuam infinitam bonitatē, & misericordiam, porrigere mihi digneris dexterā Cœlestis auxilii ad hæc implenda, quæ proposui, nimirum, ad acquirendam, & conservandam, cor-

dis, & animæ puritatem. Immò tu Domine, qui es fons aquæ vivæ vitæ, puritatis amor, & omnis munditiæ origo, hanc munditiem & puritatem mihi conferre velis, finè qua purissimis oculis tuis placere nequeo.

Tu Domine mi, secundùm multitudinem miserationum tuarum dele omnem iniquitatem meam.

Amplius lava me ab iniquitate mea, & à sordibus peccatorũ meorũ munda me. Quis enim potest facere mundũ de immundo? Non nè tu, quis solus es Omnipotens, qui solus es Sapientissimus, qui solus es Optimus.

Domine, si vis potes me mundare. Dic, obsecro tuam infinitam bonitatem: volo, mundare. Sed postquam mundatus fuero, nè permittas me amplius ullo peccato inquinari: subtrahere mihi omnes occasiones peccandi. Cohibe omnes & affectus meos, nè ad mala, & tibi displicentia ferantur. Fac, ut tota cordis mei affectione tibi soli inhæream, te solùm quæram, tibi soli placeam, tuam voluntatem faciam, tuam gloriam & honorem intendam, & hoc modo gratum tibi obsequium exhibeam.

Petitio Communis. Præterea fac, ut serviam tibi Domino meo secundùm vocationem meam. *Reliqua ut supra, pag: 82. & 97.*

EXEMPLUM

Orationis Vespertinæ.

PRO DIE DOMINICO.

De Cognitione sui, & ultimi Finis.

Initium vitæ spiritualis ac perfectionis omninò summen-

De Cognitione sui, & ultimi Finis. 145

mendum est à Cognitione sui, & Finis ultimi, ut sci-
at homo Quid sit, Quis Finis ipsius, propter quē eū
creavit DEUS. Nam si non cognoscit se ipsum, fa-
cilē non spiritualement vitam hominibus propriam,
sed animale, more brutorum vivet: & si ignora-
verit finem suum, qui est ipse DEUS, nunquam ad
eum amandum, in quo consistit nostra Perfectio,
movebitur.

Sciendum ergo est hominem constare ex corpo-
re, & anima rationali immortalis, qui ex parte cor-
poris, est vilissimus, similis animalibus ratione ca-
rentibus & multis miseriis, videlicet, mortis, ægri-
tudinis, doloris, tristitiæ, & aliis innumeris subje-
ctus: ex quorum consideratione oritur in homine
contemptus sui ipsius. Jam verò ex parte animæ
rationalis, est nobilissimus, ad imaginem, & simi-
litudinem DEI conditus, & capax æternæ beatitu-
dinis, seu visionis DEI. Et ideo finis ultimus ho-
minis, propter quem DEUS eum creavit est ipse
DEUS, & Beatitudo æterna, seu vita æterna, quæ
consistit in clara visione DEI.

Hic finis ultimus secundum S. Thomam dupli-
citer dicitur: Finis Cujus: & Finis Quo: hoc est ipsa
res, quæ ab homine desideratur, & adeptio, vel pos-
sessio, seu fructio rei. Sicut hominis avari, pecunia,
est Finis Cujus: & possessio pecuniæ, est Finis Quo.
Igitur ultimus noster Finis Cujus, est DEUS: jam
verò Finis Quo, est Beatitudo æterna, quæ est ade-
ptio, vel fructio DEI summi boni: & propterea
hæc Beatitudo, dicitur esse summum hominis bo-

num. Sumus ergò creati à DEO propter eum cognoscendum, colendum, super omnia amandū, eiq; serviendum, & obtemperandum; & ut eum amando, eiq; serviendo, atq; mandata illius servando, vitam æternam consequamur. Hinc consideret unusquisq; incipiens servire DEO, quid hætenus propter hunc duplicem ultimum Finem in vita sua fecit: an more brutorum, an verò hominum rationalium, vitam in terris duxit. Quod si in hoc defecerit, studeat idèò novam, Sanctam, spiritualem, DEO placentem inchoare, & præteritam vitiosam, & perniciosam relinquere vitam.

COLLOQUIUM ANIMÆ CUM DEO

Cōmemoratio Finis ultimi nostri propter quem à DEO creati sumus.

O DEUS infinitæ Potentiæ, & Sapientiæ, & Bonitatis, qui es Principium, & Finis ultimus noster: qui propter te ipsum, & gloriā tuam, creasti nos, ut te in hac vita cognosceremus; tibiq; mandata tua servando, & voluntatem tuam faciendo serviremus: & ut in Cælo æternam beatitudinem, quæ in clara Visione tui consistit, obtineremus, te possideremus, & te frueremur in æternū. Idèò licet, quantum ad corpus, creaveris me vilissimum similemq; animalibus ratione carentibus: sed quantum ad animam rationalem, fecisti me nobilissimum, ad imaginem & similitudinem tuam, aptū ad æternam beatitudinem consequendam.

Admiratio. O quantum beneficium hoc est, quod mihi præstitisti! ô quā magni æstimandum!

Accu-

De Cognitione sui, & ultimi Finis. 147

Accusatio sui. Ego autem ingratissimus huicq; fui, qui non consideravi, non diligenter in animo expendi hanc tuā specialem gratiā, & amorē erga me tuum, ex quo me ad eum finem, cujus gratia Angelos condidisti, nēpe ad te per omnē æternitatē possidendum, & fruendum te, creasti. Et ideo minū curavi, ut ad te felicem, & ultimū meum Finem aliquando pervenirem, qui es verum, unicum, & summum bonum meum, quod obtineri non potest, nisi te summē reverendo, colendo, diligendo, tibi ut supremo Domino serviendo, obsequendo, mandata tua fideliter exequens, & tuam Sanctissimam voluntatem adimplēdo, quod ego non feci, de quo me nunc prostratus coram tua Divina Majestate, vehementer accuso,

Admiratio. O quanta hæc cordis mei vesania ! quanta in gratitudo ! Quis super hæc non obstupescat ?

Confusio. Confundor Domine DEUS meus, & erubesco, eò quòd bruta ratione, & cognitione tui destituta, semper operantur propter illum finem, ad quem sunt à te destinata, tibiq; serviunt eo modo, quem præscripsisti eis: ego autem sciens, ad quid sum ex tua infinita bonitate conditus, nihilominus ad id non contendo.

Reprehensio. Proinde non solūm acriori reprehensione, ut hominem insanæ mentis, sed etiam ut ingratum, privatione illius æternæ felicitatis me dignum esse censeo.

Expostulatio. O anima mea quid agis ! rem

tanti momenti negligis? non cernis quantum thesaurum, immo congregationem omnium bonorum amittis! Si enim DEUM perdideris, omne bonum, omnes delicias, omnia solatia simul perdes, & invenies omne malum, omnes cruciatus, omnes dolores & infelicitatem nullis sæculis terminandam.

Exsecratio. Exsecror, Domine DEUS meus, hanc meam ingratitude summam, erga te clementissimum Creatorem meum, tuæ Divinæ bonitati contrariam.

Abominor illam: & doleo ex amore tui, quòd hucusq; tibi Domino meo non servivi, neq; te amavi, neq; colui ut debui, nec mandata tua servavi, nec aliquid pro illa æterna vita consequenda feci, verum multis peccatis totā vitā meā te offendi.

Et quamvis non merear ullam misericordiam tuam; tamen sciens, quia infinitè bonus es, spero, quòd veniam omnium offensarum tuarum, & emendationem vitæ condonabis.

Desiderium Finis ultimi. Jam totis animæ meæ præcordiis desidero finem meum, ad quem tam nobiliter me creāsti, præ oculis semper habere, & ad eum pertingēdum anhelare. Cupio die ac nocte, omni horā, omni temporis momento hoc unum curare quatenus ad illam æternam beatitudinem, te DEUM meum, amando, colendo, mandata tua fideliter servando, perveniam.

○ si jam ita faciam, ut hoc modo salutem animæ meæ obtineam!

○ utinam abhinc id, quod mihi tam sit utile, tā glorio-

gloriosum, & maxime homini ratione prædito conveniens- quæram, ut te solum unicum bonum meum inveniam, & possideam !

Utinam aliquando fruar te adeo jucundo & delectabili bono !

Utinam immergar aliquando omnium deliciarum tuarum Divinarum abyſſo, cujus rei gratiam, tu me, per tuam infinitam bonitatem, condidisti.

Gratiarum actio.

PRO quo tam eximio & insigni beneficio milles laudibus te extollo, dulcissime Domine DEUS, & Creator meus, & immensas gratias refero: quia fecisti me, non ut in his terrenis hærerem, sed ut te summum bonum, tanquam hæreditatem meam, possiderem, & ut de te, in omnem æternitatem perenne gaudium haberem.

Præterea infinitas tibi gratias ago quia me doctasti animâ rationali, nobilissimis potentiis ornatâ; intellectu, ad cognoscendum te; voluntate, ad amandum te; memoriâ ad recolendum, & recogitandum te.

Gratias tibi ago infinitas, quia dedisti mihi necessitiam Finis ultimi mei, & eorum quorum adminiculo ad hunc finem pervenire possum. Et pro aliis innumeris, immensisq; beneficiis. *Reliqua habentur supra pag: 73. & pag: 94.*

OBLATIO.

UT autem tuæ infinitæ charitati, & beneficiis tuis, aliquatenus reciproca gratitudine respondeam. *Vide cætera pag: 79. & pag:*

Proposita. Præterea firmiter propono fidelissimè tibi Domino meo servire, & omnia peccata, quæ mihi vitam ad æternam beatitudinem præcludunt, & nè ad te, meam beatam felicitatem perveniam, me præpediunt, totò conatu vitare.

Nolo unquam affici ad res terrenas vanas, caducas, quæ me à te summo bono retrahunt.

Abstine à me ut cor apponam auro & argento, divitiis, & opibus, gemmis, & lapidibus pretiosis: abstine, ut sequar delicias, & voluptates carnis, abstine, ut desiderem honores & dignitates, famam & gloriâ, & quidquid in mundo lucet, ac splendet; in quibus rebus insani aliqui homines beatitudinem suam constituiebant.

O Domine DEUS meus, tu solus eris mihi thesaurus, divitiæ, tu gemma pretiosa. Tu delectatio mea. Tu honor meus, tu dignitas, tu gloria mea; in te igitur solo beatitudinem meam felicissimam cōstituo, hanc solam quærere ad hanc festinanter currere continuo, te juvante, conabor.

Quoniam non aliâ viâ quisquam, nisi per cognitionem, reverentiam, amoremq; tui, & per exactâ observantiam mandatorum tuorum, ad illam beatâ vitam pertingere valet: ideò quamvis jam per fidem cognoverim te DEUM ac Creatorem, Patrem & Remuneratorem meum esse; tamen ut majorē semper cognitionem tui habeam, incessanti studio de te cogitare, & de tuis perfectionibus meditari volo.

Dabo omnem operam totis viribus meis semper

revereri, & omnem cultum laudem & honorem debitum tibi diligentissimè exhibere.

Volo te diligere eo modo, quo vis à me diligiti: videlicet, ex toto corde, ex tota anima, ex totis viribus, ex tota mente mea, & nihil aliud præter te, & quod tu à me diligis vis.

Statuo promptissimè tibi servire, & in omnibus obedire, tuaq; mandata fidelissimè servare.

Adhæreat potius lingua faucibus meis & oblivioni detur dextera mea, quàm ego à te factus, & ob hoc solum, ut laudem & amem te, aliquando obliviscar tui.

PETITIO.

Verùm ô Domine, qui dedisti velle, da & perficere, Ego enim, ex me ipso in profundum inferni ruere possum, sed ad illam sublimem cœlestem gloriam, ad quam me creasti, ascendere, & pervenire nequaquam valeo.

Ideò te supplex rogo, per tuam infinitam bonitatem & misericordiam, per tuum sanguinem pretiosum, & amaram passionem tuam, fac ut finem meum, gloriam tuam, & salutem meam, præ oculis meis semper habeam; ut perpetuò memor sim tui; cogitem de te, loquar de te, serviam tibi; & cuncta faciam, propter gloriam, honorem, amorè, & beneplacitum tuum; & fideliter mandata tua custodiam; tandem vitam æternam obtineā. Quæso, bone JESU, intimo cordis affectu, ut dirigere me digneris in viam bonam, quâ scis me perventurum ad finem optatum.

O DEUS meus, tuus sum ego, saluum me fac: ô Domine virtutum, concupiscit, & deficit anima mea in atria tua. Sitivit anima mea ad te DEUM fontem vivum; quando veniam, quando amabo te toto corde, & videbo, & apparebo ante faciẽ tuam? Ecce deficit in salutare tuum, & anhelat ad te anima mea. O bonitas, ô charitas, DEUS meus! ad te quoties respiro, toties suspiro; fac misericordiã tuã cum servo tuo, ut non confundar in æternum.

Adde Petitionem communem, quæ est supra pag: 82. & pag: 97.

E X E M P L U M

Orationis Matutinæ.

Pro vitis exsirrands.

INcipientes spiritualẽ agere vitã, & qui sunt ingressi viã purgativã, in hoc omnẽ operã debent collocare suã, ut pro expurganda ab omni labe peccati anima, pravyos habitus, & inolita vitia eradiceret, tũ per fugã, odiũ, & abominationẽ eorũ: tũ per actus contrariarum virtutũ. Et quoniã septem sunt principalia vitia, ad quæ omnia alia reducuntur: ideo de his dantur hic exempla per septem Ferias distincta, ad materias Meditationum illarum, quæ fieri solent in nostro Ordine, singulis Feriis accommodata.

E X E M P L U M

Orationis Matutinæ,

PRO FERIA SECUNDA.

Pro exsirrando vitio Superbie per Abominationem ejus & actus Humilitatis.

Hac

HAc die proponitur nobis ad meditandū Lotio pedum à Christo Domino Apostolis facta, in qua exemplum Humilitatis nobis dedit, & vitium Superbiæ confudit.

COLLOQUIUM ANIMÆ CUM DEO,

Commemoratio Lotionis pedum.

ORex gloriæ, Domine virtutum, qui nos docere volens exemplo tuo Humilitatem, quæ est omnium virtutum, & vitæ spiritualis fundamentum; & confundere nostram superbiām, quæ est vitiorum Regina, & omnis peccati initium: ad pedes Discipulorum tuorum te inclinare, eosque propriis manibus lavare, linteo maculas eorum abstergere dignatus es.

Admiratio. O quis in stuporē non rapiatur, cernens hoc contemptibile opus manuum tuarum? videns te DEUM immensæ Majestatis adeo servile munus obire, servis tuis vilissimis ministrare, ad pedes eorum procumbere?

Accusatio sui. O me miserum, qui hoc exemplum tam eximie humilitatis tuæ, benignissime JESU, non sequor! quia ego superbissimus sum; qui contemptibilia ministeria proximis exhibenda subterfugio: qui etiam coram tua Divina Majestate profunde me inclinare erubesco, aut grave onus censeo; quia aliis ex affectu humilitatis subiei no-
lo: qui varia innumeraq; superbiæ peccata sæpè commisi, & adhuc committo, de quibus me nunc accuso.

O quàm frequenter inordinatum appetitum ex-

cellentiae habui, & ideo facile alios contempni, quidus meliorem, utiliorem, aptiorem & digniorem me reputavi: ego verò minimū contemptum aegre tuli, & nē ab aliis vili pēderer, meos defectus celare studui. Delicta mea & imperfectiones meas saepiūs negavi, excusavi & pro his correptionē subire detrectavi. Bona opera mea (quāvis, ut verū fatear, nihil unquam boni fecerim) coram aliis inaniter ostentavi, praedicavi, & vanam gloriam ex iis quaesivi. Meam voluntatem tuae Divinae, & Superiorum, & aliorum voluntati subdere recusavi; ab aliis laudari, & honorari desideravi; aliorum sententiae, nē inferior apparerem cedere nolui. Haec sunt Superbiae germina, quae in malo animae meae solo pullulant, quae ego coram Divina tua Majestate, cum intimo doloris sensu, propalo, confiteor, & de iisdē me accuso.

Admiratio. O quanta mea malitia fuit, quae mihi huiusmodi Superbiae causa extitit! Multum miror bonitatem tuam, Domine DEUS meus, quod me hominem toleras in terris, qui arrogantem Luciferum non es passus commorari in Coelis.

Accusatio. Erubescō, & confundor, propter hoc abominabile superbiae peccatum, omnesq; ejus aetius, tam multiplices à me factos maxime dum video te Dominum altissimae Majestatis humillimū.

Reprehensio. Ac ideo jure merito me reprehendo, & arguo, coram te Domino meo, tanquā hominē nequā impiū, & sceleratū; quia non sum veritus supra id quod sum, me extollere: hoc est im-

probe

Pro Extirpando Superbia vitio. 155

probè superbire: & dignum omni hominum contemptu, opprobrio, & poenâ quâvis ignominiosissimâ me esse censeo.

Expostulatio. Heu me miserum, quem cæcum superbia reddidit, & rationis lumine privavit, ut non videam, quanta mala, & damna animæ meæ hoc vitium pessimum afferat. Videlicet, quod inimicum tuum me facit; quia tu es humilis corde: quod gratiæ tuæ Divinæ januas mihi præcludit; quia tu superbis resistis, humilibus autem das gratiam; quod te benignissimum Dominum à me repellit; quia tu habitas cum contrito & humili spiritu: deniq; quod me à Regno Cælorum excludit; quia tu dixisti: Beati pauperes spiritu: hoc est humiles; quoniam ipsorum est Regnum Cælorum.

Exsecratio. Exsecror jam, Domine mi benignissime, hanc execrabilem omnium vitiorum matrem, tibi invisam, odiosam, & tuo honori Divino inimicam.

Detestor, & abominor illam, ab amorem tuum; quia est abominabilis offensâ tua: & multum doleo, quod unquâ per superbiâ; & alia peccata, offenderim te DEUM infinite bonum. Nolo te amplius offendere, & veniam à te clementissimo Domino spero.

Desiderium Humilitatis: quia est necessaria, utilis, honesta: jucunda, pulchra, & DEO placens.
& propter exemplum Beatissimæ Virginis, aliorumq; Sanctorum, præcipuè Christi Domini Nostri. Jâ ab hinc ex intimo cordis affectu desidero quàm diligentissimè virtutem humilitatis colere ut facilis,

us, tua adjuvante gratia, expugnare ex animo, & eradicare hoc teterrimum vitium superbiæ queam.

Verè justum & consentaneum est, ut ita faciam; ut per humilitatem, pro vitio superbiæ, quo te sæpissimè offendi, aliquam satisfactionem exhibeam. O quando id faciam?

O utinam auferatur à me cæcitas mentis meæ, ut cognoscam hanc virtutem esse mihi ad salutem maximè necessariam!

O quantus est tepor meus, quòd negligam hanc virtutem adeò mihi utilem ad extirpandum elationis vitium, & ad Perfectionem acquirendam!

O quando istam virtutem sedulò exercebo, sicut hominem ratione præditum, decet, & amplectar tanquam rem præstantissimam, excellentissimā, honestissimam & omni laude & amore dignissimā?

O quid ago? Cur non quæro illam jucunditatē, tranquillitatem & puram delectationem, quam exercitium hujus virtutis, afferre solet.

Cur tam parvi æstimo gemmam istam pretiosam, & pulcherrimam, Deoq; gratam, quæ est singulare ornamentum animæ nostræ?

O quando, tibi Domine mi, per hanc virtutem placebo sicut placuit tuæ Divinæ Majestati Beatissima Virgo, & multi alii Sancti, cujus tu exemplū nobis dedisti, pro quo sis infinitus benedictus?

Gratiarum Actio.

SIs infinitè benedictus, qui sciens & Angelos in Cælo, & homines in paradiso per elationem corruisse, & periisse, descendisti de Cælo, ut

Magi-

Magister & Doctor humilitatis factus, nos tuo exemplo & verbo hanc virtutem docuisses, quā sapius nobis commendasti dicens: Discite à me, quia mitis sum, & humilis corde: Et iterum: Omnis, qui se exaltat, humiliabitur, & qui se humiliat, exaltabitur. Et rursus; Nisi efficiamini sicut parvuli, non intrabitis in Regnum Cœlorum.

Exempla quoq; stupenda humilitatis nobis dedisti, quando in sordido stabulo nasci, in duro præsepio reclinari, in vili sæno cubare inter jumenta voluisti: quando tu DEUS Altissimus Virgini Matri tuæ, & Sancto Josepho subditus fuisti: quando tu Rex & Dominus supremus servis tuis ministrare: quando tu Creator Omnipotens creaturis tuis pedes lavare dignatus es; quando cum peccatoribus conversari, à satana rentari, ab impiis hominibus ligari, conspui, alapis & colaphis cœdi, flagellari & infinitis oporobriis, & injuriis affici, demum inter latrones medius in cruce suspendi, & cum iniquis reputari non renuisti: per quæ omnia nostram superbiam reprimere, & veram humilitatem docere nos voluisti. Sis igitur pro omnibus actibus humilitatis tuæ infinities benedictus, infinities à nobis laudatus, infinities superexaltatus in sæcula.

Præterea sis benedictus, & pro aliis innumeris immensisq; beneficiis, quæ ex momento conceptionis meæ, usq; in hanc horam de tua benignitate suscipio. *Reliqua habentur supra pag: 73. & pag:*

94.

OBLATIO.

Hæc habetur pag: 79. & pag: 96.

Pro-

P*roposita.* Præterea ex amore tui, ô bone JESU, firmissimè statuo superbiae vitium exstipare, vitare, abominari, illudq; odio, tanquã animæ meæ perniciosum toxicum habere; jam verò humilitatis virtutem, amare, colere, amplecti, & sedulò exercere.

Quæram semper occasiones exhibendi ministeria quantumvis contemptibilia omnibus aliis, quibuscunq; proximis, etiam meis inimicis, & indignis.

Volo non solum majoribus, aut æqualibus, vel inferioribus, sed etiam scelestissimis subijci, propter te, tuumq; honorem.

Fugiam semper inordinatum appetitum excellentiæ: neminemq; contemnere, nulli me præferre, & omnes alios meliores, utiliores, aptiores, & digniores me reputare volo.

Opto vehementer ab aliis vilipendi, atq; patienter omnem contemptum ferre, & de hoc gaudere; sicut & ego me ipsum vilipendo, atq; contemno.

Libenter defectus meos coram aliis propalabo, ut ideò me alii facilius contemnant; virtutum verò actus occultabo, ut nihil boni de me sentiant omnes, aut me laudent, vel me honorent.

Fateor coram toto mundo, me esse omnium vilissimum, & contemptibilem; quia nihil sum, sed gratiã tuã sum id, quod sum; nihil scio; nihil habeo, præter innumeram multitudinem iniquitatum, scelestorumq; meorum.

Scio quid sum, ô Domine mi Sanctissimè, quòd coram te ex animo cōfiteor: sum iniquitatum senti-

na,

Pro Exstirpando Superbie vitio. 159

na, vitiorum pelagus, scelerum abyssus, sum sacri-
legis & latronibus, publicanis & veneficis, gentili-
bus, & damnatis, ipsisq; dæmonibus pejor.

Palàm dico quò sum deformior omnibus lepro-
sis & ulcerosis; immò sum sterquilinum, ac omniū
immunditiarum, & sordium colluvies, & recepta-
culum fædissimum, sum ulcus & apostema fædissi-
mum, ex quo tanta sanies peccatorum tantaq; lu-
es flagitiorum & iniquitatum effluxit.

Absit à me, ut libentius voluntatem meā, quàm
aliorum faciam; aut voluntati tuæ Divinæ unquam
resistam, cui me totum ad omnia, ô Domine mi,
resigno.

PETITIO.

H*æc habetur supra pag: 87. & pag: 97.*
sui hæc addantur. Adjuva me Rex libera-
lissime, & gratiam concede, ut hæc pro-
posita mea adimpleam quam perfectissimè. Infunde
quæso, ô Amator & magister humilitatis, cordi
meo profundissimam, ibiq; acceptissimam hanc vir-
tutem. Da ut ferventissimo desiderio optem, gau-
densq; accipiam omnem humiliationem, vilipensio-
nem, atq; mei ipsius contemptum. Extingve in me,
ô dilectissime JESU, omnem appetitum excellen-
tiæ, ut ex toto corde meo cupiam, gaudeamq; ne-
sciri, contemni, vilis reputari, & opprobria pati.
Fac, ut propriam vilitatē, miseriam, inconstantiam,
pravitatem, verè cognoscam & ex animo detesta-
bilem me sentiam, atq; ab aliis sentiri cupiam.
O misericordissime JESU, obsecro te, per humili-
tatem

tatem cordis tui, ut non permittas dirissimā pestē superbix, aut vanæ gloriæ in me dominari, nec aliquatenus inesse seruo tuo. Libera, & custodi me semper ab hoc malo, nè ullo modo animam meam illud inquinare possit. *Hic addatur Petitio cūmunis quæ habetur suprâ pag: 82. & 97.*

E X E M P L U M

PRO FERIA TERTIA.

Pro vitio Avaritiæ extirpando.

Per abominationem ejus & Aetūs Paupertatis.

HAc die proponi solet ad meditandum, tum O-ratio Christi Domini in horto montis Olive-ti, tum ejus tristitia & sudor sanguineus: tū captivitas ipsius; tū proditio Judæ, qui Judæis Christum tradidit, quibus ex avaritiæ vitio eū vendidit.

COLLOQUIUM ANIMÆ CUM DEO.

Commemoratio venditionis Christi Domini nostri. O mansuetissime JESU, quem impius Judas triginta tribus argenteis infensissimis inimicis tuis, sanguinem tuum sitientibus vendidit: te ad necem quærentibus tradidit: & ad te capient-dum, eos instruxit, adduxit, adjuvit.

Admiratio O. stupendam avaritiam Judæ, quâ obcecatus, & seductus, tam nefandum crimen perpetravit, ut infidelis servus Dominum suum immensæ magnitudinis, vilissima creatura Creatorem suū infinitæ potentix, homo miserrimus DEUM suum infinitæ Majestatis, indignissimum mancipiū Regē suū infinitæ Gloriæ, cliens ingratus Benefactorem suū benignissimū, infelix filius Patrē suū amantissimū sacrilego pretio vendere non sit veritus. *Ac-*

Accusatio sui. O quam Sæpissime & ego tuâ infinitam Bonitatem, svavissime JESU, per avaritiâ offendi, quando olim immoderatâ acquirêdi bona temporalia cupiditatē habui: Divitias & opes, aurū & argentū, & alia terrena possidere plūs nimio desideravi; vel aliis hæc invidi: multa minūs necessaria naturæ, & meæ conditioni concupivi, necessaria verò inordinate appetii; sæpè superflua, & inutilia, & curiosa habere procuravi, utilibus autem immoderate adhæsi: meliora & pretiosiora quæsi, viliora verò, quæ sunt pauperum propria, subterfugi: omnia ut abundanter suppetere, & ut nihil omnino deesset exoptavi.

Admiratio. O quis non miretur hunc inordinatum in me affectum, erga res istas terrenas adeo vanas, & citò perituras, præsertim nunc, quando jam mundum, ex tua Divina gratia, & ea, quæ sunt mundi, deserui?

Confusio. Confundor & erubesco, Domine DEUS meus, eò quòd ego consilium Evangelicæ paupertatis amplexus, secundum leges & modum ipsius vivere nolo. Confundor quòd ego ad cœlestia creatus, terrena amo, creatis bonis animo adhæreo, & bonum increatum relinquo.

Reprehenso sui. Ac ideò me graviter in conspectu tuo nunc arguo, tãquam hominem improbū & insanum, dignumq; gravi pœnâ me esse judico.

Expostulatio. O anima mea quid agis putas parvas esse omnes istas tuas, quas recensuisti, & de quibus te accusasti, avaritiæ culpas? & quòd modi-

ca tibi adferre possunt damna arbitraris? multum deciperis. Scias, quod ejusmodi culpæ sunt potentissimæ compedes, quibus teneris, nè ad spiritualia, & vera bona, atq; ad perfectionem tendas: sunt veri latrones, qui te thesauro cœlesti spoliunt, sunt fœdæ maculæ, propter quas munditiem cordis amittis.

Exsecratio, Abominatio, Dolor, & Spes venia. Exsecror, clementissime JESU, hoc turpe avaritiæ vitium, non tam propter illa damna, quæ ex eo anima mea reportat? sed potissimum, quia est tibi ingratum, & tuæ paupertati contrarium. Exsecror illud, ut rem maledictam. Exsecror, ut rem viris spiritualibus profanam. Displicet mihi valde, quia tibi displicet, & quia est tua infinita offensa abominor illud. Doleo ex amore tui, quod unquâ per avaritiam & alia peccata tuam bonitatem offendi! Utinam nunquam te offendissem. Utinâ nunquam nimio amore terrenorum in te deliquissem! Propono emendationem, & veniam à te spero!

Desiderium Paupertatis. Jam ô bone JESU, paupertatis Evangelicæ amore teneor. Desidero vehementer secundum ipsius leges vivere; opto ex animo omnem indigentiam, & penuriam rerû proprio animo tolerare.

O si jam ita faciam, ut facilius ad perfectionis culmen perveniam! O si verè sim pauper spiritu, seu sincero affectu! talibus enim promissisti Regnum Cœlorum.

O utinam non ampliùs amore temporalium animam meam inficiam, tibiq; displiceam!

O uti-

Pro Exstirpando Avaritiæ vitio.

167

O utinam curiosa & superflua, cum inquietudin, conscientiæ meæ minimè quæram!

Utinam ab hinc ex necessariis viliora eligam; ut hac ratione exemplum tuæ paupertatis sequar. Tu enim veniens in hunc mundum nihil bonorum terrenorum possedisti. Tu ubi reclinasses benedictum caput tuum non habuisti. Tu omnem indigentiam in terris amplexus es. Tu in hac vita viliora, & incommoda elegisti, & in summa paupertate vixisti. Itaq; & ego, imitatione tui, assimilari tibi in paupertate opto.

Gratiarum actio.

Tibi quoq; infinitas gratias ago, pro exemplo hujus virtutis & pro omnibus, quæ fecisti, & tolerasti pro salute nostra in terris. Reliqua habentur *suprà pag: 73. & 94.*

OBLATIO.

Hæc habetur ^{suprà} pag: 79. & 96.

Proposita. Præterea, o dulcissime Redemptor, omnia contraria Evangelicæ paupertati fugere decerno, ob amorem tuum. Totum cordis mei affectum à bonis caducis terrenis avertere, & ad cælestia convertere volo.

Aurum & argentum, Divitias & opes mundi, & quæ mundus æstimat, arbitror, & abijcio ut stercora, & detrimenta, propter te Christum Dominum meum pauperem.

Absit à me, ut aliquid minùs necessariū naturæ, aut statui meo conveniens appetam.

Cuncta superflua, pretiosa, tanquā pestē animæ, vitabo.

L2

Omnia

Omnia incommoda, quæ paupertatem comitantur, æquo & læto animo supportare conabor.

Nolo unquam esse sollicitus, nè mihi aliquid defuit, five in cibo, five in vestitu, five in commoda habitatione, & in aliis rebus.

Libenter tolerabo omnes necessitates, indigentias, carentias, defectus rerum necessariarum, & quidquid mihi defuerit gaudebo.

Vitabo semper appetere superflua, vel pretiosa, vel exquisita, vel curiosa.

Abfit à me, Domine, ut rebus necessariis ad usum mihi datis immoderato affectu adhæream, ita, ut illis ablatis perturber.

Viliora ex rebus necessariis semper eligā, & ideò libenter à Superioribus meis postulare propono vestes obsoletas & laceras, cellam incommodiorem, duriores lectum, cibos infirmiores, & alia ejusmodi, quæ pauperibus congruunt.

PETITIO.

Verùm quia sinè tuo adjutorio nihil boni possum præstare, ideò obsecro te, per tuam infinitam Bonitatem, per tuam sacratissimā Passionem; per paupertatem & nuditatem tuā, quā, cum dives esses, propter me egenus factus es, aufer à me mundi, & creaturarum omnium inordinatum amorem, ut nihil extra te concupiscam, nulli creaturæ adhæream.

Dñe JESU Christe, da mihi tui amore, in omnibus necessariis corporis inopiam, tenuitatem, vilitatem, penuriam, privationem, & indigentiam, ex

toto

Pro Exstirpando Avaritiæ vitio. 165

toto corde meo semper optare, quærere, diligere,
& amplecti, & in vera discretionē, patientia, perse-
verantia & gratiarum actione, hilariter, longani-
miterq; perpeti. Tollantur mihi omnia, DEUS me-
us, tu saltem mihi remaneas: tu me possideas, vita
mea, refectio mea, exultatio mea, qui es beatitudo
mea. *Adde Petitionem communem ut supra*
pag: 82. & pag: 97.

E X E M P L U M

Orationis.

PRO FERIA QUARTA.

*Pro exstirpando vitio Luxuriæ, per Abominati-
onem ipsius, & Actus Castitatis.*

HAc die ordinaria sit Meditatio de Christi
Domini nostri flagellatione, per quam caro
ejus delicatissima, & tenerrima, crudelissi-
mè cæsa, vulnerata, afflicta, dilaniata, fuit, pro no-
stris peccatis sed potissimum pro vitio carnis.

COLLOQUIUM ANIMÆ CUM DEO.

*Commemoratio crudelissima flagellationis Christi
Domini Nostræ.*

O Purissime JESU, qui tuam carnem sanctis-
simam, tenerrimam, delicatissimam, flagel-
lis cædi, vulnerari, affligi, dilaniari, tēpore
Passionis tuæ permisti, quod quidem fecisti pro
peccatis nostris, & potissimum pro vitio carnis, vt
illud tanquam fædissimum abominaremur; & vi-
taremur.

Admiratio. O admirandam Bonitatem tuam,
per quam tantos dolores, & cruciatus sustinere in

tuo Sacratissimo Corpore voluisti, ut nos corpora nostra contaminare vereremur.

Accusatio sui. Heu me miserum, qui corpus meum indulgenter tracto, & nè quid illud affligat procuro; optimis cibis illud nutrio, vel saltem id desidero, & quando ejusmodi defunt, ægrè fero: mollihus illud vestire percipio, & dum hæc suppetunt, gaudeo; quidquid libet, placet, facilè ei permitto; & quidquid durum, quidquid molestum est, ab eo amoveo; & ideò sæpiùs insolentias carnis, & spurcitas ipsius experiri, & impuros luxuriæ ignes pati est me necesse, propter quos, quoties & quàm graviter, te benignissimum Dominum offendi; tu scis meliùs, quam ego loqui valeam, de quo me coram tua Divina Majestate accuso.

Admiratio. O stupendam fatuitatem meam, eò quòd corpus meum, fontem omnium impuritatum, fæditatum, & illecebrarum ad malum, tam liberaliter foveo.

Confusio. Confundor & erubesco, ò bone JESU, dum video corpus tuum te dedisse, causâ mei, ad flagellandum, cruciandum, excarnificandum, ego verò corpori meo parco, quod millies, centies millies, omnes torturas, afflictiones, & pœnas inferni æternas, propter abominabilia peccata, & offensas tuas, meretur.

Reprehensio. Ac propterea justissima de causa me ipsum arguere, & verbis asperioribus castigare debeo, ut pote hominem impiissimum, qui carni meæ, iniquitatum auctori faveo.

Expo-

Expostulatio. O quid ago insanus homo! fateor nullum vitium, majora damna, pluraq; mala animæ meæ adferre posse, sicut carnis peccatum. Hoc enim est, quod nos firmiter à DEO avertit. Hoc est, per quod diabolus de nobis triumphat, & tenet captivos. Hoc est, quod ita excæcat mentem, ut non videat homo præcipitium, non perditionem, nõ gehennam: quorum omnium malorum est causa indisciplinata, immortificata, & indomita caro.

Exsecratio. Exsecror toto corde & animo, suavissime JESU, hoc infame carnis vitium, ut potes purissimis oculis ingratissimum, & tuæ Sanctitati contrarium. Exsecror, ut rem sacra templa tua profanantem. Exsecror, & ejuro, detestorq; & abominor illud ex amore tui.

Doleo, quòd unquam offenderim tuam infinitam bonitatem, quocunq; modo, & quacunq; specie istius peccati.

Utinam te non offendissem! Utinam corporis mei templū tuū nunquam hoc peccato contaminassē!

Sed quia major est bonitas tua, quàm malitia mea: ideo spero, quia tu DEUS meus, & veniam, & emendationem dabis, Ego autem nolo te amplius offendere.

Desiderium. Et desidero, sola intentione placendi tuæ Divinæ Majestati, ab omnibus carnis peccatis, tanquam à facie colubri fugere, & tanquā lethale animæ meæ virus vitare. O Utinā sim procul ab hoc vitio!

O si non belluarum terrestrium immundam &

pissimam, sed spirituum cœlestium mundissimam & honestam, homini rationali convenientem agam vitam, prout, propter te Domine JESU, exopto!

O verè necessaria, ad beatam vitam consequendā Continentiæ virtus, utinam te citò integrè possideam, ut ab illa æterna beatitudine, quæ in visione, & in arctissima uniono tua, dulcissime JESU, consistit, non excludar.

O pretiosa castitatis margarita, & inæstimabilis animarum nostrarum pulchritudo, cupio propter eam vendere omnia, & ipsam comparare, ut per illam anima mea ad societatem castissimarū sponiarum tuarum admitti valeat!

O si jam sequar Purissimam Virginem Matrem tuam, Virginum Reginam, & alias Virgines Sanctissimas, quæ maluerunt corpora sua variis pœnis, & morti tradere, quam inquinari, & à te in æternum alienari.

Paratus sum, Domine JESU, exemplo tuo, corpus meum offerre ad cruciandum, excarnificandū, & flagellandum, puritatis acquirendæ & conservandæ causâ, sicut tu in Passione tua, pro nobis obtulisti.

Gratiarum actio.

IDeo gratias tibi ago infinitas, pro illa acerbissima flagellatione sacratissimi corporis tui, & pro innumeris plagis, quibus caro tua benedicta afflicta fuit, & pro atrocissimis vulneribus, quæ tunc accepisti, & pro vehementissimis doloribus, quos tunc sustinuisti.

Præ-

Pro extirpando Luxuria vitio. 169

Præterea gratias tibi infinitas ago & pro aliis multis beneficiis. *Reliqua habetur pag: 73. & 94.*

OBLATIO.

Hæc est supra posita pag: 79. & 96.

Proposita. Præterea firmissimè statuo corp9 meū castigare, affligere & durius tractare, ut non insolescat, atq; me ad offensam tuam inducat.

Curabo diligenter solū necessaria in cibo & potu, & in vestimentis carnis meæ concedere, cuncta verò superflua ei denegare; nè propterea in ipsa incontinentiæ aliquod incendium oriatur.

Custodiam vigilanter sensus meos; præsertim visum, nè specie rerum corporearum, veluti laqueo potentissimo, capiat animam meam.

O mundissim: JESU, siquidem corpora nostra sunt templum tuum, in quo inhabitare libenter desideras; ideo ut hoc templum sit semper mundū, diligentem operam dabo.

Quia nullum vitium, sicut luxuriæ, magis excæcat hominem, & à te summo avertit bono: propterea à nullo vitio, sicut à luxuriæ, magis abhorrebo.

Quandoquidem hoc abominabile vitium nihil est aliud, nisi limus immundus, nisi cænum sordidum, nisi fætor gravissimus: ideo nè hoc vitio sordida redatur anima mea in conspectu tuo, Domine DEUS meus, nè fæteat graviter corā te, firmissimè propono, millies potius mori, quàm vel levissimā cogitationem immundam, voluntariè admittere, teq; per illam offendere.

Malo, Domine, mi, æternis ignibus inferni cruciari, quàm igne luxuriæ consumi; & paratus in abyssum gehennæ me præcipitem dare, quàm ad sædissimum hoc peccatum animum aliquando inclinare.

PETITIO.

Sed ô bone JESU, confiteor verè, quòd licet nullum malū evitare possim, absq; tuo auxilio Divino, multò minùs hoc sædissimum luxuriæ vitium, absq; gratia specialissima tua. Nam scio quoniam aliter non possum esse continens, nisi tu dederis. Hoc enim est donum tuum. Ideò rogo te per tuam infinitam bonitatem, & misericordiam, per tuam dirissimam flagellationem, tuq; sacratissima vulnera, per preces & merita omnium Sanctorum, qui tibi virginitate castitate, & continentia unquam placuerunt: adjuva me Rex liberalissime, & gratiam concede, ut hæc proposita mea adimpleam, atq; hoc perniciosissimum vitium expugnem, ut nunquam per illud, quocunq; modo tuam Divinā Majestatem offendam.

Tu scis, Domine, infirmitatem meam. Tota spes mea non nisi in magna misericordia tua. O amor DEUS meus, qui semper ardes, & nunquam extingveris, accende me, ut ignis charitatis tuæ extingvat ignem carnis in me. Continentiam jubes, da quod jubes, & jube quod vis.

Adde Petitionem communem, quæ est supra pag: 82. & pag: 97.

EXEMPLUM

PRO

Pro extirpando Invidiæ vitio.

PRO FERIA QUINTA.

171

Pro extirpando Invidiæ vitio.

Per Abominatiōē ejus, & Actus Charitatis.

HAc die ad meditandum proponitur crudelis, & ignominiosa Coronatio Domini nostri **IESU** Christi, cujus Coronationis fuit causa, Judæorum invidia, per quam tradiderūt eum Pilato, Judici, & ex invidia Regiæ dignitatis, quia dicebat se esse Regem, spinis coronari ipsū fecerūt.

COLLOQUIUM ANIMÆ CUM DEO.

Commemoratio crudelis Coronationis Dñi nostri.

ORex Regum Altissime, quem impii Judæi comprehendentes, Pilato Judici per invidiā tradiderunt, in multis te innocentissimum accusantes, & inter alia dicentes: Quia se Regem facit: propter quod, in ludibrium, tuumq; contemptum, & confusionem, invidentes hanc tibi Domino nostro Regiam dignitatem, spinis te coronari curarunt.

Admiratio. **O** inauditam invidiæ malitiam, quæ hujusmodi crudelissimæ & ignominiosissimæ coronationis tuæ causa fuit!

Accusatio sui. Sed quid miror Judæorum invidiæ crimen, à quo & ego non sum alienus, quo & ego sæpius te Dominum meum benignissimum offendi. Fateor, & cum dolore intimo, coram Divina Majestate tua me accuso: quia sæpè dum aliqua bona, tuāq; dona in proximis vidi, tristitiam inde habui, & mærore propter alienam felicitatem tabescebam, propter quā lætari debebam. Et quoniam

in

in omnibus singularis esse desideravi, ideò ut me nemo in aliquo superaret volui. Unde si quos scientiâ, ingenio, apertitudine, virtute, & aliis donis excedere me perpexi; atq; eos ab aliis aestimari, laudari, honorari, & amari vidi, ego illa dona ipsorū extenuavi; famam diminuere, laudes impedire, virtutem calumniari, eminentiam tegere, defectus & vitia propalare, bona opera taciturnitate suppressere consuevi. Hinc frequenter eò malitiæ processu, ut proximum odio habuerim, atq; contempserim, charitatem eis exhibere subterfugerim, malum ipsis optaverim, vel bonum, quod facere tenebar, ipsis denegaverim.

Admiratio. Quis non obstupescat super hanc invidiæ meæ enormitatem, & gravitatem, quæ tanta est, ut superet omnes omnium scelerum malitias. Nam in aliis peccatis aliquantula vel utilitas, vel voluptas reperitur, sed in invidia nihil aliud, nisi dolor, tristitia, nisi sola malitia invenitur.

Confusio. Equidem confundi & erubescere debeo, quòd cum tu, Domine DEUS meus, mandatū tuum dederis nobis, ut proximos diligeremus tanquam nos ipsos, ego hoc mandatum frangere multoties, per invidiæ meæ scelus, non sum veritus.

Reprehensio sui. Ac proinde me ipsum arguo, tanquam hominem iniquissimum & diaboli discipulum, & imitatore, cujus hoc proprium est invidiæ vitium. Nam per invidiam ipse similis esse DEO voluit, & primis hominibus gloriam invidit, ad quam nos creatos à DEO vidit; per invidiam mun-

mundum perdidit; & quidquid mali potest, usque modò facit.

Expostulatio. O homo invide, quid lucri tibi affert hoc pessimum invidiæ peccatum: certè nihil aliud, nisi tormentum animæ gravissimum; privationem gratiæ Divinæ. & bonorum cœlestium, quæ subtrahuntur à DEO illi, qui hæc invidet aliis; odium DEI eò quod doles, cum beneficia DEI aliis communicata vides.

Exsecratio. Exsecror bone JESU, hoc abominandum invidiæ vitium; quia est maxime contrariū tuæ Divinæ Bonitati, per quam tua dona creaturis communicas, de quo invidia tristatur.

Detestor illud, ob tuam infinitam, injuriam, quæ tibi Domino meo per ipsum irrogatur. Displicet mihi valde, quia tibi displicet. Utinã nunquam te hoc peccato: & omnibus quibuscunq; aliis offensissem!

Et quoniam infinities major est tua Bonitas, quàm mea malitia; ideò spero me veniam à te obtenturum; ego autem nolo unquam, tuâ Divinâ adjutus gratiâ, quam humiliter peto, & in qua sola confido, tuam Divinam bonitatem hoc peccato, & quocunq; alio offendere.

Desiderium. Jam desidero radicis extirpare ex animo meo invidiæ vitium, per veræ charitatis exercitium.

O si jam non amplius me ulla tristitia afficiat ex felicitate aliorum, quod hominem sanæ mentis non decet.

Utinam abhinc eo amore prosequar proximum, quo & me ipsum, quod mihi ad salutem est necessarium!

Utinam, Domine mi, quam perfectissimè adimpleam, illud mandatum tuum, quod tu jam mortuus dedisti nobis, dicens: Mandatum novum do vobis, ut diligatis invicem sicut dilexi vos!

O si jam gaudeam semper de omnibus: proximi bonis, tanquam de meis, & velim ipsi eadem bona, quæ mihi volo, ut tibi Domino meo placeam.

Gratiarum actio.

ET quoniam, ô clementissime DEUS, hoc gravissimo invidiæ peccato, & aliis innumeris me tuam infinitam bonitatem offendentem tam diu patienter tolerasti, non me, ut merui, severe punivisti, non in locum inferni profundum æternis flammis cruciandum detrustisti, immò multa bona tua mihi indignissimo tribuisti, & usq; nunc tribuere non desinis; ideò infinitas tibi gratias ago, pro hac tua in me clementia, & benignitate, & pro universis beneficiis tuis innumeris; quæ ex momento conceptionis meæ à te accepi. *Reliqua habentur pag: 73. & pag: 94.*

OBLATIO.

HÆC est supra pag: 79. & 96. cui addantur hæc *Proposita.* Præterea, ô amantissime DEUS meus, firmissimè statuo invidiæ peccatum diligenter ex amore tui vitare.

Fugiam hoc diabolicum vitium, quod superbiam parit quodq; odiorum detractionis, exultationis in malis

malis aliorum, & afflictionis ex prosperis eorum sit causa.

Si quando insurrexerit in me aliquis vel minimus pravus invidiæ affectus, subito eum reprimere, tuo fretus auxilio Divino, conabor.

Nolo amplius dolorem aliquem seu tristitiam de bonis alienis habere, sed potius lætabor semper tanquam de propriis, tibiq; gratias agam sicut pro nostris, & pro eorum conservatione & augmento ad tuam gloriam orabo.

Opto, & quantum commodè potero, procurare illis volo omne bonū tibi placitū, & illis salutiferū.

Nolo unquam diminuire fratribus meis famam bonam, defectus illorum, imperfectiones, & vitia revelare, eminentiam suppressere, bonas actiones silentio dissimulare.

Libenter narrabo & prædicabo aliis bona, & virtutes eorū, & ab aliis laudari eos gaudebo.

Ab sit à me, ut odio habeam proximū meū quacunq; de causa, vel eum in animo parvi pendam.

PETITIO.

SED ad hæc præstanda, quæ proposui, fateor, me minus esse idoneum. Da igitur obsecro Domine DEUS meus, ut, quod te inspirante statuo, perficiam.

Confirma hoc DEUS quod operatus es in me. Cōcede, ut ex corde meo invidiæ pestem excutiam, & hoc malum radicibus evellam. Da mihi veram erga proximos meos charitatem, ut per eam eorum bona mihi placeant, mala verò displiceant, & ut de bonis illo-

illorū gaudeā, de adversis verò cōtrister. Da mihi virtutē humilitatis, ut inferior videri aliis, in doctrina, ingenio, aptitudine, & in cæteris non ægrè ferā. Insuper da contēptū mei ipsius ut nō appetā ullā excellentiā supra alios, nec ob alienā, ullum mærorem concipiā. *Adde petitionem communem quæ est supra p. 82 & p. 97.*

E X E M P L U M

PRO FERIA SEXTA.

Pro Vitio Gulæ eradicando.

Per Abominationem ejus, & Actus Abſtinentiæ.

HAc die fieri solet Meditatio de Christo Domino Crucē bajulante; vel in Cruce pēdente, in qua felle & aceto potatus fuit: unde motivū haberi potest, ad vitiū gulæ detestandum.

COLLOQUIUM ANIMÆ CUM DEO.

Cōmemoratio fellis & aceti Christi Domini nostri.

OSsaviſſime Domine JESU Christe, qui pendens in cruce, inter cætera tormenta tua, linguam tuam benedictam torqueri, per tuos crudeliſſimos hostes voluisti, quando aceto cum amaro felle mixto ab illis potatus fuisti.

Admiratio. O dignam stupore ingenti Bonitatem tuam, per quam, pro peccato gulæ primorum parentum nostrorum, qui videntes in paradiso pomum vetitum pulchrum visu, & ad vescendum ſuave contra DEI mandatum comederunt illud, & DEUM ad indignationem provocaverunt, tu amaras pœnas, & acerbissimos cruciatus subijti.

Accusatio sui. Fateor, ô bone JESU, quòd & ego ab hoc turpissimo vitio non sum alienus, pro quo tu sacratissimum gustum tuum amaritudine fellis

in

in cruce affligi permisisti. Quandoquidem & ego sæpius, per inordinatum cibi & potus appetitum, hoc est, per gulæ peccatum, tuam infinitam bonitatem offendi.

O quàm frequenter peccavi summando cibum & potum, Præpropere, lautè, nimis ardentè, studiosè! hoc est, debitum tempus præveniendò, delicata & pretiosa esculenta quærendò, vel saltè desiderândò, quantitatem cibi & potus juxta necessitatè naturalem non servandò, nimis avidè, immodestè, & festinanter eos sumendò; nimis accuratè & curiosè præparari procurandò, de quo nunc me cum ingenti dolore accuso.

O quàm crebro sumpsi cibos & potum, non tam propter necessitatem, quàm potiùs ob eorum savoritatem, & ex eis capiendâ voluptatem! O quàm multoties à vilioribus, & gustui meo insipidis esculentis animum avertebam, & ad sapida inclinabam! O quoties dum vilior, aut minor portio, vel minùs palato meo grata offerebatur, ægrè id ferebam, & intra me murmurabam.

Admiratio. Quis super hæc non obstupefcat, cernens, quòd hoc puerile vitium me adeò sæpè viciit, immò & nunc vincit, & me ad exercendas virtutes, & ad multas honestas actiones peragendas ineptum reddit.

Confusio. Verè confundi & erubescere debeo; quia me gulæ & ventris mancipium feci; cujus desideriiis satisfacere semper intentus fui.

Reprehensio. Ac propterea nunc me acriùs arguo.

M

quo

quo coram tua Divina Majestate, ut hominem iniquitati servientem, & more pecudum viventem, quæ ideo vivere existimantur, ut comedant: at homo ratione prædinus idcirco comedere debet, ut tibi vivat, ut tibi Domino suo serviat, ut capiendo cibum voluntatem tuam adimpleat, tibiq; per hoc placeat.

Exposulatio. O me hominem miserum & verè lumine rationis orbatum, qui non video, quam sit perniciosum animæ gulæ vitium, quod multis gravissimis peccatis januam aperit, & innumera in animam introducit; quod sit sædissimi peccati luxuriæ parens & origo: quod sit dæmonis Instrumentum, quo vitur ad hominum perditionem, & multas offensas DEI.

Exsecratio. Exsecror, benignissime JESU, hoc belluinū vitium, ut pote abstinentiæ & parsimoniæ tuæ, quā usus es interris, cōtrarium; exsecror ut maledictum, propter quod maledixisti terræ in Paradiso, dicens: Maledicta terra in opere tuo. Exsecror, ut aliquid viris servitio tuo Divino dicatis profanum.

Abominor illud, & averfor, & doleo ex amore tui, quod unquam offenderim te DEUM infinitè bonum, per varia gulæ peccata, & alia innumera scelera. Jam te ampliùs offendere nolo, & veniam à te spero.

Desiderium. Desidero, dulcissime DEUS, propter te, toto animi studio, ab hoc turpissimo vitio declinare, & ad cultum abstinentiæ diligenter attendere.

O u-

O utinam ab hinc in cibo & potu servem parsi-
moniam, quæ ad salutem securius assequendam est
pernecessaria!

O si non amplius improbus & inordinatus ad
cibum & potum affectus, me ad perfectionem, hoc
est, ad te Dominum meum currentem præpediat!

O uinā secundū leges naturæ, quæ est contenta
modico, prout hominem decet, vivā tibiq; placeam!

O si jam majorem curam animæ, quàm corporis
habeam; quandoquidem, quanto magis corpus per
abstinentiam marcescit, tantò magis anima specio-
sior sit, in conspectu tuo!

O utinam non epulones splendidè viventes, sed
Sanctos tuos jejunantes, & potissimum te ipsum
Sanctū Sanctorū, quadraginta dierū spatio, à cibo ab-
stinentē, & felle atq; aceto potatū sequar, & absti-
nentiae virtutem exemplo tuo perpetuò exerceam!

Gratiarum Actio.

Gratias tibi ago infinitas, ô sapientissime Do-
ctor virtutum, qui reprobando nostram in-
gluviem, & omnem gulositatem, fellis ama-
ritudine tuum benedictum palatum in cruce imbui
voluisti; & provocando nos ad abstinentiae virtutē,
sæpè esuriem & sitim sustinuisti; atq; ut in re nulla
Carni tuæ Sanctissimæ indulgisses, parcissimo cibo, &
potu in terris usus fuisti.

Præterea infinitas tibi gratias ago, & pro omni-
bus beneficiis. *Reliquæ ut supra p. 73. & p. 94.*

OBLATIO.

Hæc fieri potest ut supra habetur p. 79.

Proposita Præterea statuo firmissimè bellū gulæ indicere, eamq; impugnare, & nē me aliquando superet sedulō curare.

Fugiam semper delicias mihi & bestiis communes: sed meæ deliciæ erunt cum Angelis per contemplationem gustare, quā sūavis es Domine!

O temperantissime JESU, decerno escā & potu eo tantū uti, ut natura ad serviendū tibi consistat.

Abstine à me, Domine, ut lauta, vel ullo modo palato sūavia quæram.

Vellē dulcissime DEUS ut omnia quæ sumptuosū sum absynthium saperent, propter te.

Propono, Domine, corpus meum, ob amorē tuum, famē, & siti vexare.

PETITIO.

Sed tu scis, Domine, quia sinē tuo adjutorio, nihil boni facere possum; ideō obsecro te, per tuam immensam misericordiam, tuamq; sacratissimam Passionem, & abstinentiam, per famem & sitim tuam, per fel amarum in cruce gustatum, per sacrum jejunium tuum, libera me à vitio gulæ. & ab omni ingluvie, & da mihi virtutem abstinentiæ. Da ut mediocrem curam corporis habeam; & non permittas, ut sub necessitatis pallio superfluitas aliqua, & oblectatio, in capiendo cibo & potu, subrepat. Fac, ut cibus animæ meæ sit de te cogitare, de te meditari, legere, audire, & tuā sanctissimā facere voluntatem. Fac me semper sobriē, & iustē & piē vivere, expectando beatam spem, & adventum glo-

Pro extirpando Iræ vitio.

181

gloriæ tuæ, ô DEUS, ô fatietas ô verè omne bonum. *Adde Petitionem communem; quæ est supra pag: 82. & 97.*

EXEMPLUM

Orationis.

PRO DIE SABBATI.

Pro extirpando Iræ vitio.

Per Abominationem ejus, & Actus Mansuetudinis.

HAc die proponuntur nobis ad meditandum dolores & afflictiones Beatissimæ Virginis MARIE, quas habuit tempore Passionis Christi Domini nostri Filii sui, & quas pertulit cū insigni patientia, modestia, resignatione, potissimum autem cum incredibili mansuetudine, erga crudelissimos Tyrannos & occisores unici ejus Filii quibus non commitabatur, non maledicebat; sed sicut Christus Dominus noster, tanquam agnus mansuetus, coram tondente se obmutuit, immò pro inimicis oravit: sic Beatissima Virgo in suis injuriis & afflictionibus siluit, & in corde, pro suis inimicis, preces ad DEUM fudit. Hinc exemplo Mansuetudinis Domini nostri, & Beatissimæ Virginis Matris ejus, ad vitandum, extirpandumaq; vitium iræ concitari & nos debemus.

COLLOQUIUM ANIMÆ CUM DEO.

Commemoratio Mansuetudinis Christi Domini nostri, & Beatissimæ Virginis Matris ejus.

OMitissime JESU, qui ab impiis inimicis tuis, tanquam latro irreverenter ligatus, di-

M3

ris-

rissimè flagellis cæsus, alapis, & colaphis percussus, spinoso diademate coronatus, demùm inter latrones in cruce suspensus, & multis injuriis gravissimis affectus, os tuum contra eos non apperuisti, & nullam comminationem edidisti; sed tanquam agnus coram tondente te, obmutuisti: immò pro ipsis Patrem tuum Æternum orasti. Eodem modo, & dulcissima Virgo Mater tua, contra crudeles tyrannos & parricidas, qui te prædilectum Filium suum atrocissimè occiderunt, se gessit, quæ non eis comminabatur, non maledicebat, sed pro eis, ut hoc peccatum dimitteretur ipsis, in corde suo orabat: quo facto iracundiæ vitium nostræ condemnastis, & virtutem mansuetudinis nobis commendastis.

Admiratio. O quam stupenda hæc mansuetudo vestra fuit, dilectissime JESU, & MARIA! qui non vindictam de Cælo petistis, non Angelos in defensionem vestram invocastis, non fulmina de Cælo super inimicos vestros demitti postulastis, non ut terrâ apertâ in abyssum inferni detruderentur voluistis; sed patientissimè omnes injurias vestras tolerastis.

Accusatio sui. O quam longè dissimili modo ego me sæpius gessi, in meis aliquibus modicis offensis, ab aliis mihi irrogatis; Nam ob levissimas injurias, immoderatum vindictæ appetitum frequentissimè habui, & in eo diu mansi, & usq; ad ultionem non quievi. Aliquando ita contra proximum excandui, ut eum odio implacabili, fuerim persecutus. Aliquando in verba contumeliæ, & maledicta prorupi. Nonnunquam ex indignatione ad proximum

100
mum loqui, eiq; charitatis officia exhibere nolui. Nonnunquam vel tristitiâ vultus, vel ficto risu, aut potius irrisione, & proximi contemptu malevolentiam ostendi, de quibus iracundiæ peccatis, cum magno cordis mei dolore, nunc me coram te Domino meo accuso.

Admiratio. O quis non mirabitur hujuscemodii malignitatem meam, per quam in tot ac tanta peccata iræ incidi?

Confusio. Pudet me vehementer, ô DEUS meus, indignationis meæ, quâ meæ vilitatis & indignitatis oblitus, contra alios digniores & meliores sæpè insurrexi.

Reprehensio sui. Proinde me ipsum in cōspectu tuo acrioribus verbis, corripio, & arguo, tanquam hominem nequam, qui illud quod maximè decet hominem ratione ornatum, multoties in conspectu tuo & Angelorum patrare sum ausus.

Expostulatio. O me miserum hominem qui dum adversariis meis, vindicando injurias, nocere volui, magis mihi ipsi nocui, nesciens, quòd qui odit fratrem suum homicida est, primò proximi, voluntate & affectu, deinde sui, opere & effectu, occidens animam suam. Et qui vult vindicari, inveniet vindictâ à te Domino nostro, à quo non est alia spes nobis veniæ impetrandæ, nisi dimiserimus aliis si qui nos læserint.

Exsecratio. Exsecror, Domine mi benignissime, omnem vindictæ appetitum, seu iræ pessimum vitium, quod facio, propter te, quia est tuæ bonitati, mansuetudini, patientiæ contrarium. De-

Detestor & abominor illud, quia est tua offensa infinita: & doleo quòd sæpissimè in te per hoc vitium & alia innumera, peccaverim.

Utinam non peccassem! utinam te, Domine DEUS meus, mea indignatione ad indignationem non provocassem! Et quamvis veniam non merear, attamen meretur bonitas tua infinita, ut mihi ignoscas, & emendationem tribuas. Ego autem nolo amplius in te, & coram te peccare.

Desiderium. Verùm desidero, sicut omnia peccata, ita & iræ semper vitare.

Cupio non de proximo meo, si quando ab illo quocunq; modo læsus fuero, vindictam sumere, sed prius de me ipso pro præteritis iracundiæ peccatis.

O si jam nunquã obicem salutis & veniæ consequendæ à te, ô bone JESU, ponã, si & ego aliquando inimicis meis denegavero veniam!

O utinam semper offensas meas prompto animo dimittam, ut & tu, clementissime JESU, mihi dimittas: qui dixisti Dimittite, & dimittimini!

O utinam nunquam hoc turpissimo vitio, dignitatem humanæ naturæ deformare velim!

O si jam fidelissime adimpleam mandata tua, Domine! Nam tu mandasti: Diligite inimicos vestros; benefacite his, qui oderunt vos: & orate pro persequentibus & calumniantibus vos; ut sitis Filii Patris vestri, qui in Cœlis est: qui solem suum oriri facit super bonos & malos, & pluit super iustos & iniustos.

O utinam sequar mansuetudinis eximium exemplum

plum Virginis Sanctissimæ Matris tuæ, & aliorum Sanctorum, sed potissimum tuum, qui tuis inimicis nō vindictā, non pœnā, non gehennā sed veniā à Patre Eterno postulasti, unde & nos idē à te discere mandasti: dicens; Discite à me, quia mitis sum.

Gratiarum actio.

Gratias ago tibi, ô mitissime IESU, pro hoc exemplo virtutis Mansuetudinis, & pro suavissimis mandatis tuis de eadem virtute plurimum ad salutem nobis necessaria.

Gratias tibi ago, quia me hominem iracundum, & ad iracundiam te commoventem non punivisti, sed tamdiu patienter me tolerasti, nec vindictam de me pro tua injuria sumpisti, dum ego de aliis proximis ultionem quæsissem.

Præterea gratias ago, & pro aliis innumeris beneficiis tuis. *Reliqua habentur p. 73. & p. 94.*

OBLATIO.

Hæc fieri potest ut supra est posita p. 79. & p. 96.

Proposita. Præterea firmissimè propono concupiscentiam vindictæ in me comprimere semper, & omnes iræ motus cohibere.

Nolo unquam dare in corde meo locum iræ, nec eam diu fovere, nec ad ultionem procedere.

Abstine à me, ut sim implacabilis, vindictæ cupidus, & memor injuriæ adversus proximum meum, nè & tu memineris iniquitatum mearum.

Quantum potero, omnes injurias meas æquo animo tolerabo, & oblivioni tradere curabo, nè ex recordatione illarū, iræ scintilla, facile in animo meo accendatur.

Dabo

Dabo operam, ut iratus aut nihil loquar, aut si loquendum sit, verba lenia, & blanda proferam.

Curabo, ut sol non occidat super iracundiā meam, & ut beneficiis inimicos meos, aut mea alienatos, ad concordiam, & pacem, & mutuū amorem inducam.

Certissimè statuo, quotiescunq; læsus fuero, me quasi agnum coram tondeute futurum.

PETITIO.

Sed quia ego impotens sum vehementissimis motibus resistere; idè obsecro te, per tuam infinitam Bonitatem, Passionem tuam & Mansuetudinem; per preces, & merita, & per hujus virtutis heroicos actus dulcissimæ Matris tuæ Virginis **MARIÆ**, da mihi ad hoc auxilium tuum, ut nunquam per indignationis furorem te offendam, ut immoderatum appetitum vindictæ refrænatum semper habeam, ut pessimum iræ vitium radicis exstirpē.

Infer, quæso, cordi meo mansuetudinis, & patientiæ virtutem, ut sciam, & valeam mansueto corde malum in bono vincere, & inimicos nostros diligere; atq; his, qui oderunt nos benefacere, & pro persequentibus nos orare: pro quibus etiā nunc te oro; ignosce illis. Da illis omnium peccatorum veniam, & nē te ampliùs offendant gratiam, & beneficiorum abundantiam, deniq; bonam mortem, vitam æternam, & amplissimam gloriam. *Adde petitionem communem quæ est supra p. 82. C. p. 97.*

E X E M P L U M

Orationis.

PRO

Pro exstirpando Acedia vitio.

187

PRO DIE DOMINICO.

Pro Exstirpando Acediæ vitio.

Per Abominationem ejus, & Actus Diligentie.

HAc die fieri potest ab incipientibus meditatio, de Christi Domini nostri in mundū Adventu, ejusq; Sacratissima Incarnatione; & Nativitate, quæ facta sunt, adveniente plenitudine temporis à Patre Cœlesti ab æterno destinati. Quæadmodum & alia cuncta, quæ fecerat Christus Dominus in vita sua, pro salute, & redẽptione generis humani, hæc omnia in illo temporis momento, quo illa fieri ab eo voluit, Pater Æternus, egit Christus, idq; cum maximo studio, & diligentia proinde de eo dicitur *Psalm.* 18. Exultavit, ut Gigas ad currẽdam viam: hoc est, hilariter, & velociter cucurrit viam hujus vitæ, laborando pro salute nostra, sicut mandavit ei Pater Æternus. Et hoc modo arguit nostram acediam, socordiam & tepiditatem, in facienda voluntate DEI, in servandis mandatis ejus, in virtutibus exercendis, & in operibus ad salutem nostram pertinentibus.

COLLOQUIUM ANIMÆ CUM DEO.

Commemoratio eorum, quæ fecit Christus pro salute nostra, cum magno fervore, tempore à Patre Æterno designato.

ODulcissime IESU, qui adveniente plenitudine temporis à Patre Æterno designati, in hunc mundū venire, homo fieri, & nasci dignatus es: & qui universa alia, quæcūq; operatus es in terris, pro salute, & redemptione generis humani, illis temporū momentis, quibus voluit Pater

Cœlestis, ea à te fieri, hæc fecisti; idq; cū maximo studio, fervore, & diligentia, prout par erat.

Admiratio. O quis non rapiatur in stuporem super magnitudinem sollicitudinis tuæ, in adimplendis mandatis, & voluntate Patris tui Æterni. Verè exultasti ut Gigas ad currendam viam hujus vitæ: hoc est: Verè cum magna hilaritate, ac velocitate cucurristi viam hujus mortalis vitæ, laborando pro salute nostra, sicut mandavit tibi Pater.

Accusatio sui. At ego miserrimus, & vilissimus peccator, quanta cū tepiditate omnia feci, & adhuc facio, quæ tu mandasti, & facienda ordinasti: quanta cū ignavia circa salutem meam quærendam hætenus me gessi, & usq; modo gero quàm grave acedie vitium tenet mentem meam, propter quod maximū tædiū & amaritudinem sentio in anima mea, in bonis actibus, in exercitio virtutum, in mortificandis passionibus, in meditationibus, in sacris precibus, in lectione librorū spiritualiū, in cellæ recessu, in sermone de rebus ad salutē spectantibus, in exhortationibus spiritualib9, in abstinentia regulari, in castigando corpore, in nocturnis vigiliis, in prolixiori oratione, & in aliis observantiis & exercitiis, quæ status præsens religiosus à me exigit. O quantum placet vita otiosa, vanæ confabulationes, diurnæ deambulationes, longa quies, mundanæ cogitationes, sensuū oblectamenta, & sine ullo fructu actiones: quorū omniū maledicta parens est acedia!

Admiratio. O quis non miretur hanc miseram, & infelicem vitam meam, perpetuis lacrymis & gemitibus

Pro exstirpando Acediæ vitio.

189

gemitibus deplorandam, absq; ullo fructu consumptam.

Confusio. Vere pudore suffundî & erubescere me oportet, quòd ego illos gratiæ tuæ dies, quos dedisti mihi ad dignos fructus penitentiæ faciendos, ad benè operandū, ab negotia salutis diligētèr peragenda, in otio expendi, vel potius perdidî.

Reprehensio sui. Ac proinde me dignum vehementi objurgatione, & reprehensione esse censeo, quia iniquè egi, quia impiè vixi.

Expostulatio. Agnosce, ô homo perditè, damna animæ tuæ gravissima, quæ tibi affert ignominiosū acediæ vitium, cui propriū est mærore animū cruciare, fastidiū in bonis operibus generare; odiū rerū Cœlestiū, quinimo ipsius DEI, in anima concitare, deniq; ad desperationem in articulo mortis hominē compellere.

Exsecratio, Abominatio, & Dolor.

Exsecror, Dulcissime JESU, hoc perniciosissimū acediæ peccatū, ut pote tuo fervori, cū quo omnia vivens in terris operari dignatus es, oppositū, tibiq; ingratisimū.

Abhorreo ab illo, displicet mihi, quia tibi displicet.

Doleo vehementer ex amore tui, quòd unquam læserim tuam infinitam Bonitatem acediæ & aliis quibuscunq; peccatis: jam illa propter te fugere volo: & indulgentiam à te spero.

Desiderium. Et quoniam omnem ignominiam & pigritiam odio habeo, cui semper inimicus esse volo: idèò amo fervorem, & diligentiam, cum qua cūcta operari desidero.

O uti

O utinam ad honorem, & gloriam tuam, dilectissime JESU, quod cupio adimpleam, ut necessario fervoris subsidio, citius ad portum salutis, ad vitam æternam consequendam, ad fruendum te in æternum perveniam!

O si damna illa universa, quæ in neglecto & tepido acquirendæ perfectionis studio & in virtutum, atq; bonorum operum exercitio per acediam patior, per diligentiae virtutem, quàm ocyssimè resarciā!

O si non amplius mæror, & inordinata in tuo obsequio tristitia, Domine mi, invadat, & teneat mentem meam: sed salutaris lætitia faciat me cuncta cum jucunditate, quæ tu vis à me fieri, peragere!

O utinam nullam opportunitatem benè agendi, tibiq; Domino meo placendi, sicut decet Religiosum prætermittam!

O si jam cuncta, suo tempore præscripto pro honore tuo peragam, sicut tu pro salute nostra fecisti, cujus exemplum fideliter sequi percupio.

Gratiarum actio.

Propterea gratias ago tibi infinitas, benignissime JESU, quòd adveniente plenitudine temporis, sinè ulla mora de Coelis descendisti, ut nos redimeres, & de diabolica potestate liberares.

Reddo tibi laudes infinitas, quòd exultasti ut Gigas ad currendam viam Redemptionis nostræ; hoc est, quòd cum ineffabili exultatione, & fervore peregisti opus salutis nostræ; nec desisti duos labores pro nobis perferre, donec consumarentur omnia, quæ tibi à Patre Æterno injuncta fuerunt.

Præ-

Præterea infinitis laudibus extollo tuam Bonitatem, per quam me hominem ignavum, inutilem, tepidum, tuis beneficiis abutentem, dies gratiæ tuæ bonos in otio consumentem tam diu tolerasti, & ad emendationem expectasti.

Insuper infinitas tibi gratias ago, proinnumeris beneficiis tuis. *Reliqua ut supra p. 73. & p. 94.*

OBLATIO.

Hæc habetur supra p. 79. & 96.

P*Reposita.* Præterea constanti animo, ut tibi, Domine mi, hac in re placeam, propono omnem pigritiam in tuo obsequio fugere, ignaviam in bonis operibus exercendis abijcere, & accidiam in exequendis mandatis tuis eradicare.

Nolo unquam dare locum tristitiæ, vel alicui tædio in bono opere, & in actibus spiritualibus, quos cum omni animi alacritate & lætitia inchoare, & in eis continuandis usq; infini perseverare contendā.

Dabo operam, ô Domine mi, ut nunquam ob aliquam corporis molestiam, laborem aut difficultatem, ea quæ pro tuo honore, vel mea, proximorūq; salute. & ex tuo præcepto agenda sunt, tempore debito agere omittam.

Tantam diligentiam & sollicitudinem singulis bonis operibus apponere curabo, ac si tota salus mea ex uno quoq; penderet.

Quemlibet actum bonum eo cum fervore spiritus, & cura expedire conabor, ac si illud opus ultimum esset, & ac si statim essem moriturus, & rationem de eo tibi districto Judici redditurus.

Beni-

Benignissime DEUS, in tuis laudibus Divinis, & in Oratione, attentissimus ero, nec unquam voluntariam distractionē, & animi evagationem admittā.

Amantissime DEUS, ad omnia opera tibi grata, ad omnem obedientiæ, omniūquē aliarum virtutū actum obeundum, me vigilem, expeditum, & alacrem fore, propter te, decerno.

PETITIO.

Verū quis ego sum, ut istud, quod propono perficiam,, qui sentio vinculis antiquæ socordix & tepiditatis me innodatum? quæ vincula tu solus dissolvere poteris. ô bone JESU, à quo id humili corde posulo. Fac Domine JESU, ut exultem, ut Gigas ad currendam viam mandatorum tuorum. Fac, ut dum tempus est, quodcūq; bonum potest facere manus mea, instanter illud operetur, amore tui. Fac ut juxta vocationem meā sollicitè viam, tibiq; Domino meo servidè serviam. Et quoniam vocasti me ad vitam religiosam. *Reliqua habentur p. 82. & 97.*

E X E M P L A

Orationis.

Pro Proficientibus.

Eundem modum hujus exercitii spiritualis, seu Orationis, mentalis faciendæ, tenere possunt Proficientes, qui est datus pro Incipientibus. Et quoniam Proficientium præcipua hæc debet esse cura, ut in virtutibus sedulo se exercent, & in illis proficiant, in quibus Christum Dominum, tanquam absolutissimum Exemplar virtutum imitari eos oportet:

ret: ideo meditationes eorum de vita sacratissima Domini nostri fiant: sicut in Religione nostra, tempore matutino de mysteriis Passionis ejus solent esse, in quibus habemus præclara omnium virtutum exempla, ex quibus vehementissima habere possumus incitamenta, ad exercitium similium virtutum. Itaq; considerando aliquas Christi virtutes, & statim agnoscendo easdem nobis deesse, fateamur istud coram ipso, doleamus, desideremus imitari eum: tandem facta Gratiarum actione, proponamus exercere nos in virtutibus nobis necessariis, deniq; ad hoc auxilium DEI & alia petamus.

Igitur cū jã ipsã Orationē, seu Colloquiū cū DEO facere volumus, ponatur primò Cōmemoratio alicujus virtutis Christi Dñi nostri; deinde Admiratio, super bonitatē Dei postea Accusatio sui, Admiratio, super malitiã nostrā Confusio, Reprehensio, Expostulatio, Abominatio, Dolor, Spes. Post hæc Desideriū virtutis, Gratiarū Actio, Oblatio cū Propositis, deniq; Petitio. Quod si quis in aliquibus recensitis affectibus exercendis difficultatē habuerit, nemo hac de re sit nimīū sollicitus, sed exerceat illos, quos potest, servatis his principalioribus: videlicet Cōmemoratione virtutis Dñi nostri, Accusatione sui, Dolorē, Desiderio illius virtutis, Gratiarū actione, Oblatione cū Propositis, & Petitione. Neq; sit aliquis multū anxius quòd modos Desiderii & Propositorum tot, quot sunt dati in omnibus exemplis suprā positis, non possit in promptu habere; sit contentus illis qui ipsi occurrunt: in quibus omnibus eum omni libertate animi, & modo

modo svavi procedatur; nè fastidium istius exercitii tam salutaris, & ad perfectionem assequendam adeo necessarii in anima generetur. Qui verò citius in hoc exercitio proficere desiderat, & se ipsū ab omni tædio, quod plurimi in Oratione mentali experiri solent, liberare, omninò conetur mandare memoriae: datum hîc exemplum superius. Gratiarum actionis, Oblationis, & Petitionis, vel prolixius, quod est p. 73. vel brevius, quod est p. 94. & sic totum negotium ipsius erit in Meditatione cognoscere, in quo emendare vitam, & quam virtutē sollicitè quærere, ac exercere debet. Et quoniam multa sunt jam data Orationis mentalis exempla pro Incipientibus, seu pro via Purgativa, secundum quæ Proficientes suas Orationes facere possunt, ideo hic tantum unum exemplum Compassionis, & aliud obedientiæ datur: quibus adjungitur exemplum de Beatissima Virgine, & aliis Sanctis.

E X E M P L U M

Orationis.

De Obedientia.

IN mysteriis Passionis Christi Domini nostri, & in omnibus Sacris actionibus ejus istæ potissimum Circumstantiæ sunt expendendæ. *Quis, Quid, Cur, Quomodo: idest, Persona, Opus, Causa, & Modus.*

Circa primam Circumstantiam.

Quis patitur, & Pro quibus, hæc consideranda sunt; quòd patitur ipse DEUS Optimus, & Beatissimus, pro nobis pessimis & miser-

meserrimis. Creator Potentissimus, pro nobis creaturis vilissimis. Verus DEI Filius per Incarnationem Frater noster factus primogenitus, pro nobis adoptatis, & indignis fratribus suis, JESUS Salvator noster, pro nobis perditis, & damnationis æternæ reis, Sanctus Sanctorum, pro nobis sceleratis, & immundis. Pater noster superpijsissimus pro nobis filiis ingratis, & impijs. Rex gloriosissimus, pro nobis subditis rebellibus, Princeps, ac Dominus supremus, pro nobis, servis inutilibus, & infidelibus, ac malis. Magister Sapientissimus, pro nobis discipulis insipientibus. Amicus noster fidelissimus, pro nobis inimicis scelestissimis.

Circa secundam Circumstantiam.

Quid patitur, hæc examinanda. Quid patitur in corpore, in anima, in honore. In corpore patitur acerbissimos cruciatus & tormenta, innumeras plagas & vulnera. In cunctis sensibus & per omnia membra: patitur in corpore delicatissimæ, & tenerrimæ complexionis, atq; maximæ sensibilitatis: patitur in corpore jam debilitato, & exhausto, per abstinentias, labores, vigiliæ, & assiduas orationes: patitur in corpore multorum Carnificum tyrannidem ineffabilem, patitur in corpore tantos dolores, ut superent omnes dolores, carnificinas, laniatus, qui fuerunt unquam in mundo, vel in posterum erunt.

In anima patitur gravissimas afflictiones & mærorem, sinè ullo modo consolationis, & refrigerio. Fuit autem causa mæroris, tum gravitas peccati Judæ,

dæ, & Petri Apostoli, atq; Judæorum: tūc malitia futura hominum, qui parvi æstimantes cūcta hæc, quæ passus est pro illis Christus, multis eum peccatis erant offensuri: deniq; propter exiguum fructū, quem prævidit futurum in hominibus, ob negligentiam & ingratitudinem eorum: insuper propter infinitam multitudinem damnatorum, qui se indignos participatione Passionis ejus, & Redemptionis reddiderunt.

In Honore autem patitur varia opprobria, contemptus, irrisiones, blasphemias, & contumelias, per colaphos, alapas, sputa, spinas, flagella denudationem, mortem ignominiosam, & cum iniquis ac latronibus deputationem.

Circa tertiam Circumstantiam.

Cur patitur. Causæ investigandæ Passionis Domini nostri. *Primò.* Ex quâ Causa patitur; & hæc est Bonitas ipsius infinita, atq; nimia erga nos Charitas. *Secundò.* Propter quam Causâ patitur: & hæc est nostra Salus & Redemptio, Justificatio, & Glorificatio.

Circa quartam Circumstantiam.

Quomodo patitur, Virtutes Christi Domini nostri inspiciendæ, cum quibus passus est. Nam in omnibus mysteriis Passionis suæ egregia dedit nobis multarum virtutum documenta: nimirum, Charitatis, Prudentiæ, Fervoris, Dilegentiæ, summæ erga DEUM Reverentiæ, Pietatis, Abnegationis, Obedientiæ, Resignationis, Fortitudinis, Magnanimitatis, Patientiæ, Constantiæ, Perse-

severantiæ, Humilitatis, Taciturnitatis, Modestix, Paupertatis, Contemptus sui. Zeli Honoris DEI & nostræ Salutis inimicorum Dilectionis, & aliarum virtutum.

Ex quorum omnium consideratione habebimus Incitamentum ad Compassionem Christi: & ad Imitationem ejus in virtutibus Sanctis. Ad Compassionem quidem, ex consideratione Circumstantiæ Quis, & Quid patitur. Ad Imitationem verò, ex cōsideratione Circumstatiæ Cur & Quomodo patitur. Quod si fuerit Oratio de aliqua virtute, nunc in principio fiat Commemoratio Illius, postea Admiratio fiat de Persona, & de Causa. Si autem fuerit de Compassione, tunc Commemoratio fiat eorum quæ passus est Christus, & in Admiratione Persona, & Causa exprimatur.

Itaq; considerando, quomodo Christus Voluntatē suam subdidit Patris Æterni voluntati, dicens: Pater mi, si possibile est transeat à me Calix iste, verū tamen non sicut ego volo, sed sicut Tu: perfectissimum Obedientiæ Exemplum nobis datum cognoscere debemus, ut & nos ita faciamus.

COLLOQUIUM ANIMÆ CUM DEO.

Commemoratio Perfectissimæ Obedientiæ Christi.

O Humilitatis & Obedientiæ Amator dulcissime JESU, qui venisti in hunc mundum, ut faceres, voluntatem Patris Æterni, sicut ipse hoc indicasti dicens: Quia descendi de cœlo non ut faciam voluntatem meam sed voluntatem ejus qui misit me. Et in horto orans ad Patrem dixisti:

Pater mi, si possibile est transeat à me Calix iste, verum tamen non sicut ego volo, sed sicut tu: quibus verbis ostendisti, quod tuam voluntatem voluntati Patris Æterni subdidisti, quod proprium obedientium est. Proinde & tu obedientissimus fuisti usq; ad mortem, mortem autem Crucis, eligens magis animam ponere, quàm obedientiã non implere. Fuisti autem obediens non solum faciendo voluntatem DEI Patris tui, vel etiam Virginis Matris tuæ Sanctissimæ, verum etiam inimicorū tuorum crudelissimorum, ad quorum nutū in omnibus in Passione tuā te gessisti.

Admiratio. O quis non mirabitur tā eximiã Obedientiã tuã, dilectissime JESU? per quã tu unic⁹ DEI Patris Filius æqualis eidem in omnibus secundum Divinitatē, minorem te Patre secundū Humanitatem ostendisti: per quam tu Creator potentissimus tuis miserrimis creaturis: Tu Sanctus Sanctorum hominibus sceleratis, & immundis: Tu Rex gloriosissimus, Dominus Altissimus, & Imperator supremus, tuis subditis vilissimis, & servis infidelibus subijci voluisti: idq; propter tuam nimiam bonitatem; & ut satisfaceres Æterno Patri pro inobediencia primorum parentum nostrorum, atq; ut nobis hujus virtutis ad vitam æternam obtinendam maximē necessariæ exemplum dares.

Accusatio sui. O quam dissimilis factus sum tibi, obedientissime JESU; quia ego inobedientissimus sum, qui voluntatem meam Divinæ voluntati subijcere nolui, quam sæpissimē per inobedienciã transgressus

gressus sū: qui mandatis DEI svavissimis toties non obediui, quoties contra illa peccavi: qui dulcia verba oris sui, auribus mentis meæ percipere detre-
stavi immò etiā ea contempsi. Quid dicam de in-
obedientia mea erga Superiores Personam DEI ge-
rentes?

O quā crebrò eorum jussis non obtemperavi, vel illud quod injunctum erat sæpè non feci velo-
citer, & sinè mora, nec libenter, seu prompta vo-
luntate: neq; simpliciter, seu cæco intellectu: neq;
hilariter absq; tristitia; neq; fortiter, in rebus ar-
duis: nec humiliter, sinè vanæ gloriæ & laudis
appetitu, neq; perseveranter, seu tempore diuturno.

Admiratio. O quanta hæc mea potervia, per
quam volo jugum obedientiæ excutere, cui cervi-
ces libera voluntate semel, ob amorem tuum, Do-
mine mi, submisi. O quanta iniquitas mea, quòd
qui me in servum tibi perpetuum dedicavi, sæpè
hoc per obedientiam retracto, revoco, & me à ser-
vitude tua subtraho.

Confusio. Pudorè suffundor Domine JESU, dum
te video adeò obedientem fuisse non tantum DEO
Patri, sed etiam scelestissimis hominibus, quorum
voluntatem prompto animo fecisti, ego autem neq;
tibi DEO supremo Domino meo, nec hominibus
probis locum tuum tenentibus obedire volo. Eru-
besco & confundor, cum sciam Cælum & terram,
& omnia, quæ in eis sunt, mandata tuā custodire
nimis, tibiq; fidelissimè in omnibus parendo cuncta
facere, ego autem infelix ita vivo, ac si non ad obe-

diendum, sed ad mandata tua transgrediendum natus essem.

Reprehensio. Ac ideo me arguo coram tua Divina Majestate, tanquam hominem iniquum & servum tuum rebellem, dignumq; plagis multis, & verberibus, ac poenis gravissimis. Sed ô Domine mi clementissime, nunc me, quæso ure, nunc seca, modo in æternum parcas.

Expostulatio. O me miserum, qui non cognosco, aut potius cognoscere nolo, quanta mala inobedientia afferat animæ meæ, quæ sicut nihil est aliud, nisi mandatorum DEI prævaricatio, ita est omnium scelerum perpetua scaturigo: quæ sicut fuit totius mundi, ita nunc est omnium nostrum certissima perditio.

Exsecratio. Exsecror abhinc, svavissime JESU, ex amore tui, omnem inobedientiam, utpote tuo supremo dominio contrariam. Exsecror tanquam Imperii tui rebellionem maledictam.

Abjicio, fugio, & abominor illam veluti rem tibi abominabilem. O utinam nunquam tibi per transgressionem mandatorum tuorum displicuissem! O si semper & tibi, & Superioribus meis, propter te, fideliter parvissem! Utinam nunquam te per inobedientiã, & alio quocunq; modo offendissem! Propter quod ex toto corde meo doleo propter te DEUM summè & supra omnia dilectum. Et quamvis non merear, tamen veniam à tua infinita Bonitate spero: ego autem corrigere vitam volo.

Desiderium Obedientiæ. Jam mihi multum placet

cet hæc sancta obedientiæ virtus: amo illam, & plus æstimo quàm aurum & lapides pretiosos, plus quàm omnia, quæ totus æstimat mundus. Desidero ex corde amplecti eam. Cupio tota animi intentione illam colere.

O utinam abhinc nullam occasionem exercendæ istius virtutis negligam, & omittam, à qua salus mea dependet !

O si jam verè incipiam obedientiæ actibus exercendis insistere, & per eos rebellem voluntatem, ac iudicium proprium subjugare, ut hoc modo in via perfectionis insignes progressus faciam !

O quando ita me geram in hac virtute, sicut decet hominem religiosum ?

Cur igitur non sic ago? quid exspecto? quid moror? cur splendorē & pulchritudinē illā, quā solet habere anima nostra à qualibet virtute non quæro?

O quanta jucunditate, & tranquillitate animi me privabo, si hanc virtutem svavissimam acquirere toto conatu non studebo!

Sed, ô bone JESU, non propter ullum commodum meum, sed purè ob honorem, & amorem tuum, in obedientia imitari Beatissimam Virginem & omnes alios Sanctos, qui in hac virtute obedientiæ amabiles se tibi exhibuerunt, sed potissimū te Dominum meum sequi desidero, qui factus es perfectissimum obedientiæ, & omnium virtutum exemplar: qui humiliasti te ipsum pronobis factus obediens usq; ad mortem, mortem autem crucis.

Gratiarum actio.

Et

ET propterea te adoro, laudo, & glorifico, tibiq; infinitas gratias ago, pro omnibus quæ salutis nostræ causâ fecisti.

Gratias tibi ago immensas, quòd me impium legum tuarum transgressorem condignis pœnis habere non affecisti: quod me rebellem servum tuum, providendo mihi cuncta vitæ necessaria, liberaliter hucusq; fovisti: quòd me contemptorem mandatorum Superiorum meorum, de quibus dixisti: Qui vos audit; me audit; & qui vos spernit, me spernit: benignè usq; nunc in terris sustinueris.

Præterea infinitas tibi gratias ago, & pro aliis innumeris beneficiis. *Reliqua ut supra p. 73. & p. 94.*

OBLATIO.

Hæc habetur supra posita p. 79. & 96.

Proposita. Præterea firmiter statuo vim mihi inferre, ut nūquam obedientiam transgrediar. Nulli operi, neq; occupationi, nisi obedientiæ ipsi me ex toto dedicabo.

Indifferentem, & paratum me ad quæq; injungenda, & exequenda præstabo.

Conabor omnia mandata tua diligenter custodire, & fidelissimè implere semper.

Quæcunq; Superiores mei vicem tuam gerentes mihi injunxerint, faciam illa velociter, sine ulla dilatione & mora.

Libenter, seu prompto animo, voluntatem meam Superioris voluntati subijciendo.

Simpliciter, seu cæco intellectu, imperatum non disci

discutiendo, & iudicium meum Prælati iudicio submittendo.

Hilariter, absq; tristitia, tædio & quærela.

Fortiter, seu excelsò animo, in rebûs arduis & difficilibus, etiam Superioribus parum affectis, & malevolis obtemperando,

Perseveranter, usq; ad perfectam mandati Superiorum impletionem, & usq; ad finem vitæ meæ.

PETITIO.

Verum, ô Domine, quia sinè te nihil facere possum, ideò rogo te per tuam infinitam Bonitatem & Misericordiam, per tuam Sanctissimam Obedientiam & Passionem tuam, ut me obedientem facias, & quod statui, me opere præstare tribuas.

Da ut viam mandatorum tuorum alacri animo curram, & quod in lege præcipis fideliter exequar. Da ut voluntatem meam voluntati tuæ, & Superiorum meorum perfectè subijciam, simul quoq; & proprium iudicium in rebus arduis, & sensui animi mei contrariis vincam. Da ut obedientiæ opus, quod Superior injungit, & ipsum obedire, non aliter quàm rem pretiosissimam æstitem, amplectar, & custodiam.

Præterea da, Domine mi, & fac, ut serviam tibi secundum vocationem meam. *Reliqua ut supra,* p. 82. & 97.

E X E M P L U M

Orationis.

DE COMPASSIONE.

Qua

Quā Christo patienti compatimur.

Quodcunq; mysterium Passionis Domini Salvatoris nostri ad meditandum proposuerim, semper justā causam habebimus compatienti Domino nostro, ex circūstantiis Personæ Patientis, & eorum quæ patitur. Quemadmodum si quis consideraverit tristitiam, pavorem, tædium, agoniam & sanguineum sudorem Redemptoris nostri in horto. Nā tristitia, quæ sanctissimā ipsius animam tunc invasit, tam ingens fuit, ut post damnatorum tristitiam nulla possit inveniri aut cogitari major, idq; propter magnitudinem ac multitudinē tormentorum, quæ sibi inevitabiliter cernebat imminere. Pavor quoq; tunc Christi fuit nimius ob mortem ignominiosissimam instantem. Permitterbat enim tunc naturam suo fungi officio, ut timeret mortem, velut malum naturæ maximum, quod omnes creaturæ viventes totis conatibus fugere consueverunt. Præterea ingens tædium animam Domini nostri mirum in modum tunc afflixit. Est autem Tædium, magna quædam anxietas, propter quam aliquis præ tristitia & fastidio deficit atq; exanimatur, ex quo tædio homines solent horrere omnia, etiam ipsam vitam: quod accidit, dum quis patitur aliquid sine omni consolatione, & refrigerio: sicut Christus Dominus voluit hoc modo pro nobis pati: quale tædium non tantum in horto, verum & per totam Passionem sensit. Agoniam quoq; in effabilem passus est Dominus noster in horto. Est autem Agonia certamen quoddam vel lucta, Itaq; quando
Sanctus

Sanctus Lucas testatur de Christo, dicens: Et factus in agonia prolixius orabat: ostendere voluit per hoc nomen Agonia, tormentum maximum, quod anima Salvatoris nostri sustinuit in horto, ex ingenti certamine & luctu, inter partem inferiorem & superiorem: inter vitam & mortem inter honorem & contumeliam: inter amorem & passionem. Ex qua agonia vel luctu factus est sudor ejus, ut ait Sanctus Lucas: sicut guttæ Sangvinis decurrentis in terrâ: hoc est, tanta abundantia Sangvinis è corpore ejus benedicto emanavit, ut in terram defluerit, eamq; copiosè irrigaverit. Ex quo sudore insolito conjicitur angustias & dolores Christi internos fuisse atrocissimos, propter quos ultra vivere non potuisset, nisi Divina virtus miraculosè vitam ejus conservasset. Quorum omnium devota meditatio ad compatendum Domino nostro faciliè unumquemq; nostrum excitabit.

COLLOQUIUM ANIMÆ CUM DEO.

Cōmemoratio eorū quæ in horto passus est Christ⁹.

O Vir dolorum patientissime JESU, qui ante amarā Passionem tuam veniens in hortum Montis Oliveti, maximā amaritudinem in anima tua benedicta sensisti: & antequam tortores immanissimi in te sævirent, tu sævitiam affectuum tuorum naturalium, tristitiæ, pavoris, & tædii, patiens sponte tua voluisti. Nam tristitia, quæ tunc animā tuam invasit, tam ingens fuit, ut post damnatorū tristitiam nulla possit inveniri, aut cogitari major, idq; propter magnitudinem ac multitudinem tormētorum,

torum, quæ tibi inevitabiliter cernebas imminere. Pavor etiam nimius tunc corripuit te, ob mortem crudelissimam & ignominiosissimam instantē. Permissisti enim tunc naturam suo fungi officio, ut timeret mortem velut maximū naturæ malum, quod omnes creaturæ viventes, & sensu præditæ, totis conatibus fugere consueverunt. Tædium quoq; adeo vehemens animam tuam tunc afflixit, ut tæderet te vivere; eò quòd nullā consolationē ab aliquo, nec refrigeriū habuisti: quia sic pati absq; omni solatio pro nobis decrevisti. Post hæc subsecuta est ineffabilis Agonia, seu quoddā certamē & Lucta, inter partē inferiorē & superiorē: inter vitā & mortē: inter honorem & contumeliam, inter amorem & passionem: ex qua Agonia tormentum maximum sustinuisti, & tantam abundantiam sanguinei sudoris, præter naturæ consuetudinem, ex toto corpore tuo effudisti, ut in terram defluerit, eamq; copiosè irrigaverit. Ex quo insolito sudore manifestum habemus, angustias & dolores tuos internos fuisse tunc atrocissimos, propter quos ultra vivere non potuisses, nisi Divina virtus miraculosè vitam tuam conservasset.

Admiratio. O quis non rapiatur in maximum stuporem, expendendo hæc omnia, quæ tu bone JESU, in horto, & tota passione tua sustinuisti? O bonitatem infinitam! ô charitatem excessivam, quæ istorum dolorum tuorum causa fuit, & quæ te induxit, ut tu DEUS noster Optimus & Beatissimus, pro nobis pessimis & miserrimis: Creator Potentissimus, pro nobis creaturis vilissimis: JESUS, Sal-

vator

vato noster, pro nobis perditis, & damnationis æternæ reis: Sanctus Sanctorum, pro nobis scelertis & immūdis: Pater noster superpijsissimus, pro nobis filiis ingratissimis, & impijsissimis: Rex Gloriosissimus, pro nobis subditis rebellibus: Princeps ac Dominus supremus, pro nobis servis inutilibus, & infidelibus, ac malis: Amicus noster fidelissimus, pro nobis perfidis, inimicis, & scelestissimis: Ut tu tantus ac talis, tanta & tam indigna pro nobis passus fueris. O verè cor saxæum foret, quod tibi tam acerba pro nobis patienti non compateretur: quod nullum internum dolorem super dolores tuos sentiret: quod verum compassionis affectum erga te sanguinem toto corpore stillantē, non in se concitaret: quod super te omnibus poris, seu catartis tui corporis apertis, sanguineas lacrymas fundentem, oculorum suorum lacrymas contineret: quod tecum & pro te pati omnia adversa, afflictiones, cruces, tribulationes, mortificationes corporis nolle.

Accusatio sui. Ego, Ego sum ejusmodi homo miserim⁹, omnibus petris durior, cautib⁹ insensibilior, qui non facile moveor compassione, & cōmiserationis super dolores, angustias, tuasq; tormenta, quæ tu salutis nostræ causâ sustinuisti, dilectissime JESU: qui tibi dolenti non condoleo: lacrymas pro nobis sanguineas fundenti non collacrymo: qui tibi morienti nō commorior, atq; tecum & pro te nihil molesti sustinere volo: qui omnes afflictiones subterfugio, de cunctis adversitatibus facile conqueror; crucē mortificationis jugiter in corpore meo portare detrecto.

Sed

Sed non mirum: quandoquidem de tua Sacratissima Passione rarò lectioni vacare soleo, & illud quod lego non pondero, vel perfunctoriè id facio: & ideo devotionis, & tuæ compassionis expers fio.

Admiratio. O quis non admiretur hanc meam ingratitudinem, erga te Dominum meum pijsimū pro me dolentem, afflictum, & tam dira patientē? quis non commoveatur iusta indignatione contra me, videns me non amare te, qui sic dilexisti me, ut sanguinem totum, & vitam dares pro me?

Confusio. Equidem jurè merito pudore suffundi debeo; eo quòd aliæ creaturæ ab omni sensu & ratione alienæ tibi Creatori suo compatiantur: quod terra tremat, & petræ scindantur, sol obscuratur, in testimonium doloris sui, ego autem sinè ullo sensu doloris & compassionis tuæ maneo.

Reprehenso sui. Ac propterea me arguo vehementer coram te, ut hominem impium, ac ingratū, & parvi æstimantem tuam erga nos immensā Charitatem & Bonitatem.

Expostulatio. O quid agis anima mea, quid agis? ficcine de tua salute parum sollicita es? ignoras, quòd qui nunc compatiuntur Christo, etiā conglorificabuntur? qui nunc dolent, tristantur, affliguntur cum ipso, etiā cum ipso lætabuntur? qui nunc sinè omni solatio vivunt, sicut & Christus vixit in terris, illi consolationibus æternis replebuntur cum ipso in Cœlis.

Exsecratio. Exsecror, dulcissime JESU, hanc tepiditatem, & duritiā cordis mei in compatiendo tibi,

De CHRISTI Compassione.

209

tibi, tuæ Charitati contrariam. Exsecror hanc meā impietatem, & ingratitude[m] erga te, tuæ Bonitati oppositam. Sit anathema apud me: Expungo illam de corde meo, ut non amplius habeat locum in eo.

Doleo nunc ex amore tui, quòd sæpè audiendo, aut legendo vel cogitando aliquando de doloribus tuis, & passione tua, non tibi condolui, non in me affectum compassionis tuæ concitavi: non commiserationem super te afflictum habui. Doleo ex toto corde, quòd amore mei tam gravia tormenta patientem, te redamare neglexi. Doleo, quòd pro his omnibus, quæ salutis meæ causâ fecisti, & sustinui, non tibi condignas laudes persolvi, nec tibi gratias egi, ut debui, & potui.

Doleo insuper & de omnibus peccatis totius vitæ meæ, propter te DEUM summè dilectum. Detestor illa quia sunt infinita offensa & injuria tua. Emendationem vitæ propono: & à te veniam peccatorū meorū spero: atq; id per tuas omnes miserationes te rogo.

Desiderium. Jam ab hinc tibi, ô bone IESU, pro nobis passo & afflicto, cōpati ex corde desidero. Utinam hic compassionis affectus super dolores tuos permaneat semper in anima mea!

Utinam tibi ita compatiar in terris, ut post hanc vitam conglorificer in Cœlis!

Ô si nihil aliud in mente habeam, nisi te Dominū meū JESUM Christū pro me passū! ut tua sacratissima Passio sit mea perennis consolatio: & ut

passi-

passionis tuæ amaræ memoria cōerceat in me vana hujus vitæ gaudia.

Utinam configar tibi semper, Domine JESU, in cruce passionis tuæ, sicut decet Religiosum, & quemlibet Catholicum! quia te Domino nostro in carne passio, & nos Religiosos, atq; homines universos, eadem cogitatione armari oportet.

Utinam ejusmodi compassionem habeam in anima mea super te dolentem Dominum meum, qualem habuit unquam Mater tua Virgo Sanctissima, & omnes Angeli, atq; omnes servi tui!

Utinam tantum dolorem experiar semper in mente, quantum tu passus es, & quantum sensisti multipliciter in tuo Sacratissimo Corpore!

Gratiarum actio.

Pro quo immensas tibi gratias ago ex omnibus medullis cordis mei.

Gratias tibi ago quoniam sic dilexisti me, ut tam dira tormenta in horto, sine ullo tortore, à te ipso sustineres pro me.

Gratias tibi ago pro omni anxietate mæore, tædio, pavore, & agonia, pro omni afflictione & angustia, & pro universis doloribus tuis, quos in monte Oliveti, totaq; passione tua pertulisti.

Sed præcipuè infinitas tibi gratias ago pro illo stupendo sudore tuo, qui sicut guttæ sanguinis decurrentis in terram ex tuo Sacratissimo Corpore emanavit, & terram tinxit.

Præterea infinitas gratias ago, pro tua prompta voluntate quidvis patiendi pro salute nostra juxta

De CHRISTI Compassione.

211

voluntatem Aeterni Patris tui: & pro vinculis, spuitis, alapis, colaphis, flagellis, spinis, plagis, vulneribus, livoribus, contumeliis, irrisionibus, blasphemis, lacrymis, pro omnibus guttis Sangvinis tui pretiosissimi: deniq; pro morte dirissima, acerbissima & ignominiosissima: & pro universis, quæ ex tuo amore infinito pati dignatus es, redemptionis nostræ causâ.

Insuper gratias tibi ago infinitas, & pro aliis innumeris beneficiis tuis. *Reliqua ut supra, p. 73.*
§ 94.

OBLATIO.

Hæc habetur supra p. 79. § 96.

Proposita. Adhæc firmo animo statuo mysteria passionis tuæ præ oculis semper habere caq; mente sedulò revolvere, diligentius expendere, & hoc modo piissimū compassionis tuæ affectū in anima mea excitare, semper fovere, & renovare, & in eo ad mortem perseverare.

Absit à me ut magis velim aliquid aliud scire, cogitare auditu percipere, nisi te JESUM Dominū nostrū vulneratum, & crucifixū.

Dabo operam, ut nullam diem: ò si possem etiā nullam horam ac momentū! sinè recordatione passionis tuæ, & simul sinè compassione tua prætermittam.

O quis mihi daret, ut nūquam siccis oculis, & in compassibili corde imaginem Passionis tuæ pertranseam?

O si passio tua amara ita penetres viscera mea, ut præ dolore tabescā & deficiā!

O 2

Uu.

Utinam moriar pro telutinam vulnerer pro te!
utinam totum cruorem meum effundam pro te!

Ecce benignissime JESU, offero me ad omnia tormenta, cruciatus, etiam mortem crudelissimam, & ignominiosissimam pro te subeundam.

Offero me, totamq; vitam meam, ad omnes tribulationes, afflictiones, pœnitentias amore tui perferendas.

Statuo in honorem passionis tuæ corpus meum variis modis affligere, & ut tecum pro modulo meo patiar, aliquantulum dolorem in corpore meo concitare & sentire.

Curabo, ut tibi Domino nostro JESU Christo, per mortificationem carnis, sim confixus cruci, ut in vita mea similitudo mortis tuæ resultet.

PETITIO.

VErùm ô piissime JESU, tu scis, quòd, licet spiritus meus sit promptus ad hæc, quæ ego te inspirante proposueram, præstanda: caro tamen infirma impedire me poterit, nisi tu mihi auxiliatus fueris. Non ignoras, quomodo nihil magis horreat natura nostra, quam amarum aliquid pati. Optimè nosti, quòd multi sunt qui tecum gaudere, regnare, & glorificari desiderant; sed pauci qui tecum flere, laborare, contemni, & pati velint: idèò supplex te rogo, & per tuos dolores, angustias, lacrymas, per vulnera, Sangvinemq; tuum pretiosum, & mortem dirissimam, deniq; per tuam Sacratissimam passionem, obsecro, da ut tibi patienti verè: compatiar, tecum in hæc vita fleam, tecum
in

in cruce moriar, tecum omnia amara libenter sustineam. Imprime mihi misericordissime Domine passionis tuæ memoriam: scribe vulnera tua in corde meo pretioso Sangvine tuo, ut in eis legam tuum dolorem, pariter & amorem; Permaneat vulnorum tuorum memoria jugiter in secreto cordis mei, ut dolor compassionis tuæ in me excitetur, & ardor dilectionis tuæ in me accendatur. Sentiam in anima, quæ tu pro redemptione mea tam cruciabiliter pertulisti tibi; dilecto pro me passo, saltem per amatoriam compassionem cum gratitudine respondeam, & amoris qualemcunq; vicem reddam. Vulnera, ô JESU cor meum, sagittâ charitatis tuæ: transeat & perfodiat militaris lancea omnia interiora & viscera mea, idq; tam profundè & validè, ut ex hoc salubri vulnere, perfectam compassionē tuā consequatur anima mea, nullumq; præter te amorem admittam nullum extra te solatium requiram. *Addat, cui placet Petitionem communem, quæ est supra p. 82. & 97.*

CAPUT XXIV.

EXEMPLA

Orationis,

De Beatissima Virgine.

Quia in nostro Ordine S. sæpius offertur nobis occasio meditandi de Beatissima Virgine, tū in Festivitatibus ejus: tum singulis diebus Sabbati, quibus leguntur meditationes de doloribus Virginis Sanctissimæ: immò bonum esset, Religiosi nostri quotidie post matutinum illâ mediâ horâ, quâ

Fratres nostri Orationem faciunt, de Beatissima Virgine meditationes breves instituerent: propterea ut Tirones hujus exercitii spiritualis non patiantur difficultatem in his meditationibus, dantur hinc aliquot Exempla pro illis, videlicet, compassionis, Congratulationis & Imitationis. Si enim contingat nos aliquando considerare dolores Sanctissimæ Virginis, tunc debemus excitare in nobis affectum Compassionis. Si Prærogativas ejus, tunc affectum Congratulationis. Si verò virtutes ipsius, tunc Imitationis.

E X E M P L U M

Compassionis,

Super Dolores Sanctissimæ Virginis. Colloquium.

O MARIA Virgo purissima! ô Mater dolorû mæstissima! quæ sicut præ cæteris plus Dominum nostrum JESUM Christum Filium tuû dulcissimum dilexisti: ita supra omnes, ob ejus passionē durissimā, magis afflicta fuisti. O quis hominû, vel Angelorû sermone enarrare, aut aliquâ verborû vi declarare, exprimere, aut quocunq; modo toti mûdo, & nobis indicare poterit illas tuas afflictiones, angustias, tribulationes, & dolores maximos, quos tu in anima tua benedicta tempore passionis dilecti Filii tui sustinuisti, sensisti, percepisti? Præsertim quâdo eum ab inimicis captum, instar latronis ligatum, à discipulis derelictum, pedibus impiorum calcatû, per terram raptatum, in via crudelissimè tractatum, variis opprobriis & verberibus affectum: in domo Annæ summi Sacerdotis gravissimè in facie percussus,

sum, & apud Caiphā consputum, colaphis & alapis cæsum, ob confessionem Deitatis reum mortis declaratum, miris & ineffabilibus modis tota nocte afflictum, referente tibi hæc omnia Joanne Apostolo, cognovisti?

Tum, etiam quando summo manè die Parasceves, ipsamet eum vinctum ignominiosè à Caipha duci ad Pilatum Judicem, cum acceleratione, irrisione, exultatione, ac si Patriæ, & communè omnium hostem comprehendissent, oculis tuis vidisti?

Tum, quando ipsum vestibus spoliatum, ad columnam alligatum immanissimè flagellari, funibus, virgis & catenis cædi, centenis, millenis, & millenis plagis onerari, vulnerari dilaniari, & postea ignominiosè & crudeli spineâ coronâ redimitum, ludibriosa chlamyde purpurea cinctum, toto Corpore Sangvine perfusum, in conspectum populi à Pilato productum conspexisti?

Tum, quando illas barbaras, inhumanas, tyrannicas Judæorum voces clamantium ad Pilatum: Tolle, Tolle, crucifige; auribus percepisti. Et illas: Noli dimittere hunc, sed Barabbam, qui erat insignis latro & parricida: & quando sententiam crudelissimæ mortis contra eum pronuciari audivisti?

Tum, quando eum ad mortem euntem, onustū gravi mole & pondere ligni crucis, & sub illa cruce aliquoties in terram cadentem, & montem Calvariæ arduum, jam viribus exhaustū, doloribus atq; tormētis debilitatum, conscendentem vidisti? & quando eum nudum inter latrones mediū im-

manif-

manifestè cruci affixum, & tribus horis in cruce suspensum, postea felle & aceto potatum, & lanceâ transverberatum, deniq; per sepulturam ex toto eû à te separatum oculis tuis percepisti? Quæ omnia quàm graviter cor tuum sauciarunt? quantis doloribus illud repleverunt? in quales angustias & afflictiones coniecerunt? nullus quamvis disertissimus quisq; satis eloqui valet: quod benè vox tua lugubris exprimit ad nos omnes mortales dicens: O vos omnes, qui transitis per viâ: attendite, & videte, si est dolor, sicut dolor meus. Nâ credibile & verisimile est cuncta hæc tormenta in anima tua te sustinuisse, & sensisse, quæ Filius tuus Dominus noster in Corpore suo passus est: & omnia illa verbera & vulnera in spiritu te excepisse, quæ ille in carne sua pertulit & excepit.

Admiratio. Quis non manebit attonitus, expendendo in animo suo multitudinem & immensitatē dolorum, afflictionum, tribulationumvè tuarum, ô Beatissima Virgo MARIA? Quis non commovebit viscera sua ad compatiendum, condolendum, & commiserandum tibi, ô virgo Sanctissima? Quis præ admiratione non erumpet in has lamentabiles voces; O MARIA Dei Genitrix Virgo, magna est velut mare contritio tua, quis medebitur tui?

Accusatio sui. Sed heu me miseram, ô Domina mea mæstissima, qui hætenus modicam compassionem, aut ferè nullam super dolores tuos habui: qui rarò & non libenter, nec attentè de tuis afflictionibus & doloribus libros tractantes evolvi, aut le-

sta

Ita devotè expendere non curavi: immò qui dolores tuos auxilios, quoties in dilectum Filium tuum peccavi. Nam qui peccant, iterum Filium DEI crucifigunt, ut testatur Paulus Apostolus. Propterea si secundū statum præsentem gloriosum, in quo tunc es in Regno Cœlorum, capax esses alicujus mœroris & doloris, fateor, quòd majorem tibi nunc delicta mea & iniquitates asferrent dolorè & mœrorem, ob ingratitudinem meam erga Filiū tuū ac Dominum nostrum, qui semel mortuus est pro peccatis nostris, ego autem iterum peccatis meis eum crucifigo: & ideò crudelior modò ego in te sum, quàm fuerunt impii Judæi, qui crucifixerunt Filium tuum & DEI, quorum delictum ipse excusabat in cruce pro eis orans: Pater ignosce illis; quia nesciunt quid faciunt. Me autem excusare non potest ignorantia, sed potiùs accusat me, coram DEO & te, mea malitia.

Confusio. O quomodo nunc sinè confusione mea levabo oculos meos ad te, ô Regina Cœli? Quomodo aperire os meum audebo, invocando te Dominam meam in necessitatibus meis? Quomodo te Matrem misericordiæ appellabo, qui adeò sum immisericors & durissimi cordis filius erga te, ut commiserationis & compassionis affectu super te dolentem non movear? Ubi est amor meus? ubi pietas? ubi gratitudo erga te, ô Mater piissima nostra?

Dolor. Sed jam desleo hanc duritiam cordis mei: averter tantam impietatem in te, ô Virgo Sanctissima; abominor hanc iniquitatem meam, quòd negligens

gens & tepidus in compatiendo tibi fui. Pœnitet me, quòd te dolente, ego non dolui; te plangēte, ego non planxi, te mærore tabescente; ego abiq; mærore hætenus vixi.

OBLATIO.

Seu Actus Compassionis.

VERùm ab hinc volo tibi Dominae meæ, doloribus multis gravatæ & sauciatae ex corde intimo compati, & hunc compassionis affectum semper in visceribus cordis mei fovere, & quoad spiritũ ducam in terris, retinere conabor. Firmissimè statuo dolores tuos, & afflictiones animæ tuæ benedictæ sæpius meditari, & in animo expendere, ut tibi afflictæ condoleam.

Prout & nunc intimè condoleo, & compatior tibi: & si in mea foret potestate, sentire ut possem amaritudines cordis illas, quas ex consideratione afflictionum dolorumq; tuorum, servi tui unquam perceperunt, paratus essem sufferre universas.

Cupio habere cor dilectissimi Filii tui, quod verè afflictiones tuas percepit & sensit; aut tuũ ipsius cor, ut eodem modo sentire eas valerem.

Fateor, ô MARIA Virgo purissima, quòd satis superq; inundavit cor tuũ suavissimũ dolorib; plurimis & acerbissimis. Ecce ô Domina mea, offero tibi cor meũ, ad excipiendos dolores tuos, & liberandũ ab eis cor tuũ. O quàm felicem me arbitror, si me gratia tuorum dolorũ sentiendorum donaveris!

O dulcissima Virgo MARIA, cupio immergi in immenso dolorũ tuorũ mari, ut in omnibus actibus animæ & corporis mei dolores tuos sentiã, & experiar.

Utinam, ô mæstissima Virgo MARIA, gladio tuæ compassionis nunc & semper transfigatur cor meum; sicut & tuam ipsius animam transfixit gladius doloris in passione dulcissimi Filii tui !

Opto semper tecum flere; crucifixo Filio tuo, & tibi cõdolere, ex intima mea super te dolente cõpassione.

Renuit consolari anima mea, & unicum erit mihi solatium in hac præsentī vita, semper tecum parī, ô MARIA.

Dabo operam, ut Filii tui passio, & tua compassio sic inhæreat visceribus meis, ut nulla inde oblivione excidat, nulla ingratitudine deleatur.

Utinam ita vulneretur anima mea amore & commiseratione tui, sicut anima tua in passione dilecti Filii tui vulnerata fuit !

Gratiarum Actio.

Cui dulcissimo Filio tuo infinitas gratias ago, quòd te sibi morienti assistere, & commori voluerit: & quòd tibi propter suam passionē afflictissimæ intimo ex corde compassus fuerit; & quòd te dilecto suo discipulo Joanni, & nos in persona Joannis tibi, ut Matri, commendaverit, præterea quòd corpus suū exangue per te de cruce deponi, in sepulchro componi atq; cruorem vulnerū suorū abstergi voluerit.

Gratias eidem infinitas refero, quòd ejusmodi fortitudinem & robur animi tibi donavit, ut fugientibus præ timore ejus discipulis, tu sola ipsi ab inimicis circumdato præsens adfueris: & quod tū
invi-

inviſtam patientiam tibi contulit, ut æquo animæ omnes tuas adverſitates & afflictiones pertuleris: quodq; ea te manſuetudine ornavit, ut minimè de vindicta ob injuriam ab impiis Judæis tibi illatam cogitaveris: & quòd tam perfectæ reſignatione te munivit, ut te ad omnia adverſa majora quæque perferenda DEO obtuleris.

Inſuper gratias ago dilecto Filio tuo immenſas, quòd, quantò majores amaritudines, te pati permiſit in terris, tanto majora gaudia & præmia æterna tibi præparaverit & jam reddiderit in Coelis; ubi expers omnium dolorum omnibus deliciis affluſis, & vivis, viveſq; in æternū: at ego memor dolorū & tribulationum tuarū, quas pertuliſti vivens in terris, ſinè dolore vitam agere nolo.

PETITIO.

UT autem hoc experiar, quod deſidero, te ſupplex obſecro per paſſionem amaram dulciſſimi Filii tui, & afflictiones tuas, quibus anima tua Sanctiſſima in morte Unigeniti Filii tui repleta fuit, effice ut verè tibi compatiar, condoleam, tuamq; totam amaritudinem in corde meo ſentiam. Fac, ut dolor ille, quem tunc paſſa es, ſic nunc inhæreat viſceribus meis, ſicut inhæſit tuis. Vulnèra, quaſo, ô Domina mea cor meum, & in corde meo tuam & Filii tui renova paſſionem. Cōjunge cor tuum vulneratum cordi meo, ut tecum tuis vulneribus pariter vulnerer, & quocunq; pergam, ſemper tuo Filio videam te conſixam. Tribue mihi, ô Mater, Filii tui vulnera, contumeliasque, irri-

irrisiones, & illa quæ in te sensisti, ut tibi, & Filio tuo saltem in vulneribus sociari valeã. Rumpere cor meum, ô MARIA, ut propria flagitia & peccata deplorem, quæ sola Filio tuo, & tibi, omnis calamitatis, pœnalitatis, & tristitiæ causa fuerunt: & in hoc aliquatenus jam meo satisfacies desiderio, si dolorum illorû vulnera, quæ maternû cor tuum sauciarûnt, dolorem mihi intimum pro peccatis meis conferre mereantur. Hoc me, quæso, solatio refice, Virgo Benedicta, mihiq; apud Filium hoc tuis precibus & meritis obtine, ut eum non amplius ullo peccato offendam, qiq; per omnia placeam.

E X E M P L U M

Gaudii Nostri.

Quod Beatissima Virgo sit Mater DEI.

C O L L O Q U I U M.

Commemoratio hujus ineffabilis ejus dignitatis. O Sanctissima Virgo DEI Genitrix MARIA, cui DEUS Omnipotens hanc eximiam & ineffabilem contulit dignitatem, quod sis Mater Filii DEI, propter quam solam universa beneficia, omnes singulares gratias, cunctas prærogativas tibi præstitit atq; te præclarissimis virtutibus ornavit, amplissimis donis cœlestibus dotavit, Divinis charismatibus cumulavit, ab originali & omni culpa præservavit, & puritatem plusquam Angelorû tibi donavit, tantamq; plenitudinem gratiæ & Sanctitatem contulit, ut omnes Sanctos simul sumptos, longè superares.

Admiratio. O miram & stupendam hanc tuam
excel-

excellentiā, dulcissima Virgo quæ omnem electæ creaturæ altitudinem sublimitate tuæ dignitatis transcendis: propter quam omne tibi curvatur genu, cœlestium, terrestrium & infernorum; propter quam data est tibi omnis potestas in cœlo & in terra; propter quam omnia in cœlis & in terris serviunt tibi, te omnes Spiritus Beati, Cœlites universi, cunctiq; mortales veri DEI, & tuæ tantæ dignitatis notitiam habentes, honorant, prædicant, magnificant, extollunt, amant, venerantur.

Accusatio sui. Ego solus homuncio miserrimus hucusq; non te, pro ut hæc tua altissima dignitas merebatur, honoravi: non magnifeci hanc tuam singularissimam excellentiam: non inde aliquā perfundebar lætitiā, nec tibi eam ex affectu cordis intimo gratulatus sum: neq; propter illam, & alia cuncta beneficia tibi Divinitus collata, gratias Domino DEO egi.

Confusio. Propterea confundor & erubescō, quod ego, qui jacto frequenter me esse tuum servū; me ex Ordine tuo Sācto esse unū; me in numerū Filiorū tuorū esse cooptatū: nihilominus parū moveor affectu gaudii & lætitiæ, de tuo tanto tamq; excellenti bono. Hinc patet, quā modicum in me est erga te, mei amoris & pietatis, de quo nunc vehementer dolco, torqueor, & correctionem propono.

OBLATIO.

Seu actus Congratulationis.

ITaq; nunc ex affectu Angelorū, omniumq; Sanctorū, atq; servorū tuorū fideiū tuiq; amantissimorum

De B. Virgine MARIA.

223

morū, gaudeo, tibiq; congratulor hunc **Altissimū**
& superexcellētem Genitricis **DEI** honorem, &
dignitatem

Exsecror nefariam Nestorii hæresim, quæ te hoc
honore spoliare contendebat, & volebat, ut non
Mater **DEI**, sed solius hominis; Christi dicereris: jã
verò amplector orthodoxam Sanctæ Ecclesiæ Ca-
tholicæ doctrinam quæ docet nos te esse, & debere
dici veram Matrem **DEI**.

Confiteor itaq; & credo, & hanc ob causam gau-
deo, tibiq; congratulor, ô Beatissima Virgo, quia
es vera **DEI** Genitrix Virgo, & quia sicut Virgo
ante partum fuisti, ita in partu Virgo, & post par-
tū permanes Virgo.

Gaudeo, tibiq; congratulor hanc gloriam, &
prærogativam singularem, quòd Filium unū cun-
demq; cum **DEO** Patre, merueris habere cōmunē.

Gaudeo tibiq; congratulor, quod per hanc di-
gnitatem, præ omnibus Angelis & Sanctis, es **DEO**
conjunctior atq; propinquior, cujus propinquitas ad
DEUM, supposita electionis gratiã, naturalis est,
quia propinquitas Matris est.

Gaudeo, tibiq; congratulor extoto corde meo,
quia cum esses parvula placuisti **Altissimo**, & de
visceribus genuisti **DEUM** & Hominem.

Ô si omnium mihi corda essent! Ô si omniū
potens esse voluntatū, potentiarū & operationum!
ô si cor ipse totus essem, non quantus sum, sed quā-
tū est totū universū, vellem tibi sic gratulari, gra-
tulari, inquam, te **DEO**, & **DEUM** tibi, te illi an-
cillam, illū tibi Filiū.

Ô An-

O Ancilla Domini te, toto me, gratulor æterno DEO! ô Mater DEI, tibi, toto me gratulor Filiū DEUM.

Sed quantum est hoc, quòd, toto me gratulor tibi? te potius, ô Virgo, Ancillā DEO, & DEUM Filiū tibi, gratulor illo ipso DEO, cujus Mater es. Sit ergo ille gratulatio tua, qui factus est generatio tua, gloria tua.

Insuper me corā te prosterno & cum profundissima reverentia tibi ut veræ Genitrici DEI cultum Hyperdulix reddo: & cum quanta possum cordis mei submissione, te honorare semper, prout omnes Spiritus Beati, Sanctiq; omnes, atq; homines tibi devoti, te honorant, honorarunt & honorabunt æternum, desidero.

Gratiarum actio.

PRæterea ô dulcissima DEI Genitrix Virgo, affectu cordis mei intimo, gratias ago Sanctissimæ TRINITATI, quæ te ad hanc excelsâ dignitatem sublimavit.

Gratias ago DEO Patri, qui non aliam Creaturâ sed te in Filii sui Matrem elegit. Gratias ago Filio DEI, qui non ex alia Virgine, sed ex te nasci voluit. Gratias ago Spiritui Sancto, qui non ex alterius hominis, sed ex tuo purissimo sanguine corpus Unigenito DEI Filio efformavit.

Laudo DEUM Patrem, qui Filium suum unicū fecit & tuum; unaq; nostrum omnium Fratrem. Laudo DEUM Filium, qui te sibi elegit in Matrē, ut per te se nobis exhiberet Salvatorem. Laudo
DE-

De B. Virgine MARIA.

225

DEUM Spiritū S. qui hoc opus ineffabile, in utero tuo, virtute sua mirabili consummavit.

Magnifico & benedico Dominū DEUM, quia ex eo, quod te ut esses Mater DEI elegit, ad quandā infinitam dignitatem evehit, & omnibus illis donis & charismatibus, quæ tantam dignitatem & Majestatem decebant, ornavit.

Adoro & superexalto DEUM meū, quia electa ab ipso in Matrem DEI, facta es Domina Angelorum: Regina Sanctorum Omnium: Refugium & Advocata hominum miserorum.

PETITIO.

ET quoniam, o Virgo Sanctissima, ideò facta es Mater DEI, ut etiam fieres Mater nostra, cui in persona Joannis Evangelistæ Filius tuus in cruce pendens nos peccatores commendavit: ideò rogo te per hunc dilecti Filii tui erga nos mi- seros singularem amorem, ut me quoq; recipias in numerum filiorum tuorum, & eorum quos in corde tuo habes prædilectos & impignoratos: quos jugiter foves, protegis, & in omnibus juxta bene- placitum Filii tui, dirigis, honestas, & perficis: & qui te vicissim singulariter amant, & colunt: qui te imitantur, & tibi in spiritu & veritate serviunt, & famulantur.

O MARIA, monstra te mihi esse Matrem. Susci- pe me in tuam Maternam curam custodiam, & di- sciplinam: in gratiā & amorem; in patrocinium & tutelam Materni Cordis tui, tanquam Filiū, quā- vis indignissimum.

P

Accē-

Accède in me filialem in te affectum, ô Benignissima! ut te Matrem meam ex corde diligam & colam: reconcilia me Filio tuo, ejusq; in me amorem & favorem semper conserva & auge: sis mihi, ô MARIA, pia semper Mediatrix apud Filium: sis de me tanquam de tuo filio sollicita: succurre erranti: deduc me in semitas justitiæ: misericordes tuos Oculos ad me semper converte, & mihi in morte, ut pia Mater, occurre; ab hostibus me defende, & tecum ad cœlestem paradysum assume.

E X E M P L U M

Imitationis Virginis Sanctissimæ,

In Humilitatis virtute.

OMnes qui se profitentur servos esse, aut Filios Virginis Sanctissimæ, conari debent ejus vitæ sanctitatē & actiones atq; virtutes semper præ oculis habere, ac fideliter imitari: ipsa enim est, ut *S. Ambrosius testatur l. 2. de Virgin:* de cujus vita velut speculo refulget forma virtutis. Hinc, inquit, sumatis, licet, exempla vivendi, ubi, tanquam in exemplari magisteria expressa probitatis, quid corrigere, quid effugere, quid tenere debeatis, ostendunt. Quod certè nos Carmelitas, qui gloriamur Ordinis Beatissimæ Virginis de monte Carmelo esse alumnos & filios, facere est necesse: qui modicum illud tempus, quod post matutinum restat, huic exercitio, seu considerationi virtutum Sanctissimæ Virginis dedicare possumus, ut inde incitamenta ad imitationem ipsius, & per hoc insignem in via perfectionis progressum habeamus.

Possunt

Posſunt autem Incipientes, qui ſunt in via Purgati-
va, & qui pro extirpandis vitiis laborant. per actus
cotrariarum virtutum, meditationes inſtituere de
ſeptem virtutibus Beatiffimæ virginis, ſecundum
ſeptenarium numerum Feriarū, quod ipſos multum
iuvabit ad ſeptem vitia principalia eradicanda: vide-
licet, Feria ſecunda de Humilitate. Aliis diebus de
Paupertate, Caſtitate, Abſtinentia, Manſuetudine, &
Diligentia.

Proſicientes verò de illis virtutibus meditationes
inſtituant, in quibus imitari Virginem Sanctiſſimā
deſiderant. Perſecti autem, quorum munus eſt va-
care amorī DEI, zelo honoris DEI, laudibus Di-
vinis &c. eadē in Virgine Sanctiſſ: conſiderare poſſūt.

C O L L O Q U I U M.

Commemoratio Humilitatis B. Virg: MARIE.

O Virgo Sanctiſſima, gloriſiſſima, & omniū
pulchritudine virtutum ornata, quarum ni-
tore, clementiſſimus ſplendiſſimē DEUS te
rutilare in mundo fecit, ut omnium virtutum abſo-
lutiſſimum exemplar nobis omnibus eſſes, ex quibus
proſundiſſimæ tuæ humilitatis virtutem ad conſide-
randum nunc mihi propono. O quā verē humil-
lima fuiſti, quæ te ipſam nihil ſemper æſtimaviſti; &
ideò quando tibi eminentiſſima Genitricis DEI de-
lata fuerat dignitas, tu Ancillam Domini te nomi-
naſti, cujus officium eſt, facere quod ipſi à Domi-
no fuerit imperatum. Et quæ contemni & vilipen-
di ab aliis deſideraviſti: & propterea dum nemo te in
Bethleem hoſpitio recipere voluit, æquo & lato

animo illum contemptum tulisti. Et quæ laudari & honorari noluisti: & ideo ad laudes Gabrielis Archangeli turbata fuisti. Et quæ cunctas gratiæ & naturæ dotes soli DEO attribuisti: prout in tuo suavissimo cantico declarasti: dicens: Fecit mihi magna, qui potens est, & sanctum nomen ejus. Et quæ nulli te prætulisti: neminem contemptui habuisti: inferioribus libenter intervijisti, vilissima ministeria exercuisti: cum vilissimis hominibus & peccatoribus conversari non recusasti; & inconvētibz ultimum locum tenere consuevisti. Sed quis omnes actus eximiæ, & perfectissimæ tuæ demissionis recensere valebit, qui tibi soli noti sunt, ô humillima Virgo?

Admiratio. O quàm stupenda & eximia hujus pretiosæ virtutis nobis exempla dedisti! ô quis servorum tuorum, & omnium Christianorum, hæc in animo perpendens ad imitandum te, & ad currendum post vestigia humillimæ Dominæ suæ, Cœli terræq; Reginæ non movebitur? Quis intiendo tantam perfectionem tuæ humilitatis, qua multū DEO Altissimo placuisti, & propter quam ad sublimissimæ fastigium dignitatis & meriti evehi meruisti, vel minimum gradum illius in humilitate perfectionis consequi non percipiat?

Accusatio sui. Fateor, quòd multi reperiuntur, sicut omnium præstantissimarum tuarum virtutum, ita humilitatis tuæ Sectatores. Ego, ego solus adeo piger sum, qui hætenus neq; curavi ob oculos mentis proponere mihi tuas virtutes sanctissimas,
nec

nec ullam mihi vim adhibui ad imitandum eas, & præcipuè virtutem tuæ humilitatis, à qua longè me esse profiteor: nec ullum vestigium similitudinis illius in me esse deprehendo. Quia ego me magni aestimo, minimū contemptum tolerare nequeo: libenter laudes humanas & æstimationem amplector: facile aliis me præpono: verbo dicam, multa, quæ superbis sunt propria, & humilitati contraria facio.

Confusio. Propterea confundi & erubescere deo: dum cerno te Dominam mundi, omnibus amplissimis donis & gratiis cœlestibus dotatam & splendoribus virtutum à DEO ornata, pro acquirendis omnibus virtutibus multos labores pertulisse, & pro illis ferventissimas orationes ad DEUM fudisse, atq; in ipsis magna contentione sine intermissione te exercuisse: ego autem in virtutibus pauperrimus cū sim, nihilominus pro his comparandis non laboro; præcipuè autem pro humilitatis virtute, quæ est acquisitu difficillima, & pro qua specialissimè Divinam Majestatem orare, illamq; sedulò exercere est me necesse.

OBLATIO.

Seu actus imitationis Beatissimæ Virginis & congratulationis.

Sed jam ab hinc firmissimè propono ob honorè tuum habere semper intentos mentis meæ oculos in tuam sanctissimam vitam, tanquam in vivum speculum sanctitatis, & omnium virtutum, volens eas imitari, potissimū verò tuā profundissimam humilitatem, qua tu inter omnes Sanctos excell-

celluisti, cujus exemplo meipsum vilipendam & ab aliis vilipendi exopto.

Absit à me, ut ex donis naturæ & gratiæ à Divina benignitate acceptis, me præ aliis extollā & ab aliis laudes vanas & honores quærā, vel delatos amplectar.

Semper ignobilia & viliora ministeria quærā, & si oblata fuerint cū gaudio illa exercebo: omnibus quoq; ad in serviendū præsertim infirmis & infirmis servis tuis prompto animo me offeram, & de occasionibus ad hæc opportunis gaudebo.

Quantū potero vestigia humilitatis, tuarumq; virtutum sequi semper conabor: de quibus mihi multū complaceo, gaudeo, tibiq; intimo affectu gratulor.

Gaudeo, tibiq; congratulor summam perfectionem hujus nobilissimæ virtutis Humilitatis, qua omnes Sanctorum ordines superasti.

Gaudeo, tibiq; congratulor totam omnium virtutum universitatem, quam tibi liberalissimus Dominus DEUS contulit, ita, ut cum aliis Sanctis aliquas virtutes tantū, tibi vero totam plenitudinem infuderit.

Gaudeo, tibiq; congratulor, quia tu facta es viva sanctitatis imago, domicilium omnium virtutum, armariū perfectionis, forma probitatis, cœlestiū gratiarum thesaurus, sacrarium donorū Spiritus Sancti.

Gratiarum actio.

Gratias ago Domino DEO, qui Humilitatis & omnium virtutum infularum animam tuam

am benedictam splendoribus ornavit, cumulavit, locupletavit.

Gratias ago Divinæ Majestati, quia te ad acquisitionem tibi comparandas singulariter adjuvit, & pro illis acquirendis sua præveniente gratia te movit, & usq; ad culmen seu perfectionem illarum deduxit.

Gratias ago benignissimo Domino meo, qui pro meritis tuarum virtutum, amplissimam gloriam in Cælo tibi contulit: præcipue verò, qui te pro tua profundissima Humilitate, supra omnes Sanctos exaltavit.

PETITIO.

O MARIA Virgo Sanctissima, quæ tua Humilitate placuisti Altissimo, quam præ omnibus mulieribus te solam in Matrem elegit, cujus anima præ omnibus aliis virtutibus ornata erat: ecce ego jam firmo proposito in animo decrevi humilitatem tuam & alias virtutes imitari; sed tu scis infirmitatem meam: quia ego nihil boni agere possum, si tu intercessione tua non adjuveris me apud DEUM. Itaq; ad pedes tuos provolutus Sanctissimos te supplex oro, impetra mihi aliquos Humilitatis & omnium virtutum gradus, si non supremos, saltem infimos, ita tamen, ut festino procedens passu ad summos valeam pervenire. Fac, ut agnoscam vilitatem & nihilitatem meam, mihiq; ipsi vilescam, & ab aliis vilipendi desiderem. Fac, ut vitam tuam Sanctissimam, tanquam omnis perfectionis imaginem, semper oculis mentis meæ inspiciam, & ad exemplar illius actiones vitæ meæ componam, ut per illas Domino DEO meo, tibiq; placeam.

Exemplum Orationis
CAPUT XXV.
EXEMPLUM

Orationis.

De S. M. N. *Theresie Patientia.*

COLLOQUIUM.

O Dilecta JESU Domini nostri Sponsa Theresia! O electa Sanctæ Genitricis Dei MARIE Filia! ô felix Reformati Ordinis Mariani Antesignana! ô Virgo purissima, & Mater mystica multorum filiorum filiarumq; fecundissima, quam Dominus DEUS dedit nobis pro lucidissimo sanctitatis, & heroicarum virtutû speculo, ut illud intueremur, & ad imitandum te provocaremur: in quo speculo, videre licet ardentissimam charitatem, profundissimam humilitatem, perfectissimam Obedientiam, Castitatem purissimam, Pauperratem exactissimam, Pœnitentiam rigidissimam, Patientiam Mani-
fuetudinem, Zelum Honoris DEI, desiderium salutis animarum, & aliarum virtutum perfectionem absolutam.

Admiratio. O quàm præclara reliquisti nobis istarum virtutum omnium documenta & exempla; inter quas dum inexplabilem patiendi pro DEO fitem, & invictâ in adversis, in afflictionibus, in infirmitatibus, in doloribus, in ariditatibus, in persecutionibus, in penitentiis, in mortificationibus tuam patientiam aliqui considerant, merito in admirationem plurimi rapiuntur, & ad sequelam concitantur

Accusatio sui. O quàm multum dissimilis tibi sum, ô beata Mater nostra: quàm longè culpa mea
sum

sum diffitus à perfectione tuæ patientiæ, atq; tuarum virtutum, qui nihil pati in vita volo: omnia quæ sunt ardua, quæ molesta, quæ carni amara, subterfugio jam verò ubiq; commoditatem, quietē, & gultum quæro, & hæc oblata libenter accepto.

Confusio. Erubescō quòd me degenerem tuum esse filium perspicio, erubescō, & doleo quod DEI beneficio vocationis ad Religionem per te reformatam non correspōdē in qua hujus Ordinis alumnos pœnitentiam, verbo & exemplo tuo docuisti cujus hanc doctrinam salutarē nondum didici.

OBLATIO.

Seu ædus imitationis & Congratulationis.

Sed jam desidero & propono exemplar tuæ Sanctissimæ vitæ sæpius intueri. Decerno tota animi contentione tuas heroicas actiones imitari. Statuo vestigiis tuæ pœnitentiæ mortificationis, patientiæ, perfectionis omniumq; tuarum virtutum insistere. De quibus gaudeo, mihiq; multum in illis complaceo, tibiq; eas congratulor.

Gaudeo de tua eximia sanctitate, ad quam à teneris annis aspirasti, eam semper toto studio quæsvisti, nec desiisti, donec ad summum pervenires.

Gaudeo, quòd amore DEI succensa nihil aliud, nisi semper pati pro DEO desiderasti, & illis omnibus, quæ tibi ad patiendum causa fuerunt, mirum in modum te oblectasti.

Gaudeo de tuo incredibili perfectionis desiderio, & de illo sublimissimo tuo voto faciēdi semper quidquid perfectius foret.

Gau-

Gaudeo de insigni tuorum meritorum cumulo, de omnibus gratiæ & naturæ donis, de omnibus innumeris beneficiis tibi à DEO collatis, & de gloria cœlesti, ad quam te prædilectus Sponsus tuus JESUS Christus Dominus noster evexit in Cœlis.

Gratiarum actio.

Pro quibus omnibus & singulis beneficiis & gratiis, gratias ago æternas Divinæ Majestati.

Sit infinities Benedictus DEUS, qui te prævenit in suis benedictionibus, ut eum ab infantia diligeres, & pro eo mundum & vitam contemneres, quā profundere pro ejus honore primâ ætate voluisti.

Sit infinities benedictus, qui te, tota vita tua ab omni peccato lethali præservavit, in suam Sponsam elegit & multis cœlestibus donis atq; heroicis virtutibus ornavit, præsertim Charitate, Puritate, Humilitate, Obedientia, Mansuetudine, Patientia & aliis.

Sit infinities benedictus qui hunc Ordinem Beatissimæ Virginis Mariæ per te instauravit qui te multorū filiorū & filiarū Matrem effecit: qui te nobis pro speculo perfectionis dedit.

Sit infinities Benedictus JESUS Christus, qui tibi morienti inter Angelorum agmina astitit, teq; ad cœleste Regnum suum assumpsit, cui triplicem aureolam in Cœlis, fortissimorum Martyrum, purissimarum Virginum, & Sanctorum Confessorum donavit, cujus cor mellissuum, totius beatitudinis gazophylacium in augmentum gloriæ, gaudiorūq; tuorum tibi offero.

PE-

PETITIO.

ET quoniam vivens in terris, quicquid petisti à Domino nostro JESU Christo impetrasti; supplico tibi, ô Beatissima Mater nostra, per cor dilectissimi Sponsi tui Domini nostri JESU Christi, ut pro me misero peccatore, & indigno filio tuo semper eundem exorare, mihiq; ab eo patientiam, pœnitentiam, crucis portandæ desiderium, præterea omnium peccatorum remissionem, vitæ emendationem, ab omni culpa mortali, & voluntaria veniali præservationem, vitiorum extinctionem, mortificationem passionum, charitatis perfectionem, tuarum virtutum imitationem, donum perseverantiæ finalis, bonam mortem, & vitam æternam impetrare velis. Adesto mihi semper, ô Mater benignissima, præsertim in hora mortis meæ. Ipsū obitum meum diligentius tibi commendo: benigne me tunc consolare, conforta & protege. Effice tuis precibus & meritis, ut anima mea tota munda hinc exeat, & ad vitam æternam perveniat.

CAPUT XXVI.

EXEMPLUM

Orationis.

Ad quemlibet Sanctum.

COLLOQUIUM.

O Gloriosè N. Apostole Christi (vel Martyr: vel Confessor: vel Sponsa Christi) qui ex tunc dum cognovisti, verum DEUM Creatorem ac Redemptorem ac Dominum tuum, hoc unice desiderasti, ut ei honorem, cultum debitum, & ve-

& venerationē redderes, & ipsius te servum fidelem profitereris: ut eū toto corde diligeres: laudares, benediceres: ejus mandata & voluntatē ac beneplacitū prompto animo faceres, quidquid verò displicet ei, omnēq; offensam ejus fugeres, ipsiq; vitæ sanctitate, cordis puritate, morū probitate, præterea cogitationibus Sanctis, irreprehensibilibus, verbis & bonis operibus, ac variarum exercitio virtutum placeres.

Admiratio. O quā insignia reliquisti nobis exempla sanctitatis, & perfectionis, præsertim humilitatis, patientiæ, charitatis, poenitentiae, mansuetudinis abstinentiæ, silentii, vigilantiae, resignationis, contemptus tui & mundi, abnegationis, & perfectæ mortificationis, atq; perennis orationis, & aliarum virtutum, quas multi mirantur, & ad imitandum te in illis inflammantur.

Accusatio sui. Ego autem quamvis inops & pauper sim in virtutibus sanctis; quamvis sciam nullam me habere virtutem; quamvis Humilitate, Charitate, Obedientia, Patientia, mansuetudine, & aliis virtutibus indigeā: nihilominus piger sum ad imitationem tui in acquisitione istarum virtutum de quo me nūc arguo, & corā tota curia cœlesti accuso.

Confusio. Erubesco, ô felicissime incola Cœli, quod cum sim naturæ similis, sicut & tu fuisti: videlicet, aptus ad benē vivendum, & agendum: cum inspirationes Divinæ & auxilia non desint mihi, quemadmodum & tibi non defuerūt: tamen in me hæc nullum fructum, culpā meā faciunt, sicut in te fecerunt: quia gratiæ DEI cooperari voluisti.

OBLA-

OBLATIO.

Sen ætus imitationis & congratulationis.

Verum jam excutere socordiam & inertiam conabor: jam propono exemplar tuæ sanctitatis perfectionis & omnium virtutum inspicere, tuq; vestigia observare, atq; tibi in similitudine vitæ sanctæ me conformare. Statuo currere in odorem bonorum operum, & honestissimarum actionum tuarum, maxime tuæ humilitatis, obedientiæ, mansuetudinis, patientiæ &c. De quibus tanquam de meis & propriis gaudeo, mihiq; in illis complaceo, atq; tibi hæc congratulor.

Gaudeo præterea de omnibus bonis tuis tibi abundantissimè a DEO collatis.

Gaudeo de tam sublimi omnium virtutum perfectione, quam adjuvante DEO, interris acquisivisti.

Gaudeo quod te clementissimus DEUS ad hunc sanctitatis gradum tam excelsū delegit, & perduxit.

Gaudeo de tua victoria, quam de mundo, carne, & diabolo reportasti.

Gaudeo de illa gloria quam habes in cælo: de tua æterna felicitate, quā possides: de clara visione DEI, qua fruieris: de tuis cœlestibus gaudiis, quibus affluis.

Gratiarum actio.

Pro quibus universis gratiis, donis, & beneficiis tibi à DEO collatis, infinitas, & immensas Divinæ Majestati gratias ago.

Laudo, & glorifico Dominum DEUM meum, quia tam liberaliter prævenit te in benedictionibus dulcedinis in terris, & quia gloria & honore coronavit te in cœlis.

Lau-

Laudo, & benedico clementissimum DEUM, quia te ab æterno elegit sibi amicum; quia te prædestinavit, vocavit, justificavit, demùm glorificavit.

Laudo, & superexalto eum, qui te ad sanctè, justè pièq; vivendum, & amorem sui, ad rerũ terrenarum contemptum, ad acquisitionem omniũ virtutum, ad implenda sua mandata, & consilia amplectenda, sua præveniente gratia excitavit, & cõcomitante adjuvit, corroboravit, & perseverare in bono, & gratia sua ad finem fecit.

Laudo, & magnifico DEUM meum, qui te intercedentem pro nobis exaudit: qui propter orationes tuas nobis peccatoribus ignoscit: & qui furorem & indignationem contra nos in clementiam & benignitatem, ad supplicationes tuas, sæpè convertit.

PETITIO.

PRoinde & nunc quæso, ut pro me peccatore Divinam Majestatem exorare, mihiq; veniam peccatorum meorum & emendationem vitæ, veram cordis compunctionem, sinceram pœnitentiã, perennem abnegationem, mandatorum DEI, consiliorum, & voluntatis ejus, atq; meorum propositorum adimpletionem, perfectionis in altissimo gradu consecutionem impetrare velis. Præcipuè verò impetra mihi has virtutes N. N. istorum vitiorum N. N. eradicationem, passionum N. N. repressionẽ. Insuper effice tua intercessione ut semper in gratia & charitate DEI vivam & moriar.

CAPUT XXVII.

DE PRÆSENTIA DEI, EXEMPLUM

Oratio.

Exempla Præsent: DEI exercenda. 239

Orationis continuæ, seu Præsentia DEI.

Hanc Orationem continuam cōmendat nobis Christus Dominus dicens: *Oportet semper orare, & non deficere, Luc: 10.* Et Paulus Apostolus: *Sine intermissione orate, 1. Thessal: 5.* & Regula Sācta nostra præcipit, *ut Religiosi nostri sint in lege Domini nocte & die meditatantes, & in orationibus vigilantes.* Cui continuæ orationi non aliter satisfacere possumus. quàm per continuam Præsentiam DEI, non physicam, sed moralem: hoc est, per frequentem memoriam DEI, & cogitationē de DEO, atq; crebras orationes jaculatorias.

Est Autem *Præsentia Divina multiplex utilitas:* nimirum; Quia in ea ratio vitæ spiritualis cōsistit. Quia est præcipuum consequendæ perfectionis, & contemplationis instrumentum. Quia nobis à multis eripit imperfectionibus & peccatis, Quia est scutum, quo contra hostem malignum, ejusq; tentationes defendimur. Quia vitia per DEI Præsentiam extirpamus, passiones effrænatas cohibemus, ad virtutes, & bona opera incitamur. Quia per eam vitam cœlestem in terris inchoamus, & degustamus.

Hæc Præsentia DEI nihil est aliud quàm Præapplicatio mentis & affectus ad DEUM.

Ad cujus rei meliorem notitiam: Sciendū quòd duplex est *Præsentia DEI.* Una est, per quā ipse nobis adest DEUS propter suam immensitatē. Alia est per quam nobis facimus præsentem DEUM, vel intellectualiter: vel imaginariē. Et ideo hæc *Præsentia DEI alia dicitur Imaginaria: alia intellectu-*

Intellectualis. Imaginaria est, in qua per imaginationem rerum corporalium efformantur imagines, ut Christi Domini nostri. *Intellectualis est*, in qua sine ulla imagine, per intellectum cogitamus de DEO, videlicet ubiq; existentem DEUM, nobisq; adesse: & intimum esse. Et quamvis aliquando formemus imagines de DEO & Perfectionibus ejus: tamen hæc non dicitur Præsentia DEI Imaginaria, sed intellectualis, quia res purè intellectuales significant.

Utraq; consistit, primò in DEI vel Humanitatis Christi repræsentatione, seu cōsideratione, vel cogitatione: deinde in pia mentis & affectus ad DEUM vel Christum applicatione: seu in exercitio variorū affectuum ad DEUM vel Christum Dominum: quod est potissimum in præsentia DEI. Et ideo Præsentia DEI à viris spiritualibus dicitur: Applicatio mentis & affectus ad DEUM. Illa pars prior potest vocari Præsentia DEI Repræsentativa. Hæc verò Affectiva. Et utraq; est necessaria: quia per Repræsentativam movemur ad Affectivam: prius enim repræsentamus nobis Christum humilem: & sic movemur ad affectum imitationis ejus in humilitate. Vel prius commemoramus nobis, cogitando, DEUM intimum & præsentem: vel Bonitatem aliasq; perfectiones ejus; & ita excitamur ad reverentiam, amorem & alios affectus erga eum.

Quæ autem præsentia DEI sit nobis utilior, an Intellectualis? an Imaginaria? unusquisq; per aliquod tempus, experientiam faciat, per quā Præsentia
magis

magis illuminetur, inflammetur, & ad passiones mortificandas, ad virtutes acquirendas moveatur, & corroboretur. Sed multorum consilium est, ut Incipientes Imaginaria Præsentia DEI magis utantur, quam Intellectuali. Quòd si aliquis perfectas imagines formare nequit, non idè Imaginariam Præsentiam relinquere debet: quia sufficiet ipsi etiam imperfecta imago. Licet quoq; unicuiq; una eademq; die, vel diversis diebus partim Intellectuali Præsentia, partim Imaginaria uti. Non enim debemus constringere animam nostram, ut semper uni modo alligetur.

Et quamvis contingat, quod aliquando de rebus creatis cogitemus, vel formando imagines, ut de Beatissima virgine, & aliis Sanctis, de cælo, inferno, de morte &c. vel sine imaginibus, ut de Angelis, de Divina gratia, de charitatis excellentia &c. nihilominus talis Cogitatio, licet non sit de DEO, tamen dicitur Præsentia DEI: quia per eam anima ad Deum sustollitur, ut cum ipso uniatur.

CAPUT XXVIII.

De Præsentia DEI Intellectuali,
Præxis Præsentia DEI Intellectualis pro Incipientibus.

Quia Incipientium est munus peccata detestari: & Præsentia DEI Intellectualis est, quando per intellectum cogitamus de DEO, quod sit ubiq; existens & nobis intimus: idè præmisso actu fidei debent hic incipientes exercere actus contritionis hoc modo.

Q

O Be-

O Beata TRINITAS unus DEUS, credo & confiteor te mihi intimū & præsentissimū esse ideò affectu omnium Angelorum & Sanctorum & Justorum te adoro, laudo, & benedico: te amo super omnia, ex amore tui de omnibus peccatis meis etiam minimis doleo; nec amplius te offendere volo; & veniam ac emendationem à te spero.

Heu me miserum, qui non erubui in tuo conspectu peccare! quomodo nunc sine pudore apparebo conspectui tuo?

Verè non sum dignus levare oculos meos sursum ad cælum: quia oculos tuos mundissimos sæpissimè offendi: ideò percutiens pectus meum cum publicano dicam: DEUS propitius esto mihi peccatori.

O Pater amantissimè, peccavi in cælum & corā te, & longè recessi à te: verè non sum dignus vocari filius tuus, fac me, obsecro, sicut unum de mercenariis tuis.

O DEUS meus, tibi soli peccavi, & malū coram te feci, cuius rei me nunc pœnitet ob amorem tuum.

Agnosco, Domine, & gemens confiteor, ac desleo summam malitiam meam, per quam tuam infinitam Majestatem, Sapientiam, Æquitatem, Bonitatem, & Charitatem supra modum offendi, inhonoravi, & vilipendi.

Equidem propter hæc, ex puro, & cordiali amore, quem tibi Creatori & DEO meo debeo, quantum possum doleo, & magis ac magis dolere desidero.

Desidero habere omnem, omnium verè pœnitentium,

Præsentie DEI exercenda.

243

tium, qui tibi Domino meo, per suam pœnitentiam placuerunt, dolorem & contritionem.

Propono per gratiam tuam milles mori, quàm te vel levissimè offendere.

O DEUS meus, recipe me ad te redeuntem, & non permittas me amplius per aliquod peccatum à te infinito bono recedere.

Bonum quod esset sæpius ex Psal: 50. decem versus ore, vel corde præferre: videlicet verbum
1. 2. 3. 4. 5. 8. 10. 11. 12. 13.

Isti actus vocantur *Orationes Jaculatorie* quibus ad cor Divinum jaculamur seu *actus anagorici*, quibus ad superna levamur, & ad unionem cū DEO evehimur: vocantur *Aspirationes*, seu pia cordis desideria, per quæ aspiramus ad DEUM; & per quæ, sicut vita corporis aëris aspiratione, sic fervor charitatis sustinetur: quæ aspirationes facili modo secundum triplex tempus, Præsens, Præteritum & Futurum exerceri possunt. Et ne mens nostra fastidium concipiat, una res variis nominibus idem significantibus effertur: ut, Diligo te, fortitudo mea: volo tibi omnia tua, ô virtus mea: complaceo mihi in te, omne bonum meum.

Et: doleo propter amorem tuum, DEUS meus, de omnibus peccatis meis. Pœnitet me ex amore tui, quòd unquam offenderim te abominor propter te omnia delicta mea. Detestor omnem prævicationem mandatorum tuorum; quia est infinita offensa tua. Displicet mihi valde transgressio legis tuæ Divinæ; quia tibi displicet.

Q

Et:

Est: volo Domine obedire tibi. Statuo servare omnia præcepta tua. Nolo unquam recedere à mandatis tuis. Custodiam legē tuam semper.

Vel unius virtutis varii actus possunt asserri: ut Humilitatis. O DEUS meus, propter id quod sum, vilissimum inter omnes creaturas, & omni contemptu dignissimum me reputo. Desidero, ut omnes hoc idem de me sentiant. Cupio ut me omnes despiciant, & exprobrent indignitatē meam. Volo omnem contemptū mei, irrisionem, & vilipensionē patienter ferre, immò lætabor de omni contemptu & despectu, atq; contemptores amabo.

PRAXIS ASPIRATIONUM

pro Incipientibus,

Qui utuntur Præsentia DEI intellectuāli, his ejusmodi aspirationes maximè commendantur.

In tempore præsentī.

O Sanctissima TRINITAS unus DEUS, quē ego mihi præsentissimum multis sceleribus offendi, de quo nūc doleo ex toto corde meo, propter purum amorem tuum.

Pœnitet me, ex amore tui, in oculis tuis in te peccasse.

Detestor hanc impudentiam meam, quia est infinita offensa tua, eo quòd non erubuerim coram te, tam multa, & tam enormia delicta perpetrare.

Exsecror universas iniquitates meas, ó Domine DEUS meus; quia sunt tuæ infinitæ Æquitati, Puritati, & Pulchritudini contrariæ.

Abominor tam perversam audaciam meam, quòd pecca-

peccando offenderim, & ad iram concitaverim te summe bonum, & amabilem Dominum, ac DEUM meum.

In præterito. Utinam nunquam præsentiam tuam Divinam peccando inhonorassem. Utinam nunquam te, atq; tuos oculos purissimos offendssem!

O utinam nunquam tuæ Divinæ Majestati displicuissem?

O utinam nullo delicto tuam Bonitatem infinitam læsissem? utinam prius occubuissem, quam peccasse!

In futuro. O si jam abhinc nullo, etiam levissimo peccato, te offendam!

O si, nunquam aliquid, quod tibi displicet Domino meo committam!

O quando in cælum, & coram te non peccabo,

O quando servabo perfecte mandata tua?

O quando in nullo transgrediar legem tuam?

O Domine adjuva me, ut non peccem tibi.

Ecce ego malo mori, quam tibi peccare, & malum coram te facere: & hoc desiderium cupio toties renovare quot sunt momenta in tota æternitate.

Praxis Præsentia DEI Intellectualis serviens Proficientibus.

Proficietes illi dicuntur, qui post plandum & poenitentiam pro peccatis suis, acquirendis vacant virtutibus, ad quarum exercitium sumere debent motiva ex ipsomet DEO Trino & Uno, qui nos creavit ad imaginem, & similitudinem suam, quæ sunt diligenter conservanda. Et imago quidē DEI, quæ consistit in ipsa natura spiritali, & in-

tellectuali animæ nostræ, semper à DEO conservatur. Similitudinem verò DEI, quæ in cunctarum virtutum possessione consistit, conservare debet homo, & conari, ut pro viribus suis per virtutes similis fiat DEO: Nam sicut DEUS Creator: ut ait *Sanctus Ambrosius lib: de Parad: Cap. 3.* est charitas, est bonus & iustus, patiens atq; mitis, mundus & misericors, & omnium virtutum splendore & totius bonitatis decore ornatus! ita homo creatus est, ut charitatem haberet & bonus esset, & iustus, ut patiens atq; mitis, & mundus & misericors, foret. Quas virtutes quantò plùs quisq; in se habet, tantò plùs propius est DEO, & maiorem sui Conditoris gerit similitudinem.

Hoc idem monet nos DEUS, *Levit: 11.* Sancti estote, quoniam ego sanctus sum. Et quia *hec sanctitas nihil est aliud, nisi omnium virtutum universitas:* dum DEUS vult, & jubet nos esse sanctos, vult, & jubet nos debere esse ad exemplar ipsius omnibus virtutibus ornatos. Habemus igitur ex ipso DEO Trino & Uno egregia motiva, & exempla, ad exercitium & cultum omniū virtutum.

Praxis Aspirationum.

IN tempore *Præsenti.* O DEUS meus, quia tu vis ut in sanctitate & iustitia serviamus tibi *Om*nibus diebus nostris: O si ita sanctus & iustus essem, sicut tu Sanctus & iustus es Domine: prout & ego vehementer cupio.

O Creator mi superpotentissime, qui me creasti ad imaginem & similitudinem tuam, ut sicut tu es purissi-

purissimus Spiritus, ita & anima mea condita sit spiritus. O si jam non secundum carnem, sed secundum spiritum viverem, & spiritu facta carnis mortificarem, sicut ex amore tui desidero!

O si perfectam spiritus libertatem acquirerem, ut amplius desiderii carnis inordinatis non servirem!

O Pater benignissime, quem quotidie Patrem meum voco, utinam tibi in bonitate similis essem!

O si cunctis virtutibus ornerer, ut per eas similitudinem tui conditoris mei gererem, tibiq; quam maximè placerem.

In præterito. O DEUS meus, tu es Exemplar omnis puritatis & sanctitatis, utinam hoc exemplar semper inspexissem, & ad illud vitam meam efformassem!

O Pater noster, qui es in cœlis, utinam nomen tuum sanctè, & justè, & piè vivendo sanctificassem!

O utinam conversatio mea semper fuisset in cœlis!

Utinam pridem mundum, & terrena immò & meipsum verè contempsissem!

Utinam sicut homines avari divitiis inhiant, & illis congregandis diu noctuq; incumbunt: ita & ego semper fecissem in virtutibus acquirendis; ut tibi per hoc placuissem!

In futuro. O utinam sim imago quædam tua, in qua virtutum tuarum similitudo expressa videatur.

Utinam moribus & actibus virtutum à tui similitudine nunquam dissentiam!

O quando tibi, Domine DEUS meus, gustum dabo, adimplendo illam tuam voluntatem, & man-

datum, quo præcipis: Sancti estote; sicut & ego sanctus sum?

Quâdo sicut tu es charitas, & bonus, & iustus, patiens atq; mitis, mundus & misericors, & omniū virtutū decore ornatus, ita & ego in his similis tibi sim?

O DEUS meus largitor omnium bonorum & virtutum, fac mecum secundum misericordiam tuā; ut sicut me ad similitudinem tuam creasti, ita similem tibi per omnes virtutes efficias.

Quæsi aliquis velit unius tantum virtutis actus exercere, procuret primò aliquod motivum ex ipso DEO ad illam virtutem habere: ut ad Humilitatem. O DEUS meus, qui humilia respicis in cælo & in terra, ut me benignè aspicias oculis misericordiæ tuæ humilis esse percipio: sicut & nunc coram te vilipendi desidero. Addat alios actus humilitatis per varias aspirationes exprimendos.

Ad Obedientiam. O Clementissime DEUS meus, cui magis placet obedientia, quàm victima: ideo ut tibi placeam, obedientiæ virtutem colere summo studio conabor.

Ad Mansuetudinem. O DEUS meus, qui exaltas mansuetos in salutem: ex amore tui, mansuetudinem amplecti volo.

Ad Patientiam. Domine DEUS meus, patiens & multæ misericordiæ, exemplo tuo patientiam in omnibus adversis tenere statuo.

Eodem modo ad varias virtutes in Scripturâ Sacra motiva de DEO plurima reperiuntur.

CAPUT XXIX.

DE PRÆSENTIA DEI IMAGINARIA.

Praxis Præsentie DEI Imaginaria.

Præsentia DEI Imaginaria dicitur illa, in qua formamus nobis imaginem Christi: Et idè usu communi, jam receptum est in Religione nostra, ut die Dominico repræsentemus nobis, in imagine per imaginationem à nobis efformata, Christum Dominum natum in stabulo, positum in præsepio. *Vel in Quadragesimâ Christum Dominum in cruce pendentem. Vel tempore Paschali ipsius Resurrectionem.*

Fer: 2. Christum Dominum pedes Apostolorum lavantem.

Fer: 3. Christum Dominum in horto orantem.

Fer: 4. Christum Dominum flagellatum.

Fer: 5. Christum Dominum spinis coronatum.

Fer: 6. Christum Dominum crucem bajulantem, vel cruci affixum.

Sabb: Christum Dominum de cruce depositum, & Virginem Sanctissimam super eum plangentem.

Incipientes, qui sunt in via Purgativa, ejusmodi Præsentia debent commoveri ad contritionem, ad poenitentiam, ad mortificandas passiones & ad vitia extirpanda: quorum omnium habentur Actus Parte 2. Hebdom: 1. Verum & hic ponuntur breves Contritionis actus. Imprimis pro die Dominico.

O amantissime JESU, qui ex M. V. in stabulo natus, & in vili præsepio reclinatus multa in comoda pertulisti, atq; lacrymas piissimas pro nobis effu-

effudisti: annon meritò & ego plangere & dolere debeo, quòd tam multis & gravibus peccatis te DEUM meum infinitè amabilem offenderim?

Pro Fer: 2. O Benignissime JESU, qui pro superbia nostra, quæ est omnium vitiorum caput, fons & origo, te profundè humiliasti, dum pedes discipulorum tuorum lavisti, ideò nunc, ex amore tui, detestor omnem superbiam, & omnia scelera mea, quibus te DEUM meum infinitè bonum offendi.

Pro Fer: 3. O clementissime JESU, qui cernens enormia peccata mea, & totius mundi, & simul mortem crudelissimam atq; acerbissima tormenta, quæ tibi parata fuerunt, sanguineum sudorem ex toto corpore effudisti; propterea lacrymas cordis nunc effundo pro peccatis meis, quibus tantarum poenarũ tuarum ego causam dedi.

Pro Fer: 4. O Dulcissime JESU, qui pro peccatis nostris crudelissimè flagellis cæsus fuisti: propterea nunc omnia peccata mea, ob amorem tuũ, detestor.

Pro Fer: 5. O dilectissime JESU, qui spinis ætuis pro nobis coronatus fuisti: Heu me miserum, qui toties te Dominum meum spinis coronavi, quoties peccavi, propter quod, ex puro amore tui, quòd tibi Creatori, & Redemptori meo debeo quantum possum doleo.

Pro Fer: 6. O Snavissime JESU, qui portans crucem ponderosam, sub ejus pondere aliquoties in terrã corruisti: verũ non tam illud crucis lignũ, quàm peccata mea gravia tibi fuerunt, sub quorum onere in

in terram cecidisti: poenitet me nunc ex corde aliquando in te peccasse.

Pro die Sabb: O Sanctissima Virgo DEI Genitrix MARIA, quæ ob mortem dilecti Filii tui, & ob amaram passionem ejus, maximos dolores pertulisti, quorum dolorum ego causa fui: quia & morti crudelissimæ Unigeniti Filii tui per mea peccata causa fui, de quibus nunc multum doleo, ob amorē Filii tui veri DEI.

His actibus contritionis pro singulis Feriis hic positis addantur aspirationes ut suprà pag: 244. Et alii actus contritionis ut pag: 242.

Tempore Paschali Facta repræsentatione Christi resurgentis pro Præsentia DEI, motivum ad contritionem habere possumus ex eo, quia hic Christus, qui resurrexit à mortuis, prius mortuus est in cruce pro peccatis nostris.

Tempore Ascensionis Domini: quia janua cœli nobis referavit, quam peccata nostra clauferant.

Tempore Spiritus Sancti missionis: quia Spiritus S. in terras misit, ut nos emundaret à peccatis nostris.

Praxis Imaginaria Præsentia DEI serviens Proficientibus.

Proficientes Præsentia Christi Domini Imaginaria uti debent, ut alliciantur ad eum imitandum in virtutibus sanctis. Et ideò volentes exercere se in Humilitate, Obedientia, Patientia, Mansuetudine & aliis, proponant sibi Christum humilem, obedientem, mansuetum, patientem &c.

Sicut

Sicut die Dominico pro Presentia DEI Imaginaria proponimus nobis Christum Dominum in stabulo natum, & in præsepio reclinatum, ubi Christus dedit nobis præclara multarum virtutum exempla; ut, contemptus mundi, humilitatis, paupertatis, patientiæ, mansuetudinis, silentii &c. in quibus virtutibus unusquisq; juxta necessitatem suam Christum Dominum conabitur imitari.

Et *Fer: 2.* Proponimus nobis Christum Dominum pedes discipulorum lavantem, quo actu dedit nobis exemplum humilitatis, patientiæ, modestiæ, paupertatis &c.

Eodem modo in aliis Feriis proponimus nobis Christum Dominum varias exercentem virtutes, in quibus ad eum imitandum exemplo ipsius provocari debemus.

Exemplum pro omnibus Feriis.

Die Dominico. O amantissime JESU, qui in stabulo natus.

Fer: 2. O benignissime JESU, qui pedes discipulorum tuorum lavando.

Fer: 3. O clementissime JESU, qui in horto orans ante passionem tuam.

Fer: 4. O dilectissime JESU, qui in flagellatione tua.

Fer: 5. O dulcissime JESU, qui in coronatione tua crudeli.

Fer: 6. Qui crucem ignominiosam portando.

Sabb: O MARIA DEI Genitrix V. quæ in tuis summis doloribus, dedisti nobis exemplum humilitatis patientiæ & aliarum virtutum. Ita q;

Itaq; & ego ex amore tui exemplo tuo humilitatis, patientiæ &c. virtutem diligenter exercere desidero.

Possunt Et alii affectus hic exerceri, videlicet: Admirationis de Bonitate Christi. O admirandā tuam Bonitatem, per quam nostræ salutis causā istas virtutes exercuisti, ut nos ad imitationem tui alliceret: idēd prompto animo te Dominum meum in virtute humilitatis, patientiæ &c. imitari conabor.

Accusationis sui. Heu me miserū, qui modicam aut potius nullam curam in his virtutibus acquirendis hætenus adhibui! verū abhinc, ob exemplum tuum, illis exercendis operam dabo.

Admirationis de nostra malitia. O quanta mea malitia & ingratitude! eō quōd ego per viam virtutum adversam tibi incado, quam tanquam perversam jam deserere, & viam tuarum virtutum currere statuo.

Confusionis. O me impudentem hominem! qui sciens te Dominum altissimæ Majestatis mei causā factum esse humilem, patientem &c. ego nihilominus sum superbus, impatiens &c. sed jam vestigia tuarum virtutum sequi decerno.

Reprehensionis. Quia ego in his virtutibus recū per imitationem non convenio, meritō me arguo & reprehendo, & ut tibi per has virtutes placeā, earū exercitium amplecti statuo.

Expositionis. O quanta mala, quanta animæ meæ damna facio, dum harum virtutum cultum negligo,

glico, finè quibus salvari nequeo ! sed non propter
damna evitanda, verùm ob amorem tuum eas exer-
cere conabor.

Exsecrationis. Propterea exsecror meam super-
biam, impatientiam &c. ut pote tuæ humilitati, pa-
tientiae &c. contrariam tibi; displicentem.

Odii. Ideò displicet mihi superbia, impatientia
&c. abominor, & summo odio habeo illam; jam
verò placet mihi virtus humilitatis & patientiae &c.
in quibus te imitari laborabo.

Doloris. Dolco, quòd multoties per superbiam,
impatientiam &c. tuam infinitam bonitatem offen-
di, & offensam tuam, per humilitatem, patientiam
&c. compensare volo.

*Quibus singulis affectibus aspirationes interpo-
nantur sequentes.*

In tempore Præsenti.

O S. jam, sicut propter te, dulcissime JESU,
percipio, ita tuo Divino adjutus auxilio hu-
milis, patiens &c. essem!

O si jam perfectè superbiam, impatientiam &c.
quæ tibi displicent, extirparem, prout maxime
exopto!

O si jam aliqua similitudo tuarum istarum vir-
tutum, quarum exemplar nobis reliquisti, in me
appareret!

In præterito. O utinam semper oculos meæ
mentis in tuam humilitatem, patientiam &c. inten-
tos habuissem, ut me ad imitationem tui excitassem.

Utinam in istis virtutibus exercendis omnem di-
ligentiam pridem adhibuissem!

Uti-

Utinam istarum virtutum splendore animam meam
exornassem, tibiq; Domino meo per hoc placuisse!

In futuro. O si jam incipiam, diligenter in exercitium humilitatis, patientiæ &c. incumbere! ô quando id fiet? ô quando curram in odorem virtutû tuarum, & me verum tui imitatore exhibebo?

O quid moror? Quare in dies & horas istud negotium salutare differre non timeo.

Cur dum tempus habeo non operor bonum?

Cur non vereor, nè insuperveniens insperata mors abrumpat filum meæ vitæ, & mihi omnem facultatem rectè agendi auferat?

O bone DEUS, sine cuius gratia speciali nihil boni facere, immò nec cogitare quidem valeo: fac me istas virtutes exemplo tuo diligenter exercere, in illis proficere, & ad illarû perfectionem pervenire.

Possunt etiam cum magno fructu anime istiusmodi actus identidem exerceri. O humillime JESU: vel, ô mansuetissime JESU &c. da mihi humilitatem veram: ecce ego amore tui, & exemplo tuo humilis esse volo: vel, patiens esse volo. *Addendo aspirationes.* O utinam jam humilis essem! O quando id fiet? quando humilis ero? ô JESU exaudi me: adjuva, & comple desiderium meum. *Eodem modo ad B. Virginem dirigere actus similes valemus.* O humillima DEI-Genitrix Virgo MARIA, impetra mihi humilitatem: ecce ego amore tui humilis esse exopto.

Qui verè desiderant & volunt continuam Præsentiam DEI, seu orationem continuam habere;
quia

quia *Actualis* ejusmodi oratio haberi nequit, at *virtualis* potest optime esse faciendo pactum cum Domino **D E O**, cujus pacti exempla habentur Par: 2. pag: 240.

Præsentia DEI Imaginaria, diversis temporibus accommodata.

Tempore Adventus pro Præsentia DEI erit Beatissima Virgo, & Archangelus Gabriel sibi Annuntians Incarnationis mysterium. *Hinc actus imitationis.* O MARIA Virgo purissima, quam Unigenitus DEI Filius in Matrem suam elegit, cujus Anima omnibus virtutibus ornata erat: videlicet, charitate: puritate, humilitate &c. ego quoq; amore tui tuoq; exemplo humilitatem &c. amplecti & diligenter colere volo.

Tempore nativitatis Domini pro Præsentia DEI haberi potest Christus Dominus. infans in stabulo natus & in præsepio reclinatus, ubi multarum virtutum exemplum nobis dedit. *Actus imitationis habetur supra pag: 75.* Hac Præsentia DEI uti valemus ad Festum Purificationis: quia etiam Christus tam diu ibi mansit.

Tempore Paschali erit Christus Dominus resurgens. *Actus imitationis.* O JESU dulcissime, qui in glorioso corpore resurrexisti à mortuis quam gloriam Corporis tui per tuam passionem, humilitatem, obedientiam, patientiam acquisivisti: gaudeo de illa tua ineffabili gloria & te in virtutibus istis, quarum exemplar nobis reliquisti, imitari decerno.

Tempore Ascensionis Domini erit Christus Dominus
ascen-

ascendens in cœlum. *Actus imitationis potest esse,*
prout in Resurrectione ipsius.

Tempore Pentecostes erit Spiritus Sanctus in specie columbæ. *Actus virtutū.* Spiritus Sancte DEUS, quem Christus Dominus misit in hunc mundum, ut nos doceres omnem veritatem & virtutes, quarum exemplum nobis reliquit, te supplex rogo, doce me Christi humilitatem, obedientiam, mansuetudinem &c. in quibus cum imitari desidero.

Actus varii Sanctorum pro Præsentia DEI,

Quod si alicui placuerit imitari alios Sanctos, qui multos actus anagogicos in die faciebant: ideo hic recensentur aliquorum exercitia.

S. Thais peccatrix à Paphnutio edocta sic sæpissimè orabat: Qui plasmasti me miserere mei.

Macarius Abbas: Domine sicut vis, & seis miserere mei.

Antiqui Anachoreta: DEUS in adiutoriū meum intende. Quæ oratio multum commendatur.

Sanctus Franciscus tota nocte sic orabat: DEUS meus, & omnia.

S. Gertrudis 365. vicibus hanc orationem quam ab ipso Christo didicit, intra unū diem repetiit: Non mea, sed tua voluntas fiat, ô amantissime JESU.

Eadem in die Ascensionis Domini 225. vicibus (tot enim sunt compages in corpore nostro) hunc versiculum recitavit: Ave JESU, Sponse floride, in jubilo, quo ascendisti, te saluto, & collaudo.

Eadem obedientiam exercendo dicebat: Offerto tibi cor meum Domine JESU in laudem æternam, ad perficiendum corpore & anima omne beneplacitum tuum. Et cum sic oraret coram imagine Crucifixi, ab ipso Christo ex imagine salutata, & vulnere lateris adnota fuit.

Eadem ante festum Ascensionis Christi 5466. vicibus recitavit hanc orationem. Gloria tibi, suavissima, dulcissima, benignissima, nobilissima imperialis, excellentissima, fulgida semperq; tranquilla TRINITAS, pro roseis vulneribus mei unice electi amatoris. Sic oranti apparuit JESUS, illamq; salutans, & se illi in morte adjuturum promittens. Dixit etiam, se illius, & eorum, a quibus ita salutabitur, peccata & negligentias absterfurum.

S. Meehtildis cum Dominica Quinquagesima vellet aliquid facere pro tot peccatis mortalium, jussa est à Christo Domino hanc orationculam faculatoriam 350. vicibus dicere. Tibi laus; tibi gloria, tibi gratiarum actio, in sempiterna sæcula.

Eandem docuit Christus, ut orans ita diceret, aliusq; doceret: JESU bone, laudo te; & quidquid minus est in me, rogo, ut supplicas pro me, JESU bone, amo te; & quidquid minus est in me, rogo, ut cordis tui amorem DEO Patri offeras pro me.

S. Aldegundis V. post tentationem superatam sic oravit: DEUS meus concede mihi, ut in amore tuo permaneam usq; in finem. Cui Dominus annuit, ac est pollicitus, quod petebat.

S. Dun-

S. Dunstanum Angelus sic orare docuit: O Rex Gentium Dominator omnium, propter sedem Majestatis tuæ, da nobis indulgentiam, Rex Christe, peccatorum, Alleluja.

S. Franciscus sæpè utebatur hac oratione: Sit benedictum Nomen D.N. JESU Christi, sacrata ejus passio, Sanctissima Virgo, quæ illū peperit, cum cælesti curia universa.

S.M.N. Theresia morti proxima hæc verba sæpius repetebat: Nè proicias me à facie tua: & Spiritum Sanctum tuum nè auferas à me.

Eadem suadebat, ut nos 50. vicibus in die offerremus DEO: quod potest fieri per istum resignationis actum: O Dominus & DEUS meus, me totum tibi offero in omne beneplacitum tuum: Fiat voluntas tua.

Aliqui hos actus multum commendant: DEO gratias: quā oratione nulla brevior, nulla DEO acceptior.

Et: DEUS propitius esto mihi peccatori.

Quod omnes, sicut omnes, propter quod omnes; hoc & ego amore tui, DEUS meus.

Quod tuus infinitus amor, nunc & in tota æternitate, à me & quibuscunq; aliis factum esse optaret, id ego nunc, & per totam æternitatem facere, propter te Domine DEUS meus, vellem.

O Beata TRINITAS unus DEUS, confiteor te mihi præsentissimum & intimum esse: & ideo affectu omnium Angelorum & Sanctorum atq; Justorum te adoro, laudo, veneror & exalto: in te cre-

do & spero: te amo super omnia, & ex amore tuo de omnibus peccatis meis, etiam minimis, doleo, amplius te offendere nolo: O si nunquam te offendifsem! veniam tamen, & emendationem, vitamq; æternam à te spero: & me totum in omne tuum beneplacitum offero. O Sancta TRINITAS miserere mei, sicut potes, scis & vis propter te. *Et iste actus sæpius est repetendus in vita & in morte.*

O DEUS meus, utinam te omnes homines cognoscant, laudent & ament, æstiment, revereantur, desiderent, tuamq; voluntatem sicut in cœlo, ita & in terra faciant! utinam nullus hominum te offenda!

Gloria Patri, & Filio, & Spiritui Sancto: Sicut erat in principio &c.

Sanctus DEUS, Sanctus fortis, Sanctus immortalis miserere nobis.

Benedictus DEUS in æternum.

Domine DEUS da scire, velle facere, quidquid, quomodo, quia tibi placet.

Pro Festivitatibus B. Virginis Præsentia DEI.

IN Fæsto Immaculæ Conceptionis, & Nativitatis B.V. potest efformari imago ejus prout Immaculata Concepta depingitur, sub forma pulcherrimæ parvæ puellæ: Et quoniam in Conceptione ipsius contulit ei DEUS ineffabilem puritatem, & animam ejus omnium virtutum infusarum splendore ornavit, quas postea in lucem edita exercuit: ideo tam ex Conceptione, quam ex Nativitate illius,

us, ad omnes virtutes exercēdas motivum habere possumus.

Actus imitationis. O purissima Virgo, cui Dominus DEUS in tua Conceptione Immaculata, ineffabilem contulit puritatem, & tuam Animam omnium virtutum splendoribus ornavit, de quo gaudeo; & te in cunctis virtutibus præsertim in humilitate &c. imitari percipio & statuo.

In Feste Præsentationis, Annuntiationis, Visitationis, Purificationis, Assumptionis. B.V. eo modo per imaginationē efformētur imagines ipsius, sicut depingi solent: ut unusquisquē juxta arbitriū suum, has vel illas virtutes ejus ad imitationē sibi proponat.

In his Festivitatibus, & aliis diebus quibuscunq; bonum erit hos actus exercere: videlicet, quā sæpius illam salutatione Angelica salutare: præsertim ad sonitū horologii in egressu ē cella, & in ingressu ad cellam: transeundo imaginem illius: ante quodlibet opus, & finito opere &c. Nam suprā hanc salutationem nulla alia est, ipsi magis grata, prout S. Mechtildi Beata Virgo revelavit.

Et: MARIA Mater gratiæ, Mater misericordiæ, tu nos ab hoste protege & hora mortis suscipe.

JESU tibi sit gloria qui natus es de Virgine MARIA, cum Patre almo Spiritu, in sempiterna sæcula.

Ave Filia DEI Patris. Ave Mater Filii DEI:
Ave Sponsa Spiritus S. Ave Templum Sanctissimæ
TRINITATIS.

O MARIA Mater DEI: memor esto precor,
mei: nunc & in hora obitus mei.

262 *Exempla Præf: DEI exercenda.*

O Mater admirabilis: Consolatrix afflictorum
Regina Sanctorum omnium, ora pro nobis.

JESUS MARIA sit nobiscum semper. JESUS
MARIA sis mihi JESUS & MARIA. JESUS &
MARIA vobis dono cor & animam meam. JESUS,
MARIA, quoties respiro, toties ad vos suspiro.

*Præxis Præsentia DEI ex variis creaturis
& actionibus nostris.*

Habetur in Disciplina clauitrali nuper reimpressa,
pag: 128.

*Commendatur hic frequens usus actuum Ana-
gogicorum à Christo, qui cogitanti S, Gertrudi,
quodd absq. amore DEI nemo salvetur, dixit; Vel-
le se, sibi gratias agi ab electis suis, etiam pro eo
beneficio quod illis, qui ejus sunt dulciter recordati,
in agone positis, in ipso mortis confinio, ita se ama-
bilem exhibeat, ut ex intimis medullis cordis, id
est, non timore tantum gehennæ, sed ex DEI verò
amore illos pœniteat peccasse. In fin: diu: piet: lib:
3. cap: 28.*

EXERCITIUM SECUNDUM

vitaæ Spiritualis est.

MORTIFICATIO.

CAPUT I.

Quid & quotuplex sit Mortificatio?

Mortificatio nihil est aliud, quàm virium
anima nostræ interiorum & exteriorum
ad illicita, & terrena proclivium debi-
ta moderatio. Istæ autem vires exteriores sunt
Sensus externi: & interiores sunt sensus interni, ap-
petitus

petitus concupiscibilis, & irascibilis, intellectus, voluntas, amor proprius, & iudicium proprium. Mortificatio enim in eo fita est, ut sensus & affectus naturæ à malo retrahamus, & effrenes motus eorū cohibeamus, & moderemur.

Ad quorū intelligentiam: Sciendum hominem esse *Animal rationale*: quia quod habet Animal, videlicet, sensus externos & internos, per quos cognoscit ad vitam suam sustentandam & conservandam necessaria; habet & appetitum, quo appetit illa: hoc idem habet homo: & ideo dicitur Animal. Est præterea homo Rationalis, per quod differt ab aliis animalibus. Ac propterea *homo est compositus ex duabus partibus*, quarum una dicitur pars *Sensitiva seu Inferior*: altera pars *Rationalis seu Superior*: vocantur præterea Caro & Spiritus: sensualitas & ratio: homo vetus & novus: exterior & interior: quarum partium in primis parentibus ante peccatum talis fuit conjunctio & ordo, ut pars Rationalis seu superior tanquam Regina imperaret inferiori & sensitivæ; inferior verò ut ancilla ei obediret. Sed postquam homo factus est rebellis DEO per prævaricationem præcepti ejus, statim quoq; facta est pars inferior rebellis superiori: & ideo continua est inter illas pugna. Nam caro concupiscit adversus spiritum, spiritus autem adversus carnem. Quia partes istæ desideriis & actibus suis inter se dissident: pars enim inferior, quæ nobis cum belluis est communis bona sensibilia, delectabilia & commoda appetit: pars verè superior, qua-

convenimus cum Angelis, bona honesta, & virtuti consentanea, Deoq; grata concupiscit. Proinde qui secundum partem inferiorem vivunt, vitam belluinam & carnalem ducunt: & tales ab Apostolo animales nuncupantur: qui verò secundum partem superiorem vivunt, vitam humanam & spiritualem agunt.

Porro *Pars sensitiva seu inferior complectitur* in se omnes sensus externos ac internos; & appetitum ex parte concupiscibili ac irascibili compositum cum suis motibus, qui passiones vocantur. Jam verò *Pars rationalis seu superior complectitur* Intellectum, Voluntatem & Memoriam intellectivā. Hic *intellectus* prout unam notitiam ex alia deducit *Ratio dicitur*, quæ dividitur in duas portiones seu partes. *Dum enim considerat temporalia*, & secundum rationes humanas, *Ratio inferior* nominatur: *si autem æterna*, vel temporalia secundum legem æternam. *Ratio superior nuncupatur*, quæ etiam spiritus dicitur. Itaq; *Ratio inferior dicit*: Hoc mihi faciendum est; quia honestum est; quia mihi est utile; vel sensui delectabile. *Ratio verò superior*: Hoc mihi, ait, faciendum: quia DEUS vult; quia præcipit; quia placet ei: quia prodest ad animæ salutem. *Ad hanc Rationem superiorem pertinet*, regere Rationem inferiorem, & partem totam sensitivam, ipsiusq; motus inordinatos moderari, quæ *moderatio* dicitur Mortificatio & Abnegatio, Crux, Odium sui, Violentia & spiritualis Circumcisio.

Est

Est autem mortificatio duplex, Una exterior, qua sensus externi, lingua, & corpus mortificantur. *Alia interior,* quæ sensus internos & affectus moderatur. *Utraq; est necessario exercenda:* quia exterior sinè interiori non multum prodest: & interior absq; exteriori diu durare non potest, licet sit potior exteriori.

Rursus utraq; mortificatio: Vel est communis, quæ est in illicitis, per quã à prohibitis abstinemus. *Alia specialis,* quæ est in licitis, per quam à non prohibitis, ob amorem DEI, & perfectionis adepti-
onẽ, nos continemus, videlicet à cibo, potu, somno, sermone visu auditu, recreatione & aliis similibus. *Et hæc mortificatio est Religiosis propria,* & omnibus qui ad perfectionem aspirant. Est enim bonum à licitis abstinere, tum ut consilia sectantes majorẽ mercedem obtineamus: tum ut facilius illicita fugiamus.

CAPUT II.

Motiva ad Mortificationem etiam in minimis.

Primum motivum est quia Mortificatio gratũ DEO Sacrificium est, ut docet Richard: de S. Viatore. Nil ita flagrat Domino in odorem suavitatis, quàm si mactetur ei vitulus propriæ voluntatis.

Secundum: quia per mortificationem peccata minuuntur, simul & pœna eis debita vitia extinguuntur, ac tentationes vincuntur.

Tertium: quia mortificatione refrenatur appetitus, ac impediuntur omnia ac singula damna, tam positiva, quàm privativa, quæ causare solet, quando

do est inordinatus. Privativū damnū in hoc consistit, quod appetitus inordinatus privat animā Divino Spiritu, sensum omnem devotionis extinguēs. Positivum damnum in hoc consistit, quod talis appetitus animam fatigat, torquet, obfuscat, fædat ac debilitat.

Quartum: quia mortificatione facilè virtutes acquiruntur, teste D. Thoma, qui ait. Virtus prærequirit passiones sedatas, & consequenter appetitus moderatos.

Quintum: Quia mortificatione hic in via beatitudo inchoatur. Dicit enim Thom: à Kempis lib: 2. de Imit: Christi cap: 12. Ecce in cruce, id est, in mortificatione totum constat, & in moriendo totum jacet, & non est alia via ad vitam, & ad verā internam pacem, nisi via S. Crucis, & quotidianæ mortificationis.

Sextum: Quia per mortificationem perfectio acquiritur: Nam summa hominis perfectio consistit in hoc, quod ad eundem reducatur status, à quo per peccatum primi Parentis decedit; sed per solam Mortificationem homo reducitur ad statum innocentiae, quantum fieri potest, dum per illam pars inferior superiori subordinatur, refrenatis ejus passionibus Itaq; per solam Mortificationem perfectio acquiritur.

Septimum: Quia per Mortificationem ceu Regiam crucis viam pervenitur ad Patriam. Nam angusta est, dicit Salvator noster, via, quæ ducit ad vitam, lata est, quæ ducit ad perditionē.

Olla-

Octavum: Quia per Mortificationem, sumus veri imitatores Chrismi, & eidem assimilamur ut de se fatetur Apost: ad Gal: 2. Christo confixus sum cruci, vivo ego, jam non ego, vivit verò in me Christus.

Nonum: Quia sine Mortificatione non potest haberi contemplatio, vel Mentalis Oratio. Unde quando dicitur Cant: 4. *Vadam ad montem myrrhæ, & ad collem thuris:* conjuncta est myrrhæ thuri: Ubi per myrrham amaram intelligitur mortificatio, quæ carni displicet; per thus autem intelligitur Oratio, juxta illud: *Dirigatur, Domine, Oratio mea, sicut incensum in conspectu tuo.*

Decimum: Quia qui mortificationem non amplectitur, vitam spiritualem, immò rationalem ducere nequit. Dicit enim S. August: *serm: 18, in Joan:* Si homo vivit secundum spiritum, imitatur Angelos, si secundum carnem, sive appetitus immortificatos, imitatur bestias Et S. Ambr: *in Psal: 118.* Qui secundum corporis appetentiam vivit, caro est, qui secundum præcepta DEI, spiritus est.

Debet autem fidelis amicus crucis mortificationem exercere etiam in minimis: cujus Ratio Prima est: quia non minima, sed maxima ad vitam spiritualem in mortificatione ejusmodi est meritorum accessio. Non enim magna occurrunt nobis abnegatione resecanda, ad quod hortatur nos Spiritus S. Eccl: 29. dicens: *Minimum pro magno placeat tibi*, id est, minora, quæq; merita quæ in minimis abnegationibus reperiuntur magni reputa. Sec-

Secunda: Quia non tantum solæ, magnæ imperfectiones nos vinciunt, sed etiã minores ligant, & ab expedito volatu in cœlum impediunt: quid enim refert si ferrea catena, aut tenui filo tenearis, si victus manes, nē ad DEUM te eleves.

Tertia: Quia dum nos in minimis rebus abnegamus, sensim propriam voluntatem vincimus & prosternimus, qua prostrata ad quandam mirabilem mentis tranquillitatem pervenimus; quam tranquillitatem *S. Doroth:* vocat Impassibilitatem, quæ mortificatione propriæ voluntatis acquiritur. Jam verò mortificatio voluntatis assiduis abnegationibus comparatur.

Quarta: Quia talis mortificatio in minimis delectat junculis quamvis licitis & non prohibitis, gratissima est DEO: *Unde Blosius ait:* Quando quis propter DEUM sensualitati, voluntatiq; propriæ etiam in rebus minimis reluctatur, ac se mortificat: rem ipsi DEO magis gratam facit, quàm si multos mortuos ad vitam revocaret.

Quinta: Quia homo has parvulas abnegationes exercens, & in modico se mortificans, in magnis occasionibus se fidelem futurum ostendit, *juxta illud Luc: 16.* Qui fidelis est in minimo, & in majori fidelis erit.

Sexta: Quia hæ modicæ abnegationes animum pium, modestum, suam parvitatem cognoscentem monstrant. Hanc autem modestiam ac humilitatem Christus humilium amator tum gratissimā habet, tum majori præmio, quàm nos putamus, cumulare consuevit.

CAPUT III.

Quam diu nos mortificare debeamus?

Tota vita mortificationem nunquam omittere debemus? ac se in illa tam in parvis quàm in magnis, semper exercere. Cujus rei est *Causa Prima*. Imitatio Christi, qui noluit Crucem deferere, etiamsi Judæi dicerent illi: Christus Rex Israel descendat nunc de cruce; ut videamus & credamus. *Unde S. Bern: Serm: 1. in die Paschæ sic ait:* Ita q; & nos quicumq; sequimur caput nostrum, non cessemus agere pœnitentiam, non cessemus tollere crucem nostram, perseverantes in ea sicut ipse perseveravit, donec dicat spiritus, ut requiescamus à laboribus nostris.

Secunda causa est: Quia Christi fidelibus nunquã sunt arma deponenda, nè victi fortè inimici vires resumentes, eos incautos aggrediantur & superent. Sunt autem arma militiæ nostræ in mortificatione, quibus cõtra inimicos nostros viriliter pugnamus, eos generosè vincimus, & de illis victis gloriosè triumphamus.

Tertia causa est: Quia principaliter ad hoc assumitur mortificatio, ut vitia extingvantur ac radicibus extirpentur, inordinati moderentur affectus, & omnia DEO displicentia rescantur: sed ad hæc opus est continua mortificatione. *Unde S. Ephrem ait:* Bellum militum breve, sed monachi pugna, quoad usq; migret ad Dominum, durat.

Quarta causa est: Quia homo, qui à studio mortificationis cessat, paulatim ex munditia ad im-

mund-

munditiam, & ex magna perfectione ad magnam imperfectionem declinat. Sed vae his, qui perderunt sustentiam, & qui dereliquerunt vias rectas, & diverterunt in vias pravas: Dicit S. Scriptura.

Sunt autem Gradus mortificationis secundum S. Bern. tres, quos Serm: 7. Quadrag: recenset.

Infimus est, abstinere à carnalibus desideriis.

Secundus & superior præcedente est, se habere tanquam mortuum circa delicias, & res hujus sæculi. Sicut peregrinus potest advertere delicias terræ, in qua peregrinatur, immò eis frui transeundo: sed mortuus illas non videt, nec desiderat; verè mortificatus non magis ad res hujusmodi attendit, ac si esset mortuus: unde nec delicias nec injurias aliud quidpiam curat.

Tertius ac supremus gradus mortificationis est, humiliare semetipsum ad imitationem Christi usq; ad mortem, mortem autem crucis; sed rarissimi sunt homines in hoc gradu mortificationis: & solummodò ad illum perveniunt, qui vitam suam vitæ, & passioni Christi perfectè conformant. *Hi sunt, qui cum Apost: ad Gal: 6. dicere possunt:* Mihi autem absit gloriari, nisi in Cruce Domini nostri JESU Christi; per quem mihi mundus crucifixus est, & ego mundo.

Primi sic mortificationi vacant, ut vix aliquid deliciarum cum timore Domini velint admittere. *Secundi* sic mortificati sunt, ut quasi mortui sæculo, nec ad delicias mundi attendant, & totù eo-
rum

rum desiderium sit intervire DEO. *Tertii denique mortificationi sic sunt addeſti*, ut crucifixi cū Christo dicere possint *cum Apost: 2. Corint: 7.* Repletus sum consolatione, superabundo gaudio in omni tribulatione.

Pensemus ergo singuli, *concludit Bernardus*, in quo gradu quisq; sit positus, & studeamus proficere de die in diem, quoniam cundo de virtute in virtutem, videbitur DEUS Deorum in Sion. Nec in exercitio mortificationis debemus quiescere, donec ad certum gradum ascendendo pervenerimus. Quod si in principio difficultatem in mortificatione patimur, hoc ideo est, quia *non est secundum hominem*, ait *Thom: à Kemp: lib: 2. de Imit: Christi*, *crucem portare, crucem amare*, corpus castigare & servituti subicere, honores fugere contumelias libenter sustinere, seipsum despiciere, & despici optare. Si ad teipsum respicis, nihil huiusmodi ex te poteris, sed si in Domino confidis, dabitur tibi fortitudo e cælo, & subijcientur ditioni tuæ mundus & caro. Sed nec inimicum diabolus timebis, si fueris fide armatus & cruce signatus. *Plura vide loco citato.*

CAPUT IV.

De Mortificatione exteriori.

Quia hæc mortificatio exterior circa sensus externos moderandos, & circa corpus subjugandum exercetur, ex quorum inordinatione seu immortificatione, inordinatio & immortificatio affectuum interiorum procedit: ideo prius danda est opera mortificationi exteriori, quàm
inte-

interiori; & quia facilior est mortificatio exterior, quam interior: à facilioribus autem semper est incipiendum.

Sunt verò quinq; sensus externi: Visus auditus, gustus, odoratus & tactus: quorum mortificatio est nobis maximè necessaria. Nam ut S. Greg: lib: 21. Moral: cap: 2. testatur, quasi quædam viæ mentis sunt, quibus foras veniat, & ea, quæ extra ejus sunt substantiam, concupiscat: per eos enim corporis sensus, quasi per fenestras quasdam exteriora quæq; anima respicit, respiciens concupiscit: Hinc etenim Jeremias ait: Ascendit mors per fenestras nostras, ingressa est domos nostras.

Visus tunc mortificatur, quando ipso tantum ad necessaria, & ad profectum spiritualem utilia videnda utimur; jam verò à vanis, & inanibus, ac nō necessariis eum avertimus.

Auditus: quando vanos rumores, profanas historias, nugas, scurrilitates, narrationes ridiculas, verba ad risum provocantia, & alia ad animæ salutem minimè necessaria audire nolumus, præterea quando à murmurationibus, detractionibus, accusationibus aliorum, & propriis laudibus abhorremus; & tantum ad utilia & spiritualia attendimus.

Gustus: quando delicata non quærentur alimenta, sed insipida & communia: & quando etiā cōmunia ad satietatem non sumuntur: deniq; quando non immoderato appetitu, sed modo debito, cum gratiarū actione, ad necessitatem, non autem ad delectationē percipiuntur. Itaq; Religiosus & quilibet vir spiritualis,

tualis dum ad refectiōē accedit; directionem præmittat, & protestetur coram DEO, eodem animo se paratum esse ad labores pro eo perferendos, sicut ad cibos capiendos: quin etiam ad abstinendum ab illis, si DEI voluntas hæc foret. Præterea gratias agat Divinæ Bonitati, quòd hæc alimenta ipsi præpararit: semperq; ad gustum mortificandum attendet, vel lautiora dimittendo, vel aliquid appetitui subtrahendo, vel etiam interdum absinthium, aut quid simile cibis admiscendo, quo fiant insipida, & gustui ingrata.

Odoratus. Quando suffitus, unguenta, & alia gratissimi odoris fugimus: vel dum graves odores propter DEUM libenter sustinemus.

Tactus: deniq; mortificatur, tum per subtractionē eorum, quæ ipsum possunt delicatē fovere, ipsique blandiri, ut mollium vestimentorū, & corporis commoditatum: tum per applicationem eorum, quæ tactum affligunt, ut sunt vestes asperiores, cilicia, disciplina, & alia corpori molesta.

Hoc modo & corpus nostrum mortificatur; & ultra hoc, per jejunia, famem, sitim, vigilias, frigus, calorem, & varios labores pro DEI honore proximiq; salute exantlandos. Cujus mortificationis & afflictionis corporum nostrorum est urgens necessitas & multiplex utilitas, quam Dionysius Richelius l. 1. De vita & sine solitar. ar. 17. nobis proponit, qui octo utilitates istius mortificationis corporis enumerat *Prima est*, satisfactio pro peccatis. Nam sicut per corporis delectationem deliqui-

mus, iustum est ut per corporis castigationem nostrorum delictorum poenas luamus. *Secunda est*, ad gratiam DEI impetrandam & suscipiendam praeparatio. Sic fecerunt Ninivitæ, qui jejuniis & sacco afflicti, suorum scelerum veniam impetrarunt. *Tertia est*, multorum malorum, tum spiritualium, tum corporalium abscissio. Afflictio enim corporalis comprimit carnis nostræ impetus, & motus inordinatos appetitus: præterea arcet corporis morbos, & poenas à DEO pro peccatis nostris intentatas: sicut expetitus est David tempore pestis maximæ, quæ tribus diebus septuaginta millia virorum prostravit; quod malum vestitus cilicio, ut Dominum placaret, David à sua gente avertit. *Quarta est*, Christi Salvatoris nostri imitatio. Ipse enim vitam asperam ac duram in mundo egit, ad quam nos quoque invitatur: *Qui mihi ministrat*, ait, *me sequatur*: & *ubi ego sum*, illic & *minister meus erit*. *Quinta est*, gloriæ magnitudo, de qua Apostolus: 1. Corint. 2. *nec oculus vidit, nec auris audivit, nec in cor hominis ascendit, quæ DEUS præparavit diligentibus se*: *Sexta est*, proximorum ædificatio & instructio. Nam dum vident spirituales viros omnem indulgentiam carnis etiam licitam respuentes, & asperitatem vitæ amantes, multum ædificantur. *Septima est*, nostrarum precum exauditio. *Sic enim hac de re Cyprianus de jejuniis Christi testatur*. Quotquot viros virtutum vidimus, qui quoties aliquid à DEO obtinere conati sunt, jejniis incubuerunt & lacrymis, & pernoctantes in orationibus, ciliciis

is carni hærentibus, supplices beneficia postularunt: Nec defuit proventus, ubi ad pedes DEI, Sacrificiū contriti cordis offerens, se prostravit humilitas; sed propè fuit invocantibus se DEUS, & porrexit manū naufragis, & subvenit afflictis *Octava est*, nequissimorum spirituum fuga. *Qua de re, ita Climacus ait Grad: 27.* Sicut exsiccatum lutum jam non porcis usui esse potest, ut ibi se volutent, ita & caro per abstinentiam marcida effecta, dæmonibus ultra non præbebit in se quiescendi locum. *Et. S. Mechtildis* audit sonum dulcissimum in firmamento cœli resonare ex sonitu disciplinarum, quibus corpus castigatur ad cujus sonitus clangorem Sancti Angeli plaudebant, dæmones fugiebant, animæ laxabantur a pœnis, & catenæ earū rumpebantur.

Etiam ad hanc mortificationem exteriorē pertinet Lingvæ moderatio, ex cujus mortificationis neglectu multa pullulant mala & peccata: videlicet mendacium, rixæ, jactantia, detractiones, deceptiones, secretorum revelatio, in loquendo procacitas, scurrilitas, verba otiosa, imprudentia, quæ tunc agnoscitur, quando quis loquitur ea, quæ nec personæ nostræ nec statui audientium, nec temporī congruunt, nec modus in sermone servatur, qui debet esse hujusmodi, ut semper modestè, humiliter, demissè, verè & suaviter loquamur. Itaq; qui Religiosus hæc mala lingvæ vult evitare, servet silentium, amet solitudinem, & nunquam loquatur nisi ex necessitate, & secundum DEI voluntatem, & proximi utilitatem: & tunc sint verba vera, & rationi ac virtuti consona.

Quantum verò placeat Christo sensuum mortificatio patet: ex verbis ejus, quibus coram S. Mechtilde promisit iis, qui oculos suos mortificant, admirandas in cœlo delicias oculorum; iis qui aures, suavissimum vocis melos in æternitatem; qui linguam, singularem excellentiam laudis DEI. Alias eidem dixit: quære me in quinque; sensibus tuis: videlicet, ad placitum DEI utendo illis.

Actus pro mortificandis sensibus externis.

Dulcissime JESU, in unione amoris tui, ex quo propter me omnia delectabilia tibi subtraxisti, volo abstinere ab omnium sensuum delectatione, ob amorem honoremque tuum, & beneplacitum tuum.

Domine JESU, amore tui volo abstinere ab hæc videndi audiendi, loquendi &c. delectatione, ut delectem te, & hanc delectationem offero delectationi tuæ, ut placeat tibi Domine DEUS.

Bone JESU tibi omnes sensus meos dedico & consecro, idè illis utar tanquam tuis, ad illa tantummodo quæ tu vis, tibi que placeat.

Plures actus pro mortificandis sensibus habentur Parte 2. in exercitiis: via purgat: pro visu p. 14. pro auditu p. 46. pro gustu p. 56. pro odoratu p. 25. pro tactu p. 36.

CAPUT V.

De Mortificatione interiori sensuum interiorum.

Quia sensuum interiorum est intima connectio cum sensibus externis: meritò post doctrinam datam de mortificandis sensibus externis,

externis, ostendendus est modus mortificandi sensus
internos.

Sunt autem *Sensus interni* quatuor: qui in cerebro sua organa habent. Primus dicitur *sensus communis* in anteriori parte capitis residens, qui ab omnibus sensibus externis species sensatas, seu imagines, & similitudines rerum presentium recipit, & de sensibus externis dijudicat: quod nimirum visus videat album, & non nigrum; auditus audiat vocem hominis hujus, & non alterius &c. qui inter sensibilia externa discernit, hoc est, inter colores, sonos, odores & alia: & qui rem unam sensu aliquo exteriori cognitam cum altera comparat, ac determinat; quod, videlicet hoc magis est album, quam alterum. Vel, hoc magis est dulce, quam illud.

Secundum est, Imaginativa seu Phantasia in medio cerebri sita, quæ à sensu communi transmissas species sensatas retinet, per quas cognoscit res absentes, & ex quibus componit novas formas, ut quando ex monte & auro montem aureum format.

Tertius est, Æstimativa in cerebro propè imaginativam collocata, quæ in homine dicitur *Cogitativa*, cujus munus est, ex representato sibi alicujus rei phantasmate, æstimare seu judicare hoc sibi conveniens vel disconveniens, utile vel in utile, hunc esse suum amicum vel inimicum: hoc esse arduum & difficile.

Quartus est, memoria in posteriore capitis parte sita, quæ conservat species convenientiæ & disconvenientiæ, amicitiae & inimicitiae, utilitatis &

incommodi: quæ in homine dicitur *Reminiscentia*, quia fit cum discursu.

Quorum sensuum interiorum debita gubernatio & moderatio debet adhiberi: quandoquidem propter defectum moderationis illorum, sequitur in appetitu sensitivo omnis inordinatio. Nam ad imaginationem & æstimationem sibi convenientis vel disconvenientis, seu boni vel mali, appetitus sensitivus movetur, illud prosequendo, hoc fugiendo. Unde si æstiativa in suo iudicio erraverit, etiam appetitus illud sequendo errabit.

Sensum communem Mortificabimus, si eum à comparatione rerum inter se, videlicet, delectabilium & utilium continebimus, nè cogitemus istud pulchrius est, quàm illud; vel hoc sapidius est, quàm aliud; istud dulcius quàm illud: ut pulchriora, sapidiora, meliora eligamus & desideremus: ut passim occurrit in cibo, potu & vestimentis, & aliis huiusmodi: nec unquam utamur his propositionibus: Melior ille fuit superior quàm iste: vel, Melior est hic, quàm ille fuit. Nam æqualiter in omnibus Superioribus personam Christi considerare & honorare debemus.

Imaginativa quoque maxime custodienda est & mortificanda, ex cujus conservatione & repræsentatione variarum formarum & imaginum, multa & gravissima damna in anima, & perturbatio pacis internæ, propter cogitationes vanas, & sæpè malas, quarum imaginatio est causa, oriuntur. Et inprimis danda est opera, ut à principio statim repellan-

pellantur, non tantum indecentes, sed etiam omnes vanæ & mundanæ imaginationes, & minimè illis immorandum, nè per hoc imagines rerum fortius imprimantur. Deinde nunquam per memoriam debemus formas & imagines rerum quæ sunt in Imaginativa concitare, præsertim noxias & inutiles: & si fuerint, sive à dæmone, sive ab inconstantia ipsius Imaginativæ, & ab aliis permultis naturalibus causis concitatæ, eas illicò reprimere est necesse, divertendo Imaginativam ad alia per cogitationes bonas. Præterea per Præsentiam DEI imaginariam, per quæ efformantur variæ imagines Christi Domini nostri, purganda est Imaginativa, & ex ea imagines profanæ rerum terrenarum acquisitæ, per alias devotas & sanctas eliminandæ. Præsertim verò in infirmitatibus, doloribus, afflictionibus, & adversitatibus, atq; in aliorum factis & dictis moderanda est imaginatio; quia tunc multum nobis nocere solet.

Æstimationem quoq; avertere debemus ab æstimatione nostra, & eorum, quæ non sunt magni facienda: ut sunt hominum favores, amicitia, vel inimicitia, sanitas corporis, commoditates, honores, æstimatio nostri apud homines: sed curandum est, ut illa æstimemus, quæ in rei veritate sunt æstimanda: videlicet, DEUM, & res Divinas, salutem nostram, pati pro DEO & contemni, statum religionis, vota professionis, observantiam regularem, orationis studium, mortificationem, & virtutum exercitium.

Memoriam tunc mortificamus, quando cavemus ne repleatur notitiis moraliter malis, quæ scilicet inducunt ad peccandum, vel à peccatis causantur: vel curamus ut à talibus acquisitis evacuetur, vel ne postmodum adveniant, impedimus: Præterea à memoria arcere debemus species, & notitias vanas, & ad salutē nostrā inutiles; curiosas historias, fabulas, narrationes ridiculas, vanos rumores, & similia. Notitiæ autē indifferentes quales sunt, scientiarū naturalium, historiarū honestarū, quæ neq; sunt ex se bonæ, nec malæ, possunt autē esse bonæ ex aliqua circumstantia: ut si quærantur ob honorem DEI, & ad nostrā vel proximorum salutem, admitti possunt. Quæ autem notitiæ sunt moraliter bonæ, ut sunt moralium virtutum, mandatorum DEI & consiliorum, articulorum fidei, Sacræ Scripturæ, piarum historiarum, & eorum quæ pertinent ad institutum & obligationem nostram, & similibus, talibus notitiis ut pote salutaribus, memoria nostra debet imbuī, ut illis ad perfectionem acquirendam utamur.

Et quoniam sensus interni in homine propter conjunctionem ad intellectū sunt discursivi seu cogitativi quorum actiones dicuntur cogitationes: idē ad moderationem debitam sensuum interiorum, pertinet moderatio cogitationum. Sunt autem cogitationes secundum S. Bernard: triplices. *Aliæ sunt immunde* ad vitia carnis, & ad alia vitia pertinentes. *Aliæ otiosæ*, inutiles, & curiosæ, quibus homines otiosi quasi vento pascuntur. *Aliæ ad res necessarias spectantes*, ut sunt de cibis, vestimentis,

&

& aliis similibus, sinè quorum subsidio vivere in terris non possumus. Quarum omnium *cogitationum sunt variae causæ. Aliquando cor nostrum instabile*, & concupiscentia ejus, quod nisi bona cogitemus, certè ad mala vel otiosa, aut commoda cogitanda sese convertit. *Aliquando recordatio eorum*, quæ vidimus, audivimus & gessimus, & quibus ad vitam sustentandam indigemus. *Aliquando demonis opera*, qui potest vana & immunda nobis repræsentare, commovendo species seu imagines istorum in Phantasia nostra. *Aliquando humores naturales*, qui magis dominantur in nobis, ut est cholericus, melancholicus phlegmaticus & sanguis. *Aliquando sensationes actuales sensuum externorum*, videlicet, visus, auditus, & aliorum. Ex quibus causis commovetur imaginatio ad repræsentanda varia objecta, ex quorum repræsentatione oriuntur variae cogitationes, seu discursus, tum in sensibus internis, tum in ratione inferiori: quas, si fuerint praviæ aut inutiles, ratio superior reprimere debet, tum DEI auxilium invocando, tum bonis & utilibus cogitationibus semper se occupando, sicut nos monet S. Anselmus lib: de similit: c. 159. *Sancta, inquit, & utilia semper cogitemus, quæ impura & inutilia repellent.*

Bonarum autem cogitationum nostrarum ipse DEUS est Auctor qui nos semper ad bonum, & ad id, quo mereamur & meliores efficiamur, instigat. Non enim sumus, ait Apost: 1. Cor: 2. *sufficientes aliquid cogitare à nobis, quasi ex nobis.*

Igitur dū mala & inutilia in corde nostro versamus, nostra cogitatio est: si bona, DEI sermo est, DEI instinctus, seu inspiratio est. *Sunt autem istæ Cogitationes bonæ quædā à Deo immixtæ* quæ nobis nihil curantibus sese ingerunt, quibus ad cōpunctionē, vel ad DEI timorē, vel ad mortificationē, vel ad virtutū studiū incitatur. *Quædā sunt à nobis excitata*, non tamen sine gratia DEI, quas consultò accersimus; ut nos ad bonos affectus cōmoveamus; quod opus est rationis Superioris, ut cū de morte, aut de Iudicio DEI cogitamus, ex quo desiderii emendationis vitæ concipimus. Pertinet ergo ad rationem superiorem, bonas & utiles cogitationes semper exercere, ut hoc modo noxias & otiosas evitet.

Quod si de rebus vitæ sustentationem necessariis aliquando cogitandum est, hoc fieri debet tempore opportuno, & moderata cum sollicitudine, plūs DEI Providentiæ, quàm nostræ nimix curæ confidendo, memores verborum Christi dicentis: *Quærite primò Regnum DEI, & iustitiam ejus, & hæc omnia adiicientur vobis Matth: 6.* Si enim prius quænaverimus, quæ ad salutem animarum nostrarum necessaria sunt, etiam illa, quibus corpus indiget, nobis non deerunt.

Actus pro mortificandis sensibus internis,

O Amantissime JESU, amore tui omnes sensus meos, tam externos quàm internos, à rerum terrenarum vanitate semper avertere volo.

Imprime quæso, dulcissime JESU, speciosam
tui

tui vultus formam meae imaginativae potentiae, & omnes formas vanas & noxias ex ea dele.

Fac, benignissime Domine mi, ut nihil conve- niens mihi judicem, praeterquam pati & contemni pro te.

O utinam omnium rerū terrenarum caducarum obliviscar, ut memor sim tui solius.

Domine DEUS meus, desidero, ut omnis mea cogitatio, locutio, & actio, tibi sit laus, & gratia- rum actio.

CAPUT VI.

*De Mortificatione Appetitus sensitivi ejusque mo-
tibus seu passionibus.*

Multiplex Appetitus invenitur in homine, juxta multiplicationem virium cognosci- tivarū, quibus in rebus cognoscendis u- titur homo. Sunt autem in homine secundum The- ologorum doctrinam, tres vires cognoscitivae, seu cognitioni servientes, quibus triplex appetitus ad proportionem respondet.

Prima vis dicitur Sensitiva, quae per sensus externos & internos cognoscit: huic respondet, Ap- petitus Sensitivus, qui sensuum cognitionem sequi- tur, & ab illis movetur.

Secunda vis Rationalis vocatur, quae est ipse Intellectus, qui per discursum rem unam ex alia cognoscit, qui discursus dicitur ratiocinatio, pro- pter quam intellectus appellatur ratio, quae dividi- tur in partem rationis inferiorem & superiorem, de quibus dictum est supra Cap: 1. Huic respon- det

det Appetitus rationalis, seu liberum arbitrium, quæ est ipsa voluntas, quæ sequitur rationis cognitionem, tam inferioris quam superioris, & ab illis movetur.

Tertia & suprema vis nuncupatur Intelligentia, quæ est ipse Intellectus, quatenus lumen à DEO proximè recipit, & prima principia conceptis duntaxat terminis, vi naturali, vel occulta Divinæ Sapientiæ, immisso lumine supernaturali, sine discursu cognoscit: cui respondet Appetitus supremus rationalis, quæ est ipsa summa voluntas prout quandam naturalem propensionem, ad bonum simplici conceptu Intelligentiæ sibi repræsentatum, à DEO proximè recipit. Et hæc tertia vis cum secunda constituunt partem hominis superiorem.

Alii secundam vim cognoscitivam appellant vim intellectivam, quæ dividitur in Rationem & Intelligentiam. Ratio autem respectu suorum officiorum dividitur in Superiorem & inferiorem: sicut oculus in sursum & deorsum oculum aspicientem. Nam ratio inferior terrena considerat, & secundum leges humanas. Ratio verò superior Divina contemplatur, & leges Divinas scrutatur, & secundum eas dirigit humanas actiones.

Hæc vis triplex Cognoscitiva & Appetitiva, ad unam pertinet animam rationalem, quam Theologi Mystici, propter ejus virium diversas actiones & officia dividunt in tres portiones, Infimam, Mediam & Supremam.

Infima portio animæ rationalis, vocatur Anima sine addito hujus vocis Rationalis: inquantum a-
nimat

nimat corpus, vivificat & sensificat. Per quot convenit cum anima irrationali, quæ in animalibus idem facit. Vocatur præterea hæc portio infima Cælum infimum Animalitas, Sensualitas, Pars sensitiva, pars hominis inferior, Ratio inferior, in quantum intellectus & voluntatis imperio obedire potest. Hæc portio complectitur in se vim cognoscitivam sensitivam, quæ fit per sensus externos & internos: & appetitum concupiscibilem ac irascibilem.

Media portio appellatur Spiritus: in quantum intelligit, sicut Angeli, qui sunt Spiritus: & in quantum ex anima rationali effluunt potentie omnino spirituales: videlicet, memoria, intellectus & voluntas. Hæc portio vocatur etiam Cælum medium, & Pars rationalis, quæ complectitur in se intellectum, ut est Ratio distincta in rationem superiorem & inferiorem: complectitur quoque appetitum rationalem, quæ est ipsa voluntas.

Suprema portio dicitur Mens, quasi in anima eminens: nam significat portionem animæ rationalis cæteris eminentiorem, hoc est, supremam: in quantum eminenti modo intelligit; videlicet, sine discursu: & eminentia, seu suprema; videlicet prima principia, tam naturalia quam supernaturalia. Hæc portio ab aliis vocatur Vertex & Apex spiritus, Centrum, Fundum, Scintilla, & Cælum supremum: quæ complectitur Intelligentiam, & Appetitum superiorem, quæ est voluntas: & hæc portio suprema & media nuncupatur Pars hominis superior. Ad hanc supremam portionem pertinet Syndere-

deretis, quæ est habitus principiorum practitorum, per quem naturaliter inclinamur ad bonum amplectendum & fugiendum malum: cujus actus est conscientia.

Sed hic notandum est, usitatum esse Theologis aliquando animam pro mente & spiritu sumere; spiritum etiam pro mente, & mentem pro spiritu habere: & hoc propter ipsius animæ rationalis indivisibilem unitatem, & miram simplicitatem. Dividitur autem, in tres portiones, non ideo quasi anima rationalis habeat quantitatem molis, seu magnitudinis; sed quatenus habeat quantitatem virtutis: & propterea illæ portiones seu partes, non possunt dici partes integrales, nisi virtuales seu potentiales: quia vires ac potentiae sunt animæ rationalis.

Hinc patet ex dictis duplicem esse propriè Appetitum in nobis: Sensitivum & Rationalem (nam ille Superrationalis appetitus ad Rationalem reducitur) Dicitur autem Appetitus sensitivus: quia sequitur sensuum cognitionem. Rationalis verò: quia sequitur cognitionem rationis; & hic Appetitus est voluntas nostra. Et quoniam uterq; Appetitus est præclivis ad illicita & bona terrena: ideo debet re-frenari, cohiberi, mortificari.

Est autem Appetitus sensitivus nihil aliud quam inclinatio ad id quod sensus judicat, (videlicet Imaginativa & Æstimativa) conveniens seu bonum: vel inconveniens seu malum. Ideò verò conveniens hic dicitur seu bonum, quia est delectabile, vel utile, vel honestum seu honorificum: discon-
niens

niens autem; quia est vel contristabile & molestum, vel nocivum, vel inhonestum.

Hic Appetitus est duplex, Concupiscibilis & Irascibilis cuius ratio est; quia appetitus semper tendit in bonum vel malum, illud prosequendo, istud fugiendo: quod est duplex, Simplex seu absolutum: & Arduum seu difficile: & ideo propter bonum & malum absolutum, institutus est Appetitus Concupiscibilis, & propter bonum & malum arduum seu difficile Appetitus Irascibilis. Itaq; *concupiscibilis munus est*, erga bona sibi proportionata ferri & moveri; mala autē sibi contraria fugere, qui Appetitus regitur ab Imaginativa. *Irascibilis verò officium est* contra difficultates, quæ in bonorū consecutione & in fuga malorum occurrunt, decertare: qui regitur ab Æstimativa.

Actus seu motus Appetitus utriusq; dicitur Passio: quia fit cum aliqua corporis immutatione seu passione. Nam corpus ita commovet, ut aliquando accendatur, aliquando obrigescat: & cor nostrum, in quo passiones resident, nunc constringatur, nunc dilatetur. Et propter hoc, quia actus seu motus voluntatis nostræ non fiunt cum immutatione corporis, licet nominibus passionum appellentur, non passiones, sed affectus, vel voluntatis actus simplices dicuntur.

Passio itaq; est motus appetitus sensitivi, ad imaginationem boni vel mali, cum aliqua corporis immutatione, quo scilicet fertur ad bonum & fugit malum. Sunt autem undecim passiones: Amor, desi-

desiderium seu concupiscentia, Gaudium seu delectatio. Odium, Fuga & Tristitia seu Dolor, Spes, Desperatio, Audacia, Timor & Ira: ex quibus sex priores passiones sunt appetitus concupiscibilis, quæ versantur circa bonum & malum absolute sumptū, & quinque posteriores sunt appetitus irascibilis, quæ versantur circa bonum & malum arduū & difficile.

Notandum, quod licet amor, dilectio & charitas: desiderium & concupiscentia: gaudium & delectatio: tristitia & dolor, pro eodem sæpè sumantur: tamen est inter hæc differentia; quod Amor propriè fit in appetitu sensitivo, licet etiam transferatur ad voluntatem: & dilectio & Charitas pertinet ad solam voluntatem: nam dilectio supra amorem addit electionem, & charitas addit æstimationem rei amatae, in quantum quod amatur magni pretii æstimatur: *Sic S. Thom: par: 2. q. 26. art: 3.* Præterea Concupiscentia dicitur respectu boni sensibilis; Desiderium verò respectu boni spiritualis. Sic Gaudium magis spectat ad spiritualia; & Delectatio ad corporalia. Ita Tristitia in animo percipitur ex malo apprehenso; & Dolor in corpore sentitur, ex malo corpori conjuncto. Cujus numeri passionum hæc est ratio. Nam si per sensum interiorem proponatur appetui bonum ut sibi conveniens, insurgit in eo amor. Si illud bonum sit absens, insurgit desiderium: si fuerit præsens & obtentum, insurgit delectatio, per quam appetitus in illo bono conquietescit. Si verò proponatur malum ut sibi inconueniens, insurgit odium, si malum absens insurgit

fu-

fuga: si ut malum præsens, insurgit *tristitia*. Quod si proponatur appetitui bonum arduum & difficile, & apprehendatur ut possibile insurgit in appetitu *Spes* illud obtinendi; & audacia media applicandi. Si verò apprehendatur ut impossibile, insurgit *desperatio*; Si verò malum arduum apprehendatur ut futurum, oritur *timor*. Si apprehendatur malum ut superabile sed cum difficultate, oritur *audacia*. At si cōsideretur malum præsens, accenditur *ira*, ut de eo, qui malum intulit, vindictam sumamus.

Definiuntur autē Passiones cōmuniter hoc modo.

Amor. Est conversio ad bonum: seu complacentia boni.
Desideriū. Est amoris extensio: seu progressio ad bonum absens.

Gaudium. Est ipsa boni præsentis possessio & fructio.

Odium. Est aversio à malo cognito: seu displicentia mali.

Fuga. Est recessus à malo futuro.

Tristitia. Est oppressio appetitus à malo præsentis.

Spes. Est appetitus & cordis erectio in bonum arduum possibile.

Audacia. Est spei quædam progressio: vel est cōtra malum arduum progressio.

Desperatio. Est spei amissio: seu appetitus dejectio.

(vitabili.

Timor. Est recessus à malo arduo futuro inæ-

Ira. Est motus appetitus ad vindictam.

Itæ passiones secundā se neq; sunt bonæ neq; malæ.

T

Si

Si à recta ratione diriguntur ad DEUM, & ad licita, seu ad creaturas modo licito, & secundum intentionem Deiformem, hoc est, secundum DEI voluntatem, sunt bonæ & meritoriae: si verò contra DEUM, & ad illicita, sunt malæ & demeritoriae.

Sunt enim datæ nobis, ut amemus DEUM velut Summum bonum, ut desideremus hoc bonum, & delectemur in eo: ut amemus quoq; æterna, & quæ placent DEO, videlicet, virtutes & mortificationis crucem: Præterea ut odio habeamus quidquid nos avertit & separat ab illo bono, scilicet, peccatum; ut abominemur illud & fugiamus, & de eo doleamus. Data est nobis & Spes, ut speremus æternam vitam, & auxilium DEI ad illam obtinendam: Audacia, ad aggrediendum grandia propter DEUM: Timor DEI, ob ejus judicia inscrutabilia: Desperatio de viribus nostris: & Ira, seu zelus Divini cultus & honoris; quibus si hoc modo semper utemur, erunt ordinatissima. Sed quia nunc propter corruptam per peccatum naturam nostram, amamus & desideramus illa, quæ sunt odio habenda & fugienda; illa verò odimus, quæ sunt amplectenda, ideo dicuntur inordinatæ. Amamus enim aliquando vetita, aliquando licita sed modo excessivo; eadem desideramus; & in eis delectamur: deinde odio habemus res bonas & ad salutem necessarias; & illas fugimus; & si contingat nos illas sustinere, contristamur: & quæ amamus, speramus; & ad illa consequenda, audaciam excitamus: desperamus in rebus bonis & sanctis: timemus res va-

ñas:

nas: & irascimur ob eandem modo immoderato: & propterea tunc istæ passiones per rationem moderandæ sunt & mortificandæ.

Hinc patet maxima mortificandarum passionum necessitas: quia si licenter agere sinantur, vitiorum fontes sunt: si verò secundum rationem regantur, virtutum seminaria sunt: hoc est, quia immortificatæ passiones vitia generant: mortificatæ verò virtutes produciunt: ad quas passiones mortificandas necessaria est.

1. *Mortificatio sensuum:* Passiones quippe, nisi præcurrente sensuum notitia, non excitantur.

2. *Proponenda sunt appetitui vera & meliora bona;* & mala vera: quia appetitus naturaliter est pronus ad bonum & malum: igitur si ipsi proponatur verum bonum, vel verum malum, facile inclinabitur ad illud prosequendum, & ad istud fugiendum.

3. *Notanda passio quæ nos magis infestat,* & illa primo impugnanda: observandæ quoq; sunt cogitationes nostræ, ex quibus citò potest agnosci passio vehementior nostra; si enim sæpius cogitamus de vindicta, & facile exardescimus, re quacunque læsi, apparet quod in nobis prædominatur passio iræ: si cogitamus ut admonitionem & correptionem culparum nostrarum effugiamus & ob hæc facile turbamur; apparet in nobis amor honoris. Si cogitamus ut evitemus labores & omnia carni molesta; tunc deprehenditur in nobis passio amoris commoditatum.

4. *Adhibendi sunt mortificandarum passionum status interni & externi.*

v. Implorandum in orationibus nostris DEI auxilium.

Sed qui vult de omnibus passionibus citò victoriā reportare. amorem imprimis studeat moderari & mortificare: quia propter hunc & aliæ moventur passionēs. Nihil enim homo desiderat, vel aliquo delectatur, nisi eo, quod amat: nihil aliud odit vel fugit, vel ob aliud dolet, nisi ob malum, quod bono amato opponitur: nemo etiam aliquid aliud sperat, vel ob aliud pugnare audet, nisi ob id quod amat: nemo desperat, timet, aut irascitur, nisi propter bonum, quod amat.

Itaq; si amor feratur in illicitum, seu in aliquod bonum utile, vel delectabile, vel honestum contra regulas rationis, debent ei proponi vera bona, præsertim cœlestia: ut si quis amet mundanos honores, vel divitias utiles, vel impuras delectationes, proponat sibi cœlestes Sanctorum honores, veras divitias gratiæ & gloriæ, ac æternas beatitudinis delectationes. Si verò amor feratur in aliquod licitū, & præter regulam rationis; tunc excessus talis debet moderari: ut si quis immoderatè amet parentes, cibum, potum, vestitum, & similia, necesse est, ut hunc nimium amorem moderetur.

Unde tripliciter potest fieri moderatio passionū.

I. Quantum ad Modum, ut de immoderatis fiant moderatæ, quod in rebus licitis est faciendum.

II. Quantum ad Objectum seu rem ad quam feruntur, ut à re illicita convertantur ad rem licitam,

tam, proponendo illis meliora & vera bona, vel mala vera: sive per rationem humanam cognita, quale est bonum virtutis; sive per fidem, per quam cognoscimus DEUM Creatorem, Redemptorem, Conservatorem & Remuneratorem nostrum: infinito honore & amore dignum: præterea cognoscimus vitam æternam, & mercedem æternam beneficientibus & sanctè viventibus; etiam infernum atq; poenas æternas malè viventibus præparatas.

III. Quantum ad modum & quantum ad objectum proponendo exemplum & vitam Christi Domini nostri ad imitandum eum.

Hinc *triplex modus* pro moderandis passionibus proponitur. *Primus Philosophicus ac humanus*, qui secundum dictamen rationis passiones moderatur dicendo: Non decet hominem ratione præditum hanc rem appetere, qui solum ad bonum virtutis tendere debet.

Secundus modus est Christianus, quo secundum rationes, quæ ex fide ducuntur moderatio fit passionum dicendo: Non decet hominem hæc bona terrena appetere, qui ad cœlestia bona possidenda creatus est: neq; decet Christianum laborem & mortificationem vitare, sed potius peccatum & poenas æternas.

Tertius modus est religiosus, qui proponendo exemplum Christi, ad imitandum eum, virum religiosum inducit.

Actus interni pro mortificandis Passionibus.

Habentur par: 2. hujus libri videlicet, pro-
T₃ mor-

mortificandi amoris & desiderii passione pag: 15.
Gaudii 26. Odii & Fugæ 37. Tristitiæ 39. Spei
47. Audaciæ 48. Desperationis 57. Timoris 59.
Iræ 70. Quibus adduntur sequentes.

*Actus pro refranandis passionibus per actus a-
nagogicos.*

Pro passione, *Amoris*, Diligam te Domine for-
titudine mea. *Psal: 17.* Mihi adhærere DEO
bonum est. *Psal: 12.*

O DEUS meus & omnia. *S. Franciscus.*

Desiderii. Quemadmodum desiderat cervus ad
fontes aquarum: ita desiderat anima ad te DEUS.

Sitivit anima mea ad DEUM fortem vivum quan-
do veniam & apparebo ante faciem DEI. *Psal: 41.*

Desiderium peccatorum peribit. *Psal: 111.*

Desideria carnis non perficietis. *Ad Gal: 5.*

Gaudii. Ego autem in Domino gaudebo, & exul-
tabo in DEO IESU meo. *Habac: 3.*

Gaudens gaudebo in Domino, & exultabit ani-
ma mea in DEO meo. *Isaiæ 61.*

Delectare in Domino, & dabit tibi petitiones
cordis tui. *Psal: 36.*

Odii. Iniquitatem odio habui, & legem tuam
dilexi. *Psal: 118.* (no *Rom: 12.*)

Estote odjentes malum, adhærentes bo-

Fugæ. Quasi à facie colubri fuge peccatum.
Ecol: 21.

Declina à malo & fac bonum, & inhabita in
sæculum sæculi.

O homo DEI, hæc fuge: sectare verò iustitiã, pie-
tatem, fidem, charitatem. *1. Tim: 6.* Tri-

Tristitie. Fuerunt mihi lacrymæ meæ panes die ac nocte, dum dicitur mihi ubi est DEUS tuus. *Psal: 91.*

Laboravi in gemitu meo per singulas noctes lectum meum lacrymis meis stratum meum rigabo. *Psal: 6.*

Afflictus sum & humiliatus sum nimis: & rugie à gemitu cordis mei, eò quod unquã offenderim DEUM meum, summè dilectum, ac infinitum bonum. *Psal: 37.*

Spei. Spera in Domino & fac bonitatem. *Pf: 36.*

DEUS meus adjutor meus & sperabo in eum. *Psal: 17.*

Pars mea Dominus, propterea expectabo eum. *Tbren: 3.*

Audacie. Omnia possum in eò qui me confortat. *Philip: 4.*

Quoniam in te eripiar à tentatione in Domino transgrediar murum. *Psal: 17.*

Adjutor meus esto nè derelinquas me, neq; despicias me, DEUS salutaris meus. *Psal: 26.*

Desperationis. Usquequo exaltabitur inimicus meus super me: respice & exaudi me DEUS meus. *Psal: 12.*

Benedictus vir qui confidit in Domino, & erit Dominus fiducia ejus. *Jerem: 17.*

Exultabo in salutari tuo. *Psal: 9.*

Timoris. Dominus illuminatio mea & salus mea quem timebo? Dominus Protector vitæ meæ, à quo trepidabo. *Psal: 26.*

Timete Dominum omnes Sancti ejus. *Psal: 32.*
 Confige timore tuo carnes meas: à judiciis enim
 tuis timui. *Psal: 118.*

Ire. Beati mites quoniam ipsi possidebunt terram. *Matth: 5.*

Discite à me, quia mitis sum & humilis corde. *Matth: 11.*

Et ego quasi agnus mansuetus, qui portatur ad victimam. *Thre: 11.*

Desine ab ira & derelinque furorem: noli æmulari ut maligneris: quoniam qui malignantur exterminabuntur. *Psal: 36.*

Actus externi pro iisdem passionibus cōercendis.

Pæter actus internos, etiam actus externi multum profunt ad passiones in nobis reprimendas: & ideo qui puerili timore mortuorum afficitur, si cadavera aliquoties contrectet, timorem expellit. Si quis iracundus opprobriis frequenter exagitetur, in dies singulos minus irascitur, ac deniq; mitescit. Si quis acedia laboret, aqua conspersus, vel alio modo acriore à somno excitatus, torporem illum brevi excutit. Si quis vestis novæ ac munda concupiscentia teneatur, indutus veste lacera & sordida intra dies paucos affectum illum deponit. His & similibus remediis externis uti debet, qui suas passiones domare & vincere cupit.

Jam verò si actibus illis internis & externis Oratio & constans Divini auxilii imploratio addatur, absq; negotio & citò victoria passionum habebitur: quibus exercitiis pro mortificandis passionibus præscri-

scriptis tam diu nobis incumbendum est, donec perfectum passionum dominium consequamur.

CAPUT VII.

De mortificatione Appetitus rationalis, seu Voluntatis, praesertim Propriae.

Voluntas humana nihil est, quàm inclinatio ad bonum per rationem cognitum. Dicitur autem Voluntas, quasi volitans ad bonum seu finem, tanquam ad suum centrum, ut in eo conquiescat. Nam sicut res corporalis suo pondere tendit ad suum centrum: ita creatura spiritalis tendit voluntatis amore in bonum seu finem. *Et ideo S. August: ait 8. Amor meus, pondus meum: illo feror, quocumq; feror.* Igitur si voluntas nostra tendit per amorem ad finem & bonū verum qui est solus DEUS, illiq; adhæret, tunc dicitur ordinata voluntas. Si verò ad bonum falsum & apparens, id est, ad creaturam, in qua sibi voluntas nostra depravata constituit ultimum finem, vocatur inordinata & perversa voluntas. Et quoniam omnis defectus in voluntate, supponit defectum in intellectu: voluntas enim non aliud, nec aliter appetit, nisi quod, & sicut ei ab intellectu proponitur; ideo curandum est, ut intellectus noster verum bonum tantum proponat voluntati: quod fiet, si semper attentus erit ad legem Divinam, quæ est suprema actionum nostrarum Regula; & secundum hanc voluntatem nostram gubernabit; nec permittet se ab aliqua passione vinci, & ad iudicium erroneum deduci. Nam qui peccant ex industria & malitia, quam-

quavis speculative sciant & judicent hoc esse contra Legem DEI; quia tamen attentius & efficacius considerant delectabilitatem objecti peccaminosi, ideo abducuntur per hanc delectationis passionem à Legge DEI. Itaq; nè & intellectus erret, & voluntas, attendendum est semper ad Legem DEI, quæ omni delectationi est præponenda. Undè & voluntas nostra semper sit subiecta Legi Divinæ, seu voluntati DEI, aut alterius hominis, ob amorem DEI. *Atq; in hoc consistit mortificatio voluntatis nostræ, videlicet, in totali subjectione ipsius DEI & alienæ voluntati: & per hoc voluntas propria mortificatur, quam S. Bern: Serm: de Resur: sic describit: voluntatem dico propriam, quæ non est communis cum DEO & hominibus, sed nostra tantum: quando, quod volumus, non ad honorem DEI, non ad utilitatem fratrum, sed propter nosmetipsos facimus; non intendentes placere DEO, & prodesse, fratribus sed satisfacere propriis motibus animorum.*

Est autem multiplex necessitas mortificandæ propriæ voluntatis.

Prima est. Quia voluntas Propria contra ipsum DEUM infinitæ Majestatis insurgit, cumq; impugnat. Nam subtrahit se ejus Dominatui, cui tanquã Auctori, servire debuerat.

Secunda. Quia dum homo propria voluntate regitur, ipsi DEO coronam surripit, eumquẽ inhonorat, teste D. Anselmo. Cum homo inquit, vult aliquid per propriam Voluntatem, DEO aufert, quasi suam Coronam. Sicut enim Corona soli Re-

gi competit, sic propria voluntas soli DEO; & sicut Regem aliquem inhonoraret, qui suam Coronā ei auferret: sic homo inhonorat DEUM, qui auferit ei propriæ voluntatis privilegium.

Tertia. Quia qui omnia exteriora reliquit propter DEUM, propriam nihilominus retinet Voluntatem, hic DEO vilissima quæq; obtulit, & sibi pingue holocaustum propriæ voluntatis tanquam idolo consecravit.

Quarta. Quia Propria voluntas est immensum onus, quod, nè ad perfectionem ei elevemur, nos impedit, & ad omnia terrena multasq; imperfectiões inclinat.

Quinta. Quia impossibile est, quemquā posse affectus suos, & vitia vincere, nisi propriam Voluntatem prius vicerit, secundum iudicium antiquorū Patrum, & Magistrorum Spiritualium.

Sexta. Multitudo damnorum nostrorum, quæ ex propria Voluntate immortificata oriuntur, quæ *Laurent. Justin de Discipl. Monast. Cap: 7.* recenset. O malum, inquit, detestabile! per te Angelorum ruina facta est, & Cœlorum agmina minorata: per te deliciarum paradus homine orbatus est, & humanum genus innumeris cladibus sauciaturum: te syadente corrui Adam, & innocentia stola nudatus est: à te dominandi ambitio, & à Deo apostatandi sumpsere principium. Tu cunctum perturbas orbem, & plurimis repleas flagitiis. Tu belorum discordias generas. Tu pacem fugas, & odiorum venena disseminas. Tu infernum ditas, & gehen-

gehennalibus flammis fomentum subministras. In Cælo prævaluisti, & in hoc sæculo principaris.

Septima. Quia per abnegationem propriæ voluntatis, quies animæ desiderata acquiritur, nec quisquam sinè illa ad veram pacem pervenire potest.

Octava. Quia in hac salus nostra consistit, juxta verba Christi dicentis: *Regnum Cælorum vim patitur, & violenti rapiunt illud* Qui, sunt hi violenti? quærit Abbas Abraham apud *Cassianū Coll: 24. cap: 26.* nempe illi, qui non aliis, sed voluntatibus suis præclaram inferunt violentiam: Quod fit per obedientiam perfectam de qua sic *B. Catharina Bononiensis, in libello DEI mandato conscripto:* Quis dubitare potest de sua salute, si finiat vitam in obedientia, quæ plus similem illum facit Domino suo Christo, quàm ulla alia virtus?

Nona. Quia est fundamentum vitæ spiritualis & perfectionis, hæc abnegatio propriæ voluntatis, in qua quantos progressus aliquis facit, tantos etiam in perfectione facit. Unde & libertas spiritus, quàm habent perfecti, & in qua, omnis, quæ in hac vita desiderari potest, consistit felicitas, ac bonum, per obedientiam promptam, (*hoc est per abnegationem propriæ Voluntatis*) acquiritur, ut *S.M.N. Theresia L. Fund: cap: 5. testatur.* Et ideo Abbas Joannes apud *Cassianum Coll: 9. cap: 8. finem ait Cœnobitæ esse.* (Cujus est obligatio tendere ad perfectionem) omnes suas crucifigere voluntates. Unde adeò est necessaria, in statu religioso viventibus hæc mortificatio voluntatis, ut *DEUS reve-*
lave-

laverit B. M. Magdalena de Pazzis, inter quinque res à DEO petendas ad cuiusvis ordinis conservationem necessarias, quintam esse: ut Religiosi perfectè agnoscant, quanti momenti sit, abnegatio propriæ voluntatis. Idem, sic B. Brigittam alloquitur: & præcipio, & mando, & consulo, & permitto, obedire, ut teneris. Hoc præcipio, quia DEUS tuus sum: hoc mando, quia Dominus tuus sum: hoc consulo, quia Sponsus tuus sum: hoc obconsulo, quia amicus tuus sum. Lib: 2. Revel: c. 16. Decima. Propter exemplum Christi, qui non venit in mundum facere voluntatem suam, sed Patris Æterni, ad quem proximus morti sic ait: non mea, inquit, voluntas, sed tua fiat. Qui sic de seipso ad S. Brigit. loquutus est olim: Ego DEUS præ omnibus, perfectissimus, & ipsa perfectio, obedi vi Patri usq; ad crucem, ut ostenderem exemplo meo, quam placitum est DEO, abnegare proprium velle. Lib: 2. Revel: c. 121.

Qui igitur Propriam vult obnegare voluntatē, solius DEI in omnibus faciat semper voluntatem; & frequenter cum Apostolo dicat: Domine quid me vis facere? Et cum Psalmista. Paratum cor meum, DEUS, paratum cor meum.

Præterea omne malum fugiat, quod est verum germen propriæ Voluntatis nostræ semperq; DEI voluntati contrarium. Bona quoq; ut sunt virtutes, non propter se, sed ut DEO placeat, operetur. Immo etiam Mediis, ut sunt cibus, & potus, somnus, &c. non ad proprium commodum, sed ad DEI placitum implendum utatur.

Insuper ad vincendam propriam voluntatē magis velit subesse, quā præesse potius aliis obedire, & alterius ductu regi, quā cæteris imperare. Nā multi sunt. *Auctor quidam Asceticus, ait*, qui pluribus paulò suprà alios annis in Religione transactis, & paucis aliquibus laboribus exantlatis, Regimen aliorum sibi deberi putant: & ideo aliorum voluntate regi nolunt; non sustinent de suis defectibus corrigi; non acquiescunt Officia inferiora sibi à Superioribus demandata prompto animo exequi; sed omnia volunt ex propria voluntate & suo placito facere. *Quos omnes B. Casarius hom: 27. sic allequitur*: non te fallat, inquit, ô frater, numerus dierum, quos hîc, relicto corporaliter sæculo, consumpsisti. Illum tantum diem vixisse te computa, in quo voluntates proprias abnegasti, quem sine ulla regulæ transgressione duxisti.

Actus mortificanda Proprie voluntatis habentur par: 2. pag: 28.

CAPUT VIII.

De Mortificatione Amoris proprii.

Hic Amor est Affectus quidam animæ quæ quis vult sibi omnia bona propter seipsum, & fugit omnia adversa propter seipsum, vel sistendo in seipso, tanquam in fine. *Qui Amor vocatur etiam Amor sui: & ordinarie sumitur pro amore inordinato & malo, de quo S. Thom: 1. 2. q. 77. a. 4. in corp: docet quod sit causa omnis peccati, quo homo amat se secundum naturam sensitivam, seu partem inferiorem, non autem secundum*

cundum partem rationalem seu superiorem. Et quoniam hic Amor proprius est multis ignotus; idè ut facilè ab omnibus cognoscat, signa ipsius proponuntur, quorum *Primum est* Æstimatio sui, quâ quis in seipso deceptus se quid magnum putat, omnia dona sua naturalia, aut supernaturalia magna æstimatione digna existimat, in omnibus sibi complacet, suos defectus extenuat, labores exaggerat.

Secundum. Quod homo per Amorem proprium ferè semper laudem, & honorem, & excellentiam super alios desiderat.

Tertium. Inanis quædam erubescencia, quâ homo de aliquibus defectibus, vel à natura, vel aliunde provenientibus erubescit: jam verò defectus animæ, videlicet, carentiam virtutum, inobedientiam, loquacitatem, & innumera vitia sua non agnoscit, nec propter illos confunditur.

Quartum. Timor ille, quo quis timet contemptum, & propriam vilipensionem.

Quintum. Absconfio eorum, quæ opinionem nostram minuere possunt, per quam vitia & culpas suas atq; defectus aliquis occultat: non quidem ob ædificationem proximi, sed ad obtinendum apud alios nomen sanctitatis, aut virtutis quâ non habet.

Sextum. Nimia quædam cura poliendi & perficiendi ea opera, quæ sunt homines visuri, vel audituri. Unde tales vanitatis & mundi Martyres à Magistris spiritualibus vocantur ex quibus si aliqui sunt concionaturi, ingenti sollicitudine torquentur, subtilia inveniendi, curiosa ac inania proponendi,

non

non ut animas per hæc lucentur, sed ut dicenti honorem, & sapientis opinionem apud Auditores concilient.

Septimum. Amor & desiderium bonorum temporalium, & eorum quibus sensualitas delectatur, non ad necessitatem, sed ad superfluitatem: quo vitio Religiosi sæpè laborant, qui tot res non necessarias, tot curiosas, tot pulchras & exquisitas, tot supervacuas habent, quibus non necessitati suæ succurrere, non imbecillitatem ad DEI obsequiū fovere, sed tantummodò istis rebus seipsos, supra votū Paupertatis, oblectare volunt.

Octavum. Quod homo, qui tenetur Amore sui, desiderat semper illicitas, aut non necessarias voluptates, quibus sensus externi & interni delectantur. Unde quærit pulchra, quæ pascant visum nova curiosa, quæ mulceant auditum: svavia quæ capiant odoratum; dulcia, quæ oblectent gustum: mollia, quæ inescent tactum: in quibus omnibus dum oblectationem quærimus, dolorem, & conscientiae remorsum reperimus.

Sunt autem plures Modi Amorem proprium mortificandi.

Primus est. Dissidentia de teipso, qua tibi ipsi, tanquam omnis imbecillitatis abyssus diffidas, & in solo DEO Potentissimo, benignissimo, ac omnium bonorum Auctore confidas.

Secundus. Eniti magis ac magis Amorem DEI augere & Divini Amoris affectibus, si fieri potest, singulis momentis se occupare, qui affectus efficiant,

ent, ut nos, & reliqua propter DEUM diligamus, & sic illum Amorem proprium in nobis extinguamus.

Tertius. Rectam intentionem in omnibus habere, ita ut in cunctis cogitationibus, desideriis, verbis, & actionibus non teipsum, sed DEUM, ejusq; beneplacitum & gloriam inquiras, & omnia in ejus honorem dirigas.

Quartus. Contemnere seipsum, neq; timere contemptum apud homines, quo te dignissimum judicabis. Et ideo ob defectus naturales nunquam orubescere: nec illos abscondere, immò aliquando eos coram aliis revelare debes.

Quintus. Nolle singulariter ab hominibus amari, aut timeri, nec laude ac reverentia affici: neque curare quomodo hominibus placeat, aut displiceat.

Sextus. Corpori bellum perpetuum indicere castigando & affligendo illud assidue: sensus omnes non tantum ab illicitis, verum etiam à licitis comprimere: quod sane non erit difficile, si corpus tuum hostem tuum esse consideres.

Septimus. Ut Religiosus, qui omnia pro Christo reliquit, paupertatem amet, cui sit vilis vestis, lectus moderate instructus, cibus communis & omnia non vanitati, sed puræ, necessitati deserviant, quæ si etiam defuerint, patienter ferat.

Octavus. Odium sui perpetuum habere, ex quo odio unusquisq; omnia molesta corpori eligat, cuncta svavia carni subtrahat, in omnibus seipsum abneget & mortificet, suæq; voluntati contradicat, idq; non tam ob suum profectum, quam ut DEO gratum

tum per hoc prætet obsequium, eiq; placeat. Et quia hoc odium sui, est speciale Donum DEI, idèo instanter orandum est, ut bonis concedatur, & Amor proprius penitus in nobis extingvatur. Porro qui vult facile Amorem propriū cognoscere & mortificare, hanc doctrinam S.M. Magdal: de Paxxis sequatur, quæ dicebat: Duos esse oculos Amoris proprii; alterū propriam reputationem: alterū propriū commodum: qui si eruantur, amorem proprium timendum non esse. *Actus interni Amorem proprium mortificandi habentur Par: 2. pag: 7.*

CAPUT IX.

De Mortificatione Intellectus, & Judicii proprii.

S Thom: 12. q. 74. ar: 5. in corp: docet: *Rationem seu Intellectum duplicem habere Actū. Unum, quo cognoscit aliquod verum. Alterum, quo dirigit alias vires: seu, quo judicat de rebus agendis, qui actus vocatur Judicium proprium. Et quoniam intellectus noster per peccatum Adæ incidit in cæcitatem & ignorantiam, propter quam homo & in inquisitione atq; cognitione veritatis errat; & quid faciendum sit, aut vitandum ignorat: idèo quoad utrumq; Actum indiget mortificatione.*

Et imprimis quantum ad actum primum, Intellectus noster mortificandus est: quando homo per curiositatem multa vana & inutilia discit: inutilia verò sunt, quæ neq; DEI obsequio, nec proximorum utilitati, nec discentium statui conveniunt. Secundo, quando homo illa quæ secundum statum suum debet scire negligit: videlicet, quando
Con-

Confessarius casus conscientiae non legit; vel quando Religiosus ex Ordine Mendicantium discere cōtemnit illa, quibus proximum ad salutem juvare posset.

Tertiò, quando homo debitum modum in discendo non servat: sicut facit ille, qui non propter gloriam DEI, & animarum salutem, & profectum animae suae, veritatis cognitionem inquit: qui novitates tantum sequitur; qui doctrinā communem, propter rationes tantum probabiles, facile deserit: qui antiquorum Sapientum auctoritatem minime veneratur: qui scientiam non instrumentum virtutis, sed finem virtutis facit: qui tempora inter doctrinam & exercitium bonorum operum, ac virtutum non partitur: qui horas debitas cultui Divino & Orationi non relinquit.

Deinde Intellectus noster quantum ad Judicium proprium mortificandus est. Tunc autem proprium Judicium dicitur, quando non est DEI nec hominū Sapientū sensui cōforme, sed singulare nostrū, ab aliorum sententia dissentiens: quod maximū est Intellectus nostri vitium, ex superbia & praesumptione nostra natum, qua quis seipsum magnum aliquid reputat, alios verò despicit, & scientia ac prudentia minores existimat. Unde qui hoc proprium judicium non abnegant manifestum incurrunt errandi & corruendi periculum.

Igitur, qui vult proprium Judicium mortificare, & abnegare, debet primò nulla ratione veram illam opinionem, putare quā omnes Sapientes falsā esse judicaverunt.

Secundò. Rebus à tota Congregatione probatis, & summa omnium consensione susceptis, non esse contrarium.

Tertiò. Majorum decreta nunquam reijcere, nec illa ad examen vocare.

Quartò. In rebus ad vitam propriam & mores pertinentibus aliorum iudicio potiùs, quàm proprio gubernari.

Quintò. Omnes res alicujus momenti nunquàm sine consilio præveniente disponere: & omnes actiones satius ex aliorum iudicio, quàm ex propria sententia executioni mandare.

Sextò. Tunc maximè à proprio iudicio cavere, quando nostrum interest: tunc enim inhærendo nostro iudicio facilè decipimur.

Septimò. In aliorum facta non se intromittere; nec Superiorum directionem condemnare; nec seipsum aliis præferre.

Actus interni pro mortificando proprio Iudicio habentur Par: 2. pag: 17.

CAPUT X.

De Vitiorum extirpatione.

Quandoquidem ex immortificatis sensibus, passionibus, voluntate, amore; & iudicio proprio vitia generantur; ideò post doctrinam de mortificatione prædictorum, de vitiorum eradicatione est tractandum.

Est autem Vitium, Habitus seu dispositio prava ex peccato relicta inclinans ad peccandũ. Difert autem Vitium à Peccato; quia Peccatum dicitur actum

actum secundum & transeuntem, vitium autem dicitur habitum seu dispositionem permanentem. Vitium simul est effectus, & causa peccatorum: effectus quidem præcedentium peccatorum, quibus iteratis generatur; causa verò subsequentium, ad quæ voluntatem inclinatur. Dum enim aliquis peccatum in aliqua materia committit, v.g. furti per iterationem ejusdem peccati acquiritur quædam dispositio prava, inclinans ad facile & delectabiliter peccandum in eadem materia: hæc prava dispositio per actuum frequentationem augetur, magisque radicatur, per quod fit habitus difficile mobilis à subjecto, & quodammodo transit in naturam: vitium namque radicatum inolevit pro natura. Unde non tam evacuandum est vitium, quam exstirpandum; quia consistit in habitu radicato, & non in actu transeunte, sicut peccatum. Qui autem vult peccata vitare, vel evacuare, debet vitia, quæ sunt causæ & principia peccatorum, eradicare.

Est autem maximopere necessaria vitiorum eradicationis viris spiritualibus, & omnibus ad statum perfectionis pervenire desiderantibus.

Primò. Quia sine hac eradicatione nemo perfectionem consequi potest, cum enim status perfectionis in virtutum acquisitarum possessione consistat, & vitia virtutibus contraria, virtutum acquisitionem impediant; propterea totis viribus vitia eradicare debet, qui virtutes acquirere, & ad perfectionem pertingere exoptat.

Secundò. Quia vitium, secundum S. Chryso-

est dirus Tyrannus, qui libertatem nostram eripit. Vitium, *secundum B. Cæsarium*. est dæmon, cor nostrum possidens. Unde quot vitia, *inquit*, habuerit homo, tot habet dæmones.

Tertio Quia vitium est naturæ nostræ contrariū, quæ cū rationalis sit, debet ratione & lege Divinā regi: vitium autem facit homines more pecudum contra rationem & legem DEI vivere.

Quarto. Quia propter vitia homo redditur DEO invisus, qui cum sit fons infinitæ bonitatis, malitiā vitiorum odio habet & averfatur. Ut igitur DEO placeat, ipseque Divinæ Majestati cor mundum tanquam desiderabile habitaculum præparet, antiqua vitia extirpet, & nova vitet.

Quinto. Quia homo per vitia est suæ salutis inimicus; est sibi met infestus: nam detractor os suum & linguam commaculat: impudicus corpus suum fædat: invidus, intima præcordiorum exulcerat: gulosus, corpus & animam gravat: iracundus, mentem suam obnubilat.

Sexto. Propter multitudinem damnorum, quæ animabus nostris vitia asserunt, quæ damna *S. Berni. Ser. ad frat. de monte D. recenset.*

Possunt autem eradicari vitia duplici modo.

Primo, per cessationem actuum vitiosorum & odium vitiorum. *Secundo* per actus contrarios: Omnes enim habitus duplici viâ destruntur: efficacius tamen & citius secundâ. Itaque qui-
cunque vult vitium expugnare, debet in principio tentationibus & impugnationibus fortiter resistere,
ne

nē ad vitiosos actus relabatur: & odium verum cōtra vitia in animo concitare & fovere. *Debet præterea* contrariis virtutū actibus vitia impugnare, ut *suadet S. Bern: de ord: vite dicens:* Adversus impetus vitiorum contrariis virtutibus est pugnandum, contra luxuriam adhibeatur cordis munditiā, contra odium dilectio, contra iracundiā patientia, contra timorem fiducia virtus, contra torporem fervor boni studii, opponatur tristitiæ gaudium, acediæ fortitudo, avaritiæ largitas, superbiæ humilitas. *Ad hæc adhibeat* fervidas ad DEUM orationes, finē cuius auxilio nihil possumus. Oratio namque non solum Divinā flectit Majestatem, ut nobis in necessitate succurrat, sed etiam animæ vires ad fortiter agendum subministrat. *Adhibeat præterea* rationabilem corporis mortificationem, ut subiecto rationi corpore, facilius vitia superentur, quæ non nisi inordinatis motibus corporis generantur ac foveantur.

Licet autem cuncta vitia eradicanda sint, non tamen omnia simul aggredienda sunt, sed singula seorsim; & incipiendum ab illis, quæ magis radicata videntur, ac magis animæ dominantur: his enim quasi ducibus superatis, reliqua facile vincuntur ac dissipantur. *Noverimus tamen* quod non sufficit unum & alterum vitium eradicare, sed cuncta sunt extirpanda. Nam sicut virtutes ita sunt connexæ, ut se simul concomitentur, nec una sine aliis possit in statu perfecto reperiri; sic contingit & vitiis, quod facile se mutuo concomitentur, & unū

retentum alia revocet: & quamvis minimum videatur, aditum tamen ad animam dæmoni præbebit, qui solet eam aggredi, quâ parte noverit esse debiliorem.

Et quamvis multæ sint vitiorum species, de quibus sequenti Exercitio tertio agetur, ubi de virtutibus tractabitur: hîc tamen *septem capitalia vitia recensentur* quorum *Primum est, Superbia*, quæ est inordinatus appetitus propriæ excellentiæ, cui debetur honor & reverentia. *Dicitur autem tripliciter Superbia* ut S. Thom: 1. 2. q. 84. ar. 2. in corp. docet *Primò*. Inclinabilitas seu pronitas ad superbiendum, ex flexibilitate naturæ vel corruptione fomitis actualis. *Secundò*, Elatio contra præceptum, vel inordinatus appetitus excellentiæ, in quacunq; re; *Tertiò* inordinatus appetitus excellentiæ, cui debetur honor & reverentia: prima est initium vel radix omnis peccati: secunda est generale peccatum, quod in omnibus peccatis reperitur: tertia verò est peccatum speciale, & est unum de septem capitalibus.

Sunt autem quatuor species Superbiæ secundum S. Gregor: lib: 33. Moral cap: 7. Æstimare bonum à seipso habere: sibi datum desuper pro suis accepisse meritis credere: gloriari se habere quod non habet: & cæteris despectis appetere videri singulariter habere quod habet. Ultra istas species S. Bern: ponit duodecim gradus Superbiæ, qui sunt, Curiositas, per quam aliquis curiosè ubiq; & inordinatè circumspicit: Levitas mentis, per quam ho-
mo

mo superbè se habet in verbo. *Inepta letitia*, quā homo est facilis & promptus in risu. *Jactantia*, non tacens usq; ad interrogationem *Singularitas*, per quam aliquis sanctior aliis vult apparere. *Arrogantia*, per quam homo se aliis præfert. *Præsumptio*, per quam aliis reputat se sufficientem ad majora. *Defensio peccatorum*, per quam aliquis suos defectus excusat. *Simulata confessio*, per quam aliquis non vult subire pœnam pro peccatis, quæ simulatè confitetur. *Rebellio*, despiciens obedire. *Libertas*, per quam homo delectatur liberè facere quod vult. *Peccandi consuetudo*, per quam homo excutit DEI timorem, Deumq; contemnit. De quibus gradibus superbiæ Par: 2. sunt *Actus interni pro mortificando vitio superbiæ* pag: 18. *Ibidem sunt Actus Humilitatis contrariæ virtutis huic vitio:* pag: 20. Et quoniam Inanis gloria immediātè oritur ex superbia, ut ait S. Thom: tanquā ex causa, à qua differt ex eo, quia superbia appetit excellentiam; inanis verò gloria appetit manifestationem ejus: propterea communiter conjungitur cum Superbia. Quamvis etiam inanis gloria sit vitium capitale secundum S. Thomam. Nam *omne vitium capitale illud dicitur ex quo alia vitia oriuntur:* ex inani autem gloria oriuntur septē vitia, scilicet, jactantia, præsumptio novitatum, hypocrisis, pertinacia, discordia, inobedientia & contentio, per quā aliquis contra alium litigat clamorosè, de quibus par: 2.

Secundum vitium capitale dicitur Avaritia, quæ est immoderata cupiditas habendi temporalia: Cujus filiæ sunt septem, Obduratio, Violentia, inquietudo, fallacia, fraus, perjurium, proditio, de quibus Par: 2. sunt Actus interni pro eradicando Avaritia vitio pag: 30. Et Actus Paupertatis virtutis contrariæ avaritiæ pag: 32.

Tertium est Luxuria, quæ est appetitus impuræ voluptatis. Cujus filiæ numerantur octo: cæcitas mentis, inconsideratio, præcipitatio, inconstancia, amor sui, odium DEI, affectus præsentis sæculi, desperatio futuri sæculi. Gradus hujus vitii sunt quinque: aspectus, cogitatio, delectatio, consensus, opus, Actus interni pro exstirpando hoc vitio habentur Par: 2. pag: 41. Ibidem sunt Actus Castitatis contrariæ virtutis pag: 42.

Quartum Invidia, quæ ex inani gloria nascitur, & est Mæstitia de bono alterius, quatenus proprium bonum diminuere creditur: cujus sunt quinque filiæ odium, susurratio, detractio, læticia de adversis, afflictio de prosperis. De quibus Par: 2. sunt Actus interni pro exstirpando hoc vitio p. 49. Et Actus Charitatis contrariæ virtutis pag: 51.

Quintum Gula, quæ est inordinatus appetitus cibi & potûs: cujus species hoc versiculo comprehenduntur.

Præpropere, laute, nimis, ardens, studiosè Eiusdem quinque filiæ numerantur. Inepta læticia,

scurrilitas, immunditia, stultiloquium & hebetudo mentis; de quibus Par: 2. sunt *Actus interni* pro eradicando hoc vitio p. 60. Et *actus Abſtinentiæ* virtutis contrariæ p. 61.

Sextum Ira, quæ est immoderatus appetitus vindictæ. Sunt autem *Ira species tres*, *Ira*, quæ vocatur fellea: *Maria*, quæ vocatur infania; & *Furor*. Per primam homo celeriter irascitur: per secundam, diu iram servat; per tertiam, donec ulciscatur homo non quiescit. Hinc & *iracundi dicuntur esse triplises*, acuti, amari, & difficiles. *Filiæ verò vitii Iræ sunt sex*, scil: Rixa tumor mentis, contumelia, clamor, indignatio, & blasphemia. De quibus Par: 2. sunt *Actus interni* pro exstirpando hoc vitio p. 70. Et *Actus Mansuetudinis* contrariæ virtutis p. 72.

Septimum Acedia, quæ est tristitia de bono spirituali Divino: *cujus filiæ numerantur sex*, malitia, rancor, pusillanimitas, desperatio, torpor, & mentis evagatio: de quibus Par: 2. sunt *Actus interni* pro exstirpando hoc vitio p. 8. Et *Actus Diligentie* contrariæ virtutis p. 10.

Quamvis nullus miles Christi, & vir spiritualis debeat cessare unquam à pugna contra vitia, nec quasi victor illorum gloriari; quia penè extincta resurgere valent, si securus vivat: natura namq; nostra corrupta pabulum & vires vitii semper subministrat: tamen potest aliquis habere *quedam eradicatorum vitiorum signa*. Unum est, Pax interna animæ, Alterum est, Facilitas & delectabilitas in

exercitio virtutum. Sed præter hæc possumus alia habere judicia cujuslibet vitii capitalis jam extirpati. Si unusquisq; expendat diligenter naturam omnium vitiorum, ac filiarum eorum: & Aëtus internos pro quolibet vitio extirpando designatos, atq; Aëtus contrariæ virtutis, locis supra citatis, inde cognoscetur utrum jam extirpaverimus hæc vitia vel non? quâ in re tam diu desudare debem, donec appareat manifestatio eradicationis eorum.

Quod si aliquis se profecisse in hoc agnoverit, gratias Domino maximas referat, & in illo solo gloriatur; ac suppliciter à DEO postulet continuationem victoriæ de his hostibus animæ suæ usq; in finem hujus vitæ, ut post mortem gloriose de illis triumphet.

E X E R C I T I U M TERTIUM

VITÆ SPIRITUALIS EST VIRTUS.

C A P U T I.

De virtutis necessitate.

INter exercitia viri spiritualis potissimum est virtutum. Nam ille propriè dicendus est vir spiritualis, qui relictis aëtibus sæcularibus, vitam operibus bonis, ac virtutum acquisitioni dedicavit, ad quarum amorem & inquisitionem efficaciter unumquemq; nostrum potest movere ipsarum honestas pulchritudo, utilitas, & delectabilitas: de quibus fusè satis actum est superiùs, de modo meditandi de virtutibus: Hic tantummodo ponitur *descriptio virtutis cujusdam Ascetici Doctoris dicentis:*
Vir-

Virtus est supplementum naturæ, ornamentū mentis, facilitas boni operis; quā benè sanctèq; vivimus, quā veris malis, scilicet, peccatis resistimus, quā meritis cumulamur, quā vitam æternam promeremur, & Christi imagines, ac DEI imitatores effici-mur. Quæ descriptio sicut multū commendat virtutes, ita ad amplectendum eas etiam tepida corda facilè accendit.

Sciendum est, animam nostram nudam à DEO creari, hoc est, sinè habitibus vel formis, quibus perfectè & completè bonum rationis, verumq; attingat. Habet tamen potentias & capacitatem ut prædictos habitus, vel proprio labore acquirat; vel per infusionem à DEO recipiat. Residet autē hæc capacitas in parte rationali: & etiam in sensitiva, quatenus ex conjunctione ad rationem aliquid ejus participat; unde dicitur rationalis per participationem. *Est autem in parte rationali solum duplex potentia*: intellectus & voluntas: (memoria enim prout pertinet ad partem intellectualem, non differt secundum rem ab ipso intellectu) & *in parte sensitiva est duplex potentia appetitiva*, irascibilis & concupiscibilis, quæ possunt esse subiectum virtutum: quarum potentiarum virtutes, dicuntur supplementum, complementum, & perfectiones: quia sinè illis non possunt suos actus rectos, & moraliter bonos, seu rectæ rationi conformes producere. Excedit enim vires illarum potentiarum bonitas moralis, & rectitudo ordinis ad rationem, & legem Divinam, quæ sunt regulæ actionum nostrarum.

(Boni-

(Bonitas autem moralis est ipsa conformitas actus cum ratione) & ideo debent illæ potentia compleri & perfici, per virtutū habitus, ad hoc ut producant suos actus rectos & bonos, seu rectæ rationi conformes.

Ex quo patet, ad hoc poni virtutem in potentia humana, ut compleat & perficiat illam, tribuatq; ei vim ad rectè & faciliter operandum, quam vim ipse habitus virtutis habet à potentia superiori scilicet, à ratione à qua movetur. Etsi illa motio sit ante habitum acquisitum, tunc fit per modum passionis & transeuntis; & illa operatio, seu actus fit cum difficultate, quod si potentia inferior frequenter moveatur à ratione ad suos actus rectos & bonos, jam tunc per illas frequentes motiones rationis acquiritur habitus, & actus fiunt tunc omnes promptè, faciliter, & delectabiliter: quia prædicta motio est facta connaturalis potentia habituatæ, ratione ipsius habitus.

CAPUT II.

De virtutis definitione, & divisione.

Definitur virtus, quod sit habitus bonus, quo rectè vivitur, quo nullus malè utitur. Seu secundum Sanctum Augustinum; quod sit bona qualitas mentis, quæ rectè vivitur quæ nullus malè utitur, quam DEUS in nobis sine nobis operatur: quæ definitio convenit cuilibet virtuti, præter ultimam partem, quæ convenit tantum infusæ virtuti. Ubi Qualitas ponitur loco generis: & Bona ponitur loco differentia virtutis à vitio Mens
verò

verò hîc dicitur non ipsa anima, sed ejus potentia rationales, ut intellectus & voluntas, & etiam appetitus sensitivus prout est rationalis per participationem. Per verba *Quâ rectè vivitur*, ostenditur virtutem esse principium proximum boni actûs: quia *Ly vivitur*, non sumitur pro Esse viventis, sed pro operatione. Per verba. *Quâ nemo malè vititur*, differt virtus à quibusdam habitibus non ita determinatis ad bonum, quin possint ad malum seu falsum concurrere, ut opinio, & fides humana. Virtus autem neq; ad malum, neq; ad falsum inclinare potest.

Aliâ viâ ostendit D. Thom: prædictæ definitionis bonitatem, quia notificat virtutem per omnes suas causas. Formalis enim exprimitur cum dicitur *bona qualitas*: hoc quippè est virtus formaliter & in recto, Materialis, cum dicitur *mentis*: nā subjectū virtutis tantū potest esse potentia rationalis, vel quæ participat rationem, videlicet, appetitus sensitivi, Finalis per verba. *Quâ rectè vivitur* &c. Finis enim virtutis est, Actus vitalis bonus & rectus Deniq; ultima verba *Quâm DEUS in nobis* &c. ostendunt causam efficientem esse DEUM infusæ virtutis, quæ causatur in nobis à DEO finè nobis agentibus, non tamen finè nobis consentientib9.

Dividitur autem virtus Primò. In Acquisitâ & infusam. *Acquisita dicitur illa*, quæ nostris actibus acquiritur. Nullam enim virtutem habemus à natura, nisi secundum aptitudinem & inchoationem, sed acquirimus eam per frequentationem actuum

etuum secundum perfectionem. *Infusa est*, quæ à solo DEO infunditur: & tales sunt virtutes Theologicæ: Fides, Spes, Charitas; & aliæ virtutes morales, quæ in instanti justificationis cū gratia sanctificante infunduntur, ut pedissequæ charitatis, quibus anima decenter ornatur. Nam DEUS non minùs perfectè providit ordini gratiæ ac providit ordini naturæ; cū ordo gratiæ sit multò nobilior & superior ordine naturæ. Ideò non debuit ille esse DEO minoris curæ ac providentiæ, quàm iste: DEUS autem ordini naturæ sic providit, ut ad esse substantiale intellectualis naturæ, statim à principio conditionis ipsius consequerentur potentiæ, quasi proprietates illius naturæ, ut esset perfecta & quantum ad esse, & quantum ad operari, quæ potentiæ sunt ejusdem ordinis naturalis cum ipso esse, ac ipsi proportionatæ. Unde etiam ordini gratiæ sic providit, ut ad esse supernaturale participatum per gratiam, consequerentur potentiæ sanctificantis, statim à principio infusionis ipsius gratiæ, ut sic natura intellectualis esset perfecta in ordine gratiæ, & quantum ad esse, & quantum ad operari: hæ autem potentiæ sunt tam virtutes Theologicæ circa ultimum finem immediate, quàm virtutes morales infusæ circa media ad illum finem; quæ dicuntur potentiæ, quia sunt tota virtus agendi proxima.

Est autem multiplex discrimin inter virtutes infusas, & acquisitas. *Primum est*: nam infusæ sunt ordinis supernaturalis seu gratiæ: acquisitæ verò sunt ordinis naturalis. *Secundum*: nam infusarum prin-

principia sunt virtutes Theologicæ: *acquisitarum* verò principia sunt rationis naturalis practica: videlicet, Synderesis, & Appetitus naturalis beatitudinis in ordine naturæ; ex quibus principiis procedunt virtutes acquisitæ, sicut ex virtutibus Theologicis procedunt infusæ. *Tertium*: in modo operandi: nam infusæ operantur secundum legem Divinam & fidem: acquisitæ verò secundum dictamen rationis naturalis. Patet hoc in cibi & potus sumptione. Nam secundum temperantiam acquisitam homo temperatè sumit cibum & potum secundum regulam rationis humanæ, videlicet, ut non noceat valetudini corporis, & nè impediatur actum rationis. Jam verò secundum temperantiam infusam homo temperatè eundem sumit cibum & potum juxta legem Divinam, quam fides docet, ut, scilicet, parcitate cibi, vel satisfaciamus pro peccatis nostris: vel ut corpus castigetur & in servitutem redigatur: vel ut compatiamur Christo & conglorificemur. Quod valde notandum est Religiosis, ut hoc modo altiori & Diviniori exerceant actus moralium virtutum. *Quartum*: Quod infusæ unâ cum gratia percipiuntur, & amissâ gratiâ etiam illæ amittuntur: acquisitæ verò sine gratia consistere possunt. *Quintum*: Nam acquisitæ virtutes subjungant in nobis passiones, & vitia virtutibus contraria exsurgent, & per assiduos actus omnem difficultatem auferunt: infusæ verò dant vires nobis ad creberrimos congressus, ut pax animæ comparetur. Unde patet quod amissâ gratiâ per peccatum, &

simul virtutibus infusis amissis, non tam facillè virtutes exerceri possunt. *Sextum est*, quia acquisita virtus dirigit suos actus ad finem naturalem, qui est virtutis honestas & conformitas ad rationis regulam, infusa verò ad supernaturalem, scilicet, ad felicitatem æternam assequendam: & propter hoc specie inter se distinguuntur.

Secundò dividitur virtus in politicam purgatoriam, purgati animi, & exemplarem.

Exemplaris in solo reperitur DEO, in quo exemplar humanæ virtutis præexistit. *Circa quod notandum est*, quod ex virtutibus Cardinalibus, quæ ponuntur exemplariter in DEO, sola Prudentia & Iustitia est formaliter in illo: quia istæ secundum formales rationes possunt ab imperfectionibus denudari: Fortitudo verò, & Temperantia non sunt formaliter in DEO, sicut neq; in Angelis, eò quòd ex propria ratione possunt versari circa passiones appetitus sensuivi. Unde solum ponuntur in DEO eminenter virtualiter, sicut omnis alia perfectio in creaturis reperta, quæ nequit secundum suum formalem conceptum ab imperfectionibus secludi. *Etiā virtutes Christi Dñi respectu nostrarū dicuntur exemplares*: Nam sicut ejus Resurrectio est causa exemplaris nostræ, sic ejus virtutes nostrarum sunt exemplar ad imitandum propositum; juxta illud ad Rom: 8. Quos præscivit & prædestinavit conformes fieri imaginis Filii sui. Et 1. Corint: 15. Portemus & imaginem cœlestis: id est, obedientiam & virtutē Christi: ut exponit Interlinearis.

& divisione.

323

S. Verò Thom: docet: ut *virtutes cardinales existunt in homine secundum conditionem suæ naturæ*, prout, scilicet, ordinatè se habet in rebus humanis gerendis, *dicuntur Politicæ*: ut sunt virtutes tendentium in Divinam similitudinem *vocantur Purgatorie*: ut sunt jam Divinam similitudinem assequentium, *Purgati animi appellantur*. Ex qua doctrina patet, quòd virtutes *Politicæ*, sive communes, correspondent *via Purgativæ*, quia purgatam jam animam ad Divina, seu ad similitudinem DEI trahunt; virtutes verò *Purgati animi*, correspondent *via unitivæ*, quia in anima Divinam similitudinem causant.

Hæc Divisio est tantum accidentalis, & solum est secundum diversos status virtutum, ita ut eadem numero virtus dum incipit, dicatur *Politica*, in profectu, vocetur *Purgatoria*, & in consummatione, *animi Purgati*.

Tertio, Dividitur virtus in *Theologicam*, *Intellectualem*, & *Moralem*: quæ divisio est cæteris compendiosior, & clarior: proinde secundum hanc de virtutibus hîc tractabitur, præmissis nonnullis ad eandem materiam pertinentibus.

CAPUT III.

De multiplici modo acquirendi virtutes.

Primus Modus est, Virtutis cognitio: quia nunquam Voluntas fertur in incognitum, nec ferri potest.

Secundus est, Magna virtutis æstimatio seu appetitatio: quia certum est, quòd etsi aliquid in se

V2

opti-

optimum sit, illud tamen non libenter amplectimur, nisi pro meritis æstimemus, ac in magno pretio habeamus. Virtus autem magni æstimanda est, quia, ut Sanctus Basilius Epist. 24. ad Maximum ait: Verè virtus est pretiosa possessio, ad quam obtinendam nulli sumptui, labori nulli parcendum est.

Tertius est, Diffidentia sui & Confidentia in DEO: Nam quoties in nobis fidimus, in poenam superbiæ iusto DEI iudicio miserabiliter cadimus: qui verò confidit in DEO non confunditur.

Quartus est, Velle Christum in omnibus imitari, in quo virtutes omnes mirabiliter elucet.

Quintus est, Exacta mandatorum DEI custodia & in viris Religiosis observantia Regulæ rigida: quia tam Lex Divina, quam Regula Religionis est de actibus virtutum. Propterea S. August: Regulam suæ Religionis speculum vocat, in quo inspicere possumus quales sumus, an iusti an iniusti, an pulchri, an fœdi; utrum quisq; nostrum regulariter vivat; utrum proficiat an deficiat; utrum DEO placeat an displiceat.

Sextus est, Ut vir DEO consecratus magnum desiderium acquirendæ virtutis concipiat & ad exercitium illius se citò accingat: deinde frequenter acquirendæ virtutis intentionem & propositum renovet, ut occurrentibus occasionibus exercendæ virtutis tam actus internos quam externos eliciat, nec ullam exercitii tam sancti occasionem prætermittat. Debet autem quotidie virtutum illarū, quas specialiter tunc exercere decreverit, determinatum

nume-

numerum actuum internorum & externorum elicere, singulisq; diebus conscientiam suam examinare, an in hac parte fuerit fidelis. Actus verò interni omnium virtutum, secundum triplicem viam *Purgativam* scilicet, *Illuminativam* & *Unitivā* distincti habentur Par: 2. statim à principio.

Septimus est, Fervens à DEO virtutis postulatio: cum enim propriā industriā ac diligentia, finē Divinis auxiliis, virtutem acquirere non valeamus, idcirco eam à DEO ardenti animo postulare debemus.

Ultimus modus acquirendarum virtutum est.

Unius virtutis sibi magis necessariæ exercitio operam dare, & uni virtuti specialiter acquirendæ fortiter incumbere: sicut fecere multi spirituales Viri, & Religiosi, qui Sanctitate olim claruerunt, quorum alii se Humilitati, alii Mansuetudini, alii Obedientiæ dederunt, & eo studio omnes virtutes facile & citò compararunt. Virtutes enim ita sunt inter se connexæ, ut una perfectè non possit finē aliis acquiri. Nam virtus finē aliis, ait *S. Greg: lib: 22. Moral: cap: 1.* Aut omninò nulla est, aut imperfecta. Cujus rei ratio est; quia nulla virtus moralis potest esse perfectæ, finē Prudentia perfectæ, & prudentia absq; omnibus virtutibus moralibus non potest esse perfectæ. Unde mitis homo esse nequit, nisi sit prudens; & prudens esse non valet, nisi justus, castus, humilis, sobrius, obediens &c. fuerit: Prudentia quippe injusta, intemperans, superba esse non potest: præscribit enim

nam illa virtutibus media, ad rationis normam exacta, virtutes verò prudentiæ finem præfigunt, ad quem consequendum, ut prudentia judicet, & eligat magis convenientia media, hoc dependet ex recta dispositione appetitus per virtutes morales: quia qualis unusquisq; est, talis finis videtur ei, & ita judicat, sicut est affectus. Si igitur virtus una perfecta acquiri nequit, nisi omnes quoq; habeantur, optimus erit modus cito acquirendarum omnium virtutum unius exercitio, intenso studio & principaliter invigilare, alias verò virtutes exercere pro occasionibus occurrentibus, quæ multiplices nobis in Religione offeruntur, dū variæ virtutes in Hebdomadas, Menses, & annos assignantur.

Itaq; eligat sibi unusquisq; unam virtutem principaliter colendam & exercendam, quæ sit sibi magis necessaria, quod faciliè cognoscet ex inclinatione ad aliquod vitium, vel passionem: propterea proclives ad iram, Mansuetudinem amplectantur: tenaces propriæ voluntatis & iudicii proprii, Obedientiam: proclives ad excellentiam supra alios, & æstimationem sui, atq; ad honores, assumant Humilitatem, quæ virtus omnibus nobis à Christo Domino commendatur, dum dicit: *Discite à me, quia mitis sum, & humilis corde.*

Quomodo autem exercendo unam virtutem & alias simul exercere valeamus, practicum hujus rei exemplū in Instructione Novitiorum *Par: 2. cap: 22. de Mansuetudine* habetur. Si enim aliquis fuerit iracundus, quoties aliqua de causa irā afficitur,

toties

toties pro mortificanda ista passione, & exercenda mansuetudine sic se gerat: Dum aliquis illum verbis exasperat, & passio iræ malum rependere gestit, confestim novus mansuetudinis cultor hunc rationis actum præceptumvè producit agens: Modò non est irascendum nè ferveas; ecce est actus Prudentiæ: deinde si ira non quiescit, tunc dicit, secundum Fidem non licet ulcisci; ecce actus Fidei: quod si adhuc ira fervet, tunc ait, ad immensum boni acquisitionem: hac arduitate victa, se, promovendi; ecce actus Spei: vel ait, amandum esse proximum etiam cum malè agit; ecce actus Charitatis: vel ait tribuendum cuiq; quod suum est, quia dicit DEUS: mihi vindictam, & ego retribuam; ecce actus iustitiæ: vel ait, non esse admittendam iræ deformitatem quam exterius prodit; ecce actus Modestiae: vel ait, animum infra alios demittendum ac ex eo illis non resistendum; ecce actus humilitatis; vel ait, malo hanc injuriam potius pati, quam acriter respondere; ecce actus Patientiæ: vel ait, nullam voluptatem illicitam undecunque, ac proinde exultatione sumendam; ecce actus temperantiæ: vel ait, non solum mediocri mansuetudinis occasione, sed in maxime ardua leniter agendum; ecce actus Magnanimitatis; vel ait, potius huic difficultati obstitendum, quam parum sècaviter cum proximo procedendum; ecce actus Fortitudinis. Ex hoc patet exemplum, quomodo unam virtutem exercendo etiam alia simul exerceri possunt.

Eodem modo quot fines unius alicujus actus a-

liquis sibi proponit, tot virtutum species ille actus fortitur: prout hoc exemplo declaratur. Si quis volens sacro inservire dicat: Sanctissime Domine DEUS & Pater mi dilectissime, ego propter te in unionem meritorum, & omnium operum dulcissimi Filii tui Domini nostri JESU Christi nunc volo sacro inservire: *Primo* ob honorem tuum, *deinde* ad Fidem meam testandam. Et ad vitam æternam consequendam. Et ut tibi placeam. Et ut proximis meis prosim. Et ut tibi, meoq; Superiori obediam. Et ut corpus meum mortificem. Et quia non curo bona terrena, sed cœlestia. Et quia non desidero alia alimenta præter hæc, quæ in Sanctissimo Eucharistiæ Sacramento nobis offeruntur. Et quia dignus sum, ut tanquam vilissimus omnium pro aliis inserviam. Et ut hunc modicum laborem perferam propter DEUM; Et ut oculos meos hic circa DEI mysteria detineam. Et ut modò non cum hominibus, sed cum DEO loquar. Et ut pro peccatis meis tibi satisfaciam. Et ut me gratum pro beneficiis tuis tibi exhibeam. Et ut impetrem omnia dona, quibus indigeo usq; ad beatitudinem æternā consequendā: præcipuè ut impetrem hujus Passionis N. mortificationem: hujus vitii N. extirpationem: præterea virtutem Humilitatis &c. & donum Perseverantiæ in gratia tua usq; ad mortem. In quo exemplo manifestum est, quomodo unus actus propter varios fines habet speciem Fidei, Spei, Amoris DEI, Charitatis proximi, Obedientiæ, Pœnitentiæ, Paupertatis, Abstinentiæ, Humilitatis, Pati-

Patientiæ, Silentii, Modestæ, Grati tudinis, & Orationis.

Et quoniam Christus Dominus noster exigit à nobis ut ab eo potissimum discamus *Mansuetudinem & Humilitatem*, eumq; in his virtutibus imitemur, ideò quilibet nostrum virtutes istas præ omnibus aliis, totà vitâ suâ præcipuè colere debet: Quia verò Mansuetudinis Praxis est data: propterea *hic Humilitatis exemplum affertur*, quam in omni occasione, in quolibet actu, & cum quacumq; alia virtute exercere valeamus. *Et imprimis.*

Surgendo, Benedictus DEUS, qui me indignum ullo beneficio Divino, à subitanea morte, & ab aliis mentis & corporis periculis hâc nocte præservavit.

Induendo vestes Indue me, Domine, veste pretiosa tuæ gratiæ, & charitatis, ac humilitatis, & vilipensionis mei, quem superbia, sicut primos Parentes nostros, ita & me veste innocentæ, & omnium virtutum spoliavit.

Petitio Humilitatis mane faciendæ. Domine DEUS meus, scio quòd inter omnia vitia maxime superbia insidias & perditionem animæ meæ molitur mihi: supplico tuæ Divinæ Majestati, ut me contra hunc perniciosum meum hostem virtute veræ Humilitatis munire digneris.

Manendo in Cella, Domine miserere mei, propter merita servorum tuorum me multò meliorum, inter quos in hac domo me habitare fecisti; ita enim teneo me illis esse indigniorem.

O Deus meus sicut olim inter Angelos tuos coram

te stetit diabolus, qui se obtulit ad nocendum Job fidei servo tuo: ita & ego sum uti diabolus, & ip-
sis pejor diabolis inter servos tuos, quibus pessimā
vitā meā noceo: & si quid adversi patiuntur in hac
vita fateor, quòd propter mea peccata patiuntur.
Sed ô Domine, miserere mei propter preces servorū
tuorum & da mihi emendationem vitæ.

Eundo aliquò. Domine non sum dignus calcare
hoc pavementum, per quod transeunt tot dilecti
servi tui.

Occurrendo alicui fratri; seu habendo obviū
aliquem Religiosum. Ego sum minimus Religioso-
rum nostrorum, qui non sum dignus servus esse, &
mancipium, atq; scabellum pedum ipsorum.

*Quod si fuerit inter multos homines: vel trā-
seundo aliquam Civitatem vel Pagum.* O DEUS
meus, ita puto, quòd omnis homo in hac Civitate,
vel Pago manens, à minore usq; ad majorem ingre-
diatur in Regnum DEI, propter suas justitias; ego
autem solus propter peccata mea, pœnam ingredi-
ar sempiternam, verumtamen de peccatis meis, ex
amore tui doleo, atq; veniam, & per piissimam
misericordiam tuam, vitam æternam spero.

*Veniendo ad Conventum, ibi ex obedientia mā-
surus.* Domine, rogo te, ut hîc & quocunq; ve-
nero contemnar ab omnibus, & pro te in nihilum
redigar; & ut non faventes mihi floreat, & ego
subsim illis.

Domine, fac me tanquam pavementum mundi,
ut ab omnibus conculcer, vilipendar, & indignis-
sime tracter. Do.

Domine, concede mihi hanc gratiam, ut mei vilipensione, & quadam annihilatione procurè quàm maximam gloriam tuam, ita in nihilum redigar in conspectu hominum, sicut fax & thymiana consumitur, ut luceat aliis, & reddat svavitatis odorem.

Eundo adChorum. Domine DEUS meus, ego te nunc cum servis tuis laudare volo; sed indignæ sunt meæ laudes & preces, conjunctione precum aliorum servorum tuorū: quia illi omnes sunt sancti & perfecti tibi; placentes; ego autem omnibus solus pejor sum, & imperfectus, atq; omnium mortalium nequissimus: quomodo igitur potest esse speciosa laus in ore adeò magni peccatoris? Domine, suppleant pro me, quæso, laudes tuæ Humanitatis, Sanctissimæ Matris tuæ, & omnium Angelorum, ac Sanctorum atq; Justorum.

Audiendo male loquentes de se. Laudetur DEUS, verè confiteor meritò malè alios de me loqui, cum non reperiatur persona supra quam possent cadere omnia vituperia mundi quantum supra me. *Si vituperetur & vilipendatur ab aliquo.* Justus es Domine, & rectū judiciū tuū: vermis sum & non homo, opprobriū & abjectio plebis. Agnosco in me nihil reperiri laude dignū, sed omnia vituperanda: quia dum me ipsum considero, clarè cognosco me esse pejorem dæmonio. *Si ab aliis laudatur.* Domine DEUS tibi soli laus, & gloria, mihi verò contemptus & confusio: *Si dæmon commemoraverit aliquod bonum opus.* Verè servus inutilis sum, & plūs omnibus hominibus peccans. Nihil dignum,

dignum, Domine, in conspectu tuo unquam egi: ideo deprecor Majestatem tuam, ut tu DEUS deleas iniquitatem meam.

Sedendo ad Mensam. Utinam cibis & portio vilior mihi contingant: quia aliis ut dignioribus & melioribus meliora debentur, mihi autem ut vilissimo & indignissimo viliora.

Si contingat elevare oculos ad Cælum, tunc illicò ad terram convertantur, dicendo: Domine non sum dignus aspicere altitudinem cœli præ multitudine iniquitatum mearum.

O DEUS meus, profiteor quod aliis debetur cœlum, mihi soli infernus, & in inferno, sub pedibus Luciperi & omnium damnatorum locus infimus.

Aspiciendo flores. Flores isti omnes dant Domino DEO suavitatis odorem, ego autem amaritudinis do foetorem.

Videns aliquas Oviculas. Scio quia omnes injusti hædi sunt; inter quos & ego sum peccator, qui multis peccatis obnoxius sum: oves autem, DEUS novit quæ sunt.

Sed o DEUS meus, inter oves locum presta.

Et ab hædis me sequestra.

Statuens in parte dextra.

Confutatis maledictis

Flammis acerbis addictis.

Voca me cum Benedictis.

Videns equos Ego sum equus & mulus cui non est intellectus.

Audiendo afflictiones aliorum, vel aliquas publicas

blicas calamitates. Ego, ego sum, Domine DEUS meus, causa omnium afflictionū, tribulationum, pœnarum, & calamitatum, & omnium malorū, propter innumera gravissima scelera mea: parce Domine universis proximis meis; in me convertatur furor tuus, & omnes iustitiæ tuæ Divinæ pœnæ. Miror quòd me Angeli, & Sancti, ac omnes creaturæ tamdiu in mundo tolerant, quòd me terra non dehiscat, nec vivum absorbeat.

Præterea exercendo Actus aliarum Virtutum simul possumus & Humilitatis exercere: ut Fidei. Auctor Fidei JESU Christe, firmissimè credo vera esse omnia, quæ te revelante, credit S. Mater Ecclesia. Confiteor tres esse Sanctissimæ TRINITATIS, in una Divinitate Personas: Verum est profectò Clementissime Domine JESU Christe te DEUM & Hominem, sed unam tantum Personam esse.

Sed fateor me indignum esse quem ad hæc mysteria cognoscenda admisisti: quia quod lingua mea dicit, moribus vita contradicit: dum enim fateor te DEUM & Hominem esse Humilem, Patientem, Obedientem, ego tamen superbus, inobediens, & impatiens sum.

Spero. Clementissime DEUS, firmissime spero, me tandem ex auxilio & bonis operibus gratiæ tuæ præstitis, gloriâ sempiternâ fruiturum: verum ego nulla bona opera in me agnosco, sed potius infinitam malorum multitudinem; & ideo per solam tuam misericordiam, & per passionem, ac merita Domini nostri JESU Christi, me salvandum spero.

Anno-

Amoris DEI. Quoties dico: Amo te DEUS meus super omnia: toties hæc dicens, confundor & erubesco; quia scio me multa amori, tuo contraria facere. Tu enim dixisti: Si quis diligit me, sermonem meum servabit: quem ego sæpius non servavi.

Charitatis erga proximum. Domine, juxta mandatum tuum diligo proximum tanquam meipsum, in cujus servum me trado, & in cunctis necessitatibus & infirmitatibus quantumvis abominabilibus, ad omnem famulatum ei exhibendum me offero.

Obedientia. O DEUS meus, cuilibet Superiori meo, etiamsi videatur homo agrestis & ignarus, prompto animo, propter te, semper, & in omnibus obedire volo, cujus judicio & voluntati meum judicium & voluntatem quam perfectissime subdere conabor.

Castitatis. O quam longè sum, Bone DEUS, ab illa cordis & corporis puritate, quam juxta propositum meum procurare debeo; propter quod sædo sterquilinio, & Cloacæ totius mundi abominabilior in conspectu tuo sum.

Paupertatis. Omnia viliora & abjectiora, in mantione, in vestitu, & in aliis rebus necessariis, soli mihi deberi profiteor.

Pœnitentia. O DEUS meus, sicut nullum genus peccati est, quo ego te non offendi; ita nullum genus tormentorum adeo grave in mundo, & in inferno reperietur, quod ego non promerui: Sed, ô Domine, hîc ure, hîc seca, tantummodo in æternum parce.

Abstinentia. Fateor me nullo cibo humano dignum

gnum esse sed cibo ferarum nutriendum esse; quia more bestiarum vivo.

Manſuetudinis. Jure merito ab omnibus affligendus ſum, & omnibus convitiis, calumniis, injuriis afficiendus, quæ omnia, pro meis demeritis, æquo animo tolerare debeo.

Patientiæ. Quidquid laborum, moleſtiarum afflictionum, dolorum, ſub ſole poteſt reperiri hæc omnia tanquam mihi debita, ſereno vultu & mente ſuſtinere paratus ſum, ob honorem & amorem tuum, Domine.

Modestię. Abſit à me, Domine, ut aliquid pulchrum in creaturis intueri oblectamenti alicujus cauſam velim, conſcius deformitatis meæ, quandoquidem omnibus leproſis, ulcerofis, & cadaveribus ſætentibus turpior ſum.

Silentii. Servabo ſtriſtè ſilentium, nec os abſque neceſſitate aperiā ad loquendum, nè alios tetro meo halitu inſiciam, propter compureſcentia in peccatis viſcera animæ meæ,

Gratitudinis. O quā ingratuſ ſum, erga tuam infinitam bonitatem, cui poſt tam multa & ſingularia beneficia mihi collata, malum pro bono reddo, & pro quibus gratias tibi debitas non perſolvo, immò penitus ea oblivioni trado !

Magnanimitatis. Fateor me parvo eſſe animo ad heroicas virtutes exercendas, magnanimum autem ad omnia mala.

Diligentiæ. O quā alacer ſum ad currendas vias, quæ ducunt me ad perditionem, quā piger
ad

336 *De multiplici modo acquirendi virt:*
ad carpendam viam mandatorum tuorum quæ ducit ad te, qui es vera vita nostra !

Perseverantie. Utinam non jam perseverem amplius in malitia, in tepiditate, in ingratitude, sicut hætenus feci, sed in tuo fideli servitio, quod nondum cæpi, attamen incipere volo.

Insuper. Sicut bonum est, & valde meritòriū, unum actum virtutis unius exercere ex motivo plurium virtutum, *dicendo:* Volo modo audire Sacrum, vel orare vel tacere ex Charitate, & Spe in DEUM, ex Obedientia, Humilitate, Patientia, Religione, Timore DEI, Pœnitentia, Gratitude &c. quod posset fieri manè. *dicendo:* Domine DEUS meus, quidquid hodie dixero, fecero, vel cogitavero, hoc volo fieri ex Charitate, & Spe in te DEUM meum, Religione, Timore tuo, ex Obedientia, Humilitate, &c. Ita omnes actus optimum erit, & meriti maximi, ex motivo unius virtutis illius, quàm aliquis pro speciali cultu elegit, v.g. Humilitatis, cuncta exercere, *dicendo:* Hoc volo facere ex motivo Humilitatis. Unde potest aliquis manè dicere: Clementissime DEUS, omnia verba, cogitationes, & opera hujus diei, totiusq; vitæ meæ, volo à me fieri ex motivo Humilitatis.

Ut autem aliquis cognoscat, an in virtutibus proficiat, hæc indicia observet. *Primum est,* si facile, promptè, delectabiliter, & constanter circa Materiam alicujus virtutis operatur, qui prius difficulter, lentè, inconstanter, & cum tristitia circa eam operabatur.

Secun-

Secundum est. Si vitiorum inveteratorum careat impugnatione, & importuna passionum molestia.

Tertium est. Si maximum proficiendi in virtute desiderium in seipso experitur.

Quartum. Si vita ejus sit conformis vitae Domini nostri JESU Christi, & Sanctorum ejus. Si autem aliquam in se virtutem quis agnoverit, DEUM ejus auctorem esse sciat, & ei pro ipsa gratias agat, & nunquam ab exercitio ejus desistat.

CAPUT IV.

De Virtutibus Theologicis.

DE FIDE

Summarium Capitis.

- I. De virtutibus Theologicis tractatur.
- II. De Fide agitur: eadem definitur: Objectum ipsius demonstratur.
- III. Cur credenda in 12. articulos dividuntur.
- IV. Fides dividitur.
- V. Actus Fidei recensentur, & quomodo sunt ad salutem necessarii docetur.
- VI. Causa Fidei, & Effectus ostenduntur.
- VII. Vitia actibus Fidei opposita enumerantur.
- VIII. Praxis Fidei describitur.

I. Non tractabitur hic de virtutibus quibuscunque; modo scholastico, in ordine ad speculationem, sed modo ascetico ad ipsarum exercitium, ut Tirones spirituales illam habeant virtutum cognitionem, quæ ipsos juvare valeat ad earum acquisitionem. *Virtutes* autem, juxta S. Thomam 1. 2. q. 68. a. 2. in tria genera distinguuntur. Sunt enim quædam virtu-

virtutes *Theologicae*. Quædam *Intellectuales*. Quædam *Morales*. Virtutes quidem *Theologicae* sunt, quibus mens humana DEO conjungitur. Virtutes autem *Intellectuales* sunt, quibus Ratio ipsa perficitur. Virtutes autem *Morales* sunt, quibus vires appetitivæ perficiuntur ad obediendum rationi: inter quas *primus locus Theologicis virtutibus datur*; quia nobilitate alias præcedunt; *illarum enim est Objectum DEUS*, qui est ultimus finis. Aliæ autem virtutes sunt circa ea, quæ sunt ad finem: *Præterea*, quia non sunt humanæ, sed suprahumanæ, vel Divinæ; & conveniunt homini, prout per gratiam participat naturam Divinam. Quæ virtutes sunt nobis necessariae ad Beatitudinem supernaturalem & æternam consequendam. Nam hæc Beatitudo est excedens humanam naturam, ad quam homo sola Divina virtute pervenire potest, ad quod ei à DEO dantur *Theologicae virtutes*.

Sunt verò virtutes Theologicae Tres. Cujus ratio est: quia Objectum ipsarum est DEUS, qui potest considerari; Vel ut est summum & primum verum; & sic attingitur per Fidem. Vel ut est summum Bonum nostrum: hoc est, à nobis Divino auxilio consequibile; & sic attingitur per Spem. Vel ut est summum Bonum in seipso, & propter se amabile amore amicitiae; sic attingitur per Charitatem.

Dicuntur autem Theologicae, id est, *Divinae*; tum quia habent DEUM pro Objecto, inquantum per eas rectè ordinamur in DEUM; tum quia à so-
lo

lo DEO nobis infunduntur: tum quia sola Divina revelatione in Sacra Scriptura hujusmodi virtutes traduntur.

2. *Inter has virtutes prior est Fides*, ordine generationis, ut ait S. Thomas, quo ordine præcedit Fides Spem, & Spes Charitatem secundum actus: nam Habitus simul infunduntur, Non enim potest, inquit, S. Thomas: Appetitus tendere in aliquid, vel sperando, vel amando, nisi quod est apprehensum, seu cognitum sensu, aut intellectu: per Fidem autem apprehendit intellectus ea, quæ sperat, & amat.

Sumitur autem Fides hic pro Credulitate, per quam assentimur alicujus dictis, propter auctoritatē dicentis, quam Credulitatem si exhibemus dictis hominum, propter auctoritatem eorum, quia veritatem in suis dictis servant, dicitur *Fides humana*: Si verò præbemus Credulitatem dictis à DEO, propter summam DEI auctoritatem, & indubitatam veritatem, dicitur *Fides Divina*: Hanc S. Paulus ad Hebr: 11. sic definit.

Est substantia sperandarum rerum, argumentum non apparentium: ac si diceret: Fides est fundamentum eorum, quæ videnda speramus in Cælo, & persuasio eorum, quæ visa non sunt. Ab aliquibus verò definitur sic:

Est Habitus, seu virtus supernaturalis à solo DEO infusa, per quam rebus Fidei assentimur, propter auctoritatem DEI revelantis. Cujus Objectum Materiale est id, quod à fidelibus creditur.

tur. *Principale* est ipse DEUS. *Secundarium* verò illa omnia, quæ in ordine ad DEUM creduntur, per quæ adjuvamus, & ducimur ad fruitionem Divinam, seu ad vitam æternam: ut est Incarnatio, Passio, Resurrectio, Ascensio Christi. *Formale verò Objectum Fidei*, est prima veritas DEI revelantis, qui neq; falli potest, propter infinitam suam Sapientiam; nec aliquem fallere, propter infinitam Bonitatem.

Assignatur autem multiplex conditio sinè qua non datur Fides. *Prima est*, quòd res revelata non sit visa, vel evidenter cognita. *Secunda*, quòd sit proposita, per instrumentum infallibile, cuiusmodi est Ecclesia; vel ejus Caput Pontifex Romanus. *Tertia* sufficientia motiva ad credendum mysteriis Fidei, ratione miraculorum & testium; ratione consensus Evangelistarum & Doctorum; & innumerabilium Martyrum pro veritate Fidei mortuorum; & aliorum ratione quorum mysteria Fidei apparent evidenter credibilia, propter quæ, prudens homo sinè dubitatione debet illis assentiri. *Quarta est*, intrinseca motio Spiritus Sancti, quæ intellectum illuminat, & voluntatem accendit, & quæ est causa Fidei principalis. Quia Fides est donum DEI; & quia assensus Fidei est ordinis supernaturalis: Ergo à principio supernaturali produci debet.

3. *Cur autè credibilia* seu res quæ creduntur, & in 12. articulos dividantur, qui in symbolo à duodecim Apostolis composito continentur?

Ratio istius rei est ex S. Thoma 2.2. q. 1. a. 8.

in

in C. quia illa, inquit, per se pertinent ad Fidem quorum visione in vita æterna perfruemur, & per quæ ducemur ad vitam æternam. Duo autem nobis videnda proponuntur: scilicet, Divinitas, cujus visio nos beatos facit: & Humanitas Christi, per quem ad gloriam Filiorum DEI accessum habemus: ut dicitur ad Rom: 5. seu per quem consequimur vitā æternā. Unde dicitur Joan: 17. Hæc est vita æterna, ut cognoscat te verū DEUM, & quem misisti JESUM Christum. Et ideo primò distinguuntur credibilia quæ pertinent ad Divinitatē: deinde, quæ pertinent ad Christi Humanitatem.

De Divinitate sunt Articuli sex: hoc est, de uno, & Trino DEO, & de operibus Divinitati propriis; videlicet, de opere Creationis, Sanctificationis & Glorificationis. *De Humanitate quoque Christi sunt articuli sex.* Itaq; 1^{mus} articulus est, de uno DEO, & Persona Patris, & de opere creationis 2^{us} articulus, de Persona Filii DEI Incarnati 3^{ius} de Conceptione ejus de Spiritu Sancto, & Nativitate ex MARIA Virgine 4^{us} de Passione ejus, morte, & sepultura, 5^{us} de Descensu ad inferos, & Resurrectione, 6^{us} de Ascensione, 7^{mus} de Adventu ad judicium, 8^{us} de persona Spiritus Sancti, 9^{us} & 10^{us} de opere sanctificationis, 11^{mus} & 12^{mus} de Opere Glorificationis. Hinc patet, quòd sicut duo sunt, quæ speramus videre in cælo: Scilicet Sanctissimā TRINITATEM, & Christi Domini Humanitatem: ita duo sunt præcipua hæc capita Fidei nostræ. Mysterium SS.

TRINITATIS, & Christi Domini Incarnationis.

Alii dant istam 12. Articulorum rationem dicentes, propter tres Personas Divinas, & tria opera Divina, duodecim articulos Fidei debere esse: qui primum articulum tribuunt Patri, ut Creatori, deinde sex sequentes Filio DEI, ut Redemptori. Jam verò reliquos quinque; Spiritui Sancto, ut Sanctificatori.

Isti verò duodecim articuli Fidei, sunt quasi duodecim partes principales Fidei, quæ partes vocantur articuli, ad similitudinem partium corporis nostri, quæ etiam dicuntur articuli. Unde sicut corpus in plures partes, seu articulos ob officia peculiaria distinguitur, ita etiã quæ fide creduntur debent in tot articulos distingui, quot sunt rationes, ob quas credibilia peculiarem habent difficultatem, propter inevidentiam eorum: unde quod habet specialem difficultatem, illud etiã specialem articulum habet.

Notandum præter Symbolum Apostolorum esse alia tria: *Nicænum, Constantinopolitanum, & S. Athanasii*; sed hæc sunt idem, quoad substantiam eum Symbolo Apostolorum, solum differunt quoad clariorem explicationem quorundam mysteriorum, quæ ad aliquas confutandas hæreses fieri debebant.

Notandum præterea: quod Fides nostra, eorū, qui ab orbe condito vixerunt, una fuit; ac numerū articulorum Fidei, temporum successu non crevisse, quantum ad substantiam, sed tantummodò quantum ad explicationem, & expressam professionem. Nam quæ explicite; & sub majori numero nunc à fidelibus

De Fide.

343

libus creduntur eadem omnia ab antiquis Patribus implicitè, & sub minori numero credita fuerunt.

Duo enim sunt communissima principia Fidei.

Primum, quòd DEUS est, *Secundum*, quòd circa hominum salutem providentiam habet: seu quòd omnium Provisor est, juxta illud *ad Hebr. 11.* Accedentem ad DEUM oportet credere: Quia est, & quòd inquirentes se Remunerator sit. In quibus principiis omnes articuli Fidei implicitè continentur. Nam hoc principium DEUS est, virtute includit in se hæc, & quæ ad unitatem Essentiæ Divinæ, & quæ ad Trinitatem Personarū, & quæ ad Attributa Divina spectant. Hoc verò principium, quòd DEUS sit Provisor universi, continet in se virtute ea, quæ spectant ad Creationem, Conservationem, Redemptionem, Justificationem, Glorificationem. Et quoniam omnes fideles ab orbe condito crediderūt DEUM esse, & esse Proviforem, seu omnium providentiam habere: ideo saltim implicitè in illis duobus principiis ea, quæ sunt in articulis Fidei crediderunt.

4. *Dividitur autem Fides in Fidem vivam & formatam: & in Fidem informem, ac mortuam, Fides viva est*, quæ est gratiæ sanctificantis & Charitatis conjuncta, qualis est in justis. *Fides mortua est*, & informis, quæ est à gratia, & charitate separata, ut est in peccatoribus. *Dicitur autem Fides mortua* ob peccatum mortale, per quod amittitur gratia & charitas: *tamen hæc Fides mortua, est vera Fides*; sicut & viva Fides; quia utraq;

est eadem secundum Entitatem & substantiam: & utraq; est à DEO; quia est donum DEI: & utraq; est virtus, licet informis, & mortua sit virtus quantum ad Essentiam specificam, non autem quoad perfectionem virtutis, quæ consistit in hoc, quod valeat ad consequendam vitam æternam: est tamen dispositio ad Pœnitentiam, Justificationem, & Salutem æternam.

Et quamvis in fidelibus peccatoribus sit Fides informis, non tamen est *indemonibus, & damnatis*. Quia Fides est donum DEI, quo homo ordinatur ad Beatitudinem æternam: dæmones autem, & damnati jam non ordinantur ad illam. Habent tamen dæmones aliquam Fidem acquisitam per experientiam, & per evidentiam miraculorum. Unde S. Jacobus de illis dixit: Dæmones credunt, & contremiscunt.

Beati quoq; in cœlo nec Fidem, nec Spem habent, quia quod nos credimus, & speramus, jam ipsi vident, & possident. Sed Fideles in purgatorio existentes habent Fidem: quia nondum sunt admissi ad claram visionem DEI: non sunt tamen propriè viatores; quia jam non possunt mereri: sed habent se sicut illi, qui ad portam civitatis perverunt, sed nondum sunt introducti.

Angeli verò & homo in primo instanti Creationis suæ habuerunt Fidem: quia Viatores erant, & in eo statu fuerant, quo ad DEUM tanquam ad Finem ultimum tendebant.

Notandum verò est, quòd ille qui aliquem articu-

ticulum Fidei non credit, quamvis alios credat, Fidem infusam, nec formatam, nec informem habet. Quia utraq; est donum DEI: & quia Veritas prima revelans æqualiter se communicat omnibus articulis Fidei.

5. *Actus Fidei est duplex: Interior*, qui est credere, seu, est internus assensus: nam credere nihil aliud est, quàm cum assensu cogitare. *Et Exterior*, qui est ipsa confessio Fidei, quæ fit ore, aut aliis signis exterioribus.

Actus internus Fidei dividitur per hoc, quod est: *Credere DEUM, Credere DEO, & Credere in DEUM*: qua de re S. Aug: *Serm: 181.* sic loquitur *Credere DEUM*, est credere, quia est (hoc est, quia est unus in essentia, & Trinus in Personis, quia est Omnipotens, summè bonus, misericors &c.) *Credere DEO*, est credere illa esse vera, quæ DEUS loquitur. *Credere in DEUM* est eum simul diligere, non quocunq; modo, sed sicut solent, qui vita & factis sunt Christiani. *Unde peccatores non credunt in DEUM*, nisi valdè imperfecto modo, inquantum possunt in DEUM suas actiones referre, tanquam in finem imperfectè amatum, *dæmones* autè nullo modo credunt in DEUM, sed solum credunt DEUM vel DEO.

Actus internus Fidei est nobis necessarius ad salutem: sed *Sciendum est* quòd quædam necesse est credere necessitate medii; quædam præcepti; quædam implicite; quædam explicitè quædam ad salutem primam, quædam ad secundam *Illud autem*
dici-

dicitur necessarium necessitate medii, quo prætermisso salus non obtinetur, etiamsi inculpabiliter prætermittatur, illud verò *necessarium necessitate præcepti*, quo culpabiliter prætermisso salus non obtinetur, eo verò inculpabiliter omisso salus obtineri potest: præterea illud *creditur explicitè*, quando creditur aliquid in particulari, & in seipso; *implicitè verò creditur*, quando aliquid creditur non in se, sed in alio; sic qui credit, quidquid credit Sancta Mater Ecclesia, implicitè credit mysterium SS. TRINITATIS, Incarnationis &c.

Insuper *salus prima* dicitur *Iustificatio*, seu gratia sanctificans, *Salus* verò *secunda* est ipsa gloria, seu *vita æterna*.

His suppositis, hoc tanquam certum tenendū est, ad obtinendam salutem sive primam, quæ est, iustificatio, sive secundam, quæ est vita æterna, necesse est necessitate medii, & præcepti, omnes adultos credere explicitè. *Primò* DEUM esse, & Remuneratorem esse; quia dicit Apost: *ad Hebr: 11.* Accedentem ad DEUM oportet credere quia est, & inquirentibus se Remunerator est. Tum etiam, qui tendit in finem debet præcognoscere illum: Finis autem est visio DEI Remuneratoris, Ergo debet præcognosci existentia DEI Remuneratoris.

Secundò Mysterium SS. TRINITATIS, & Incarnationis Christi, quia Fides est de iis, quæ sunt Objectum Beatitudinis. Objectum autem Beatitudinis nostræ est, SS. TRINITAS, & Christi Humanitas. Igitur debemus credere DEUM esse unū,
&

& trinum in personis; & Christum Humanā naturā
assumpsisse; ipsumq; esse verum DEUM & Homi-
nem; & pro nostra salute mortuum esse.

Sed ante Christi adventum, non fuit necessarium
necessitate mediū credere explicitē mysterium SS.
TRINITATIS, & Incarnationis; nam satis erat
adultis implicitē hęc credere; Christum esse nasci-
turum Redemptorem generis humani, & SS. TRI-
NITATEM.

Præter illa Myſteria SS. TRINITATIS & In-
carnationis, tenentur omnes necessitate præcepti
explicitē credere alios articulos in Symbolo con-
tentos: deinde tenentur explicitē credere, & nosse
Sacramenta tria: Baptismū, Pœnitentiam, & Eucha-
ristiam: præterea Decalogi præcepta: quia tenentur
illa adimplere; ergo etiam tenentur illa explicitē co-
gnoscere.

Tenentur quoq; scire præcepta Ecclesiæ, maxi-
mè Confessionis, & Communionis annuæ. Animæ
immortalitatem. Peccatum Originale. Quòd DE-
US sit orandus; & ideo debent scire orationem Do-
minicam. Non tamen tenentur hęc scire sub mor-
tali peccato memoriter, aut iisdem verbis quibus
proponuntur; sed sufficit, quòd illa sciant quoad sub-
stantiam, & significationem, ita, ut, si de illis in-
terrogentur, rectē respondeant, & illa debito tem-
pore observent.

*Obligatur autem, unusquisq; elicere actum Fi-
dei internum: Primò, quando adepto usu rationis
cognoscit necessitatem Fidei; nisi per invincibilem
igno-*

ignorantiam, aut inadvertentiam excusetur. Ob eandem rationem tenentur infideles actū Fidei elicerere, dum illis sufficienter credendi proponuntur Articuli Fidei. *Secundò*, quando Fidem tenetur exteriorius confiteri, quam non potest confiteri sinè actu interno Fidei. *Tertiò*, quando sinè eo non posset vinci gravis tentatio. *Quartò*, aliquando in vita. *Quintò*, in articulo mortis: quia tunc homo tenetur se convertere ad DEUM per actum contritionis, qui habet adjunctum actum Fidei, & Spei implicitū: cū nullus possit DEUM super omnia diligere, & peccatum detestari super omnia, quatenus est DEI offensa nisi in DEUM credat & speret.

Quantum ad actum Fidei exteriorē, qui dicitur Confessio Fidei, quæ fit ore, aut signis externis: Sciendum etiam hunc actum necessarium esse necessitate præcepti ad salutem. Est autem *Præceptū duplex*: *Affirmativum*, quod obligat semper, sed non ad semper; id est non pro quovis loco, & tempore, sed pro certo. Et *Negativum*, quod obligat semper, & pro semper.

Estigitur Confessio Fidei de necessitate præcepti affirmativi; quia quando locus, & tempus exigit, semper est facienda, etiamsi periculum fortunarū, aut vitæ sit adeundum. Dicit enim scriptura ad Rom. 10. Corde creditur ad justitiam, ore autem confessio fit ad salutem.

Tunc autem locus, & tempus exigunt à nobis exteriorē Fidei confessionem, quando à Rege, vel præside, aut ab aliquo, qui publica auctoritate fun-

gitur, interrogamur an simus Christiani? an credamus in Christum? tunc enim tenemur disertè confiteri, quòd credimus in Christum, & quod Christiani sumus: quia tunc magnus honor debitus DEO subtraheretur, & magnâ injuriâ DEUS afficeretur.

Quòd si quis privata auctoritate, seu à privatis interrogaretur, an esset Christianus, vel Catholicus? licitè cum posse reticere, aut rejicere, aut dissimulare; quia tunc non parvisceret honorem DEI, sed solum hominum importunorum quæstiones eluderet, & contemneret. Sic nomen Christiani usurpatur, non ad significandam Religionem, sed nationem; sicut apud Indos, per hoc nomen Christianus, intelligitur Hispanus; tunc licitè interrogatus an esset Christianus? posset non respondere se esse Christianum, immò posset negare se esse Christianum; cum non interrogaretur de Fide, sed de natione.

Quòd si alioquin Fides putaretur falsa; vel si proximus magnum pateretur scandalum, dum aliquis à privatis hominibus interrogaretur de sua Fide, tunc teneretur Fidem confiteri. Qua propter si vir gravis interrogaretur de Fide coram Hæreticis & Catholicis, teneretur Fidem confiteri, ad vitandum grave scandalum.

Verum *negare Fidem nullo modo licet*: quia de hoc est præceptum Negativum, quod obligat semper, & pro semper: & ideò quod præcepto negativo prohibetur, in nullo casu admittere licet.

Sed sciendum est: *Aliud esse negare Fidem verbis, factis, aut signis: Aliud verò occultare: signa autem*

autem quibus possit occultari Fides sunt duplicia: *Alia* quæ directe & primario sunt instituta ad Religionem falsam profitendam; ut sunt sacrificia Paganorum, thura, vestes sacrificulorum, Circumcisio, agnus Paschalis apud Judæos, cæna apud Lutheranos. *Alia* verò signa sunt politica, ad usus profanos instituta; ut vestis, qua civis à rustico, miles à mercatore, & gens una ab alia distinguitur. Igitur quamvis possit Christianus illicitè uti signis, vestibus, & actionibus, quæ sunt propria illi nationi, in qua conversatur, & illis occultare suam Fidem: quia Christianus non tenetur semper, & ubiq; locorum suam Fidem profiteri, sed pro tempore & loco: nihilominus nunquam licet Christianis uti signis, vestibus, quæ sunt ordinata ad profitendam falsam Religionem, quia talibus signis uti, est omnino profiteri illam sectam, propter quam sunt instituta.

6. *Causa principalis efficiens Fides vivæ* est ipse DEUS: quia Fides viva est donum DEI: & ideo *Concil. Trident. sess. 6. cant. 3.* definit: Neminè posse credere, sperare, & diligere, sicut oportet, sine speciali auxilio gratiæ. Etiam Fides informis est à DEO, tanquam à causa principali efficiente, non inquantum est mortua ob adjunctum peccatum mortale, cujus DEUS non est auctor; sed substantialiter in genere Entis inquantum est Fides: proinde & Fides informis hoc modo est donum DEI, quia tam Fides viva, quàm informis quoad substantiam & entitatem est eadem: ergo sicut viva Fides, est donum DEI ita & informis.

Effectus Fidei S. Thom: duos esse ostendit: Primus est Timor. Alter Puritas cordis. Quidam addunt Tertium, Contemptum mundi.

Imprimis *Timor* effectus Fidei, qui est duplex: *Servilis & Filialis*, *Timor servilis* est ille, quo quis timet, nè à DEO puniatur; talis timoris est causa Fides; per Fidem enim cognoscimus DEUM esse, eundemq; futurum Judicem, diem iudicii tremendum, pœnarum inferni æternitatem, ex quibus apprehensis oritur servilis timor. *Timor Filialis* est ille, quo quis timet offensam DEI, & nè ab illo separetur; qualis timor procedit ex eo, quia credimus per Fidem, quòd sit DEUS quoddam Bonum immensum, infinitum, summum, à quo disjungi est infelicissimum. *Hic timor filialis* est effectus Fidei formatae per Charitatem: Ille autem servilis est effectus Fidei informis.

Secundus Effectus Fidei est Puritas cordis: sic enim *Act: 15.* Petrus dicit de Fide: *hæc puritas est cogitationum, affectionum, sermonum, operumq; munditia;* Cujus causa est Fides; quia per illam anima ad DEUM sustollitur, & per hoc à rebus terrenis, & ab earum contagione separatur, & sic pura efficitur: tunc enim quælibet res contrahit impuritatem, quando rebus vilioribus immiscetur; ut cum aurum stanno miscetur.

Tertius effectus Fidei secundum aliquos est Contemptus mundi, qui nihil est aliud, quam abrenuntiatio omnium visibilium, propter amorem DEI: Cujus abrenuntiationis & contemptus causam assignat

gnat Apost: ad Hebr: 11. Hæc est victoria, quæ vincit mundum, fides nostra: Nam per hanc cognoscimus solum DEUM esse omne bonum, & cœlestia bona esse vera bona, jam verò terrena esse caduca & vana bona; propterea merito sunt contemnenda.

7. Quia virtuti contrariatur vitium, ideo & Fidei opponitur vitium infidelitatis & Confessioni Fidei opponitur Blasphemia est autem. Infidelitas duplex: Quædam est purè Negativa, ut est in eo, qui nihil audivit de Fide: nec potuit audire, & est in ipso ignorantia Fidei invincibilis, qualis infidelitas non est peccatum, sed potius pœna ex peccato primorum parentum orta. Quædam infidelitas est Positiva, ut est in eo, qui Fidei sibi annuntiatae contradicit, nec vult illi assentiri, sed eam contemnit; & hæc infidelitas comparata ad illa peccata, quæ sunt contra virtutes Morales, est maximum peccatum; quia magis avertit hominem à DEO, quem nec cognoscit, nec colit, quàm alia peccata, in quibus homo cognoscit DEUM, sed non colit. Sed comparata infidelitas, ad peccata quæ sunt contra alias virtutes Theologicas, Spei, & Charitatis; est minus peccatum: quia illa peccata supponunt infidelitatem, & ultra hanc addunt novam malitiam; igitur sunt graviora.

Non debemus tamen dicere, quod *omnis actio infidelium sit peccatum*: quia licet non possint facere opera bona meritoria, ad quod requiritur gratia Divina, quam ipsi non habent, tamen possunt facere aliqua

aliqua opera moraliter bona: ut fecit Samaritanus infidelis, qui vulnera proximo alligavit.

Sunt autem *Infidelitatis tres species: Paganismus, Judaismus, & Hæresis*. Cum enim peccatum infidelitatis consistat in renitendo Fidei; si igitur aliquis renititur Fidei nondum susceptæ, talis infidelitas est Paganorum. Si verò quis renititur Fidei susceptæ in Figura; & sic est infidelitas Judæorum. Si autem in manifestatione veritatis, sic est infidelitas Hæreticorum, ad quos pertinent Apostatæ à Fide.

Quod si considerentur varii infidelitatis errores indiversis hominibus, tunc sicut in infinitum possunt multiplicari errores, ita & infidelitatis species. *Sic S. Thom. 22. q. 10, a. 5.*

Inter has infidelitates gravior est Judæorū, quàm Gentilium; quia Judæi susceperunt Fidei figuram, sed eam malè interpretando corrumpunt. Hæreticorum verò infidelitas omniū gravissima; quia suscipientes & profitentes Evangelium illud corrumpunt.

Prohibetur autem Christianis cum infidelibus communicatio: tū in pœnam Hæreticorum, tū ad cautelam fidelium simpliciorum propter periculum subversionis. Sed hæc communicatio dupliciter accidit: Aut quoad Religionem; & sic fidelibus non licet in illorum Synagogis, vel concionibus, vel sacris interesse, nè ea approbare videantur. Aut in rebus civilibus, sic fidelibus permittitur communicatio cum infidelibus.

Aliud est vitium oppositum confessioni Fidei. v.

Y

Blasphe

Blasphemia, quæ propriè significat quodlibet maledictum, aut convitium, quod lædat famam aut DEI, aut alicujus hominis; sed hîc sumitur Blasphemia, prout importat quandam derogationem excellentiæ Divinæ bonitatis, quod fit, vel negando aliquid de DEO, quod ei convenit: vel tribuendo aliquid creaturæ, quod soli DEO convenit. Estq; *Blasphemia peccatum mortale maximum* ad infidelitatem pertinens; quia licet blasphemans non sentiat id esse verum, quod dicit de DEO; induit tamen personam sentientis ita esse; & sic blasphemia includit infidelitatem. *Est autem duplex Blasphemia.* *Alia est cordis*, quæ est secundum intellectum; & hæc opponitur interno actui Fidei, qui est credere. *Alia est Blasphemia oris*, quæ est secundum exteriorem locutionem; & sic opponitur exteriori actui Fidei: videlicet confessioni. In damnatis est modò interior blasphemia, quæ est Divinæ justitiæ odium, & detestatio ipsius DEI? sed post resurrectionem erit forsan in eis exterior, seu vocalis blasphemia; sicut in sanctis in cælo, vocalis laus DEI erit.

Præter dictas blasphemias est etiam specialis *blasphemia in spiritum Sanctum*. Dicitur autem blasphemia seu peccatum in Spiritum Sanctum, non tantum dum aliquis dicit aliquid blasphemum contra tres Divinas Personas; vel contra tertiam Personam SS. TRINITATIS; vel qui usq; ad mortem in mortali peccato perseverat; sed specialiter dum aliquis peccat ex certa malitia, repellendo illa, quæ

quæ eum à peccato retrahere possent: hoc est, cō-
temnendo dona, & gratiam Spiritus Sancti, quæ
homini oblata erant ad peccata impedienda, & ad
salutem promovendam: & sic est peccatum in Spi-
ritum Sanctum; quia est contemptus gratiarum Spi-
ritus Sancti.

Cujus *blasphemia, seu peccati in Spiritu San-
ctum sunt species sex*; Desperatio, Præsumptio, Im-
pugnatio veritatis agnitæ, Invidentia fraternæ gra-
tiæ, Impenitentia, Obstinatio. Sex enim sunt
gratiæ, seu remedia, quæ homini inspirantur à Spi-
ritu S. per quæ peccata evitari possint. *Primò*, confi-
deratio Divinæ misericordiæ ex una, & Divinæ ju-
stitiæ ex altera parte: & hoc tollitur per desperati-
onem. *Secundò*, timor, quem immittit Spiritus S.
qui oritur ex consideratione Divinæ justitiæ pu-
nientis peccata; & hoc tollitur per præsumptionē:
cum quis præsumit, quòd veniam sine pœnitentia,
& gloriam sine meritis, possit adipisci. *Tertiò*, a-
gnitio veritatis; hæc tollitur per impugnationem,
ut licentiùs vivere possimus. *Quartò*, auxilium
gratiæ, quod tollitur, cum quis gratiæ reluceni in
fratre, aut crescenti in mundo, invidet; & dicitur
invidentia fraternæ gratiæ. *Quintò*, consideratio,
quanta sit turpitudine actus peccati, ex quo oriri so-
let pœnitentia, de commisso peccato; & hoc tolli-
tur per impœnitentiam, quando quis habet proposi-
tum non pœnitendi. *Sextò*, cōsideratio, quanta sit
parvitas & brevitatis boni, quod in peccato quæritur,
& hæc consideratio inducit hominem, ut ejus vo-
lun-

luntas, non firmitur in peccato; & tollitur per obstinationem; quando homo in peccato firmat suum propositum.

8. *Praxis Fidei.* Primum, quod vir Asceticus & Spiritualis circa Fidem exercere debet, est *Æstimationis Fidei*: quia est maximum donum DEI ex Gratia specialissima unicuique nostrum datum; teste Apost: *ad Eph: 2.* Gratia, inquit, estis salvati per Fidem, & hoc non vobis, donum enim DEI est. Per quam benedictionem DEI accipimus, ut ait Apost: *ad Gal: 3.* Igitur qui ex Fide sunt, benedicentur cum Fidei Abraham. Præterea per fidem omnes ex DEO nascimur. Omnis enim qui credit, quoniam JESUS Christus est, ex DEO natus est 1. *Joan: 5.* Per Fidem Filii DEI efficimur, ut Apost: testatur *ad Gal: 3.* Omnes, inquit, Filii DEI estis per Fidem in Christo JESU. Per Fidem redimur hæredes vitæ æternæ, ut ipsemet Christus dixit, *Joan: 5.* Amen, amen dico vobis, quia qui verbum meum audit, & credit in me, habet vitam æternam. *Æstimando* autem hoc donum Fidei, quoties symbolum Apostolorum aut S. Athanasii, aut Nicœnum, quo Ecclesia in sacrificio Missæ utitur, recitamus, vel actus Fidei facimus, semper hoc debita cum reverentia peragendum est; & dū hæc ore proferimus, etiam mentis assensum iisdem præbeamus. Ex eadem vera æstimatione Fidei, sacrâ quoque scripturam, sacros codices, videlicet, Biblia Sacra, quæ non nulli viri piissimi flexis genibus legere solent: præterea res omnes sacras, & benedi-

ctas,

etas, imagines Sanctorum, & Reliquias eorum, omnes ritus & cæremonias Ecclesiæ Sanctæ, etiam Personas DEO dicatas in speciali reverentia habere debemus.

Secundum est: Gaudium de hoc Fidei dono, & animæ nostræ bono: eò quòd inter tot millia hominum pereuntium, quibus denegatum est hoc à DEO donum, nobis illud contulit benignissimus DEUS: ex quo dono cognovimus verum DEUM, Creatorem, Redemptorem, & Remuneratorem nostrum; cognovimus finem ultimum nostrum, V. Beatitudinem nostram: cognovimus & media ad illam obtinendam, per usum Sacramentorum, & observantiam DEI mandatorum. Et ideò Eunuchus ille Æthiops de quo *Act. 8.* scriptum est, postquam credidit dicens: Credo Filium DEI esse JESUM Christum; & baptizatus est, ibat per viam suam gaudens, ob ejusmodi Fidei donum. quod tunc à DEO accepit. Sic Apostolus Thessalonicenses monet *1. Epb. 5.* Semper, inquit, gaudete sinè intermissione orate in omnibus gratias agite. Causam hujus gaudii prius designans: Omnes enim, inquit, vos Filii lucis estis: hoc est, Filii Fidei; *ut Cardinalis Hugo ait.* Eodè modo S. Mater nostra Theresia morti proxima impensissimè lætabatur, quòd esset Christiana, & quòd esset Filia Ecclesiæ, quasi Fide progenita, quæ sæpius miro pietatis sensu hæc verba repetebat: *Sum certè, Domine, Filia Ecclesiæ.* Et de S. Sebastiano M. aliqui Auctores tradunt, quòd dum in Fidei Christianæ ludibrium, multis ignominiiis & injuriis

afficiebatur, ipse pectori suo hanc inscriptionem affixerit: *Christianus sum*: ut inde solatium suum, & honorem eximium se habere ostenderet.

Tertium est: Gratitude erga DEUM, pro tã excellenti dono gratuito nobis collato. Ad quod hortatur nos *S. Aug. Serm: 38. de verbis Apostoli 1. ad Corinth: 4.* non enim, inquit, Fides nihil est, sed magnum aliquid, quãsi habes, profectò accepisti. Quid enim habes, quod non accepisti? Videte Charissimi, unde D. DEO gratias agatis, nè in aliquo dono ejus ingrati maneatis. Tunc autem grati erimus, si ut veri Christiani vixerimus.

Quartum est: Rectus usus Fidei, quem in omnibus actibus nostris servare nos est necesse: quod fiet. *Primò cum Præsencia DEI cuncta operando*: scientes per Fidem, quia DEUS nos videt, & quia nobis præsentiissimus est; ex eo quia DEUS immensus est: ideò ubiq; est, & nobis adest, & quid facimus & cogitamus videt; ut omnia cum summa reverentia & timore DEI peragamus, & omne quod illi displicet, fugiamus. *Secundò, Contemnèdo mundum & terrena*, prout svadet *S. Joan: Evang: Nolite inquit, diligere mundum, neq; ea, quæ in mundo sunt 1. Joan: 2.* Sed quæ sursum sunt quærite: quæ sursum sunt sapite, non quæ super terram, ait Apost: *ad Coloss: 3.* Fide credentes: quòd nec oculus vidit, nec auris audivit, nec in cor hominis ascendit, quæ præparavit DEUS iis, qui diligunt illum *1. Cor: 2.* *Tertiò conservando in nobis vivam Fidem*: hoc est, cum charitate DEI conjun-

junctam: propter quod omnia peccata, per quæ
 Charitas amittitur, vitare maximè debemus. *Quar-*
to, conjungendo cum Fide bona opera. Nam Fi-
 des viva per bona opera probatur. Fides enim sinè
 operibus mortua est, *Jacobi 2.* Sed sunt multi, qui
 confitentur se nosse DEUM, factis autem negant:
 Ut ait Apost: 1. *ad Titum*: Et tales sunt, qui non
 servant mandata DEI. Nam qui dicit se nosse DE-
 UM, & mandata ejus non custodit, mendax est, 1.
Joan: 2. Ejusmodi quoq; sunt, qui credentes in
 Christum non sequuntur Christum in operibus ejus.
 Credis in Christum? *querit S. Bernardus*: fac o-
 pera Christi. Qui tē dicis in Christo manere, debes
 sicut ipse ambulavit, & tu ambulare. Quod si prò-
 priam gloriam quæris, florenti invidēs, absenti dē-
 trahis, reponis lædenti te. Hoc Christus non fecit.
 Confiteris te nosse DEUM, factis autem negas, *Sic*
S. Bern: Serm: 24. sup: Cant: Quinto, Actus
 Fidei frequenter & servēter exercendo. Nam Dia-
 bolus nihil magis impugnat, quàm Fidem, quæ
 est basis & fundamentum ædificii & vitæ spiritua-
 lis, contra quem recurrendum est ad arma Fidei, si-
 cut nos monet Apost: *ad Ephe: 6.* In omnibus,
 inquit, sumentes scutum Fidei, in quo possitis omnia
 tela nequissimi extinguere. Utamur igitur hoc scu-
 to Fidei, manē, in meridie, vesperi, & sæpius; in
 omnibus quoq; periculis, in tentationibus, potissi-
 mum verò in morte. *Præterea* in usu Sacramen-
 torum Pœnitentiæ, & Eucharistiæ, audiendo missā,
 & in Oratione. Immo in quolibet actu cujuslibet

virtutis, & in quolibet bono opere, Fidem profi-
tendo: hoc est protestando nos hæc omnia in Fidei
professionem exercere. *Insuper* in omnibus actio-
nibus nostris Fide nos gubernando: seu doctrina re-
velata à DEO, quam veram per Fidem agnovimus:
quod fieri potest hoc modo.

*Resuscitati a somno, hæc verba Sacre Scriptu-
ræ mente volvamus:* Vigilate, quia nescitis diem,
neq; horam. *Matt: 24.*

Hora est jam nos de somno surgere. *ad Rom: 13.*
Quærite primò Regnum DEI, & justitiam ejus,
Matt: 6.

Exeundo Domò. Ambula coram me, & esto per-
fectus. *Gen: 16.* id est, ambula secundum bene-
placitum meum: ut ait *Hugo Card:*

Ingrediendo Ecclesiam. Terribilis est locus iste,
non est hic aliud, nisi Domus DEI & porta Cæli.
Gen: 28.

In Oratione: Vigilate, & orate, ut non intretis
in tentationem. *Matt: 26.*

Omnia quæcunq; orantes petitis, credite, quia
accipietis, & evenient vobis. *Marci 11.*

Ut Otium evitemus: Dum tempus habemus, o-
peremur bonum. *ad Gal: 6.*

Cibum & potum sumentes: Sive manducatis, si-
ve bibitis, sive aliud quid facitis, omnia in gloriam
DEI facite. 1- *ad Cor: 10.*

Sobriè & justè, & piè vivamus in hoc sæculo.
ad Tit: 2.

Loquendo cum aliis: Sit autem sermo vester est,
est: Non, non. *Matt: 5.*

De

De omni verbo otioso, quod locuti fuerint homines, reddent de eo rationem, *Matt: 12.*

Sit omnis homo velox ad audiendum, tardus ad loquendum. *Jac: 1.*

Aspiciendo minus necessaria. Si oculus tuus dexter scandalizat te, erue eum, & proice abs te. *Matt: 5.*

Quiescendo. Ego dormio, & cor meum vigilat. *Cant: 5.*

Media nocte clamor factus est, ecce sponsus venit exite obviam ei. *Matt: 25.*

In afflictionibus. Cum ipso sum in tribulatione, eripiam eum & glorificabo eum. *Pf: 90.*

In infirmitate. Mihi vivere Christus est, & mori lucrum: cupiens dissolui, & esse cum Christo. *ad Philip: 1.*

In tentationibus. Dominus illuminatio mea, & salus mea, quem timebo? Dominus protector vitæ meæ, à quo trepidabo. *Psal: 26.*

Adjutor meus tu es: **DEUS** meus nè tardaveris. *Psal: 39.*

Hæc sunt exempli causâ allata plura similia gnarus Scripturæ Sacre in promptu habebit.

Præter hæc habentur Actus Fidei par: 2. pag: 119. quibus uti quocunq; tempore licebit.

C A P U T V.

DE SPE

Theologica Virtute.

Summarium Capitis.

I. *Spes definitur.*

II. *Objectum Spei ostenditur.*

III.

III. *Actus Spei describuntur,*

IV. *Vitia Spei opposita recensentur.*

V. *In quo consistit Beatitudo æterna declaratur.*

VI. *Praxis spei docetur.*

Ut melior hujus virtutis cognitio habeatur. *Sciendum est*, quod Spes nihil est aliud, quam expectatio alicujus boni: per quod differt à Timore; quia hic expectatio est mali, Spes verò aliquando significat motum appetitus sensitivi ad bonum sensibile futurum, arduum, possibile, & sic Spes vocatur passio sensitiva. Aliquando significat motū voluntatis ad bonum intelligibile futurum, arduum, possibile ad adipiscendum per vires naturales; & talis Spes potest dici Rationalis, Aliquando significat motum voluntatis ad bonum intelligibile arduum possibile per auxilium divinum: sic *Spes* dicitur Theologica, quæ *definitur sic*.

I. *Spes* est habitus à DEO infusus, per quem voluntas firmiter tendit in DEUM, ut in bonum arduum, futurū, consequi possibile ipsius Dei auxilio.

Seu: *Spes* est virtus, per quam firmiter speramus Beatitudinem æternam DEI auxilio, & per bona opera ex gratia DEI facta obtinendam. Hæc *Spes redditur firma ex duobus*. *Primo* ex DEI promissione, qua omnibus benè operantibus pollicitus est gratiam & gloriam, atq; ut benè operentur sufficientia auxilia, nisi in pœnam alicujus peccati denegentur. *Secundo* Habet firmitatem ex nostris meritis Divinâ gratiâ factis: sed ex hac parte admittit hæitationem & timorem; quia nullus potest esse omni-

omninò certus de suis meritis, & perseverantia in illis: Majorem tamè certitudinem habent justì, qui merita jam habent, quàm peccatores, qui illa non habent: & ideò in illis dicitur Spes viva, formata, & perfecta; in istis verò mortua, informis, & imperfecta.

Residet autem Spes in voluntate, in quantum est eminenter irascibilis.

2. *Objectum Spei Materialè primarium.* Est Beatitudo nostra æterna: seu est DEUS, ut est Beatitudo nostra. *Secundariū est* omne id, quod potest pertinere ad Beatitudinē æternā: ut est, visio Humanitatis Christi, Aureola, Dotes animæ & corporis: Et omne quod conducit ad Beatitudinem; ut est Pœnitentia, Remissio peccatorum: & bona opera ex gratia DEI facta; quia hæc sunt tanquam media, & instrumenta, ad nostram beatitudinē ordinata.

Formale Objectum Spei est auxilium DEI, ratione cujus speramus beatitudinem æternam nostrā possibilem, & obtinendam: speramus quoq; & bona opera vitæ æternæ meritoria à nobis facienda.

3. *Actus Spei* est sperare beatitudinē æternam, seu vitam æternam ex auxilio DEI, & bonis operibus gratia DEI præstitis obtinendam. *Debemus verò sperare primariò* in Gratia & Misericordia DEI, & auxilio ac meritis Christi: *Secundariò* in bonis operibus nostris ex gratia DEI factis.

Et quando istos actus facimus *Spero te Domine: Spero à te. Spero in te:* sensus istorū est: Spe-

ro te Domine videndum. Spero à te ad hoc auxilium tuum Divinum, & pro bonis operibus retributionem. Spero in Misericordia DEI, & meritis JESU Christi me salvandum, & gratiam tuam te mihi daturum, ad bona opera vitæ æternæ meritoria facienda.

Oportet autem nos elicere actum Spei, ut satisfaciamus præcepto Divino affirmativo quod obligat semper, sed non ad semper. Obligat autem nos, *Primò* cum quis ad usum rationis pervenit, eiq; sufficienter proponitur DEUS, ut ejus finis ultimus, & æterna beatitudo: tunc enim debet sperare beatitudinē à DEO. *Secundò*, quando aliquis contra spē tentatur, & vehementer ad desperationē inducitur: quia tunc homo tenetur actibus Spei munire seipsum. *Tertiò*, quando vel actus Pœnitentiæ, vel orationis ex præcepto sunt exercendi. Nam quotiescunq; tenebitur aliquis pœnitere, tenebitur & sperare: Actus enim Pœnitentiæ sinē spe veniæ esse non potest. Sic quando quis orabit, statim se exaudiendum sperare debebit.

Sed sciendum est, quod præter præceptum Affirmativum, est aliud Negativum, quod obligat semper, & pro semper: id est, ad nunquam desperandū.

4. *Sunt autem duo Vitia Spei opposita. Unum est per excessum, Præsumptio*, qua quis vult consequi beatitudinem, vel sinē meritis, quasi debitam sibi; vel sinē DEI auxilio, quasi ad id propria natura & vires sufficiant.

Unde duplex est Præsumptio: Alia quæ innititur

tur DEO, quæ de Misericordia DEI præsumit, sed modo non debito, talis Præsumptio fuit Lutheri, & Calvini, qui de DEO præsumebant, quòd illis gratiam sinè pœnitentia, & vitam æternam sinè meritis propriis, seu sinè bonis operibus esset daturus; Quæ quidem duo paratus est DEUS conferre modo à se præscripto, & gratiam, si pœnituerimus; & vitam æternam, si bona opera habuerimus.

Alia est Præsumptio, quæ innititur propriæ virtutis; cum aliquis de suis viribus sic præsumit, ut per illas, & peccatorum veniam, & vitam æternam sit adepturus: Et hoc vitium fuit Pelagianorum: & est peccatum contra spiritum S. Nam tollit, & contemnit auxilium gratiæ Spiritus Sancti.

Oritur autem illa Præsumptio prior, quæ innititur Misericordiæ DEI, *ex superbia*, per quam homo tanti se æstimat, ut putet, quòd eum DEUS etiam peccatorem non puniet, nec à gloria excludet. *Hæc verò Præsumptio*, quæ innititur propriæ virtuti, *oritur ex vana gloria* per quam homo attentat nova, quæ admirationem pariunt; novū autem est, id velle assequi, quod vires nostras excedit.

Alterum vitium oppositum Spei est per defectū Desperatio, per quam homo vel impossibilem reputat beatitudinis consecutionem, vel non confidit, DEUM auxiliū ad illius consecutionem sibi postulanti præbiturum.

Oritur autem Desperatio. Tum ex Luxuria, ex qua nascitur fastidium rerum spiritualiū; & idèò luxuriosus homo, solas delectationes carnis putat esse

esse bonū, jam verò beatitudinem æternam contemnit; & quia ad illam non aspirat, propterea de ejus consecutione desperat. *Tum ex Acedia*, ex qua homo deiicit animū, ut judicet beatitudinem sibi impossibilem.

Est autem Desperatio: Alia Mentalis, quæ solum est in ipsa voluntate. *Alia verbalis*, quæ per verba prolata foras prorumpit; qualis fuisse in Cain deprehenditur, qui dixit: Major est iniquitas mea, quam ut veniam merear. *Alia est Realis*, quæ operibus malis & factis se prodit in apertum; qualis fuit in Juda, qui laqueo se suspendit: talis est eorū hominū, qui tradiderunt se impudiciæ, & omni immunditiæ, & qui vitam in turpitudinibus peccatorum exigunt, & de his pœnitere nolunt.

Aliqui dividunt Desperationem respectu Objectionis, & dicunt, quòd alia est Desperatio veniæ consequendæ: & talis fuit in Cain & Juda. *Alia vitæ in melius mutandæ & emendandæ, & gratiæ obtinendæ*. Alia est Desperatio æternæ beatitudinis consequendæ. Hinc definiri potest *Desperatio*. *Est voluntas diffidens de remissione peccatorum, ac auxilio DEI ad vitæ emendationem, & ad bene agendum, & de vita æterna consequenda.*

Sunt verò sex Cause Desperationis. Prima est, quia non vult homo attentè considerare ea, quæ illum in spem æternæ beatitudinis erigere possint: ut, quòd DEUS sit bonus, misericors, & in omnibus suis promissionibus fidelis; & quòd unicuique quantumvis peccatori maximo sufficientia auxilia
gra-

gratiæ suæ dare consuevit. *Secunda est* nimia sollicitudo de rebus terrenis, & necessariis hujus vitæ; præsertim cum præjudicio Divinæ providentiæ, tanquam DEUS nihil omnino nobis conferat, nisi nostro labore quæsitum fuerit. *Tertia est*, cum quis ab orandi studio, & perseverantia desistit ideo quia non statim impetrat à Domino, quod petit. *Quarta est*, cum quis ingrediendo per contemplationem, in multitudinem ac enormitatem suorum peccatorum, incipit desperare de illorum venia. *Quinta est*, cum quis ob infirmitatem suam, & ob difficultatem vivendi secundum mandata DEI, desperat de vitæ suæ emendatione. *Sexta est*, cum quis secum recogitat, DEUM esse austum, rigidum, severum, & ideo diffidit de adeptione æternæ beatitudinis, ita, ut omnem spem illius consequendæ abiiciat.

5. Et quoniam illud quod per Spem Theologicam speramus, est beatitudo æterna, quæ est ultimus finis noster: ideo necesse est declarare, quid sit hæc Beatitudo, ut spiritualiter vivere incipientes, sciant illam æstimare, & ad eam obtinendam dic nobis; contendant.

Verum quidem est, quòd, secundum S. Thomā, omnes homines naturaliter appetunt Beatitudinem, secundum communem rationem Beatitudinis, quatenus est bonum perfectum, quod totaliter voluntatem explet & satiat: non omnes tamen sciunt, quod nam sit tale bonum, in quo vera Beatitudo consistit: & ideo aliqui Gentiles putabant Beatitudinem consistere in divitiis; aliqui in honoribus, alii in ve-

in voluptate; alii in fama seu gloria. Eodem modo etiam nunc aliqui peccatores statuunt suam Beatitudinem in prædictis, sed falluntur: quia nullum bonum creatum reperitur ita perfectum, quod totaliter satiare, implere, & quietare possit voluntatem nostram. Nam tale bonum est, solus DEUS, qui habet omnem rationem boni, & qui solus omnem voluntatem implere & satiare potest.

Est autem duplex Beatitudo: videlicet, *Objectiva & Formalis seu Essentialis*. *Objectiva* est res illa, quæ nos beatificat, & *talis est ipse DEUS*, qui est finis ultimus noster. *Formalis est*, adeptio illius rei, & possessio finis ultimi; & *talis est visio DEI*, quæ nihil est aliud quam clara cognitio DEI, ut est in se: Et ideo Beatitudo essentialiter consistit in Actu intellectus, seu in cognitione per quam consequimur DEUM ut finem ultimū: hoc est, habemus præsentem DEUM: Accidentaliter verò in actu voluntatis secundum ipsam delectationem, quæ consequitur Beatitudinem. Tunc enim voluntas nostra adepto fine ultimo, seu habito Deo, conquiescit, & de eo delectatur: sicut avarus dum habet pecuniam, quam desiderabat, delectatur de ea. Itaq; constitutivum status beatifici est visio DEI; quia in hac consistit essentialis Beatitudo nostra.

Est autem possibilis nobis Visio DEI: hoc enim docet Fides Catholica; Joan: 3. Videbimus eum facti est. Non quidem viribus naturæ nec comprehensivè, sed ex gratia DEI; alias homo nunquam
esset

esset beatus. Et licet Essentia DEI sit infinita; tamen potest ab intellectu cognosci modo finito. Quāvis enim in ratione Entis nulla sit proportio inter Essentiam DEI infinitam, & intellectum nostrum finitum; est tamen proportio ut inter potentiam & objectum: quia intellectus noster cum sit spiritus, sicut & DEUS, ideo sufficit ut DEUS in ratione objecti possit attingi, seu cognosci ab intellectu nostro: præsertim cum DEUS, ut est quoddam Ens, claudatur intra latitudinem objecti intellectus nostri, cujus objectum est Ens Universale comprehendens entia universa.

Videtur verò à Beatis DEUS non per aliquam similitudinem creatam representantem DEI essentiam, quæ ejusmodi dari non potest: quia deberet esse infinita: sed per intimam unionem essentia DEI cum intellectu Beatorum per lumen gloriæ elevato & disposito & corroborato, quod lumen est participatio Divini luminis: & ideo, sicut DEUS, per suum lumen increatum, videt seipsum; ita Beati, per lumen Divinum participatum & creatum, vident DEUM; in quo similes DEO erimus in visione, per participationem luminis gloriæ, non verò per aliam similitudinem. Est quia hoc lumen gloriæ inæquale datur Beatis; secundum majorem Charitatem datur unicuique; majus lumen gloriæ, quo mediante videtur DEUS; propterea inæqualiter Beati vident DEUM, sed unus alio perfectius, qui habuit plus Charitatis. Non differunt quidem Beati inter se quantum ad rem visam; quia eundem

Z

DE-

DEUM omnes vident: sed tantum quantum ad modum visionis: hæc tamen inæqualitas Visionis DEI nullam parit invidiam & mærorem in Beatis: quia satietas est de intrinseca ratione Beatitudinis: & quoniam quilibet Beatus plenè satiatur DEO, juxta suam capacitatem, sive secundum suam condignitatem meritorum & Charitatis, ideò nullus triflatur ob inæqualitatem visionis, nec eam invidet aliis.

Videntes autem DEUM in cælo nullo modo comprehendunt eum; id est, non cognoscunt DEUM sicuti cognoscibilis est: sic enim solus DEUS seipsum cognoscit: nam ad hoc deberent habere lumen gloriæ infinitum, quale communicari non potest creaturis: & licet totus DEUS videatur à Beatis, non tamen totaliter ut est visibilis. *Dicuntur verò Beati in cælo comprehensores,* non quod comprehendant DEUM, ita ut ipsum continent & claudant, sed quia ipsum cognoscendo attingunt, & jam consecuti sunt: & sic dici possunt comprehendere DEUM non continendo sed attingendo & consequendo. Et quia nullus intellectus creatus simpliciter potest comprehendere DEUM: ideò videndo eum non potest videre in ipso omnia, quæ facit, aut facere potest.

Hæc verò omnes Beati videntes Essentiam Divinam vident, videlicet, *Tres personas Divinas simul, & omnia attributa Divina:* ut Potentiam, Sapientiam, Bonitatem & alia: quia & Personæ & hæc attributa sunt idem formaliter cum essentia

Divi-

Divina. *Vident etiam clarè omnia mysteria gratiæ*, quæ in hac vita obscurè per Fidem credebant. *Præterea vident omnia genera, & species rerum conditarum*: quia hæc sunt numero finita & certa; non per aliquas similitudines creatas, sed per solam essentiam Divinam per quam & DEUS videtur: tamen singula specierum individua, & hominès cogitationes, & quæcunq; nondum facta sunt, etiamsi futura sint, & fieri possint, Beati in Deo, seu in Verbo videre non possunt: quia hæc cui vult revelat DEUS, iis, scilicet, qui cæteris clariùs videre Essentiam DEI meruerunt. Sic manifestat DEUS B. Petro quæ pertinent ad suam Ecclesiam; & Fundatoribus Ordinum, quæ spectant ad Ordines ipsorum. Simul autem, non successivè, in primo instanti suæ Beatitudinis quilibet Beatus videt in DEO omnia præterita, præsentia, & futura, quæ ad statum suæ beatitudinis pertinent. Unde etiam cogitationes hominum, & actus voluntarios tunc cognoscunt radicaliter seu causaliter, hoc est, quia ex visione Verbi oritur, ut fiant Beatis peculiare revelationes de his rebus: non autem formaliter, & distinctè, nisi à Deo revelentur, quæ revelatio fit successivè; sed istæ revelationes non spectant ad essentiã Beatitudinis: quia sunt accidentaria, & adventitia.

Insuper Beati vident pœnas damnatorum ut Beatitudo illis magis complaceat: non tamen gaudent per se de pœnis eorum, sed per accidens, contemplan-do in illis iustitiam Divinam.

Ad eandem Beatitudinem pertinent tres dotes

animæ: videlicet, *Visio*, quæ correspondet Fidei, *Comprehensio*, quæ correspondet Spei. *Fruitio*. quæ correspondet Charitati: quæ dotes sunt velut quædam honoraria præmia, & ornatus animæ, pro actibus trium virtutum Theologicarum in hac vita exercitarum.

Et quia corpora nostra cooperantur nunc animæ in operibus bonis! ideo post resurrectionem, eadem corpora participabunt gloriam beatitudinis cum animabus suis. Quæ corpora habebunt etiam dotes suas: Impassibilitatem, scilicet, Subtilitatem, Agilitatem, & Claritatem.

Et quamvis omnes Catholici speremus illam Beatitudinem æternam; nihilominus ista spes timorem de illa consequenda nobis non aufert. Terret enim unum quemq; nostrum illud, quod dicitur. *Eccli: 9*. Nescit homo, utrum amore, an odio dignus sit. Propterea nos commonet *Petr: Apost: 2. Petr: 1*. dicens: Satagite, ut per bona opera certam vestram vocationem & electionem faciatis. Et *Paulus Apost: ad Philipp: 2*. Cum metu, inquit & tremore vestram salutem operamini. Pro solatio tamen nostro notantur aliqua signa salutis à spiritualibus Magistris, & Doctoribus piis.

Primum est signum salutis. Fides viva cum Charitate & bonis operibus conjuncta; qualis Fides quinq; prudentum Virginum fuit, de quibus dicitur, *Matt: 25*. Prudentes Virgines acceperunt oleum in vasis suis cum lampadibus, & intraverunt cum Sponso ad nuptias; quia cum Fide bona op-

opera & virtutes habuerunt; ut SS. Patres dicunt.

Secundum signum est. Observatio diligens & perfecta mandatorum DEI usq; ad mortem. Ita enim *ipsemet Christus Dominus dixit*: Si vis ad vitam ingredi, serva mandata, *Matthei 19.*

Tertium, Fuga & Abominatio omnium peccatorum: *quia dicitur Apoc: 21.* Non intrabit in eam, (id est, Civitatem Sanctam Jerusalem) aliquid coinquatum, aut abominationem faciens, & mendacium.

Quartum, Resignatio, seu Conformitas cum voluntate Divina in omnibus. Sic enim *Christus dixit*: Non omnis, qui dicit mihi, Domine, Domine, intrabit in Regnum cœlorum: sed qui facit voluntatem Patris mei, qui in cœlis est, ipse intrabit in Regnum cœlorum. *Matt: 7.*

Quintum. Humilitas & Contemptus sui, *ipsemet teste Christo Domino, qui dixit*: Amen dico vobis, nisi conversi fueritis, & efficiamini sicut parvuli, non intrabitis in regnum cœlorum. *Matt: 18.* Et rursum: Sinite parvulos, & nolite eos prohibere ad me venire: taliū est enim regnū cœlorum. *Matt: 19.*

Sextum, Charitas erga proximos, etiam inimicos: & injuriarum oblivio. In hoc cognoscent omnes, *inquit*; Christus, quia Discipuli mei estis, si dilectionem habueritis adinvicem, *Joan: 13.* Et: Diligite inimicos vestros, benefacite his, qui oderunt vos: Et, Orate pro persequentibus & calumniantibus vos: ut sitis Filii Patris vestri, qui in cœlis est.

est. *Mattb: 5.* Et: Dimittite, & dimittemini.
Luc: 6.

Septimum, Vera & constans Pœnitentia, & proprii corporis castigatio. *Sic enim Christus ait:* Pœnitentiam agite: appropinquavit enim regnū cœlorum *Matt. 4.* Et *S. Paulus:* Castigo, inquit, corpus meum, & in servitutem redigo: ne fortē cū aliis prædicaverim, ipse reprobus efficiar. *1. Corinthb: 9.*

Octavum, Frequens, pius & devotus SS. Eucharistiæ usus. Nam qui manducat hunc panem ait *Christus*, vivet in æternum. *Joan: 6.*

Nonum, Devotio erga Passionem D. nostri JESU Christi, & frequens meditatio de ea, cum pia Cōpassione interna & externa. Si enim compatimur, etiam conglorificabimur. *ad Rom: 8.*

Decimum, Tribulationes, quibus DEUS per totam vitam exercet suos, quas ipsi sustinent cum patientia. Nam per multas tribulationes oportet nos intrare in regnum DEI. *Act: 14.* Et: Quem diligit Dominus castigat: flagellat autem omnem Filium, quem recipit. *ad Hebr: 12.*

Undecimum, Religiosus status. Nam quod Dominus Apostolis dixit, hoc idem Religiosis competit: Vos inquit, qui reliquistis omnia, & secuti estis me; centuplum accipietis, & vitam æternam possidebitis, *Matt: 19.*

Duodecimum, Devotio singularis erga Virginem Sanctissimam: sic enim multi Sancti Patres sentiunt: ut, *S. Anselmus.* Sicut, inquit, ô Beatissima, omnis
 à te

à te averſus, & à te deſpectus, neceſſe eſt ut intereat: ita omnis ad te converſus, & à te reſpectus, impoſſibile eſt ut pereat. *Et S. Germanus:* Nullus eſt, qui ſalvus fiat, ô Sanctiſſima, niſi per te. *Et S. Antonius,* Impoſſibile eſt, quòd illi, à quibus Virgo MARIA oculos Miſericordiæ ſuæ avertit, ſalventur: ita neceſſarium, quòd hi ad quos convertit oculos ſuos, pro eis advocans juſtificentur, & glorificentur.

Verùm ultra hæc, ſunt præcipua alia ſigna ſalutis, quæ ipſemet, Chriſtus Dominus in Beatitudinibus recenset dicens. Matth: 5.

Beati pauperes ſpiritu: quoniam ipſorum eſt regnum cœlorum.

Beati mites: quoniam ipſi poſſidebunt terram.

Beati qui lugent: quoniam ipſi conſolabuntur.

Beati qui eſuriunt & ſitiunt juſtitiam: quoniam ipſi ſaturabuntur.

Beati Miſericordes: quoniam ipſi miſericordiam conſequentur.

Beati mundo corde: quoniam ipſi DEUM videbunt.

Beati pacifici: quoniam Filii DEI vocabuntur.

Beati qui perſecutionem patiuntur propter juſtitiam: quoniam ipſorum eſt regnum cœlorum.

IV. Praxis Spei virtutis Theologica.

Primum eſt quod curare debemus, ut ſemper habeamus Spem vivam, cum Charitate & Virtutibus conjunctam, *Quæ de re ſic ait S. Bernardus Serm: 1. in Pſal: 90.* Sunt, inquit, qui ſperant quidem in Domino, ſed fruſtra: quia ſic de mi-

misericordia ejus sibi ipsis blandiuntur, ut à peccatis suis non emendentur; vana est omninò Spes ista, & hæc confundit, eò quod Charitas desit. *Idem Serm. super Salve Regina:* Spes, ait, sine vita virtutum, non est Spes, sed Præsumptio.

Secundum est, ut procuremus habere semper conscientiam bonam, (Quoniam, si cor nostrum, *inquit B. Joannes* non reprehenderit nos, fiduciam habemus ad DEUM, & quidquid petierimus accipiemus ab eo. Qui autem conscientiam habere dici possent, subiicit: Quoniam mandata ejus custodimus, & ea quæ sunt placita coram eo facimus. 1. *Joan:* 3, *Et S. Aug:* in præfatione *Psalmi* 31. Ille, *inquit*, sperat, qui bonam conscientiam gerit: quem verò pungit mala conscientia, retrahit se à spe, & non sibi sperat, nisi damnationem. Ut ergo speret regnum, habeat bonam conscientiam; & ut habeat bonam conscientiam, credat & operetur: quia quod credit, Fidei est, quod operatur, Charitatis est.

Tertium est, ut quantumvis aliquis rectè agat, suis tamē nil meritis penitus adscribat, sed sola DEI misericordia nitatur. Nam periculosa, *inquit S. Bernardus*, habitatio eorum, qui in meritis suis sperant; periculosa, quia ruinosà. Tota Spei salus, & omne ipsius meritum Christus Crucifixus est.

Quartum, ut patientiam cum Spe copulemus: hoc est; ut spes nostra patiens sit. Sic enim nos monet Apostolus *ad Hebr:* 10. Nolite, *inquit*, amittere confidentiam vestram, (videlicet in tribulationibus & afflictionibus) quæ magnam habet re-

mune-

munerationem. Patientia enim vobis necessaria est, ut voluntatem DEI facientes, reportetis promissionem. *Et ad Rom: 5.* Scientes quòd tribulatio patientiam operatur, patientia autem probationem, probatio verò Spem.

Quintum, ut Spes nostra sit constans, etsi aliquando, immò sæpius cadamus, spes tamen nunquam deponenda est, sed quoties cadimus, toties resurgamus: si millies cadim⁹ millies resurgamus. Est enim promissum DEI certissimum: Quoniam in me speravit liberabo eum, eripiam eum, & glorificabo eum *Psal: 90.* Nam nullus speravit in Domino & confusus est. *Eccl: 2.* Bonus est enim Dominus sperantibus in eum. *Tbren: 3.* Et *S. August: in Prefat: Psal: 31.* Optimus ergo ille, *inquit*, qui & vitam tenet, & benè ibi ambulat: sequentis autem Spei est, qui etsi aliquantulum claudicat, non omnino errat, aut remanet, sed progreditur, etsi paulatim.

Sextum, ut benè agentes speremus ex auxilio DEI Beatitudinem, seu vitam æternam & omnia media ad eandem consequendam. Videlicet: Remissionem peccatorum, Mortificationem passionum, Victoriam tentationum, Adeptionem virtutum.

Septimum, ut quod speramus, idem à Domino DEO cum fiducia petamus. Si quis, *inquit S. Jacobus*, indiget sapientia (& quacunq; re) postulet à DEO: postulet autem in Fide, nihil hæsitans. *Jacobi 1.* Et *S. Joannes.* Hæc, *ait*, Fiducia, quam habemus ad eum, quia quodcunq; petierimus se-

cun-

cundum voluntatem ejus, audit nos. 1. *Joan: 3.*
 Et ipse *Salvator noster*: Et ego, *inquit*, dico vobis.
 Petite, & dabitur vobis, Omnis enim qui petit accipit. Quis autem ex vobis petit Patrem panem nunquid lapidem dabit illi? aut si petierit ovum, nunquid porriget illi scorpionem. *Luc: 11.*

Octavum, Ut post DEUM nostrum in Sanctorum, præcipue verò in Beatissimæ Virginis *MARIÆ* intercessionem spem nostram collocemus, exemplo Ecclesiæ Sanctæ, à qua in Antiphona *Salve Regia* vocatur *spes nostra*: ut eam quoq; appellavit *B. Ephræm in Orat: de Laud: SS. DEI Matris*, *B. Aug: Serm: 18. de Sanctis*. Et *S. Bernard: in serm: in Nativitate ejus*. Filioli hæc peccatorum scala, hæc mea maxima Fiducia est, hæc tota ratio Spei meæ.

Nonum, Ut quemadmodum semper ad magna & heroica aspirare debemus; ita etiam ad eadem facienda, auxilium DEI speremus: seu ut heroicam spem in DEO habeamus: & talis Spes dicitur firma & infracta Fiducia in DEO. *Qualis Spes heroica*, seu Fiducia singularis in DEO; de *S. Abraham Patriarcha ab Apostolo ad Rom: 4. prædicatur*. Quod contra spem in spem credidit, ut fieret Pater multarum gentium: nec consideravit corpus suum emortuum, cum jam esset centum annorum, quando ei filius promittebatur à Domino, qui in remissione DEI non hæsitavit dissidentia, plenissime sciens, quia quæcunq; promisit, potens est & facere. *Talis Spes heroica & S. Job fuit*; qui in suis

tri-

tribulationibus dicere solebat: Etiam si occiderit me, in ipso sperabo. De Sancto etiam P. N. Joanne à Cruce constat; quia immensam penè spem & Fiduciam in DEO habebat. Nam quidquid ad Majorè ejus gloriam, & proximi utilitatem aggrediebatur, non in propriis viribus, sed in Divina confidebat omnipotentia se illud perfecturum. Unde sæpius dicebat: O Spes cælestis, quæ tantum obtines, quantum speras!

Decimum, Ut frequenter per diem Actus spei exerceamus, qui habentur *Par: 2. pag: 122. & 124.* Et Actus Fiduciæ *pag: 155.*

Præterea secundum varias occasiones occurrentes his jaculatoriis actibus uti possumus.

Manè & Vesperè, In te Domine speravi non confundar in æternū: in justitia tua libera me, (hac die, vel nocte,) ab omni malo. *Psal: 30. His adjungantur & alii versus usq. ad finem Psalmi ejusdē.*

Intentionibus, Eripe me de inimicis meis DEUS meus: & ab insurgentibus in me libera me. Disperge illos in virtute tua *Psal: 58.*

Quoniam tu es, Dominus, Spes mea *Psal: 90.* Si consistent adversum me castra, non timebit cor meum. Si exurgat adversum me prælium, in te Domine sperabo. *Psal: 26.*

Mirifica misericordias tuas, Domine, qui salvos facis sperantes in te, *Pf: 16. Et Psalmus totus 12.*

In afflictionibus, DEUS noster refugium & virtus: adjutor in tribulationibus quæ invenerunt nos nimis. *Psal: 45.*

Factus

Factus est Dominus refugium pauperi, adiutor in opportunitatibus, in tribulatione sperent in te, qui noverunt Nomen tuum: quoniam non dereliquisti querentes te, Domine. *Psal: 9.*

Spes mea, tu Domine, in die afflictionis *Jer: 17.*

Qui tribulant me exultabunt si motus fuero: ego autem in misericordia tua speravi. *Psal: 12.*

In periculis. Qui habitat in adiutorio altissimi, in protectione DEI cœli commorabitur Dicit Domino: Susceptor meus es tu, & refugium meum: DEUS meus sperabo in eum. Quoniam in me speravit liberabo eum, protegam eum quoniam cognovit nomen meum. *Psal: 90.*

In te speraverunt Patres nostri, speraverunt & liberaſti eos. Ad te clamaverunt & salvi facti sunt: in te speraverunt, & non sunt confusi. *Pf: 21.*

In quacumq; necessitate, Miserere mei DEUS: quoniam in te confidit anima mea. *Psal: 56.*

Dominus firmamentum meum, & refugium meum, & liberator meus. DEUS meus adiutor meus, & sperabo in eum. *Psal: 17.*

Fiat misericordia tua Domine super nos, quemadmodum speravimus in te. *Psal: 32.*

Nullus speravit in Domino, & confusus est. *Ecclesi: 2.*

Beatus vir cujus est nomen Domini Spes ejus. *Pf: 5.*

In timore aliqui. Dominus illuminatio mea, & salus mea, quem timebo? Dominus Protector vitæ meæ, à quo trepidabo? *Psal: 30.*

Ecce DEUS Salvator meus fiducialiter agam & non timebo: quia fortitudo mea & laus mea Dominus, & factus est mihi in salutem. *Isaia 12.* Vi-

Viriliter agite, & confortetur cor vestrum omnes qui speratis in Domino. *Psal: 30.*

In scrupulis, Sacrificate sacrificium iustitiæ, & sperate in Domino. *Psal: 4.* Spera in Domino, & fac bonitatem. *Psal: 36.*

In infirmitate. Etiam si occiderit me in hoc ego sperabo. *Job: 13.*

Veniant mihi miserationes tuæ & vivam. *Psal: 118.*

In Domino sperans non infirmabor. *Psal: 25.*

Tu es Spes mea portio mea, in terra viventium. *Psal: 141.*

Ad te, Domine, Domine, oculi mei, in te speravi non auferas animam meam. *Psal: 140.*

Eundo ad capiendam quietem. In pace in idipsū dormiam & requiescam. Quoniam tu, Domine, singulariter in spe constituisti me. *Psal: 4.*

Ad te Domine levavi animam meam, DEUS meus in te confido non erubescam. Custodi animā meam & erue me, non erubescam quoniam speravi in te. *Psal: 24.*

Hic habet locum Psalmus totus 30.

CAPUT VI.

DE CHARITATE.

Summarium Capituli.

- I. Charitas definitur ejusq; natura describitur.
- II. Subjectum ejus & augmentum declaratur.
- III. De Objecto Charitatis agitur.
- IV. Actus principalis illius ostenditur.
- V. Effectus dilectionis recensentur.

VI. Vitia Charitati opposita enumerantur.

Quamvis in Sacra Scriptura vox Amoris Dilectionis & Charitatis pro eodem fere sumatur, nihilominus quando de virtute agitur, usitatio Charitatis est usus, teste *S. Aug: Lib: 14. de Civit: DEI* quæ sic definitur.

1. *Charitas est virtus Divinitus infusa, quâ homo diligit DEUM propter ipsum, & proximum propter DEUM.* Seu: *Est habitus supernaturalis inclinans voluntatem ad amandum DEUM supra omnia propter se, amore amicitiae.* Dicitur propter se: hoc est, non propter bonum nostrum; quia tunc non esset amor amicitiae, sed concupiscentiae. Nam amare ut ait *S. Thom: ex Arist:* Est bonû alicui velle, vel sibi, vel alteri. Velle bonû sibi, est amor concupiscentiae. Velle bonum alteri, id est, amato, est amor amicitiae. Unde in Spe est amor cōcupiscentiae: in Charitate autem est amor amicitiae. Proinde *S. Thom: 2.2. q. 23. ar: 1. dicit:* quòd Charitas est quaedam amicitia ad DEUM: quæ requirit benevolentiam mutuam; præterea mutuam amorem seu redamationem: requirit etiâ, ut fundetur super alicujus boni communicatione: sicut hæc amicitia ad DEUM, fundatur super communicatione boni perfectissimi, quod est æterna beatitudo, quam communicat nobis DEUS: & id ò Charitas est amicitia perfectissima inter DEUM & hominem, & est supernaturalis. Nam quælibet amicitia fundatur in aliquo vinculo, quo animi amicorum vinciri possint; & hoc

De Charitate.

383

si sit naturale, etiam amicitia erit naturalis; si autem sit supernaturale, etiam amicitia erit supernaturalis: sed hoc vinculum, quo iustum cum DEO uniuntur, est merè supernaturale; in hac vita est gratia, in futura est beatitudo: ergo est supernaturalis.

Hæc Charitas qua DEUM & proximum diligimus, *non est Spiritus S.* mentem humanam inhabitans, sed *est habitus creatus*, qui mentibus nostris à Spiritu S. infunditur; secundum Apost: ad Rom: 5. Charitas DEI, *inquit*, diffusa est in cordibus nostris per Spiritum S. qui datus est nobis. Quæ Charitas quamvis sit finita, producit tamen affectum infinitum, dum conjungit animam DEO, iustificando ipsam, quod accidit ex virtute infinita agentis DEI.

Est autem Charitas Virtus omnium virtutum excellentissima, & omnium virtutum, forma & Regina: & Mater, finem qua nulla virtus tam infusa quam acquisita est virtus perfecta & meritoria vitæ æternæ.

Charitas est virtus, quia est qualitas, qua bene utimur & nemo illa malè uti potest, & quam DEUS in nobis finem nobis operatur: Et quia attingit DEUM conjungendo nos DEO, qui est suprema regula actus virtutis. Nam virtus consistit in attingendo regulam humanorum actuum, quæ est duplex: Ratio humana, & ipse DEUS. *Præterea Charitas est virtus specialis*: quia habet speciale Objectum circa quod versatur: videlicet bonum Divinum: seu DEUM, ut est summum bonum in se,

&

& summè amabilis propter semetipsum: per quod distinguitur à Fide, & Spe, & ab aliis virtutibus moralibus. *Præterea Charitas est virtus excellentissima*: quia attingit DEUM secundum se ut in ipso sistat tanquam in eo, quod est summè amabile; non ut ex eo aliquid nobis proveniat: Fides autem attingit DEUM, secundum quod provenit ex eo cognitio veri. Spes verò attingit DEUM, secundum quod provenit ei adeptio boni, seu æternæ beatitudinis. Et ideo Charitas est excellentior Fide, & Spe, & per consequens aliis virtutibus tam Intellectualibus quàm moralibus, quæ attingunt rationem humanam, ut suam Regulam. Deinde finè Charitate reliquæ virtutes non sunt meritoriaæ vitæ æternæ: & ideo Charitas dans eis condignitatē meriti, erit illis præstantior.

Præterea Charitas est omnium virtutum forma: quia per illam ordinantur actus omnium virtutum ad ultimum finem. Nam finis est ex quo virtutes sumunt suam formam. Et ideo quod dat actui ordinem ad finem, dat ei & formam; & sic Charitas, quia dat actibus ordinem ad finem, dat ipsis etiam formam; & propter hoc forma virtutum esse dicitur.

3. Est autem Charitas tantæ perfectionis, ut etiam in minimo gradu existens sit perfecta. Per hoc enim *infuse virtutes differunt à moralibus*, quod quævis infusa, etiam in remisso gradu, potest suos actus producere, quia inest ei vis Divina; morales autem virtutes diminutæ nequaquā possunt. Unde
mini-

minima Charitas etiam hos effectus producit, quòd amat DEUM super omnia, & proximum propter DEUM, & ordinat omnes virtutes in DEUM, peccatum mortale secum non compatitur, actus meritorios vitæ æternæ operatur, & ad implenda Divina præcepta est sufficiens.

1. *Præterea, Charitas est Regina virtutum:* ipsa enim imperat actus omnium virtutum, eosque dirigit ad DEUM, ut finem ultimum *Est quoq; Mater illarum:* quia ex ea omnes aliæ virtutes nutriuntur, & quia ex appetitu ultimi finis concipit actus aliarum virtutum imperando ipsos.

2. *Insuper absq; Charitate nulla virtus potest esse perfecta:* quia absq; illa, in ultimum ac perfectum bonum non dirigitur. *Denig, sine Charitate nulla virtus est meritoria vitæ æternæ.* Nam sola Charitas omniū virtutum actus ordinat in DEUM, qui est ipsamet merces nostra; in cuius visione consistit beatitudo nostra, & vita æterna.

II. Et quoniam Charitas habet pro Objecto suo bonum Divinum, quod solo intellectu cognoscitur: ideo *Charitatis subiectum non potest esse, nisi appetitus intellectivus, qui dicitur voluntas:* non autem appetitus sensitivus, cuius objectum est sensibile bonum, quod per sensus apprehenditur.

Est verò Causa Charitatis ipsemet DEUS. Nā a solo Spiritu S. nobis infunditur; quia fundatur super communicationem beatitudinis æternæ, quæ communicatio non est secundum bona naturalia, sed secundum bona gratuita: quia ut dicitur ad

Rom. 6. Gratia DEI, vita æterna. Unde Charitas neq; est nobis naturalis, neq; per vires naturales acquiri potest; sed per infusionē Spiritus S. qui est amor Patris & Filii, cujus participatio in nobis est ipsa Charitas participata. Infunditur autē unicuiq; Charitas, non secundū capacitātē naturālē, sed secundū volūtatē Spiritus S. distribuentis sua dona prout vult.

Que Charitas, quamdiu vivimus augeri potest.

Ex hoc enim in hac vita dicimur esse Viatores; quia in DEUM tendimus, qui est ultimus finis nostræ beatitudinis: in hac autem via tantò magis procedimus, quantò magis DEO appropinquamus per affectum Charitatis, per quam DEO unimur. *Augeatur autem Charitas* non per additionem unius gradus Charitatis ad alterum gradum, sed per majorem *radicationem* seu inhæSIONem in voluntate tanquam in subiecto. *Radicari* verò nihil aliud est, quàm firmiùs inhærere, seu magis ac tenaciùs inesse subiecto. Et licet Charitas augeatur intensivè, non *augeatur* tamen *extensivè*: quia minima Charitas extendit se ad illa omnia, quæ sunt ex Charitate diligenda: & sicut cuilibet tentationi potest resistere, quodlibet opus virtutis poterit imperare & exercere absq; eo, quòd augeatur extensivè. Neq; hoc augmentum fit per quemlibet actum Charitatis, nisi dispositivè; in quantum ex quolibet actu Charitatis homo redditur promptior ad agendum secundum Charitatē, & habilitate crescente homo prorumpit in actum ferventem dilectionis, quo conatur ad profectum Charitatis: & tunc Charitas auge-

augetur in actu. *Quod augmentum Charitatis à solo DEO tanquam à causa principali effectivè producitur, ab homine verò tanquam à causa secundaria moraliter & dispositivè.* Quia ab eo augmentum Charitatis producitur effectivè à quo & ipsa Charitas : à solo autem DEO effectivè producitur Charitas; ab ipso quoq; & augmentum Charitatis producitur. Et sicut homo moraliter & dispositivè concurrit ad augmentum gratiæ, ita & ad augmentum Charitatis. *Circa quod augmentum hæc notanda sunt: Primum,* quòd per solum actū ferventiorē Charitas augeatur. *Secundum,* quòd per quemvis actum Charitatis mereamur illius augmentum. *Tertium,* quòd hoc promeritum augmentum non detur, nisi postquam homo per actum ferventiorē se disposuerit. *Quartum,* quolibet actu Charitatis nos mereri vitam æternam.

Potest verò Charitas semper augeri donec præsentem eū habeat, quē diligit, qui omne ejus desiderium tunc implebit: unde in hac vita nullus est terminus augmenti Charitatis. Est enim participatio quædam infinitæ Charitatis, quæ est Spiritus S. Et DEUS creans & augens Charitatem est infinitæ virtutis. Et in voluntate capacitas per Charitatem augetur, quia per ipsam cor dilatatur. Et quavis Charitas ex parte Objecti, V. DEI qui est infinitè diligibilis nullius creaturæ potest esse perfecta, quia nulla creatura potest DEUM infinitè diligere: tamen ex parte diligentis tunc est Charitas perfecta, quando diligit DEUM tantum, quantum potest.

Quod quidem contingit tripliciter. *Uno modo sic*, ut totum cor hominis actualiter semper feratur in DEUM. Et hæc est perfectio Charitatis Patriæ. *Alio modo*, ut homo studiū suū deputet ad vacandū DEO, & rebus Divinis prætermiſſis aliis, nisi quātū necessitas præſentis vitæ requirit. Et ista perfectio Charitatis est in via possibilis, quæ paucorū hominum est. *Tertio modo ita*, ut habitualiter aliquis. totum cor suum ponat in DEO, ut nihil cogitet, vel velit, quod Divinæ dilectioni contrarium sit: & hæc perfectio est communis omnibus Charitatem habentibus, quam omnes homines habere debent.

Non potest verò Charitas secundum se, ac directè diminui, dispositiva tamen & directè diminutionem admittit, quæ diminutio nihil est aliud, quàm dispositio ad corruptionem illius, quæ sit, vel per peccata venialia, vel etiam per cessationem ab exercitio operum Charitatis. *Verū totaliter amittitur Charitas, per quodlibet peccatū mortale* quo homo recedit à DEO, cui per Charitatem uniebatur. Nam quilibet actus peccati mortalis contrariatur Charitati: peccatum enim est transgressio præcepti Divini, quicquid autem contrariatur præceptis DEI manifestè contrariatur Charitati, quæ requirit ut totaliter subiciamur DEO servando præcepta DEI. *Præterea*, quia Charitas importat unionem quandam ad DEUM. Omne autem peccatum consistit in aversione à DEO, & ideo omne peccatum mortale contrariatur Charitati. Unde patet

tet quòd licet *Fides & spes remaneant informes*, quia non excluduntur per peccatum mortale; *tamen Charitas non potest remanere informis*, quæ uno peccato mortali perpetrato amittitur: & quod sit ultima forma virtutum respiciens DEUM, ut finem ultimum.

Sunt autem tres gradus Charitatis. Primus Incipientium, qui in eo occupati sunt, ut recedant à peccato, & pravis desideriis continuè resistent; & sic Charitatem in se nutrant, ac foveant, nè corrumpatur, ac pereat. *Secundus est Proficientium*, qui principaliter hoc intendunt, ut in bono, & in virtutum exercitatione proficiant, ut per hoc Charitas in eis augeatur, & roboretur. *Tertius est Perfectorum*, qui hoc præcipuè intendunt, ut DEO inhæreant, & fruantur: qui cupiunt dissolvi, & esse cum CHRISTO.

III. *Objectum Formale Charitatis est, Bonitas Divina* super omnia diligibilis. *Materiale verò est illud, quod habet bonitatem Divinam, vel essentialiter, ut est DEUS: vel participativè ut est proximus: & ideò DEUS est primum Objectum Charitatis: proximus verò secundarium.* Sub quo comprehenduntur omnia, quæ sunt aliquid DEI, & ut sunt capacia æternæ beatitudinis. Hinc colligitur *quatuor diligenda esse ex Charitate: DEUS, Proximus, Corpus nostrum, & Nos ipsi.* Nam Charitas fundatur super communicationem æternæ beatitudinis: hæc autem quatuor pertinent ad hanc cōmunicationem: DEUS quidem, ut beatitudinis æ

ternæ causa & principium; & ideo primo loco, & super omnia debet amari. Nos verò ipsi, ut ejusdem beatitudinis directè participes. Corpus autem, ut participans indirectè per redundantiam ex gloria animæ. Deniq; proximi tanquam socii nobiscum prædictæ participationis. Proximi verò dicuntur tam homines, quàm Angeli: tam amici, quàm inimici; tam iusti, quàm peccatores, quatenus isti cōverti possunt; Dæmones tantum & damnati excluduntur, quia jam non sunt capaces beatitudinis æternæ.

Imprimis autem ex Charitate diligendus est DEUS, tanquam primarium Objectum Charitatis, in quantum est bonitas increata & infinita, quæ facit DEUM super omnia propter seipsum, hoc est, amore amicitiae amabilem; & sic ex Charitate volumus DEO omne bonum, & de illius bonis gaudemus. Diligitur autem à nobis DEUS propter ejus bonitatem, non ut est quoddam attributum Divinum ab aliis distinctum, & prout dicit quandam particularem perfectionem in communicando se: sed ut bonitas Divina dicit quandam absolutam perfectionem in omni genere excellentiæ: sic enim dicit rationem formalem Objectivam Charitatis etiam in se continens omnia attributa Divina.

Deinde ex Charitate etiam Proximus est diligendus, ad quod præcepto Divino obligamur. *Matt: 26.* Diliges proximum tuum, sicut teipsum. Præterea, quia omnes sunt homines unius & ejusdem naturæ, propter quod necesse est, ut eos naturaliter dili-

diligamus. Sunt quoq; capaces gratiæ donorū supernaturalium, & ipsius beatitudinis æternæ, in quibus omnibus cum illis communicationem habemus; & ideo oportet ut eos ex Charitate diligamus. Non solum autem iusti sed etiam peccatores sunt ex Charitate diligendi, non quo ad peccatū secundum quod sunt peccatores, propter quod sunt odibiles DEO, & sunt inimici DEI: sed quo ad naturā suā, secundum quam sunt capaces æternæ beatitudinis, propter quod proximi nostri dicuntur.

Immo etiam Inimici sunt ex Charitate diligendi, non inquantum sunt inimici nostri secundum suam pravam affectionem peccati: sed ut sunt homines, & inquantum sunt capaces visionis Divinæ: quia sic sunt proximi nostri; qua de re est præceptum DEI speciale. *Matth. 5.* Diligite inimicos vestros. Quod præceptum de diligendis inimicis non debet nobis videri grave; siquidem est juris naturalis: fundatur enim in hoc præcepto naturali: *Quod tibi non vis fieri, alteri nè feceris.* Sed nemo vellet odio haberi ab eo, quem injuria affecit, immò euperet ab eo amari: ideo vice versa, si quispiam ab aliquo injuria affectus fuerit aliquando, debet omne odium ejus abolere, & in amorem convertere: *Nam quod tibi vis fieri, Et tu facias alteri.*

Sciendum autem est Christum Dominum non dedisse novum præceptum de diligendis inimicis, sed antiquum male intellectum, & à Judæis depravatū, suæ integritati restituisse. Judæi enim ex hoc, quod pro-

proximus sit diligendus, inferebant: ergo inimicus odio habendus; non animadvertentes, quòd inimici sint proximi, quos jubemur diligere.

Est autem de necessitate Charitatis ut signa & beneficia communia, quæ aliis proximis in communi exhibemus, eadẽ quoq; inimicis exhibeamus; signa autem & beneficia singularia & specialia exhibere inimicis non est de necessitate Charitatis, nisi in casu necessitatis. Quia nemo tenetur magis diligere inimicum quàm ut alios proximos diligimus: sed non tenemur omnibus proximis specialia signa Charitatis exhibere, nisi in casu necessitatis. Ergo nec inimicis. Potest tamen contingere aliquando quòd magis tenemur inimico specialia signa exhibere, quàm alteri. *Primò* ob vitandum scandalum: nè alii deprehendant nos exercere odium, nisi in tali casu speciale signum amoris exhiberem⁹. *Secundò*, si videamus hoc esse necessarium, ut in nobis odium restringamus. *Tertiò*, si ad placandũ inimicum, & ad salvandam animam ejus adverteremus id esse necessarium.

Hinc necessarium est, ut quoties inimicus nos salutat, eum resalutemus; ita ut si non resalutatio esset contemptus notabilis personæ insignis; & in præsentia personarum illustrium, unde scandalum oriretur, tunc non resalutare esset peccatum mortale; si autem inimicus esset inferioris conditionis, ut servus respectu nobilis viri, tunc nullum peccatum esset. Quòd si obvium inimicum haberem, salutare ipsum verbo, aut alio signo simpliciter non tene-

teneor: quia salutatio est signum speciale, quod etiam aliis proximis non teneor impendere. Quod si per signum salutationis meae possum lucrari inimicum; sic ex Charitate teneor ad hoc ei præstandum: præterea si inimicus sit aut Prælati, aut in aliqua dignitate constitutus, cui ab omnibus signa honoris exhibentur; tunc sub mortali teneor ad similem honorem illi exhibendum, præsertim si notabilis contemptus personæ hinc oriretur.

Sed sciendum *quis modus servandus est in condonanda injuria inimicorum.* Nam tria sunt quæ ex injuria illata nascuntur. *Primum est dolor, & animi amaritudo, ex quæ odium & malevolentia oritur, ita ut ei qui nos injuria affecit malè cupiamus: & hoc odium statim ab initio est deponendum: aut si fuerit admissum, quàm primùm abjiciendum.* Ita enim præcipit Christus Matth: 6. Si non dimiseritis hominibus, nec Pater vester dimittet vobis. *Secundum quod ex injuria oritur, sunt signa doloris & amaritudinis opere externo declarata; & hæc salva conscientia non sunt licita.* Si autem is, qui offendit petit veniam, tunc tene-mur per exteriora signa declarare nos aut nullū odium concepisse, aut jam deponere, nec velle animū malevolū retinere. *Hoc enim requirit à nobis præceptum Christi Luc: 17. Si peccaverit, inquit, in te frater tuus increpa illum: & si poenitentiam egerit, dimitte illi: & si septies in die peccaverit in te, & septies in die conversus fuerit ad te dicens: Poenitet me; dimitte illi. Quod si Superio-*

riores ab aliis inferioribus offensi fuerint non debent statim ad priorem amorem admittere eos, à quibus injuriam acceperunt; quia hoc ad illorum cautelam, & ad exemplum aliorum est utile. *Tertium quod ex injuria oritur*, est actio in foro externo, cum à judicio requirimus injuriæ reparationem, & hoc licitè fieri potest: quia unicuiq; liberum est apud legitimum judicem jus suum persequi; præsertim si agitur de bonorum restitutione, aut de famæ læsione. Si tamen is, qui nos læsit, veniam petit, & condignam satisfactionem offert, tunc in jus vocari non debet: nam videtur jam injuria illata cessare.

Debet quoq; homo quilibet etiam seipsum diligere ex Charitate: quia hoc præcipitur *Matth. 22.* Diliges proximum, sicut te ipsum: in quo præcepto implicite unicuiq; mandatur sui dilectio quæ debet esse mensura & regula dilectionis proximi: & quia homo est aliquid DEI, in quo relucet similitudo & imago DEI: unde sicut principaliter quilibet debet diligere DEUM, ita secundariò & ea quæ sunt DEI: Et quia quilibet potest sibi velle bonum spirituale, gratiam, videlicet, & gloriam æternam. Et quamvis vituperentur ab *Apostolo 2. ad Timot. 3.* Homines amantes seipsos: tamen hoc debet intelligi de illis, qui se amant secundum naturam sensibilem, & secundum concupiscentiam, cui indulgent, non verò de illis, qui amant seipsos secundum naturam rationalem, & qui sibi volunt ea bona, quæ pertinent ad perfectionem rationis.

Immo

Inmò etiam corpus suum debet homo ex Charitate diligere: quia est à DEO: & quia possumus eo uti ad servitium DEI: & quia est instrumentum bonorum operum, per quod cultum DEO exhibemus, & illius gratiam promeremur: & quia est capax æternæ beatitudinis per redundantiam ex gloria animæ. Et quamvis Apost: ad Rom: 7. Conquereretur de suo corpore, dicens: Infelix ego homo, quis me liberabit de corpore mortis hujus? nihilominus Apostolus non conquereretur de corpore sub ratione corporis, sed de concupiscentia & fomite peccati, quem nomine corporis vocat. Neque valet dicere: Si corpus amandum est: ergo jejuniis, disciplinis, ciliciis &c. non est affligendum. Nā tunc maxime dilectionem corpori impendimus cum illud per mortificationem à peccatis arcemus: & ideo Apost: ad Colloss: 3 nos monet Mortificate, inquit, membra vestra.

Et licet homines boni & justi verè seipsos diligant: non tamen peccatores: quia non amant id, quod est in homine præstantius; non enim amant animam suam, nec illius salutem; ut dicitur Psal: 10. Qui diligit iniquitatem, odit animam suam. Unde seipsos amant secundum id, quod est in homine inferius; hoc est, secundum cupiditatem & sensualitatem, in quantum bona sensibilia & delectabilia sequuntur; qui ordinem naturæ invertunt, dum rationem cupiditatibus subiiciunt.

Insuper creature irrationales secundario tanquam media & subsidia nobis & nostris proximis
ad

ad salutem conferentia possunt diligere à nobis: Et ideo bona hujus vitæ (ut honores divitiæ, sanitas, doctrina) prout conferunt ad meritum gratiæ & gloriæ, & ad serviendum DEO & proximo, & ad opera misericordiæ, ex Charitate sunt diligenda.

Talis autem ordo in Charitate servari debet, ut ille magis diligatur, qui vel est majoris perfectionis, vel magis conjunctus diligenti. Propterea ante omnia debet amari DEUS; & post DEUM Humanitas Chriti, deinde Virgo Beatissima; postea plûs unusquisq; debet amare seipsum, quàm proximû: ex proximis plûs debet amare justos, quàm peccatores: plûs parentes, quàm fratres: plûs amicum, quàm inimicum.

Et imprimis principaliter, & maxime, ex Charitate diligendus est DEUS super omnia, & præ omnibus; idq; Objectivè, & Appretiativè, & intensivè. Objectivè, magis diligendus est DEUS, quàm Parentes, aut quivis alius proximus: nam dicitur Matth: 10. Qui amat Patrem, aut Matrè plûs quàm me non est me dignus. Appretiativè, quia magis æstimare debemus DEUM, quàm alia, & ideo debemus esse parati omnia alia bona amittere, & quævis mala pati propter amorem DEI. Intensivè quoq; diligendus est DEUS; quia omni conatu voluntatis, & fervore Charitatis ad eum amandum ferri debemus.

Etiam post DEUM Humanitas Domini nostri JESU Christi ex Charitate diligenda est magis quàm nosipsi, aut nostri proximi: quia est causas meri-

meritoria nostræ salutis, atq; etiam gratiæ & Charitatis, & omnium spiritualium bonorum.

Virgo quoq; Beatissima post DEUM & Christum plus omnibus est amanda; & *Objectivè* optando illi illam plenitudinem gratiarum, quæ illi ex privilegio singulari DEI est decreta: & *appretiativè*; quia hæc est Mater DEI, & salutis nostræ origo: & *intensivè*; quia est Mater misericordiæ, spes, & refugium peccatorum.

IV. *Est autem Actus principalis Charitatis Dilectio*, quæ differt à Benevolentia: quia hæc nihil est propriè nisi actus voluntatis, quo volumus alteri bonum, sinè ulla unione affectus ad illam: Dilectio verò est actus Charitatis quo volumus alicui bonum cum unione affectus ad amatum. *Hoc actu Dilectionis debemus amare DEUM propter seipsum*, cum DEUS sit ipsa essentia bonitatis per se, & ultimus finis omnium: quanquã *dispositivè propter aliud* à nobis diligi possit, quo inducimur ad ipsum amandum: puta propter beneficia ab eo suscepta, vel propter præmia sperata, vel propter pœnas, quas per ipsum vitare intendimus: per quæ disponimur & inducimur ad DEUM diligendũ. Unde *licite possumus diligere DEUM propter mercedem eternam*, ordinando ipsum actum dilectionis in DEUM, qui est ultimus Finis & ipsa merces æterna. Unde *Concil: Trid: Sess: 6. c. 11. definit*: Si quis dixerit justum peccare, cum intuitu vitæ æternæ mercedis, bene operatur, anathema sit. *Licite quoq; potest diligi DEUS propter bona*

temporalia, dummodo in his finem ultimum non constituamus. Nam & Ecclesia petit à DEO sanitatem, pluviam, agrorum fertilitatem &c. Et in Oratione Dominica petimus panem, & sub nomine panis bona temporalia: quia hæc sunt instrumenta virtutum, & subsidia ad serviendum DEO.

Neq; putet aliquis à nobis diligere DEUM amore mercenario, qui amor est malus, & Charitati contrarius, dum diligitur propter mercedem: quia tunc amor mercenarius est malus cum quis diligit DEUM propter solam mercedem, non referendo eam cum suo amore ad DEUM tanquam ad finem, qui eam confert mercedem: sed si quis diligit DEUM sperando ab illo mercedem, ita ut eundem diligeret seclusa mercede, tunc talis amor est bonus.

Neq; etiam aliquis putet in hac dilectione esse ordinem inversum, dum petimus à DEO res temporales, eò quod tunc Oratio res spiritualis ordinatur ad res temporales: quia nos preces nostras primario in honorem DEI referimus; secundario ad bona temporalia obtinenda.

Deinde debemus diligere DEUM Totaliter sumendo hoc Nomen totaliter, tam *Objective ex parte rei amate* ita ut totum, quod est in DEO, diligamus, cum DEUS totus sit amabilis. Quam *Subjective ex parte rei amanti*, ita, ut nihil sit in amante, quod non tendat in amorem rei amate. Sed si hoc nomen Totaliter sumatur ratione modi ita, ut tantum DEUM diligamus, quantum est amabilis, sic nullo modo possumus nec obligamur diligere DE-

DEUM; quia DEUS est infinitè bonus & infinitè amabilis, ergo est infinitè diligendus; quod nulla creatura præstare potest, cum ipsius dilectio sit finita.

Præterea diligendus est DEUS sine modo, seu sine ulla mensura: quia DEUS est finis ultimus; finis autem intantum est appetibilis, & amabilis; in quantum est bonus: DEUS autem est infinitè bonus; itaq; in infinitum erit appetibilis & amabilis & ideo sine ulla mensura, sine modo & Objective, & appretiative, & intensivè est diligendus: proinde in illius dilectione semper est proficiendum. *Per accidens tamen ex parte subjecti aliqua mensura & modus propter nostram infirmitatem est servandus,* nè succumbamus. Nam aliqui plus nimium jejunando &c. ex amore DEI, debilitantur. In actionib; quoq; externis cum sint media ad finem, mensura est adhibenda; unde regulari debent prudentiâ, ut fiant quando oportet, & nè una operatio aliam impediat, præsertim cum ex præcepto sit exercenda.

Obliganur autem diligere DEUM & proximum ex DEI mandato de quo Matth: 22. Diliges D. DEUM tuum ex toto corde tuo &c. Et proximum tuum sicut teipsum. Et quamvis Charitas, qua diligimus DEUM & Proximum sit una virtus, propter unam rationem formalem diligendi, quæ est bonitas Divina per se summe amabilis, propter quam diligimus DEUM propter se, & proximum propter DEUM: *nihilominus duo sunt præcepta à DEO data de dilectione DEI & Proxi-*

mi: Unū quidē quo inducimur ad diligendum DEUM, sicut finem: & aliud quo inducimur ad diligendū proximū propter DEUM, sicut propter finē. Unde *dilectio DEI & Proximi duo sunt actus Charitatis propter quos data sunt praecepta duo.* Verum quidem, est quod in dilectione DEI includitur dilectio proximi; & è converso: nihilominus debebāt dari duo praecepta de hac utraq; dilectione, propter homines min⁹ capaces qui non considerant unum horū praeceptorum in alio contineri: quæ praecepta includuntur in omnibus praeceptis Decalogi, & hæc ordinantur ad dilectionem DEI & proximi.

Præcepit autē DEUS *Deut: 6.* ut eū diligamus ex toto corde, ex tota anima, & ex tota fortitudine: & in Evangeliiis additur, ex tota mente, ex tota Virtute & ex omnibus viribus (sed hæc nomina, fortitudo, virtus & vires pro eodem sumuntur) quod sic explicat *S. Thom: 2. 2. q. 44. 4. 5. in c.* Præcipitur, inquit nobis, ut tota nostra intentio feratur in DEUM, quod est diligere eum ex toto corde: & quòd intellectus noster subdatur DEO, quod est ex tota mente: & quòd appetitus noster reguletur secundū DEUM, quod est ex tota anima: & exterior actus noster obediat DEO, quod est ex tota fortitudine, vel virtute, vel Viribus DEUM diligere. Quod præceptū de dilectione DEI in hac vita non potest perfectè adimpleri, ad quod requiritur, ut homo totaliter uniatur DEO, sicut fiet in Patria, seu in Cælo, ubi hoc præceptum plenè & perfectè implebitur. In hac vita verò imperfectè impletur, ubi unus aliò tantò

tantò perfectiùs implet illud, quantò magis accedit
per quandam similitudinem ad patriæ perfectionem.

Et quoniam *hoc præceptum est Affirmativum*,
quòd obligat semper sed non pro semper: in quo in-
cluditur Negativũ, quòd obligat semper & ad sem-
per, id est, ut nunquam odio habeamus DEUM:
ideò *secundũ illud* præceptum affirmativum, *unus
quisq;* obligatur *elicere actum dilectionis*. *Primò*
quando venit ad usũ rationis, & cognoscit DEUM
esse suum Creatorem, & summũ Benefactorem. *Se-
cundò* cùm quis odio DEI tentatur. *Tertiò* quoties
vult elicere actum contritionis, qui est dolor de
peccatis ob amorem DEI, vel propter DEUM sum-
mè dilectum. *Quartò* in articulo mortis, & in e-
videnti vel probabili periculo. Sed secundũ consi-
lium Magistrorum spiritualium, optimum est, quàm
frequentissimè actus dilectionis DEI exercere, pro-
pter summam & infinitam bonitatem DEI, & ob
innumera beneficia ejus.

Et quia præter DEI dilectionem præceptum da-
tum est homini ut proximum diligeret sicut se ipsũ:
ideò hunc *Modum dilectionis, proximi quilibet
servare debet, ut eum diligit sicut seipsum, id est,
sanctè, justè & veraciter*. Quod non est intelli-
gendum: ut ait S. Thomas citatus, quòd aliquis
proximum sibi æqualiter diligit, sed similiter sibi.
Primò quidem ex parte finis, ut scilicet, aliquis di-
ligat proximum propter DEUM, sicut seipsum pro-
pter DEUM debet diligere: ut sic sit dilectio proxi-
mi sancta. *Secundò* ex parte regulæ dilectionis;

ut scilicet aliquis non condescendat proximo in aliquo malo, sed solum in bonis: sicut & suae voluntati satisfacere debet homo solum in bonis, ut sic sit dilectio proximi iusta, *Tertio* ex parte rationis dilectionis: ut, scilicet, non diligat aliquis proximum propter propriam utilitatem, vel delectationem, sed ea ratione, quod velit proximo bonum, sicut vult bonum sibi ipsi, ut sic dilectio proximi sit vera. Nam cum quis diligit proximum propter suam utilitatem vel delectationem, non verè diligit proximum, sed seipsum.

V. *Sunt verò effectus Charitatis duplices: Interioriores: Videlicet. Gaudium, Pax, Misericordia. Et Exteriores: Vid: Beneficentia, Eleemosyna, Correptio fraterna.*

Primus effectus Charitatis est Gaudium, quod etiam Delectatio dicitur. Sed in hoc differunt, quod Delectatio sit communis, tam ratione praeditis, quam carentibus: propriè tamen Delectatio tribuitur brutis, Gaudium verò Hominibus. Est autè Gaudium, affectio seu hilaritas quædam animi interior, ex amati desideratig, boni possessione consequens dilectionem. Estq; erga DEUM duplex Gaudium: Aliud puræ amicitiae, quo gaudemus de præsentia boni Divini ad ipsum DEUM: ut quia possidet infinitam perfectionem, infinitam beatitudinem &c. Aliud declinans ad amorem concupiscentiae: ut cum gaudemus quia DEUS est bonis præsens per gratiam, & erit per gloriam. Ad amorem proximi

proximi consequitur gaudium de ejus bono, quod nō est bonum concupiscentiæ, sed amicitiae.

Pax verò est quædam pacatio motuum, & quò ad alterum & quò ad nos. Seu Est unio tam appetituum in nobis, tum unio appetitus proprii cū appetitu alterius, tam quò ad corda, quàm quò ad verba, aut opera. Et hæc vocatur Concordia: ac proinde Concordia includitur in pace. Utramq; unionem efficit Charitas. Nam secundum quod DEUS diligitur ex toto corde, omnes appetitus nostri in unum, qui est ipse DEUS, feruntur. In quantum autem diligimus proximos sicut nosipsos, volumus implere eorum voluntatem, sicut & nostram: & sic omnium corda in unū Velle pacificè junguntur.

Misericordia secundum S. Aug: Est alienæ miserie in corde nostro compassio. Quod intelligendū est in ordine ad sublevationem talis miserie. Propriè autem Compassio dicitur quædam tristitia, & dolor animi de malo alterius. Seu, Misericordia est affectus voluntatis, quo secundū rationem movemur ad sublevandam proximi miseriam. Estq; distincta virtus à Charitate, cujus pars Potentialis potest dici: quatenus per se oritur ex Charitate, & adjungitur illi in ordine ad quandam partem Objecti secundarii, nempe ad sublevandum malum proximi. Ex eo enim quod Charitas gaudet de bono proximi tanquam de proprio, sequitur non modò ut tristetur de ejus malo, sed ut ad illum sublevandum conetur, qui est proprius affectus misericordiæ. Ideò autem dicitur distincta virtus à Charitate, quia habet quædam

dam specialem, & distinctam difficultatem à Charitate, vel quia versatur circa passiones moderandas, quæ in nobis oriuntur ex conspectu miseriæ proximi; aut enim plùs nimio commovemur ad levandù malum proximi; aut plùs nimio retardamur, & indurescimus, nè misereamur; aut quia æstimamus afflictum iustè pati: ergo ut tales passiones ad mediū rationis reducantur, aliquis habitus in mediocritate consistens requiritur.

Actus virtutis misericordiæ. Est sublevatio miseriæ alienæ sive temporalis, sive spiritualis & vocatur *Eleemosyna*. Numeranturq; communiter 14. *Septem corporales* scilicet *pascere esurientem, potare sitientem, vestire nudum, colligere hospitem, visitare infirmū, redimere captivum, & sepelire mortuum*: quæ in hoc versu continentur.

Visito, poto, cibo, redimo, tego, colligo, condo. *Septem aliæ sunt spirituales*: nempe *docere ignorantem, consulere dubitanti, consolari tristem, corrigere peccantem, remittere offendenti, portare onerosos, orare pro proximis*: quæ etiam continentur hoc versu:

Consule, castiga, solare, remitte, fer, ora. Ita ut sub primo verbo intelligatur Cōsiliū & Doctrina.

Beneficentia est actus Charitatis, quo alicui bonum ipso facto, & re ipsā exterius exhibemus. Hæc Beneficentia ut sit meritoria, illius actus, quo proximo subvenimus, per Charitatem referendus est in DEUM.

Eleemosyna est opus, quod datur indigenti ex
com-

compassione propter DEUM. Est verò Eleemosyna actus Charitatis, non solum ideo, quia actus omnium aliarum virtutum dirigit in DEUM, ut in fine ultimum, sed etiam ideo quia est actus à Charitate imperatus mediante misericordia productus. Ut verò Eleemosyna sit meritoria vitæ æternæ, debet esse impensa ex Charitate in DEUM, ita ut proximo indigenti, quem propter DEUM amamus, Eleemosynam largiamur. *Et licet corporalis Eleemosyna secundum suam substantiam considerata, non habeat effectum spirituales: nihilominus ex parte suæ causæ, hoc est, in quantum ex Charitate & misericordia procedit, quia propter DEUM exercetur, Sic habet effectum spirituales.* Primo, quod sit meritoria vitæ æternæ. Secundo, quod satisfaciatur pro pœnis, quæ post dimissa peccata remanent. In quo sensu Daniel loquitur ad Nabuchodonosor Regem, *Redime peccata tua Eleemosynis:* hoc est, prius pœnitentiam fac de peccatis, demùm illorum pœnas Eleemosynis redime. Tertiò, quod quando Eleemosyna fit ex motione Spiritus S. nondum quidem inhabitantis sed excitantis, videtur jam hominẽ ad iustitiam disponere & præparare. Quartò, Quia proximum, cui exhibetur Eleemosyna, monet ad orandum pro benefactore.

Sciendum autem est, quod Eleemosyna sola sine pœnitentia non dimittit peccata. Nam dicitur. *Luc: 13.* Nisi pœnitentiam egeritis, simul omnes peribitis. *Neg. item dimittit peccata ut Sacramentum:* quia solum hoc habent Sacramenta ex

Christi institutione. *Neq̃ etiam dimittit peccata ut certo & infallibiliter disponens ad recipiendam gratiã.* Sed tantũmodò remittit peccata quo ad pœnas illarũ præsupposita pœnitentia. *Obligamur verò ad faciendam Eleemosynam præcepto affirmati- vo,* quod non pro omni, sed pro certò tempore obligat: ut quando proximus est in necessitate, quã ego benè novi; & habeo tantas facultates, ut illi subvenire possim; & sinè magno incommodo rerũ mearum; præsertim cum nesciam certò; aut saltem probabiliter, an aliquis eum in hac necessitate iuvabit.

Correctio est actus adhortationis, quem impendimus proximo nostro ad emendationem ejus. Est autem actus Charitatis, à misericordia elicitus, per quem intendimus à spirituali miseria proximũ eripere. Est actus Charitatis; quia ad Charitatẽ spectat bonum proximi procurare, hoc est emendationem vitæ, quod fit per correctionem. Est quoq̃; actus à misericordia elicitus, quia misericordiæ est proprium commoveri super miseria proximi, hoc est, super peccato, quod est spiritualis miseria hominis gravissima.

Correctio appellatur alio nomine *Correptio*, sed cũ hoc discrimine, quod *Correptio* fit quædã Reprehensio, sive Monitio, quam non semper emendatio proximi sequitur: *Correctio* verò est adhortatio, quæ emendationem sortitur. His tamen nominibus Doctores promiscuè utuntur, ad significandum actum, quo proximi mediante monitione in melius

us vitam commutare cupimus. *Obligamur autem ad faciendam fraternam correctionem præcepto Divino, quod habetur. Matt: 18. Si peccaverit in te frater tuus corripe eum. Quod præceptum quia est affirmativum, idè non semper, sed pro certo, loco, tempore & aliis circumstantiis occurrentibus sub peccato obligat: præsertim si scio peccasse proximum; & si in peccato perseverat: si prævideo emendationem: si ob correctionem vitia dimittet: si scio, quòd non habeat, qui illum corripere possit; & si adste opportunitas coarguendi; deniq; si peccatum mortale commisit: in his casibus si correctio omissa fuerit erit peccatum mortale: quia tunc est tempus necessitatis proximum corrigendi; præcepta autem affirmativa obligant pro tempore necessitatis.*

Correctionis modum ipsemet Christus D. descripsit. Matt: 18. Si peccaverit in te frater tuus, vade, & corripe eum inter te, & ipsum solum; si te audierit, lucratus eris fratrem tuum; si te non audierit, adhibe tecum adhuc unum vel duos, ut in ore duorum, vel trium testium, stet omne verbum: quòd si non audierit eos, dic Ecclesiæ: si autè nò audierit Ecclesiam, sit tibi sicut Ethnicus, & Publicanus. In quibus verbis triplex modus Correctionis. Primus, secreta Correctio inter te & illu solum. Secundus, ut fiat Correctio in præsentia unius vel duorum. Tertius, ut fiat publica Correctio, hoc est, in facie Ecclesiæ, seu Congregationis. Sed quando peccatum proximi est publicum, tunc non est necesse ut præcedat Correctio secre-

ta; quia cessat causa privatae correctionis, videlicet, ne proximus infametur, qui publico crimine commisso jam se ipsum infamavit. Quod si secretum fuerit peccatum proximi, sed in magnum detrimentum multorum, & boni publici vergit tunc sine praemissa secreta correptione, statim palam ad denuntiationem procedendum: illud verò est peccatum publicum, de quo aliquis in iudicio est convictus; aut quod in aliqua vicinia circumfertur, aut in communitate, aut in Collegio, aut quando est publica infamia. Si verum fuerit peccatum secretum, & non cedat in malum aliorum, sed solū in ejus qui peccavit, & in illius, in quem peccavit; tunc secreta admonitio debet precedere, publicam denuntiationem: quia ex Charitate obligamur, ut proximo quantum possumus cum minimo detrimento ejus subveniamus. Quando verò ex certa & justa causa, colligimus nostram secretam correptionem nullum fructum allaturam: tunc omissa privata correptione statim ad publicam transire possumus. Sic Joseph Patriarcha fecit, qui omissa privata correptione, fratres suos apud patrem accusavit: quia illius monitionem non suscepissent, ex eo quod ipsi oderint.

VI. Vicia autem opposita Charitati, haec sunt, quorum aliud opponitur.

Astui Charitatis, qui est dilectio: ut Odium.
 Gaudio Charitatis (Divino, ut Acedia
 de bono (Proximi, ut Invidia

Paci,

Paci, quod committitur. (Corde, ut Discordia,
 (Ore, ut Contentio.
 (Schisma,
 (Opere, (Bellum.
 (ut (Rixa,
 (Seditio.

Misericordiæ ut Cordis duritia

Beneficiæ & Correctioni fraternæ, ut Scandalum.

Odium Dei est Aversio à Deo, seu displicentia.

Possunt autem homines impii duplex habere odiū contra DEUM & Abominationis per quam odio habent legem peccata prohibentem, & ipsum Legislatorem DEUM. Et Odium Inimicitie propter pœnas, quas eis infligit pro peccatis: quia vellent non esse justitiā DEI, & per consequēs ipsū DEUM; & tale odium est in damnatis. Unde nullo modo potest odio haberi DEUS, inquantū est Auctor eorum effectuum, V. Esse, vivere, Intelligere: Quia hæc Voluntati humanæ nullo modo displicere possunt. Et tantūmodò potest DEUS odio haberi, inquantū est Auctor eorum effectuum, qui perversæ voluntati humanæ displicent, ut, quod peccata prohibeat & quod pro eis pœnas infligat. Est autem odium DEI maximum peccatum. Nā peccati ratio cōsistit in voluntaria aversione à Deo, quæ aversio per se inest in odio DEI, in aliis verò peccatis est solum per participationem. Et quia odium opponitur maximo bono, nempe dilectioni DEI, qui est sumū bonum: ergo odium erit sumū malum.

Odium.

Odium Proximi est Aversio ab eo. Itaq; odisse fratrem secundum id, quod habet à DEO, v. naturam & gratiam, est peccatum: odisse verò id quod est & ab homine & à suggestionē diaboli v. peccatum, tale odium est meritorium: quia zelatur super iniquitatem impiorum, & vult eam annihilatam esse, tanquam id, quod iram DEI concitat.

Acedia est tristitia generans tedium & fastidium de rebus Divinis.

Invidia est tristitia de bono proximi, quatenus excedit proprium bonum, illudq; diminuit.

Discordia est quædam dissensio voluntatum & iudiciorum, per quam unus iudicat aliquid esse bonum vel verum: alius iudicat esse malum aut falsum; & per quam unus à voluntate alterius dissentit.

Contentio est quædam pugna, seu altercatio verborum, quæ dicit quandam contrarietatem, & discrepantiam adversus proximum; quæ Contentio contingit dupliciter: Primò contra veritatem, quæ est impugnatio veritatis: & sic est peccatum mortale, quando eo animo veritas ad Fidem pertinens, aut ad bonos mores, impugnatur: si autem exercitii causa, aut tentationis fiat, aut ex probabili ignorantia, tunc à mortali excusatur. Secundò fit Contentio contra falsitatem, quæ est impugnatio falsitatis: & hæc non est peccatum: nisi fiat excessus; aut in vocis intensione; aut in gestibus incompensatis; maximè si fiat non ad instructionem audientium, sed ad inanem ostentationem; & sic non carbitur pecca-

peccato: quod non erit contra Charitatem, sed contra modestiam. Si autem Contentio fiat in defensionem Veritatis, & in oppugnationem falsitatis cavendo ne fiat aliquis excessus; tunc non tam Contentio, quam defensio virtutis dicenda. Oritur verò tam discordia, quam Contentio ex inani gloria. Nam sicut illi dicuntur discordes, qui stant in suo sensu & iudicio, & unus alteri non acquiescit; Ita Contententes sunt, quorum unusquisq; id verborum contentione defendit, cui animo adhæret, per quod in utroq; inanis gloria relucet. Et ideo utrumq; ex inani gloria nascitur.

Schisma est græca dictio, quæ in latino scissione significat, v. eam separationem, quæ est partis à toto: ut cum quis separat se, & disjungit ab unitate Ecclesiæ, quæ est corpus mysticum, constans ex varia conditione fidelium, tanquam membris inter se connexis sub uno Capite Christi Vicario Summo Pontifice. Unde *Schisma* nihil est aliud, quam recessus seu separatio ab unitate Ecclesiæ & ab illius capite Summo Pontifice, cui renuit subesse.

Bellum est armorum conflictus ad hoc institutū, ut vi & armis parti adversæ noceatur, & injuria vindicetur. Estq; duplex *Defensivum*, quo nos, & Remp: & bona illius contra invasores defendimus. Et *Offensivum*, quo hostem Reip: armis aggredimur, ad hoc ut ex hoste vindictam sumamus. Utrumq; bellum est licitum, & primò *Defensivum*; quia sui defensio est juris naturalis, deinde *Offensivum* bellum est licitum, quando non est alia ratio vindican-

dicandi injurias, & reperendi damna Reipublicæ illata.

Rixa est contradictio in factis: quæ differt à Contentione, quia hæc est in verbis. Unde Rixa est quoddam bellum privatum inter personas privatas, quæ se invicem ex ira percutiunt. Estq; Rixa ex parte Invasoris peccatum mortale: quia injustè invadit, & opere manuali infert proximo nocumentum. Ex parte verò se defendentis, si sit cū moderamine inculpatæ tutelæ nullum est peccatum. si autem aliquantum hoc moderamen excedat, erit veniale: si autem ex ira, & odio magis se vindicare, quàm defendere intendat, etiã erit morale. Hinc ad Rixã Duellũ spectare videtur: quia hoc inde dictum, quod sit duorum bellum. Sunt autem Duella illicita, etq; jure naturali, ac Ecclesiastico, & Civili prohibita: unde Duella facientes gravissimè peccant; similiter & hi qui illis auxilio, consilio cooperantur: Spectatores verò sunt excommunicati.

Scandalum Civium dissensio, per quam una multitudo contra aliam tumultuatur. Unde Seditio est dictum aut factum minus rectum, præbens alteri occasionem ruinæ, seu peccandi. Estq; duplex: Activum & Passivum. Activum est cū quis suo dicto, aut facto minus recto, intendit alium ad peccandum inducere: aut licet hoc non intendat, tamen tale dictum, aut factum committit, quod ob speciem mali in se inclusam ad peccandum inducit. Passivum est, cū quis ex dicto aut facto aletorius, quod est præter intentionem operantis, & præ-

ter

ter conditionem dicti, aut operis, disponitur ad peccandum: & sic ex malitia sua accipit occasionem ruinæ. Unde dicitur tale scandalum mere Passivū.

Praxis Charitatis.

Primum est, quod à nobis exigit vera dilectio DEI: ut DEUM diligamus super omnia *Obiectivè Apprehensivè, & intensivè*: ut dictum est pag: 396.

Secundum est, Ut dilectio DEI non tantum sit Afficiens, hoc est affectu amoris animam iusti hominis inflammans; sed etiam immò magis efficiens, id est, ad opera bona hominem movens. Per afficientem dilectionem homo cupit, & vult DEO bona sua Divina: de ejus bonis & perfectionibus gaudet: ut omnes serviant & obediant DEO desiderat. Per efficientem verò omne malum, quod est abominabile DEO fugit & abominatur propter ipsum DEUM, juxta illud Psal: 96. qui diligitis DEUM, odite malum. Deinde operatur bonum propter DEUM, secundum ejus præceptum & consilium: sic enim dicit Christus D. Joan: 14. Si quis diligit me sermonem meum servabit. Insuper omnia adversa æquo sustinet animo. Nam Charitas patiens est: Charitas omnia suffert 1. ad Corinth: 13. Ideo Propheta David de se dicit Psal: 16. Propter verba laborum tuorum, ego custodivi vias duras. Ubi igitur est amor afficiens, ibi simul debet esse efficiens: nunquam enim DEI amor est otiosus; sed operatur magna ubi est; si verò renuit operari, amor non est, ut ait S. Greg:

Ter-

Tertium est, ut DEUM amemus totaliter totalitate Objecti, & totalitate subiecti; ad quod pertinet illud Divinum mandatum, ut DEUM diligamus ex toto corde, ex tota mente, ex tota anima, & ex totis viribus juxta doctrinam superius allatam.

Quartum est, ut nihil magis desideremus tota vita, quam pati & contemni propter DEUM; sicut ipsemet Christus D. fecit pro nobis: Qui passus est pro nobis, inquit S. Petr: vobis relinquens exemplum, ut sequamini vestigia ejus 1. Petr: 2. Nam ubi amor ibi dolor. Et ideò S. M. N. Theresia quia verè amore DEI flagrabat semper; ideò semper pati pro eo desiderabat. dicens: Quomodo possum erga DEUM ostendere meum amorem, nisi per dolorem, & nisi patiar aliquid pro ipso. Unde sæpius in hæc verba prorumpebat: Domine aut pati, aut mori. Eodem modo S. P. N. Joannes à Cruse fervens amator DEI fuit, qui nihil aliud in vita, quam pati & contemni pro Christo D. dilecto suo voluit.

Quintum ut fugiamus mundum, & omnia, quæ sunt mundi: Nam qui vult hujus mundi esse amicus, inimicus DEI constituitur ut asserit S. Bern: Serm: 85. in Cantic: Et S. Joan: Evang: Nolite, inquit, diligere mundum, neq; ea, quæ in mundo sunt; quia si quis diligit mundum, non est Charitas Patris in eo 1. Joan: 2.

Sextum ut simus semper unum cum DEO, quem amamus, uniendo voluntatem nostram in e-

ma

mnibus cum Divina volūtate: in hac enim adeò stricta unione, consistit vera dilectio DEI, per quam parati sumus omnia de manu DEI tā prospera, quā adversa: tam vitam, quā mortem prompto, & læto animo recipere. Nam amantium est, idem vel le & nolle.

Septimum ut omnia quæcunq; agimus ex amore DEI, seu ex motivo Charitatis: cum amore, seu cum magno Charitatis fervore: & ob amorem DEI: & in Charitate agamus. Nam ejusmodi cuncta opera etiam vilissima valde dilecto DEO placent, & illum glorificant, quod maximè intendere debet purus amor. *Modus istius exercitii ostenditur p. 2. 386.*

Octavum ut conemur semper purum amorem habere erga DEUM: *purus verò amor requirit*, ut excludatur à corde omnis imperfectio advertenter commissa, vel ex crassa negligentia, quæ semper displicet dilecto DEO: *Deinde requirit purus amor*, ut nulla consolatio creata admittatur, & multo minùs quærat, nisi vel volita à dilecto; vel in ordine ad DEUM actualiter, vel saltem virtualiter. *Præterea* non admittit amicitiam, vel affectum, ad aliquam creaturam; sed solum ad dilectum, vel in ordine ad eum. *Insuper purus amor* nihil aliud intendit in omnibus suis operibus, verbis, cogitationibus, & omissionibus, nisi dilecto placere DEO, & istis, quæ ipsi placere scit, toto conatu vacare. *Deniq;* non quærit quæ sua sunt, sed quæ dilecti DEI: ac proinde solum gloriam & honorem ejus, in omnibus quærit.

No-

Nonum ut assidue, seu saltem frequenter cogitemus de DEO, eumq; per cogitationes nostras præsentem nobis semper faciamus. Nam *sicut dicit S. M. N in itin: perfect: c. 28.* Etiam magni amici, & consanguinei in amicitia tepescunt, si non conversantur frequenter: quomodo ergo inter DEUM & animam stabit verus amor, si anima adeò obliviscetur DEI, neq; de eo sæpius cogitabit. Sed hæc cogitatio, seu Præsentia DEI amati non debet esse otiosa, sed varios exercens affectus erga DEUM: ut Amoris, Gaudii, Desiderii, Laudis, &c. *juxta modos varios præscriptos, tum in hac par: 1. pag: 76. tum par: 2. p. 153. 183. & sequent: 241. 375. 386. & sequen:*

Possū, quog; his faculatoriis uti.

Diligam te, Domine, fortitudo mea, Dominus firmamentum meum, & refugium meum, & liberator meus. DEUS meus, adjutor meus, & sperabo in eum: Protector meus, & cornu salutis meæ, & susceptor meus, *Psal: 17.*

Nonne DEO subjecta erit anima mea? ab ipso enim salutare meum. Nam & ipse DEUS meus, & salutaris meus: Susceptor meus. *Psal: 61.*

Quid enim mihi est in cælo, & à te quid volui super terram? defecit caro mea & cor meum: DEUS cordis mei, & pars mea DEUS in æternum. Mihi autem adhærere DEO bonum est, ponere in DEO spem meam. *Psal: 72.*

Quam bonus, & quam suavis est, Domine, Spiritus tuus! *Sap: 17.*

Quis

Quis nos separabit à Charitate Christi? tribulatio? an angustia? an persecutio? an gladius? Certus sum enim quia neq; mors, neq; vita, neq; creatura alia poterit nos separare à Charitate DEI, quæ est in Christo JESU, Domino nostro *ad Rom: 8.*

Tibi dixit cor meum, exquisivit te facies mea, faciem tuam Domine requiram *Psal: 26.*

Quemadmodum desiderat cervus ad fontes aquarum, ita desiderat anima mea ad te DEUS. Siti- vit anima mea ad te DEUM fontem vivum, quando veniam & apparebo ante faciem Domini? *Psal: 41.*

Nomen tuum Domine, & memoriale tuum in desiderio animæ. Anima mea desideravit te in nocte: sed & spiritu meo in præcordiis meis de mane vigilabo ad te *Isaie 26.*

Venite adoremus Dominum: procidamus ante DEUM. *Psal: 94.*

Omnis terra adoret te, & psallat tibi *Psal: 65.*

Sanctificetur nomen tuum: Adveniat regnum tuum: Fiat voluntas tua sicut in cælo & in terra. *Matth: 6.*

Benedictio, & claritas, & Sapientia, & gratiarū actio, honor, virtus, & fortitudo DEO nostro in sæcula sæculorum Amen. *Apec: 7.*

CAPUT VII.

De Virtutibus Intellectualibus.

TRactare de Virtutibus Intellectualibus propriè pertinet ad Philosophos: sed quia in divisione Virtutis mentio facta est virtutis Intellectualis; ideo brevissimè hic proponitur notiti-
illius.

illius. *Virtus Intellectualis* vocatur, quia residet in intellectu, eumq; perficit ad attingendum verū: quæ sic definitur: *Est habitus attingens infallibiliter verum*: quod sic declaratur: quia *Virtus* cum sit perfectio potentiæ, debet illam perficere ad attingendum proprium objectum modo perfecto: *Intellectus autem est Objectum verum*: ideo *Virtus Intellectualis* debet perficere intellectum ad attingendum infallibiliter verum. Et propterea *Opinio*, *Suspicio*, *Fides humana* inter *Virtutes Intellectuales* non numerantur; quia non perficiunt Intellectū ad attingendam veritatem infallibiliter; sæpē enim falluntur.

Dividitur autem Virtus Intellectualis in eā quæ versatur circa universalia: seu in eam quæ attingit verū circa universalia. Et in eam quæ versatur circa singularia: seu in eam, quæ attingit verum circa singularia.

Virtus Intellectualis quæ versatur circa universalia, *Subdividitur in Intellectum, seu Habitum principiorum, Sapientiam & Scientiam*.

Habitus primorum principiorum sic definitur: *Est Habitus quo principia de se manifesta cognoscuntur*: quæ principia quia sunt duplicia: Alia sunt *Speculativa* & alia *Præctica*: ideo *Intellectus* seu *Habitus primorum principiorum* dividitur in *Intelligentiam*, quæ est de primis principiis speculativis. Et *Synderesim*, quæ est de primis principiis practicis. *Sapientia* est cognitio rei per altissimam causam. Et talis est *Theologia*, cujus
obje-

objectum est altissima causa, scilicet, DEUS, ut cognoscibilis per revelationem mediatam: omnes enim Theologicae conclusiones procedunt ex principiis revelatis per Fidem cognitiss, subsumendo etiā alia principia naturaliter cognita. *Est eminenter Practica & Speculativa* propter eminentiam Objecti, quod simul est in se scibile, & ipsa Regula operandi.

Scientia est cognitio rei per causam inferiorā seu est Habitus acquisitus per demonstrationem: Et hæc dividitur in Speculativam, quæ in veri cognitione sistit. Et in Practicam, quæ cognitionem veri ordinat ad opus. Unde Speculativæ finis veritas; Practicæ opus.

Practica Scientia est duplex: nempe Medicinæ, quæ circa corpus ut sanabile versatur. Et Philosophia Moralis, quæ circa actus humanos Morales & per rationem regulabiles occupatur: & ideo Philosophus Moralis cognoscit verum. ut benè vivat & operetur. Et hæc Philosophia Moralis dividitur in Ethicam, quæ tractat de vitiis, & virtutibus secundum quod ad determinatam personam spectant, & in Politicam, quæ tractat de his quæ pertinent ad regimen multitudinis, & Oeconomicā quæ agit de pertinentibus ad regimen domesticum.

Scientia Speculativa est triplex: Alia quæ abstrahit à materia intelligibili, quæ dividitur in Metaphysicam: cujus Objectum est Ens reale naturaliter cognoscibile in toto suo ambitu. Et in Dialecticam, sive Logicam, quæ vocatur Scientia

rationalis: quæ habet pro Objecto Ens rationis; si-
ve secundam intentionem veritatis ostensivam.

Alia est Scientia, quæ abstrahit à materia sen-
sibili, quæ considerat quantitatem: quæ dividitur in
Arithmetica; cujus Objectum est quantitas discre-
ta, vel numerus: sub hac continetur *Musica*. Et in
Geometria; cujus Objectum est quantitas conti-
nua: sub hac continetur *Astrologia*, *Cosmogra-
phia*, *Geographia*, *Topographia*, *Hydrographia*,
Optica, & *Machinativa*.

Alia est, quæ abstrahit à Materia singulari, ut est
Physica, seu Scientia Naturalis; cujus Objectum
est Ens Mobile: seu Ens constans naturâ, quæ est
Principium motus & quietis. Sub qua continetur
Philosophia Moralis & *Medicina*

Vocatur autem materia singularis, quidquid
pertinet ad singularitatem rerum sensibilium. Sen-
sibilis verò *Materia*, sunt omnes qualitates & mo-
tus, quæ externis sensibus percipiuntur. *Intelligi-
bilis autem Materia* est ipsa Substantia corporea,
& *Materia prima*, quæ solo intellectu capiuntur.

Virtus Intellectuális, quæ versatur circa Par-
ticularia, subdividitur in *Prudentiam* & *Artē*.
Prudentia est recta ratio agibilium; de qua se-
quenti capite cum Virtutibus moralibus agetur. *Ars
est recta ratio factibilium*: Id est *Habitus re-
tificans Intellectum circa factibilia*, ut circa fabri-
cam domus, vestis &c. *Differunt autem factibi-
lia ab agilibus*: quia *Agibilia* sunt actus ipsius
voluntatis, ut amare, odire, gaudere, tristari &c.
Facti-

Factibilia verò sunt actus versantes circa materiã externam artificiosè disponendam, ut circa ferrum, lignum &c. *Ars dividitur in Liberalem & Servilem sive Mechanicam.*

Artis Liberalis Species septem, quæ in hoc versu continentur. *Lingva, Tropus, Ratio, Numerus, Tonus, Angulus, Astra.*

Lingva, designat Grammaticam. *Tropus*, Rhetoricam. *Ratio*, Dialecticam. *Numerus*, Arithmeticam. *Tonus*, Musicam. *Angulus*, Geometriã. *Astra* Astrologiam.

Artis Mechanicæ sunt etiam Species septem: *Rus, Nemus, Arma, Rates, Vulnera, Lana, Faber.*

Rus significat agriculturam, *Nemus* artem venatoriam & piscatoriam, *Arma* militarem, & armificicem. *Rates* navalem & mercatoriam. *Vulnera* Chirurgicam, & Pharmacopoleam. *Lana* texturam, sartoriam, coriariam, futoriam, plumariam seu acupistoriam. *Faber* artem fabrilem, in auro, argento, ære, ferro, ligno, lapide &c. Sub his speciebus innumeræ aliæ comprehenduntur, ut *Pistoria, Coquinaria, Pistoria, Cytharistica, &c.*

Artium autem tam Liberalium quàm Mechanicarum quedam sunt propter necessitatem ut *Fabrilis, Pistoria, Coquinaria &c. Quedam* propter vitæ commoditatem, ut *Navigatoria, Mercatoria &c. Quedam* ad vitam poliendam & defendendam, ut *Grammatica, Rhetorica & Militaris. Quedam* ad solas delicias ut *Pistoria, Cytharistica, Organica &c.*

Praxis Virtutum Intellectualium.

Primum est, quod scientiis rerum Divinarum aut humanarum dediti præ oculis habere debent: *Recta Intentio* in acquirendis scientiis & in usu illarum, ut nihil intendant nisi Voluntatem DEI, ipsius honorem, gloriam, & maiorem cognitionem illius, ut hinc eum diligant, ipsi serviant, & mandata ejus custodiant. Tunc enim utilis est Scientia *Laurent: Justin: ait:* cum rectè viuendi mores instruit, cum ad cœlestia contemplanda animum attollit, cum ad DEUM diligendum erudit, cum ad illum quærendum & possidendum omnia cordis interiora inflammat. *Lib: de casto connub: cap: 14.* Præterea salutem propriam & proximorum. Nā sunt, ait *S. Bernardus*, qui scire volunt, ut ædificent proximos, & profint eorum saluti & hæc Charitas est: item sunt, qui scire volunt, ut ædificentur, ut suæ saluti consulant; & hæc Prudentia est. Deniq; cognitionē suā, videlicet, ut cognoscāt suos inordinatos affectus, eosq; moderari sciant: pravos habitus, & vitia, illaq; extirpare conentur, ut sciant declinare à malo, & facere bonum. *Quæ de re sic ait Thomas à Kemp:* Humilis sui cognitio certior via est ad DEUM, quàm profunda Scientiæ inquisitio. O si tantam homines adhiberent diligentiam ad extirpanda vitia, & virtutes inferēdas, sicuti ad movendas quæstiones! non fierent tanta mala & scandala in populo, nec tanta in cœnobiis dissolutio! Certè adveniente die iudicii nō quæretur à nobis, quid legimus, sed quid fecimus: nec quàm

Intellectualibus.

423

quàm benè diximus, sed quàm religiosè viximus. Verè benè doctus est, qui DEI voluntatem facit, & suam voluntatem relinquit. *Sic ille lib: 1. cap: 3. de Init: Christi.*

Secundum est, ut cum Scientia Virtutem conjungant, præcipuè Humilitatem, quam ab æterna Sapientia discant, quæ dixit: Discite à me, quia mitis sum. & humilis corde. Ubi enim est Humilitas, ibi est Sapientia: *Prov: 11.* Et Scientia finè usu Virtutum teste *S. Greg:* Ethnicorum est, non Christianorum, quanto minùs Religiosorum? Et finè Humilitatis sapore nihil magnum aut gloriosum efficiet. Humilitas est, quæ Scientiam jam adeptam perficit, atq; cōservat. Longè ergo à Scientiæ veritate discedit, qui de cognitione intumescit, & ex dono DEI, unde se humiliare debuerat, inde superbit. *Hæc S. Gregor: Lib: 23. Moral: cap:*

Tertium, ut fugiant Scientiam mundanam & solam cælestem inquirant. *Mundana Scientia illa est*, quæ ut ait *S. Jacob:* Non est desursum descendens, sed terrena, animalis, diabolica. *Terrena est*, cui non placent cælestia; frequens & diuturna oratio; librorum sacrorum & spiritualium lectio; de rebus salutaribus sermo; solitudo, & à conversatione familiari cum hominibus elongatio. *Animalis est*, quæ fugit mortificationem, sensuum oblectamenta sectatur, quærit commoditatem. *Diabolica est*, quæ habet finem præcipuum propriam excellentiam, quæ est ambitiosa, & quæ ad primas sedes & ad prælationes aspirat. *Sapientia cælestis est*

desurfum descendens ut *inquit idem Jacob: Apost.* Primùm quidem pudica, deinde pacifica, modesta, svadibilis, bonis consentiens, plena misericordiæ & fructibus bonis, non judicans, sinè simulatione, *Jacobi, 3.*

Quartum est, ut cum studio literarum studium Orationis amplectantur, ut cuncta ab oratione incipiant, Oratione studium sæpiùs interrumpant, & in oratione desinant. Nam omnis Sapiencia à Domino DEO est, & cum illo fuit semper, & est ante ævum ipse enim creavit illam in Spiritu S. & præbuit eam diligentibus se. *Eccol: 1.* Unde *B. Jac: Apost.* Si quis vestrum, *inquit*, indiget Sapiencia, postulet à DEO, qui dat omnibus affluenter. *Et Laurentius:* Verum scire, ait; Divinæ est Sapienciæ: homo autem per seipsum ad hanc Scientiam pervenire non potest, nisi doceatur à DEO. Hinc *S. Bernard:* ut in ejus vita habetur: quidquid in Sanctis Scripturis valuit, orando se id accepisse confitebatur. Idem & *S. Thom: Aquinas Angelicus Doctor:* dicere solebat, quidquid sciret, non tam studio, aut labore suo peperisse, quàm Divinitus traditum per orationem obtinuisse.

IACULATORIÆ

Pro usu hominum Literis vacantium.

DA mihi, Domine, Scientiam Sanctorum, *Sap: 10.* quæ justis, ac Sanctis convenit. Bonitatem, & disciplinam, & Scientiam doce me.

Viam justificationum tuarū instrue me, & exercebor in mirabilibus tuis. *Pf: 118.* Bea-

Beatus homo, quem tu erudieris Domine, & de lege tua docueris eum. *Psal: 93.*

Veniat, quaeso, in me Spiritus Sapientiae tuae Domine. *Sap: 7.*

Bonus es tu, & in bonitate tua doce me justificationes tuas.

Revela oculos meos, & considerabo mirabilia de lege tua.

Da mihi intellectum & scrutabor legem tuam. *Psal: 118.*

Dirige me in veritate tua, & doce me: quia tu es DEUS Salvator meus. *Psal: 24.*

Domine ad te confugi: doce me facere voluntatem tuam; quia DEUS meus es tu. *Psal: 143.*

Da mihi, Domine sedium tuarum assistricem Sapientiam, & noli me reprobare à pueris tuis: mitte illam de caelis Sanctis tuis, & à sede magnitudinis tuae, ut mecum sit, & mecum laboret, ut sciam quid acceptum sit apud te. *Sap: 9.*

CAPUT VIII.

De Virtutibus Moralibus in communi.

Morales Virtutes dicuntur illae quae perficiunt vim appetitivam (hoc est, appetitum rationalem, seu Voluntatem; & appetitum Sensitivum) ad producendos actus humanos Legi Divinae & Rationi conformes. Vocantur autem *Actus humani*, qui ex deliberata voluntate procedunt; qui actus dicuntur *liberi* & tales sunt *proprii hominis*, per quos distinguuntur à brutis in operando. Qui verò actus sunt *indeliberati*, seu qui non

non procedunt ex deliberata voluntate, non dicuntur *Actus humani*, sed *Actus hominis*, in quantum procedunt à persona hominis. Et quoniam *secundum S. Thom.* iidem sunt *Actus Morales*, & *Actus humani*: ideò sicut *Actus humanus* debet esse liber, ita & *Moralis*.

Libertas formaliter est in Voluntate; sed *radicaliter est in Intellectu*. Nam *causa* & *radix Libertatis* est indifferentia iudicii Intellectus. Voluntas enim est potentia cæca, quæ semper sequi debet ductum Intellectus. Unde ille si fuerit in iudicando indifferens ad utrumlibet, hoc est, si iudicaverit hoc bonum posse appeti, quia est conveniens; & posse non appeti, quia est inconveniens, & cum tali indifferentia illud bonum voluntati proposuerit, tunc Voluntas erit quoq; indifferens & libera, ad illud bonum prosequendum, vel non prosequendū; atq; tunc Voluntas dicitur esse libera in *Actu primo*. Quod si Intellectus iudicaverit, sive verè, sive falsò hic & nunc ita sibi expedire, vel ob honestatem vel ob utilitatem, vel ob aliquam delectationem potius conveniens hoc amplecti, quàm repudiare: tunc etiam voluntas sequetur tale iudicium Intellectus eligendo hoc potius, quàm illud; eò quod Intellectus suo ultimo iudicio ita decernit, quod iudicium constituit Voluntatem sub actuali exercitio libertatis, per quod exercitium fit electio unius duntaxat præ alio, retento posse & facultate ad aliud; & per hoc fit Voluntas nostra libera in *Actu secundo*.

Ne-

Necessitas istarum Virtutum Moralium est; quia sicut homo per Virtutes Theologicas perficitur ad attingendum finem ultimum, qui est DEUS, hoc est, ad cognoscendum, appetendum, & amandum eum: ita per Virtutes Morales, perficitur homo respectu finis intermedii, seu respectu mediorum ad finem ultimum.

Sunt autem quatuor, Virtutes Morales *Prudentia, Iustitia, Fortitudo, & Temperantia.*

Prudencia quidem quæ residet in Intellectu secundum Essentiam est Intellectualis Virtus: tamen inter Morales connumeratur, quia est moderatrix & directrix aliarum Virtutum Moraliū: & quia non solum dat facultatem rectè operandi, quod omnis Intellectualis Virtus præstat, sed etiam dat rectum usum, quod munus est Moralium Virtutum, quæ faciunt ut rectè utamur illis.

Eædem quatuor *Virtutes Morales* dicuntur *Cardines* seu *Principales*: quia sicut ostium in cardine vertitur, & fundatur, ita in his quatuor Virtutibus vita Moralis vertitur & fundatur: Dicuntur *Principales*, quia in iis principalius humana vita versatur, & super eas aliæ virtutes fundantur: & quia primatum tenent in aliqua ratione Virtutis singulari: sicut *Temperantia* in moderatione: *Fortitudo*, in firmitate: *Iustitia* in rectitudine, sive æqualitate.

Præcipue tamen sunt *tres Virtutes Morales*, quæ resident in appetitu subjectæ per se regulis Prudentiæ. Dicuntur enim *Morales*, à *more*, quod

nomen

nomen significat inclinationem ad aliquid: & quia inclinari proprium est potentiae appetitivae (cognoscitiva enim potius trahit ad se illa, quae cognoscit, quam inclinetur ad ipsa) ideo illae Virtutes propriè debent dici Morales, quae appetitum perficiunt: videlicet, *Iustitia* quae perficit appetitum rationalem, seu voluntatem. *Fortitudo*, quae perficit appetitum irascibilem. *Temperantia* appetitum concupiscibilem: ad quas tres Virtutes Morales, tanquam Principales omnes aliae Virtutes reducuntur velut partes integrales, seu integrantes: vel ut subjectivae: vel ut potentiales. *Partes integrales* sunt quaedam conditiones requisitae ad hoc, ut opus Virtutis sit perfectum. *Partes subjectivae* sunt Species Virtutis Principalis de quibus illa essentialiter praedicatur. *Partes Potentiales* sunt illae Virtutes, quae non perfectè participant rationem Virtutis Principalis: habent tamen cum illa connexionem; vel quia ordinantur ad actus minùs principales in eadem materia; vel quia in modo procedendi, & moderandi passiones, & actus appetitus, assimilatur modo proprio Virtutis Cardinalis seu Principalis.

Ex his Virtutibus Moralibus, quae respiciunt bonum alienum, videlicet pertinens ad DEUM, vel Proximum, resident in voluntate, ut, *Iustitia* cum aliis Virtutibus, quas continet sub se, quae serviunt ad bene agendum & conversandum cum proximis: & quae versantur circa operationes seu actus voluntatis. Unde *respectu boni proprii nulla Virtus in voluntate datur*: quia respectu boni proprii volun-

tas nostra nullam difficultatem patitur. Quæ verò virtutes respiciunt bonum proprium, resident in appetitu irascibili, & concupiscibili ut *Fortitudo*, & *Temperantia* cum virtutibus, quas sub se continent, quæ circa passiones versantur.

Praxis Virtutum Moralium habetur supra
pag: 323.

Cui *Faculatoria* adduntur.

Domine DEUS Virtutum, exaudi orationem meam: auribus percipe DEUS Jacob: Etenim benedictionem dabis ô Legislator, ibo de Virtute in Virtutem: ut videam te DEUM Deorum in Sion. *Psal: 83.*

Dixisti, Domine, arcta est via, quæ ducit ad vitam: Virtus est ista via arcta, quæ ducit ad vitam, ait *S. Hieronymus*, & pauci sunt, qui ingrediuntur per eam: fac me quoq; Domine, cum paucis ingredi per eam *Hieron: l. 10. c. 39. in Ezech.*

Deduc me in semitam mandatorum tuorum, quia ipsam volui. Curram viam mandatorum tuorum, cum dilatabis cor meum. *Psal: 118.*

Dominus Virtutem populo suo dabit: Dominus benedictet populo suo in pace, quod & ego à te peto, & spero. *Psal: 28.*

Beatus vir Domine, cujus est auxilium abs te, ascensiones (*per Virtutes*) in corde suo disposuit in valle lacrymarum, in loco quem posuit. *Pf: 83.*

Domine deduc me in Justitia tua: propter inimicos meos dirige in cōspectu tuo viam meam. *Pf: 5:*

DEUS Virtutum convertere: respice de cœlo, & vide,

vide, & visita vineam istam, & perfice eam, quam plantavit dextera tua. Psal. 79

CAPUT IX.

De Prudentia.

Prudencia definitur sic: *Est recta ratio agibilium: seu Est Habitus rectificans intellectū circa agibilia: v. ad rectam electionem agibilium secundum Regulas morum.* (sunt autem Regulae morum: Dictamen Rationis, & Lex Divina, atq; humana) *Obiectum Prudentia est omne agibile: seu omne, quod cadit sub electione, & libero arbitrio: Agibile enim idem est atq; Eligibile, & Arbitrabile.*

Partes Integrantes seu Integrales Prudentia, communiter assignantur octo: nempe, Memoria, Intellectus seu Intelligentia. Docilitas, Solertia sive Eustochia, Ratio, Providentia. Circumspectio & Cautio. Ex quibus quinque priores spectant ad Prudentiam, secundum quod est cognoscitiva, considerando per Eubuliam; judicando per Synesim vel Gnome: nam omnes illae deserviunt perfecto consilio & iudicio. Tres verò posteriores pertinent ad Prudentiam, secundum principalem ejus actū, qui est *præcipere & applicare ad opus.*

Memoria est recordatio eorum quæ legimus, audivimus, vidimus, aut aliter experti sumus: ex quibus facile colligimus, quid in præsentī negotio expediat. Intellectus sive Intelligentia est præsentium notitia; seu est recta cognitio finis particularis. Docilitas est promptitudo ad discendum. Solertia
est

est habitus qui provenit ex repentino, inveniens quod congruit. Sumitur autem pro *Eustochia* cuius est pars: nam *Eustochia* est benè conjecturativa de quibuscunque: *Solertia* autē est facilis & prompta conjecturatio circa inventionem medii. Ad *Solertiam* reducitur *Sagacitas* per quam callidè & acutè aliquid dignoscim9, & in præsentī scim9: inde *Præsagire* & *præsagium* dicitur de futurorum cognitione, quasi illa antequàm eveniant, sentire. *Ratio* dicit aptitudinem ratiocinandi, & unum ex alio rectè inferendi seu colligendi: unde non sumitur pro ipsa potentia ratiocinativa, sed magis pro bona ejus dispositione & usu. *Providentia*, dicit prospectū futurorum; nam *prudens* idem est ac *procul videntis*. *Circumspectio* dicit attentionem ad omnia, quæ occurrunt, & conferentiam illius, quod in finem ordinatur cum his quæ circumstant, nè quid ex necessariis in opere desit. *Cautio* deniq; dicit attentionem ad præcavenda mala, quæ possunt bonis admisceri.

Partes Subjektivæ sive *Species Prudentiæ* sunt *Monastica* & *Gubernatrix*, *Monastica* sive solitaria Prudentia est, qua unusquisq; regit seipsum, suosq; actus, intendens bonum proprii suppositi in ordine ad finem humanæ vitæ. *Gubernatrix Prudentia* est, qua unusquisq; dirigit aliquam multitudinem intendens commune bonum ipsius multitudinis: quæ dividitur in quatuor Species in *Regnativam* (sub qua continetur *Monarchica*, *Aristocratica*, *Domocratica*) in *Politica*, *Oeconomica* & *Militarem*.

Regna-

Regnativa est quæ gubernat regnum aut tempus: *Monarchica est*, per quam unus totam gubernat multitudinem, qui vocatur Monarcha; & est Imperator, vel Rex, vel Princeps absolutus, *Aristocratica est*, per quam pauci & optimi Tempus gubernant. *Democratica dicitur*, quæ in Rep: imperat populus. *Politica est* quæ subditi seipso rectè disponunt in ordine ad bonum commune Reip: *Oeconomica est*, qua quis regit domum seu familiam. *Militaris est* per quam Dux in bello gubernat exercitum.

Partes Potentiales Prudentiæ sunt illæ Virtutes, quæ ordinantur ad actus minùs principales deservientes principalissimo: & tales Virtutes sunt tres v. *Eubulia*, *Synesis* & *Gnome*. Nam in Intellectu practico in ordine ad agibilia præter universalia judicia circa finem, quæ rectificat *Synthesis*, tantum sunt tres actus versantes circa media, nempe *Consilium*. *Judicium*, & *Imperium*: ex quibus actibus magis proprius est Prudentiæ *Imperium*, ad quod tam Judicium quàm Consilium ordinantur. Itaque pro rectificando consilio ponitur *Eubulia* seu *benè Consiliativa*. Ad rectificandum autem Judicii ponuntur duæ Virtutes: v. *Synesis*, quæ latine sonat bonam sensationem: & *Gnome*; quæ significat quandam perspicacitatem judicii, quæ Virtutes duæ per hoc differunt inter se: quia *Synesis* judicat secundum communes leges: *Gnome* verò judicat secundum rationem naturalem in his, in quibus deficit Lex communis, à qua dirigitur *Epykeja*.

Omnès

Omnes Species Prudentiæ, & omnes partes Potentiales resident in Intellectu practico, eo quod in ipso est *Consilium, Judicium practicum, & Imperium.*

Est autem Prudentiæ munus proprium, proposito fine Virtutis per Synderesim, media ad illum consequendum per consultationem inquirere, & per judicium invenire, & per imperium executioni mandare. Unde dum Synderesis seu Ratio practica hunc finem Temperantiæ proponit. *v. temperatè seu cum mediocritate comedere* tunc Prudentia debet media invenire & præscribere, quibus ad hanc mediocritatem perveniatur: videlicet, tantum tali horâ, toties per diem, comedere. Itaq; ad omnes Virtutes Morales per Synderesis directionem pertinet, bonum finem respicere, eumq; Prudentiæ præscribere; ad Prudentiam autem spectat, ad hunc finem consequendum media dictare: propterea nullus potest esse prudens *secundum Aristotelem 6. Ethic. cap. 12.* qui non sit Vir bonus, id est virtuosus per Virtutes Morales, quæ virtutes finem Prudentiæ præstituunt, de quo fine, ut aliquis habeat rectam estimationem & judicium, requiritur ut habeat Virtutes Morales: quia ut *Philosophus dicit 3. Ethic.* Qualis unusquisq; est, talis & finis videtur ei; & ideò sicut Virtutes Morales esse non possunt absq; Prudentia; ita nec Prudentia potest esse sine Virtutibus Moralibus, *ut docet S. Thom. q. 5. de Virt. a. 2.*

Quandoquidem Prudentia residet in Intellectu

practico, eumq; perficit, & actus ejus rectificat: & quia ipsa attendendo ad Legem, dirigit actus Voluntatis, seu actus humanos & liberos, qui sunt ipsa agibilia: ideo expedit habere notitiā istorum actuum tam Intellectus practici quam Voluntatis.

Sciendum quòd licet *Intellectus* sit potentia una, tamē propter *diversos fines* appellatur *Intellectus Speculativus* & *Practicus*. Nam *Intellectus Speculativus* dicitur, qui solam cognitionem veritatis intendit: *Practicus* verò qui cognitionem veritatis ordinat ad opus. *Actus Intellectus Speculativi sunt tres*: I. *Simplex Apprehensio*, quā res simpliciter cognoscimus. II. *Judicium*, quod unum de altero affirmamus, vel negamus: componendo aliquid cum subjecto, vel ab illo dividendo. III. *Discursus*, per quem aliquid minùs notum, per aliud notius manifestatur, & concluditur.

Actus Intellectus Practici sunt Alii versantes circa finem, qui actus non habent aliud nomen nisi *Judicium Practicum* Alii *versantes circa media* sunt tres. I. *Consilium*, per quod media ipsa quærentur & inveniuntur. II. *Sententia* dijudicans inter plura media reperta, & dictans in particulari, quod sit hic & nunc determinatè eligendū: qui actus propriè vocatur *Judicium practicum*. Quod si per *Consilium* unum tantum medium reperiatur, non erit opus alio judicio, præter id quod in consilio clauditur, III. *Imperium* quo dirigitur *Voluntas* ad usum, & executionem operis: & hic est ultimus & perfectissimus actus rationis
pra-

practica, ad quæ *Consilium* & *Judicium* ordinantur.

Actus Voluntatis circa finem sunt tres. I. *Volitio*, quæ est simplex complacentia in bono per intellectum præsentato: quæ est duplex: *Prima* & *Secunda*, *Secunda Volitio* est, quam ex alia priorē movetur. *Prima* est, ad quam ab ipso Auctore DEO applicatur Voluntas nostra. Quia Voluntas movet se, & applicat mediante consilio: primam autē volitionē nullū potest præcedere consiliū, cum illa sit radix, & origo totius consultationis; igitur ad primam Volitionem voluntas non se applicat, sed ab alio applicatur, & movetur, à suo scilicet Auctore DEO. Talis volitio est illa, quam puer rationis compos effectus habet: vel illa Volitio, quæ est post interruptionem omnis actus, qualis est illa, quam evigilantes primo formamus: vel ut est illa Volitio, quæ nobis alia agentibus, primò incidit circa novum negotium: vid: dūm cui venationem exercenti subito incidit & cogitatio, & volitio deserendi sæculum, & religiosæ vitæ amplectendæ. II. *Intentio*, per quam voluntas tendit in finem ut consequendum per media. III. *Fruitio*, quæ est delectatio, seu quies in finē adepto: vel secundum rem, & sic est fruitio perfecta: vel in apprehensione & spe, & sic est imperfecta. Quod si finis fuerit absolutè ultimus, tunc fruitio talis simpliciter vocabitur: si verò non fuerit ultimus, sed intermedius, tunc erit fruitio secundum quid.

Actus Voluntatis circa media sunt itidem tres.

I. *Consensus* per quem voluntas approbat ea media,

D d 2

quæ

quæ per rationem & consilium ad consequendum finem fuerint inventa, unde consentire, est idem cum intellectu sentire, & quasi in sententiam ejus ire. II. *Electio*, quæ est unius medii præ aliis acceptatio. III. *Usus*, quo voluntas applicat cæteras potentias ad operis executionem: qui dividitur in *Activum* & *Passivum*. *Usus Activus*, est ipse actus elicitus à Voluntate. *Passivus* verò, qui elicitur ab aliis potentiis ex Voluntatis applicatione.

Inter hos Actus Intellectus & Voluntatis fit ordo ejusmodi, ut semper actum voluntatis præcedat aliquis actus intellectus dirigens ac regulans; vicissimq; omnem actum Intellectus (excepto primo qui est ab ipso Auctore naturæ DEO) præcedat aliquis actus Voluntatis applicans, & ad exercitium movens. Sicut enim ad intellectum pertinet ordo & directio actuum Voluntatis: sic rursus ad Voluntatem spectat applicatio & exercitium aliarum potentiarum, etiam ipsius Intellectus.

Primus igitur in humanis negotiis, est actus Intellectus, qui dicitur *Judicium* sive simplex propositio bonitatis finis: quæ propositio est ab Auctore naturæ. *Secundus est actus Voluntatis v. simplex Volitio* seu complacentia in bono præsentato, quæ si fortis sit, excitat & applicat Intellectum ad examinandum, num illud bonum sit consequibile & possibile. *Tertius in Intellectu sequitur*, qui est *Judicium*, quo Intellectus bonum proponit Voluntati ut consequibile per media, & possibile. *Quartus est in Voluntate* qui est *Intentio boni* per media assequendi.

Post

Post hos quatuor actus qui sunt circa finem, succedunt actus circa media: nam in vi Intentionis applicatur Intellectus ad investiganda media, ad consequendum finem opportuna; unde *sequitur in Intellectu Actus quintus* qui *Consilium* seu *Consultatio* dicitur. Hunc Actum sequitur *Sextus actus Voluntatis* nempe. *Consensus*, quo voluntas approbat, seu potius appetit utilitatem illorum mediorum: in vi cuius Consensus seu approbationis voluntatis movetur Intellectus ad media illa examinanda & discernenda, discutiendo quæ sint aptiora & commodiora: sicq; fit *Septimus actus Intellectus*, scilicet *Judicium discretivum* mediorum; quem sequitur. *Octavus actus Voluntatis Electio dictus*, per quam Electionem Voluntas unum medium præ alio acceptat.

Hi quatuor Actus sunt circa media in finem ordinanda, post quos insequitur ordo executionis: Nam in vi & efficacia Electionis movetur Intellectus ad intimandam executionem mediorum Electorum; sicq; fit *Novus Actus Intellectus* scilicet *Imperium* seu intimatio executionis operis: cui succedit *Decimus Actus Voluntatis Usus activus*, quo Voluntas applicat potentias executivas ad assumenda media & exequenda. *Undecimus actus est usus passivus* qui est ipsa mediorum executio per potentias Voluntati subditas. Deniq; sequitur *Fruitus ultimus actus Voluntatis*, per quam Voluntas quiescit in fine secundum rem adepto.

Hinc patet Intellectus ac voluntatis mutua de-

pendentia, ac ordo, qui in humanis negotiis servari solent: præsertim dum prudenter, ac ratione maturata, & non præcipiti festinatione aut sola imaginatione procurantur. Sunt enim plerique homines, qui passionibus, & imaginatione abrepti, vix ullum legitimi ordinis vestigium tenent, nullo consilio, nulla rerum faciendarum ponderatione, discussione, ac electione sese regentes: Verum etiam in hominibus prudentissimis hi omnes actus iam subito fiunt, ac sine mora sibi succedunt, atque miscentur, ut eorum ordo, ac distinctio vix agnosci, etiam ab ipso operante, possit.

Vitia Prudentiæ opposita primo per defectum sunt hæc: Imprudentia, Præcipitatio seu Temeritas, Inconsideratio, Inconstantia, & Negligentia.

Imprudentia est triplex: nempe Negativa, & hæc est in pueris, & amentibus. Privativa, & hæc est in illis, qui possunt, & debent habere Prudentiam sed eam negligunt. Et Contraria, quæ est in illis, qui spernunt prudens consilium, & contra rectum iudicium temere & præcipitanter agunt. Prima non est peccatum, sed pœna peccati originalis, Secunda est peccatum pro ratione negligentiae. Tertia est peccatum mortale; secundum materiæ gravitatem.

Præcipitatio est vitium contra Prudentiam, quod tunc contingit, quando ex imperio Voluntatis, aut vehementis passionis aliquid agit contra ordinem Prudentiæ.

Inconsideratio tunc contingit, quando quis cō-
temnit,

temnit, aut negligit ea, ex quibus rectum paratur
judicium in operationibus.

Inconstantia est recessus à bono proposito.

Negligentia est omisso debitæ sollicitudinis *Alia*
Vitia opposita Prudentiæ per excessum sunt hæc:
Prudentia carnis, Astutia, Dolus, Fraus, Sollicitu-
do rerum temporalium, & sollicitudo futurorum.

Prudentia carnis tunc est, quando quis consti-
tuit suum ultimum finem in delectationibus hujus
vitæ & inimica est DEO. Rom: 8.

Astutia est vitium, quo quis falsis, ac simulatis
studiis, ac dictis utitur ad aliquid etiam bonum ob-
tinendum; quia bona benè quærenda sunt, non me-
diis simulatis & falsis.

Dolus est executio astutiæ per verba, aut facta
simulata.

Fraus est executio astutiæ per facta tantum, &
sic minùs patet, quàm Astutia.

Sollicitudo temporalium est vitium, quo tempo-
ralia nimis sollicitè quærentur.

Sollicitudo futurorum est nimia anxietas eorū,
contra illud Christi D. Nolite solliciti esse &c.

Praxis Prudentiæ.

Primum est, quod requirit Prudentia, ut ille,
qui vult esse prudens, sit vir bonus, & virtu-
tibus omnibus præditus: quia sicut Virtutes
MORALES esse non possunt absq; Prudentia; ita nec
Prudentia esse potest sinè Virtutibus MORALIBUS. *Se-*
cundum ut fugiat Prudentiam carnis: Prudentiam
autem spiritus teneat. Nam Prudentia carnis mors

est ut ait *Apost.* Prudentia autem Spiritus vita & Pax quoniam Sapientia carnis inimica est DEO, Legi enim DEI non est subiecta. ad *Rom.* 8. De hac utraq; Prudentia *S. Basili.* *Hom.* 17. in *Proverb.* sic loquitur: Una, inquit, est Prudentia proprii commodi custos, & alieni doli observatrix-qualem serpens habet: ille, si quid periculi imminere viderit, caput super omnia custodit. Ea videtur versutia illa (*quæ versutia est prudentia carnis*) quæ prona est ad proprium commodum, & simpliciores defraudandos, quali prudentia fuit ille sæculi prudens iniustitiæ œconomus apud Evangelium. Vera autem prudentia est cognitio eorum, quæ agenda sunt & non agenda, quam si quis recte sedatus fuerit nunquam ab officio virtuteq; discedet. Tertium ut cum Prudentiæ munus sit virtutum fines intueri: præcipuè finem totius vitæ humanæ intueatur, qui est placere DEO, & beatitudinē æternam consequi. Quartum est ut media ad illū finem vitæ nostræ obtinendum, v. observationem mandatorum & consiliorum, exercitium bonorum operum, modum vivendi juxta statum Vocationis suæ adhibeat. Quintum ut quid sibi faciendum, quidvè vitandum sit, & omnes circumstantias cuiuslibet operis prævideat: Prudens enim dicitur, quasi procul videns secundum *S. Isidor.* Unde *S. Bernardus Lib.* 3. de *Conside.* cap. 4. Quemdam monet: Diligenter, inquit, omne quod faciendum erit, tracta apud te, & cum his qui te diligunt. Tracta ante factum, quia post factum sera retractatio est.

est Sapientis consilium est: omnia fac cum consilio, & post factum non pœnitebis. *Sextum* ut cum Prudentia simplicitatem jungat, sicut vult *Christus D. noster*: Estote, *inquit*, Prudentes sicut serpentes, & simplices sicut Columbæ. *Matth: 10.* Benè adjungit Prudentiæ simplicitatem, *ait Remigius*: quia simplicitas absq; Prudentia facilè decipi potest: & Prudentia periculosa est ad decipiendum, nisi simplicitate temperetur. *Et S. Hieron.* Prudentia, *inquit*, absq; bonitate malitia est, & simplicitas absq; ratione stultitia nominatur. *Et S. Chrysost.* Estote, *ait*, prudentes sicut serpentes ad intelligendas fraudes: estote simplices sicut columbæ ad ignoscendas injurias. Præterea, estote prudentes sicut serpentes, ut omne malum intelligatis & caveatis: estote simplices sicut columbæ, ut non faciatis ullum malum: quia intelligere malum laudabile est; facere autem vituperabile. *Septimum* ut cum Prudentia simul discretionem habeat, ad quam pertinet; ordinare cogitationes, nè extra DEUM vagentur: affectus mentis, nè nimis in creaturis occupentur: voluntates, nè à DEO avertantur; intentiones, nè illis malæ misceantur, suspensiones & judicia, ut in meliorem partem convertantur. Omnia verba ac facta ut in bonum dirigantur. Præterea secundum *Richardum Victorinum* ad *Psal: 143.* Ad Discretionem pertinent I. *Judicatio*, quæ cuncta in iudicium adducit & segregans bonâ à malis, per illicita nos effluere non permittit. 2. *Deliberatio*, quæ cuncta ordinatè operatur, & nihil

con-

confusum relinquit. 4. *Dispensatio*, quæ superveniendi occasione cedit, & humanæ infirmitati condescendit. 5. *Moderatio*, quæ modum custodit in omnibus, & mensuram non excedit.

Actus Prudentia habentur pag: 2. pag: 84.

His Faculatorie adduntur.

Dedi cor meum ut scirem Prudentiam atq; doctrinam *Ecclesiastici* 1.
Viam Prudentiæ ostende mihi Domine, *Isaia* 41.

Domine, qui dixisti per Prophetam: Audi Israël mandata vitæ, auribus percipe ut scias Prudentiam *Baruch* 3. Hanc Prudentiam, quæso, doce me.

Ecce, Domine, prudentem me fecisti mandato tuo: quia in æternum mihi est. *Psal.* 118.

Nè sis Sapiens apud te ipsum: nè innitaris Prudentiæ tuæ: Si dilexeris audire, Sapiens eris. *Prov.* 3.

CAPUT X.

De Justitia.

Justitia aliquando sumitur pro collectione omnium Virtutum: sive perfectione qua Viri Sancti dicuntur Justi. Aliquando sumitur pro determinata Virtute, quæ est de numero Moralium Virtutum, de qua sic ait *Aristot.* 5. *Ethic.* cap: 1. Præclarissima Virtutum, inquit, est Justitia, & neq; Hesperus neq; Lucifer ita admirabilis; quæ sic definitur: *Justitia est constans & perpetua voluntas, jus suum unicuiq; tribuens.*

Objectum Justitiæ est *Jus*, sive *Justum*. Hæc Virtus residet in Voluntate; & est specialiter ad alterum:

Justitiæ.

443

rum; cujus actus est ponere æqualitatem, ad quam requiritur medium rei, & non tantum medium rationis constitutum per Prudentiam, sicut fit in aliis Virtutibus: quia in materia Justitiæ non aliter constituit medium, quam per æqualitatem secundum rem, ut tantum reddatur, quantum re ipsa debetur.

Partes Integrales Justitiæ sunt duæ: v. *facere bonum: & declinare a malo.* Quod potest sumi dupliciter: vel *universaliter*, & sic pertinet ad quaelibet Virtutem, accedere ad bonum, & a malo recedere; nam quaelibet exercendo suum actum bonum, & accedendo ad illum, ab opposito malo declinat. Vel *Specialiter* pro eo quod est facere bonum debitum alteri, seu restituere: & vitare malum, quod sit proximo nocivum, videlicet, non furari, hoc modo sunt partes Integrales Justitiæ: quia sine illis non potest esse perfectum opus Justitiæ.

Partes Subjectivæ Justitiæ sunt tres scilicet *Commutativa, Distributiva & Legalis.* Justitia *Commutativa* est partis ad partem, & reperitur in venditionibus, & emptionibus & omnibus contractibus inter particulares homines. Justitia *Distributiva* est totius ad partes, & reperitur in distributione præmiorum, bonorum communium, ac dignitatum Reip: ad ipsos Cives. Justitia *Legalis* est partium ad suum totum, quæ consistit in hoc, quod quilibet tribuat communitati quod ei debet, procurando bonum commune ipse, maxime in Observantia Legum, quam principaliter respicit Justitia Legalis: & hæc *Alia est pure Legalis*, quæ
atten-

attendit ad verba Legis secundum literam: Alia quæ attendit ad mentem Legislatoris & vocatur *Epykeia*.

Vitia opposita his partibus Iustitiæ v. Legali est Legalis Injustitia, sive Legum relaxatio, Vitium oppositum Epykeiæ, hoc est Iustitiæ Legali specificè sumptæ, est Iniquitas: quia Epykeia dicitur Æquitas. Vitium oppositum Iustitiæ Distributiæ, est Acceptio personarum: quando distribuens bona communia non distribuit secundum merita personarum, sed secundum affectum erga personas. Iustitiæ Commutatiæ contrariantur illa vitia, quæ inferunt proximo nocumentum, sive in vita, sive in honore, sive in bonis externis. Hujusmodi sunt Homicidium, Furtum, quod est acceptio rei alienæ invito Domino. Rapinæ quæ addit supra furtum, violentiam, & injuriam personæ, dum res in præsentia, aut è manibus eripitur. Injustitia Judicis in judicando: Actoris in accusando: Rei in se defendendo: Et quæ fit ex parte Advocatorum. Præterea Fraus, quæ committitur in emptionibus, venditionibus, & aliis Contractibus commutativis. Et Usuræ, per quam lucrum ex mutuo accipitur. Similiter & Vitia, quæ inferunt proximo nocumentum Verbis, scilicet, Contumelia, per quam læditur honor alicujus, obijciendo illi, aut coram eo propalando suos defectus Morales: ut quod sit latro &c. Convitium, per quod obijciuntur alicui defectus naturales, vel pænales, ut quod sit Cæcus &c. Improperium, quo obijciuntur alicui defectus Fortunæ,

tunæ, ut quod servierit &c. *Detractio*, quæ est alienæ famæ denigratio, fitq; in absentia, sicut læsio honoris in præsentia. *Susurratio*, quæ profert aliquid, sive malum sit, sive non ut amicitiam separet. *Derisio*, per quam dicuntur verba causantia alicui pudorem, & erubescantiam. Et *Maledictio*, quæ est alicujus mali proximo imprecatio.

Partes Potentiales Justitiæ sunt: Religio, Penitentia, Pietas, Observantia, Gratitude, Vindicativa, veritas, Amicitia & liberalitas. Partes Potentiales Justitiæ dicuntur; quia in aliquo conveniunt cum justitia v. in hoc, quod sint ad alterũ; tamen non participant plenè Justitiæ rationem, vel quia deficiunt à ratione æqualis: vel quia deficiunt à ratione debiti.

Religio quæ etiam *Latria* vocatur, est *Virtus*, quæ cultum debitum, DEO tribuit tanquam primo omnium principio: Seu est protestatio Divinæ excellentiæ, quæ fieri debet cum nostri submissione, protestando nostram dependentiam ab illo. *Objectum Religionis* est *Divinus cultus*, non autem DEUS ipse, nam per hoc Religio distinguitur à Virtutibus Theologicis, quia istarum Objectum est DEUS: Religionis verò Objectum est cultus creatus, qui DEO offertur, ut termino & fini Cui. Divina autem excellentia est ratio ob quam talis cultus DEO debetur. Sub quo cultu continentur *Sacrificia, Oblationes, Laudes, Adorationes, Vota, Framenta, Imagines, Ritus, Cereemoniæ sacræ &c.* quibus Divinitas honoratur: simul & nos ipsi, nostriq; actus

actus honesti, & universæ res creatæ, quæ in signū & testificationē Divinæ excellentiæ possunt DEO offerri.

Actus Religionis sunt: Devotio, Oratio, Sacrificium, Oblatio, Votum, Juramentum, Adjuratio Divini Nominis, ejusq; per Laudem Assumptio, Devotio est in Voluntate, quæ est actus Religionis elicitus & primarius, estq; nihil aliud, quam prompta voluntas ad ea quæ sunt DEI cultus & famulatus. Nascitur ex contemplatione Divinæ eminentiæ, & nostrorum defectuum cognitione. Devotionis effectus est cordis lætitia, quæ tollit omne contristans & retardans.

Oratio est petitio decentium à DEO: & est in Intellectu: quia orare, est nostrum conceptum ad DEUM ordinare; ipsi exprimere, intimare, ac notum facere. Fructus Orationis præcipui sunt tres: Satisfactio, Impetratio & Meritum. Est infallibilis, quando orans postulat pro se piè, perseveranter & conducentia ad salutem.

Adoratio est honor externo corporis gestu exhibitus DEO. Fit per quemcunq; actum externum, per quem significatur interna reverentia, & veneratio; ut per genuflexionem, inclinationem, prostrationem, capitis dis Kooperationem &c.

Sacrificium & Oblatio includunt omnes actus, quibus res externas DEO offerimus. Et quamvis Oblatio si largiùs sumatur comprehendat Sacrificium; nam & hoc quædam Oblatio est; propriè tamen accepta differunt. Nam Sacrificium dicitur de

de re, quæ offertur cum sui immutatione: *Oblatio* verò cum offertur integra & immutata. *Dividebatur* olim *Sacrificium* ratione materiæ, in *Victimam*, *Immolationem* & *Libamen*. Materia *Victimæ* erat animal, quod occidebatur: Materia *Immolationis* erat aliquid inanime & solidum; ut panis, thus, spicarum manipulus &c. Materia *libaminis* erant res fluidæ: ut aqua vinum, &c. quæ effundebantur. *Rursus dividebatur Sacrificiū* ratione Formæ vel Finis, in *Holocaustum*, *Hostiam pacificam*, & *Sacrificium pro peccato*, *Holocaustum* est, in quo tota res comburebatur, ut in fumū resoluta ad DEUM ascenderet. Eratq; perfectissimum sacrificium: quia in illo expressius significatur omnia ipsius DEI esse. In aliis duobus sacrificiis partim cremabatur, partim Sacerdotibus aut offerentibus reservabatur: offerebatur verò *Hostia pacifica* pro beneficiis acceptis, vel accipiendis. *Sacrificiū* autem *pro peccato* in expiationem peccati. Verū hæc omnia sacrificia in Lege Gratiæ celsarunt: quia habetur nunc perfectissima *Hostia* & *Sacrificium Corporis* & *Sanguinis Christi D. Nostri*; quod per illa *Sacrificia* legalia figurabatur: atq; ita debent cessare figuræ existente veritate.

Oblatio est Actus, quo res externas DEO offerimus, sinè mutatione illarum facta in ipsa oblatione, pro usibus Divino cultui convenientibus: uti est *Ministrorum sustentatio*, *Ecclesiarū constructio* & *reparatio*, *utensilium Sacrorum præparatio* &c. *Dicitur sinè mutatione rerum* facta in ipsa oblatione,

one, ad distinctionem Sacrificii, in quo ea quæ *Sacrificantur* in ipso Sacrificio *immutari debent*: vel *maculatione* vel *combustione* vel *fractione* &c. quod fiebat ad significandum Sacrificium offerri DEO ut primo principio totius Entis, qui potest suo supremo dominio res creatas destruere, annihilare & immutare. *Oblatio dividitur in Oblationem primitiarum*, qua quis in recognitionem beneficii à DEO accepti offert primitias fructuum ad protestandū omnē terræ fructum DEI esse beneficium. *Et in Oblationem decimarum*, quæ specialiter est ad sustentationem ministrorum Ecclesiæ.

Votum est promissio DEO facta: quod dividitur in *Solemne* & *Simplex*. *Solemne votum* est, in qua fit perfecta voventis traditio, habetq; annexam susceptionem status. *Simplex votum* est quod prædictam traditionem non includit. Hoc *Votum simplex* subdividitur in *Absolutum*, quod seipsum statim obligat: & in *Conditionale*, quod fit dependenter à conditione futura contingenti, neq; obligat priusquam talis conditio purificetur. Rursus *Votum Conditionale*: Aliud est *pœnale*, aliud non *pœnale*. Præterea dividitur *Votum* in *Tacitum* & *Expressum*: in *Perpetuum* & *Temporale*, quæ ex terminis constant, *Ultimo dividitur Votum* in *Personale*, quo promittitur aliqua personalis actio: ut Peregrinatio, jejunium &c. *Et in Reale*, quo promittitur aliqua res externa: ut Eleemosyna. *Et in Mixtum*, quo simul promittitur res externa, & actio personalis: ut peregrinatio cum obligatione Eleemosynæ.

Jura

Juramentum est attestatio, seu invocatio Divini Nominis ad fidem faciendam, promissionemve firmandam. Et est actus intellectus spectans ad Religionem: quia hujusmodi invocatione profitemur Divinam Excellentiam. Dividitur primò in purè *Contestatorium*, quo DEUS præcisè vocatur in testem ut cùm dico: *Testor DEUM. Furo per DEUM. Vivit Dñs*: Et in *Execratorium*, quo DEUS vocatur in Vindicem, ut cùm dico: *Testem invoco DEUM in animam meam: Ita me DEUS adjuvet: Ita sit mihi propitius: Hæc faciat mihi DEUS, & hæc addat &c.* Rursus *Juramentum* aliud fit immediatè per Deū: Aliud per ejus Creaturas, non ut creaturæ præcisè secundum se considerantur, sed ut sunt aliquid DEI, in quo Divinitas ejus splendet: & hoc pacto est *Juramentum Contestatorium*: ut cum juramus per cælum, per Angelos, per rem sacram; intelligimus quippe in ipsum DEUM eorum Conditorē. Quod non debet fieri per res viles, ob speciem indecentiæ, Vel consideramus creaturas ut sunt aliquid ad nos pertinens, quod obligamus DEO: & hoc modo est *Execratorium*, ut cum juramus per vitam, animam, aut salutem nostram, vel Patris, vel Filii, vel Regis &c. Tertiò dividitur *Juramentum* in *Solemne*, cui adhibetur aliqua notabilis circumstantia exterior; ut quòd fiat in tribunali coram testibus &c. Et in *Simplex* quod caret prædicta Solemnitate. Deniq; dividitur *Juramentum* in *Affertorium*, quod adhibetur tantum ut credatur aliquid, quod alià viâ sufficienter probare

bare, non possumus. In *Promissorium* quod fit ad confirmandam aliquam promissionem, quâ volumus nos alteri obligare. Quod si talis *promissio* DEO fiat, est *votum juratum* seu *juramentum cū voto*: ac proinde ejus transgressio est duplex peccatum contra Religionem. Si verò fiat Creaturis est simpliciter promissorium juramentum. Et in *Comminatorium*, quò minamur alteri pœnam, ut constri-cti Juramenti reverentiâ non valeamus condonare eam. Est verò inter prædicta Juramenta hoc discrimen: quòd in primo sufficit una veritas ejus nimirù quod ita esse testamur, in aliis autem duplex requiritur. Alia Præsens, ut verè habeamus animù exequendi quod minamur, vel promittimus: & alia Futura, quæ verificet executionem. Prima est omnino Indispensabilis.

Adjuratio Divini Nominis est Juramento affinis, quæ fit quando DEUM, vel rem sacram advocamus, ut ejus timore, vel reverentia alterum moveamus ad aliquid faciendum, vel omittendum. Fit autem *Adjuratio* duobus modis: vel *Deprecando*, ut cū pauper petit Eleemosynam propter DEI amorem. Vel *Præcipiendo*, ut cum Prælati adjurant sibi subditos, in *Virtute Spiritus S.* Et cum Ecclesia inobedientes anathematizat, Atq; hoc secundo modo licet dæmones adjurare, ut ab obsessis corporibus recedant, hominibusque, aut animalibus, aut terræ fructibus non noceant.

Ultimus Religionis Actus est *Invocatio* sive *Assumptio Divini Nominis* per Laudem; quando
scilicet

scilicet laudamus ejus Misericordiam, Pietatem, Amorem &c.

Vitia Religioni opposita sunt Irreligiositas per defectum, & Superstitio per excessum. Superstitio alia est cultus indebitus quo verus DEUS colitur, sed indebito modo. Alia Superstitio ratione rei cultæ, quæ cultus soli DEO debitus tribuitur creaturis, & dæmonum simulacris. Prima partitur in cultum falsum ut si quis DEO nunc offerret cultum Judæorum; aut si falsis miraculis & testimoniis aliquid confirmare vellet. Et in cultum superfluum: ut dum præter Ecclesiæ morem ponitur cultus in aliquibus circumstantiis, quæ ad rem non pertinent: ut in colore, vel situ candelarum, in numero Missarum, vel Orationum, ut sint tot, & non plures. Secunda Superstitio quæ est ratione rei cultæ dividitur in Idololatriam, Divinationem, Superstitionem Observantiarum, & Magiam. Aut enim diabolus colitur præcisè ut honoretur tanquam Numen: & hæc est Idololatria. Vel colitur ut aliquid occultum revelet: & hæc vocatur Divinatio quasi Divina actio. Quia proprium Divinitatis est futura & omnino occulta cognoscere. Vel ut juvet & dirigat in operando: & sic est Superstitio vanarum Observantiarum. Vel deniq; ut ejus opera mira & insolita ab hominibus fiant, & ista appellatur Magia.

Alterum Vitium oppositum Religioni per defectum dicitur Irreligiositas quæ continet hæc vitia, nempe: Sacrilegium, quo vis aliqua, & injuria

infertur rebus, aut personis DEO, ejusq; cultui cōsecratis. *Tentationem DEI*, quæ tunc fit quando quis absq; justa causa aliquid facit, vel dicit ad capiendum experimentum Divinæ Potentiæ, Sapientiæ, Justitiæ, Misericordiæ &c. *Perjurium*, quod est transgressio Juramenti. *Simoniam* per quâ res Sacræ indignè tractantur, cōmutando illas rebus temporalibus. *Infidelitatem*, quæ frangit fidē DEO in Voto promissam. Et *Blasphemiam*, per quam derogatur D. Excellentiæ & Sanctitati.

Secunda Virtus quæ est Pars Potentialis Justitiæ, est *Pœnitentia* quæ sic definitur: *Est Virtus offerens DEO debitam satisfactionem & dolorem pro peccatis.*

Tertia Virtus est *Pietas*, qua quis exhibet officium & cultum debitum Parentibus, Patriæ, & consanguineis: decet enim ut ex Pietate omne obsequium, & reverentia, & beneficium subventionis præstetur prædictis necessitatem patientibus.

Quarta Virtus est *Observantia*, per quam homines aliqua dignitate antecellentes cultu quodam & honore dignamur. Hac Virtute coluntur omnes aliqua dignitate, virtute, sapientia, & Sanctitate præcellētes, ut sunt *Superiores, Doctores, Magistri, Sancti* &c. Unde *Observantiæ* assignantur aliquæ *Species* ▾ *Observantia specialis*, seu *Urbanitas* quâ honoramus Magistros. *Dulia* quâ colimus Sanctos, & DEO consecratos. *Hyperdulia* quâ honoramus sanctos speciali nexu Divinitati cōjunctos: uti est *Beatissima Virgo*, quæ relatione Maternitatis De-

um attingit: & *Humanitas Christi* D. secundum se considerata & *Obedientia* per quam Superiorum DEI personam gerentium jussis obtemperamus. Unde Virtus Obedientiæ respicit præceptum Superioris, ut præceptum est. *Cujus Virtutis Materia* sunt omnes Virtutum actus, quocunque modo à Superioribus injuncti. *Forma* est illa ratio ut fiant illi actus, quia præcepti sunt. Quod Religiosi debet notare, ut veri & formales Obedientiæ sint Observatores, non alias ad obediendum rationes conqui-
rendo, quàm quia jussa à Superioribus injuncta sunt: in quo *neceſſe est ut voluntatem nostram subiiciamus voluntati Superiorum*, quod minùs perfectiorum est: sed ut *Subijciamus quoque Intellectum*, quod perfectiorum est. Sunt autem duo genera Obedientiæ: *Aliud* est facere cum Obedientia, ut cum aliquis petit aliquid à suo Superiore. *Aliud ex Obedientia* aliquid præstare: ut cum proprio motu Superior alicui quidpiam injungit. Illud primum aliquando non caret culpa, si petatur aliquid sine ulla necessitate. In secundo genere actus Obedientiæ semper est bonus: nisi aliquando ex vicio Obedientis corrumpatur: v. si aliquis ideò rem à Superiore injunctam libenter amplectitur, quia sibi placet, & proprio naturæ genio est consona.

Ut verò Obedientia opus sit perfectum has circumstantias, *Secundum S. Bernardum* habere debet: v. ut fiat *Velociter*; sine mora & dilatione. *Libenter*; hoc est prompta voluntate, voluntatem nostram voluntati superioris subiiciendo. *Simpliciter*; cæco

intellectu, imperatum non discutiendo, & iudiciū nostrum iudicio Prælati submittendo. *Hilariter*; absq; tristitia, tædio & querela. *Fortiter*; excelso animo in rebus arduis & difficilibus; etiam Superioribus parū affectis, & malevolis. *Humiliter*; absq; vanæ gloriæ & laudis appetitu, vel complacentia; rudibus quoq; Prælati, & imperiti. *Perseveranter*; usq; ad perfectam mandati Superiorum impletionem; & usq; ad finem vitæ nostræ.

Gradus Obedientiæ Heroicæ sunt isti. Primus est, Promptitudo Obediendi: hæc paruit in tribus Magis, & S. Abraham. Nam fidelis Obediens nescit moras, ait S. Bernardus, fugit crastinum, ignorat tarditatem. *Secundus*, Conformitas totalis subditi cum Superioris Voluntatē. Nam Obedientia est sepulchrum propriæ Voluntatis ut asserit S. Climacus, *Tertius*, Conformitas totalis cum Superioris Intellectu sive Iudicio, ita ut dicat obediens: quod Superior rite præcipit, vel prohibet vel saltem de Superioris mandato non iudicet, sed obediatur clausis, ut dicitur, oculis: propterea S. Bernardus ait: Profecto Obedientia est indiscreta, hoc est; non discernens quid, & quale præcipiatur. *Quartus*, nihil omnino facere inconsulto Superiore, quamvis bonum esset opus, unde S. Basilus: Quidquid insciente Superiore facis, id furtum est, & Sacrilegium, tibiq; exitium non utilitatem apportat, esto tu id bonum iudices. *Quintus*, obedire cuilibet Superiori etiam imprudenti, & indiscreto: quia tam prudens, quam imprudens Superior est Christi

Christi Vicarius. *Sextus*, obedire Superiori parum affecto vel malevolo: quia confidendum est tunc Domino, quod omnia talis Superioris præcepta dirigat in bonum obedientis. *Septimus*, obedire seu acquiescere voluntati æqualium; immò & inferiorum; exemplo Christi, qui cum esset DEUS, voluit hominibus obtemperare. *Octavus*, Superiori præcipienti non replicare: seu non se excusare: sic Christus D. jam defessus Crucem sibi impositam portare non recusavit. *Nonus*, adversus affectus nostros & inclinationes obtemperare. *Decimus*, etiamsi Superior nihil jubeat, ejus voluntati se accomodare, & indicia suæ voluntatis exequi. *Undecimus*, indifferentem se ad omnia præbere, & quantum est ex se nihil de se ordinare, nihilq; nisi quod Superior voluerit concupiscere. *Duodecimus*, cum majore aviditate difficiliora, viliora; ignobilia & naturæ repugnantia ex Obedientia injuncta facere, quàm illa, quæ sunt facilia, nobiliora, & naturæ nostræ consona.

Obedientiæ per defectum contrariatur Inobedientia, prout procedit ex intentione agendi contra præceptum, atq; adeò ex contemptu & vilipendentia illius.

Et istæ sunt virtutes quatuor supra numeratæ, videlicet Religio, poenitentia, Pietas, observantia, partes Potentiales Justitiæ dictæ, quæ à ratione perfectæ Justitiæ deficiunt, propter inæqualitatem ejus, quod redditur: sequuntur aliæ virtutes, quæ deficiunt propter imperfectionem debiti; quia non red-

dūt ex debito legali & rigoroso. Ex his est in ordine.

Quinta Virtus pars Potentialis Iustitiæ, nempe *Gratitudo*, quæ respicit debitum ortum ex beneficio: utq; illi satisfaciat rependit aliquid benefactori; ut *Gratiarum actionem, obsequium, cultum, vel aliud beneficium*; sumitur autem *Gratitudo* dupliciter. *Primò*, ut generatim extendit se ad omnes, à quibus beneficia accepimus, v. ad DEUM, parentes, Superiores &c. quo pacto non est una specialis virtus, sed actus diversarum virtutum. Ut enim DEO gratias reddit, coincidit cum Religione: ut parentibus, cum Pietate: ut superioribus, cum Observantia &c. *Secundò* sumitur, ut specialiter respicit beneficium acceptum ab illo in quo solum attenditur ratio benefactoris: & hoc modo est virtus specialis distincta ab aliis, quæ licet non inducat debitum rigorosum recompensandi beneficium, bene tamen debitum decentiæ & honestatis. *Sunt autem quinque Officia Gratitudinis.* 1. *Est accepti beneficii æstimatio*: ut ostendamus nos illud æstimare, si non ex rei magnitudine, saltem ex affectu, & animo donantis. 2. *Est benigna acceptatio* per quam benefactorem honoramus, & affectui ejus quodammodo satisfacimus: quæ de re *Seneca Lib: 2. de Benef. cap: 35.* sic ait: *Qui grate beneficium accipit, primam ejus pensionem solvit.* 3. *Est gratiarum actio*, quæ est benevola gratiæ acceptæ protestatio, per quam benefactor honore afficitur: estq; proinde beneficii quædam compensatio. 4. *Est regata commemoratio*, partim ut apud nos simus inemo-

memores beneficii accepti, partim, ut oblata occasione corā aliis libenter illud referamus; quod pertinet ad laudem & honorem benefactoris 5. *Est redditio seu repensio*, quando vicissim re, vel obsequio redditur beneficium. Quod si nō suppetat, quod rependas, saltem reddenda est bona imprecatio: ut *DEUS remuneret, in centuplum compenset* vel piæ ad DEUM preces, pro salute benefactoris offerendæ. Hæc quinque; Gratitude munera ad tria reduxit. *S. Thom: art: 2.* quæ sunt: *Beneficium agnoscere, pro eo gratias agere, retribuere loco & tempore pro facultate recipientis. Vitium Gratitude contrarium per excessum non est nominatum: per defectum verò est Ingratitudo. 1. Beneficium non retribuere. 2. dissimulare non agendo gratias 3, Oblivisci & nolle agnoscere. 4. Retribuere mala pro bonis 5. Vituperare beneficium, 6. Beneficium pro maleficio reputare.*

Sexta Virtus est Vindicatio, quæ ex Græco, idem est, quod *injuria ultio*: seu est *delicti punctio*, ejus potest esse multiplex finis. 1. *Bonum ipsius peccantis*, ut quod resipiscat, & emendetur: sicut pater punit delicta filii & Magister Discipuli, & tunc est actus Misericordiæ, Pietatis aut Charitatis. 2. *Propria defensio*, pro qua unicuique licitum est quemcunque; injustum invasorem invadere; & vim repellere cum moderamine tutelæ: qualis defensio solet fieri pro vita, pro honore, pro pudicitia, & hujusmodi: 3. *Est Honestas*, quæ resplendet in punitione malefactoris, cui debetur pœna; & tunc est

Virtus

Virtus specialis pertinens ad Iustitiam. Et licet hæc Virtus, sit in personis privatis ad expetendam modeste vindictam, non tamen ad exequendam: quia hæc executio solum debet fieri à iudice, qui habet auctoritatem puniendi malefactores. Nec licet cuilibet seipsum vindicare, sicut licet se defendere: longè tamen laudabilius est injurias condonare, & ultionem non quærere exemplo Christi D.N. *Huius Virtuti per excessum opponitur Crudelitas seu Sævitia* quæ excedit mensuram honestæ vindicationis: *per defectum* verò opponitur *Remissio*.

Septima Virtus est Veritas seu Veracitas. Estq; habitus existens in voluntate, qui nos facit dicere verum, rectè utendo verbis & signis, quæ nobis data sunt ad manifestandum alteri internos conceptus & iudicia, ita ut his exteriora signa conformentur. Et hæc fidelis manifestatio valde est necessaria ad humanam societatem, atq; multoties debita his quibus convivimus, debito honestatis *Ad hanc Virtutem tria spectant*. 1. *Amare Veritatem*, in dictis & factis. 2. *Cavere nè contra iudicium mentis aliquid dicatur*: pro quo est præceptum negativum obligans ad semper. 3. *Patefacere iudiciū mentis* per verba, aut alia signa: hoc tamen non præcipit pro semper; quia multoties expedit ea, quæ in mente sunt, occultare: & si loqui opus sit, licebit iusta ex causa æquivocatione uti; ita tamen, ut intentio loquentis interno conceptui semper conformetur; neq; intendat audientem decipere, sed tantum secretum suum celare. *Ad Veritatem re-*

voca-

vocatur *Fides* seu *Fidelitas* quæ servat proximo fidem in promissis, Unde notandū est quod promissio facta animo se obligandi, & acceptata, juxta valdè probabilem sententiam, obligat sub mortali. *Fidelitati* opponitur *Infidelitas in promisso*, vel *Fidei data violatio*. *Veritati* autem opponitur *vitium mentiendi*. Mentiri verò dicitur, quasi contra mentem ire; cum aliud in mente sentimus, & aliud extrā significamus. *Dividitur autem Mendacium* *Primo in factantiam*, quā aliquis majora de se prædicat, quā habeat, & *Ironiam*, quā, aliquis minora, quā insint affirmat; vel laudabilia, quæ insunt, negat. Hæc opponitur *Veritati* per defectū. *Secundò dividitur Mendacium in Jocosum*, quod dicitur causa propriæ, vel alienæ voluptatis: *Officiosū*, quod dicitur causa propriæ, vel alienæ utilitatis: & *Perniciosum*, quod alicui nocet injustè, licet alteri profit. *Tertio dividitur Mendacium ratione signi*, in illud, quod consistit in verbis, & hoc propriè vocatur *Mendacium*. Et in illud, quod consistit in factis, & actionibus: ut dū habens in corde lætitiā, tristitiā contra veritatem ostendit: appellaturq; *Simulatio*: sub qua comprehenditur *Hypocrisis*, per quam re vera peccator justus se simulat.

Octava Virtus est Amicitia quæ non est mutua benevolentia in aliqua communicatione fundata; sed est *Virtus*, quæ facit ut *conversatio nostra cū proximi, sit grata*, & talis, qualem decet esse, spectata nostra conditione, personarum, quibuscum agimus, negotiorum &c. ut neq; nimis blandè neq; ni-

mis asperè in colloquiis & congressibus ad illos nos habeamus, sed ut decet æqualiter amicos & socios, propter generalem communicationem naturæ rationalis. *Hæc Virtus propriè vocatur: Affabilitas: cui per excessum opponitur Adulatio:* quia adulatores student nimis blandè in convictu se habere, qui omnia probant, omnia laudant, & in omnibus se accommodant voluntati eorum, quibus blandiuntur. Et si hoc faciunt suæ utilitatis causâ, dicuntur simpliciter *adulari*: si verò solùm, ut placeant, & delectent, dicuntur *blandiri*. *Per defectum* opponitur *Litigium*, quod perturbat vitam socialem, & contentiones atq; pugnas parit.

Ultima Virtus est Liberalitas, quæ versatur circa pecunias, ut decet, illas expendendo ubi sub pecuniis intelliguntur omnes divitiæ externæ, quarum pretium & æstimatio pecuniâ metitur. Est autem Liberalitas duplex: Alia, quæ primariò moderatur passionem appetitus concupiscibilis, & quæ solum disponit ad congruam elargitionem: & hæc potius est pars Temperantiæ, quam Justitiæ, quæ residet in prædicto appetitu. Alia est, quæ respicit primariò exteriorè elargitionè, ut fiat, quibus, & quomodo oportet: & hæc cùm sit ad alterum spectat ad Justitiam, ut pars potentialis, quæ residet in voluntate. Ad Liberalitatem reducitur Magnificentiæ, quæ est circa magnos sumptus in ordine ad alterũ, quæ ponitur in voluntate: nam Magnificentiæ est quædam egregia Liberalitas. Liberalitati per defectum opponitur Avaritia: seu nimia

Justitia.

461

nimia cupiditas divitiarum, quæ est, juxta *Apostolū Paul: 1. ad Tim: 6.* Radix omnium malorum: cuius filias enumerat *Gregor: Lib: 31. Moral: proditorem, fraudem, fallaciam, perjuriam, inquietudinem, violentiam & obdurationem contra Misericordiam.* Per excessum verò oponitur Prodigalitas, quæ plus dat, quàm oportet, aut his quibus non oportet.

Praxis Justitiæ

Hæc expressa est in actibus Justitiæ p. 2. p. 87. quibus adduntur.

Faculatoria.

Fac me Domine virum justum, qualem describit Propheta David.

Qui ingreditur sine macula & operatur justitiam.

Qui loquitur veritatem in corde suo, qui non egit dolum in lingua sua.

Nec fecit proximo suo malum, & opprobrium non accepit adversus proximum suum.

Qui jurat proximo suo & non decipit. *Pf: 14.*

Sacrificabo sacrificium Justitiæ & sperabo in Domino. *Pfal: 4.*

Confitebor Domino secundum Justitiam ejus, & psallam nomini Domini Altissimi. *Pf: 7.*

Domine deduc me in Justitia tua: propter inimicos meos dirige in conspectu tuo viam meam. *Pf: 5.*

Exaudi me Domine in tua Justitia; & non intres in iudicium cum servo tuo. *Pfal: 148.*

CAPUT XI.

De Fertitudine.

Tri-

Tripliciter sumitur Fortitudo: *Primò*, ut dicit firmitatem animi in quolibet virtuoso opere: & sic non est Virtus specialis, sed generalis conditio omnium virtutum: nam de ratione cujuslibet virtutis est firmiter inclinare ad suum actum. *Secundò*, ut dicit firmitatem animi in sustinendis vel superandis temporalibus periculis, quæ reddunt objectum difficile & arduum, quorum victoria pertinet ad appetitum irascibilem; sed neq; hoc modo Fortitudo sumpta est virtus specialis: quia comprehendit omnes suas partes potentiales, quæ non attingunt perfectè rationem fortitudinis: ut Magnanimitatem, Magnificentiam &c. *Tertiò* sumitur prout dicit firmitatem animi in illa materia ubi difficillimū est firmitatem habere, ut sunt mortis pericula; contra quæ firmat animum, nè illorū timore bonū rationis deferat: vel detinet, nè nimium audax in ea incidat. Et hoc modo Fortitudo est Virtus specialis importans specialē honestatē, quæ sic à D. Thom: definitur: *Fortitudo est virtus existens in irascibili cōdērcitiva timoris & audaciæ moderativa instantibus periculis.* Unde munus ejus est duplex 1. *Cōdērcere timorem*, & non omnino tollere: nam etiam est timor cadens inconstantem virum. 2. *Moderare audaciam*, nè declinet in temeritatem. *Pericula* verò, quæ sunt materia circa quam hujus virtutis, debent esse ex honestò fine: debent esse maxima: & ex aliqua impugnatio-
ne occurrentia: v. quando oppugnatur bonum rationis; quod fit vel in bello communi, quod est contra
Justi-

Justitiam: vel in bello particulari, quod est contra Fidem, Castitatem &c. *Sunt autem duo actus Fortitudinis, nempe Aggredi, & Sustinere;* inter quos principalior est *Sustinere.* id est, immobiliter sistere in periculis: quia qui sustinet, sentit pericula imminencia; qui aggreditur, sentit ea ut futura: & Hinc *Martyrium* quod est *actus principalissimus Fortitudinis*, non in aggrediendo, sed in sustinendo consistit.

Partes Integrales Fortitudinis sunt Quatuor; Duæ ex parte aggressionis, scilicet, *Magnanimitas*, ad securè aggrediendum; & *Magnificentia*, ad perficiendum inchoata; Duæ ex parte Sustinentiæ: scilicet, *Patientia* nè decideret animus ex tristitia mali præsentis, & *Perseverantia*, nè fatigetur & frangatur ex diuturnitate illius. Quæ debent fieri circa pericula mortis, quæ sunt materia Fortitudinis: nam si fierent circa alias materias minùs difficiles, potiùs essent partes potentiales Fortitudinis, quàm integrales.

Partes Potentiales Fortitudinis sunt Quatuor, secundùm S. Thomam v. *Magnanimitas*, *Magnificentia*, *Patientia*, & *Perseverantia*. Dicuntur autem istæ Virtutes partes potentiales Fortitudinis propter affinitatem cum ipsa vel in materia, vel in modo perficiendi, qui est firmare animum nè à bono rationis recedat.

Magnanimitas est Virtus inclinans ad opera magna, & heroica, in omni genere virtutum. Ex eo enim dicitur animus magnus, quia ad magna aspirat:

aspirat: scilicet, ad magnam & profundam Humilitatem, magnam Patientiam, magnam abstinentiam, magnam vitæ Austeritatem &c. Et quia Magnanimitas est *primariò*, circa magnitudinem virtutis: ideo *secundariò* est circa magnitudinem honoris qui virtutem magnam consequitur. *Materia intrinseca magnanimitatis sunt passiones, vel actus appetitus irascibilis: scilicet, Spes & Desperatio.* Magnanimitas enim *spem erigit*, & stimulat ad magna sibi proportionata, firmatquæ ut usq; ad consecutionem non deficiat; & etiam detinet, nè ad improporcionata ascēdat: *Desperationem verò comprimit*, nè propter rei difficultatem à virtutis prosecutione deterreat. *Sub Magnanimitate continetur Fiducia*, quæ dicit Spē consequendi magna. Et *Securitas animi ex ablatione timoris.* *Vitia magnanimitati opposita sunt ex parte Objecti primarii Præsumptio*, quæ tendit in magna improporcionata. Ex parte Objecti secundarii, scilicet, honoris est *Ambitio*, quæ est appetitus inordinatus honoris. Ex parte gloriæ, quæ est honoris effectus, est *Vana gloria.*

Secunda pars potentialis Fortitudinis est Magnificentia, quæ est Virtus magnorum operum factiva, in ordine ad bonum ipsius magnifici. Nam si prædicta opera in ordine ad alienum bonum fiant, erit alia Magnificentia, quæ est pars potentialis Iustitiæ. *Differt autē hæc Virtus a Magnanimitate*, quia hæc intendit magnū in actibus virtutū internis & immanentibus, ubi bonitas moralis *primariò*

con-

consistit: sed *Magnificentia* intendit magnitudinē in operibus externis seu artefactis: quæ versatur circa magnos sumptus, & circa pecunias, quibus præparantur. *Materia* istius Virtutis *intrinseca* sunt istæ *passiones* appetitūs irascibilis, scilicet: *Spes Desperatio* & *Timor*: sed principalior est *Spes*. Est enim præcipuū munus hujus Virtutis rectificare & confortare passionem *Spei*, nè obruatur à magnitudine sumptuū & difficultate: vel si opus sit, detinere illam, ut non aggrediatur, quæ non oportet. Comprimit etiam *Desperationem* & *Timorem*, nè à magnis sumptibus inordinatè retrahant. Ad *Magnificentiam* reducitur *Strenuitas*: nam pertinet ad Magnificum, ut ea, quæ aggreditur strenuè & sollicitè exequatur. *Vitia* illi opposita per defectū est *Parvifacientia*: per excessum est *Consumptio*.

Tertia pars potentialis Fortitudinis est Patientia: quæ firmat animum contra tristitias ex rebus adversis, & hujus vitæ malis natas. Seu, *Est Virtus quæ moderatur tristitias ut omnia adversa & hujus vitæ mala equo animo tolerantur*. Sunt autem hæc mala: ut mors Parentum, Consanguineorum, dolores, morbi, injuriæ, contumeliæ, detractiones, infamiæ, irrisiones, probra, etiam ipsa mors, quæ homo verè patiens sinè nimia tristitia sustinere debet. Hæc Virtus licet resideat in appetitu concupiscibili; quia versatur circa tristitiam, quæ est passio istius appetitus; tamen adjungitur Fortitudini ut pars potentialis: quia Patientia servat formam & modum Fortitudinis, firmando animum in bono

contra malum. Hinc patet, quòd Tristitiæ sunt materia intrinseca Patientiæ, *cujus vitium oppositum est Impatientia*. Ad Patientiam reducitur Longanimitas, per quam sustinemus æquo animo diuturnam dilationem boni desiderati: & quia hæc dilatio excitat in nobis afflictiones & tristitias: sustinere autem hæc; munus est Patientiæ, idèò meritò Longanimitas ad Patientiam reduci debet. Etiam Tolerantia pertinet ad Patientiam: quia utraq; firmitat in rebus adversis.

Ultima pars potentialis Fortitudinis est *perseverantia*, non illa, quæ homo durat in gratia usq; ad finem vitæ hæc enim non est Virtus, sed specialissimum donum proprium prædestinatorum: quod licet impetrare possimus, non tamen propriè mereri: neq; illa, quæ est in Voluntate ad firmandam illam in bono contra passiones Spei, Desperationis. Timoris &c. quas passiones illa non moderatur. Sed illa *Perseverantia est Virtus*, quæ est in appetitu irascibili, ad firmandum illum & moderandas passiones ejus, nè propter difficultatem, quæ sentitur ex continuatione & diuturnitate virtuosorum actuum recedat à bono rationis. Et hæc *Perseverantia est pars potentialis Fortitudinis*. Convenit enim cum illa, tum in subjecto, & materia: quia utraq; est in irascibili. Tum etiam in modo perficiendi, qui est firmando & roborando ad sustinendum: Fortitudo quidem sustinet difficultatem proveniente ex periculis mortis, quæ est omnium maxima: Perseverantia verò sustinet difficultatem proveniente

ex operis continuatione & diuturnitate, Vel ex ejo repetitione: unde sic definiri potest: *Perseverantia est virtus, quā sustinemus difficultates ex operis continuatione & diuturnitate provenientes.* Hæc virtus moderatur *Timorem qui est materia intrinseca Perseverantia.* Ad *Perseverantiam* reduciur *Constantia*, per quam adversus difficultates, vel impedimenta occurrentia in bono constanter persistimus. Differt autem à *Perseverantia*: quia hæc non desistit à bono propter diuturnitatē: *Constantia* autem non desistit propter quæcunq; alia exteriora impedimenta:

Vitium oppositum Perseverantia per defectum dicitur *Mollities*: non illa, quæ est *Luxuriæ* species: sed illa per quam facilè quis recedit à bono inchoato propter timorem deficiendi, vel propter tristitiam proveniente ex defectu delectationis. Dicitur verò *Mollities* quia cedit debili moventi, v. *Timori* aut *Tristitiæ*. Per excessum opponitur *Pertinacia*, quā quis nimium propriæ sententiæ adhærens non desistit ab incepto cum oportet. Unde pertinaces dicuntur, qui permanent in propria sententia plus quam oportet.

Praxis Fortitudinis.

HÆc sunt, quæ ad praxim veri cultores Fortitudinis deducere debent *Primum est*, ne pericula mortis nimium audaces temerè aggreantur: qua de re sic nos monet *S. Ambr. Lib. 1. cap. 37. de offic.* In omnibus non solum, quid honestum, sed etiam quid possibile sit quæramus, ne forte

fortè aggrediamur aliquid, quod non possimus exequi. Unde nos tempore persecutionis de civitate in civitatem cōscendere, immò (*ut ipsius verbō utar*) fugere vult Dominus, nè temere aliquis, dùm Martyrii desiderat gloriam, offerat se periculis, quæ fortassè caro infirmior, aut remissior animus ferre ac tolerare non queat. *Secundum est*, ut nulla pericula, nullos labores, nulla adversa nimium formident, etiam ipsam mortem, & si eveniant, magnò animò ferant, & in omnibus adversis mentis tranquillitatē conservent. Nam Fortitudinis proprium est, ait *M. Tullius*: Nihil extimescere, omnia humana despicere, nihil quod homini accidere possit, intolerandum putare. *Tertium est*, ut sæpius legant Historias Sanctorum Martyrum, & animo perspiciant quanta passi sunt tormenta pro DEO, pro Fide orthodoxa, pro virtute, pro sua & aliorum salute, ut eorum exemplo ad similia perferenda excitentur; prout de Sancta M.N. Theresia in ejus vita legimus; quæ cum SS. Martyrum acta perlegeret, adeo in ejus meditatione Sancti Spiritûs ignis exarsit, ut domo aufugiens in Africam trajiceret, ubi vitam pro gloria JESU Christi, & animarum salute profunderet. *Quartum est*, ut actus amoris DEI frequentissimè exerceant: nam Charitas expellit omnē periculorū, laborum, & difficultatum timorem. Nihil enim est, ait *S. August. lib: 1. cap: 28. de moribus Ecclesiæ Catholicæ*, tam durum atq; ferreum, quod non amoris igne vincatur. Et *S. Paulus ad Rom: 8.* Quis, inquit, nos separabit à Charitate Christi? tribula-

bulatio? an angustia? an fames? an nuditas? an periculum? an persecutio? an gladius? *Quintum*, ut pro acquirenda virtute quæcunq; ardua & difficilia aggredi non vereantur, magnam fiduciam habentes in auxilio DEI: ut *S. Paulus ad Philip: 4. de se ipso dicebat*: Omnia possum in eo, qui me confortat. *Sextum*, ut ad exercendos heroicis actus virtutum semper contendant, quod nobis magnopere *S. M. Nostra* commendat. *Septimum*, ut vincere seipsum, pravos affectus subjugare, & dominium passionum acquirere conentur. Revera, inquit, *S. Ambrosius lib: 1. cap: 36. de Offic*: Jure ea fortitudo vocatur quando unusquisq; seipsum vincit, irā continet, nullis illecebris emollitur atq; inflectitur, non adversis perturbatur, non extollitur secundis. Quid autem excelsius & magnificentius, quā exercere mentem, afficere carnem, & servitutem redigere, ut obediat imperio, consiliis obtemperet?

Hæc Praxis continetur in actibus Virtutis Fortitudinis par: 2. p. 96. Quibus adduntur.

Faculatoria.

Diligam te, Domine fortitudo mea: Dominus firmamentum meum, & liberator meus.

DEUS meus adjutor meus, & sperabo in eum.

Quoniam in te eripiar à tentatione & in DEO meo transgrediar murum. *Psal: 17.*

Fortitudo & laus mea Dominus, & factus est mihi in salutem.

Dominus mihi adjutor, non timebo quid faciat mihi homo. *Psal: 117.*

Dominus illuminatio mea, & salus mea quem timebo?

Dominus Protector vitæ meæ, à quo trepidabo?
Psal: 26.

Cantabo fortitudinem tuam, & exaltabo manẽ misericordiam tuam. Psal: 58.

CAPUT XII.

De Temperantia.

EX eo dicitur *Temperantia* quia ad temperiẽ debitam reducit vim nimiam passionum nostrarum & affectuum. *Est autem Temperantia virtus refrænans appetitum sensitivum in concupiscentiis & delectationibus corporalibus quæ maximam vim habent abducendi à bono rationis.* Hæc virtus primariò est instituta ad moderandas delectationes, *gustus & tactus*, quorum sensuũ delectationes, & earum concupiscentiæ vehementissimæ sunt, ut potè, quia versantur circa operationes maximè connaturales. Cæteræ delectationes aliorum sensuum exteriorum, ut visus, odoratus, gustus: & passiones concupiscibiles, quæ facilius moderantur, vel erunt *Materia* secundaria *Temperantiæ*: vel moderabuntur per alias virtutes, quæ dicuntur partes potentiales *Temperantiæ*. *Partes integrales Temperantiæ sunt due*, quæ ad opus temperantiæ concurrunt & illud quasi integrant: nempe, *Verecundia & Honestas*. *Prima dicitur Pars Temperantiæ*, quia jacet *Temperantiæ* fundamenta, & ad illam disponit, quæ nihil aliud est, quam laudabilis passio timoris, quo quis horret committere turpia
propter

propter confusionem & vituperationem: cui ad-
jungitur *Erubescencia*, per quam aliquis fugit vi-
tiosa agere, propter timorem vituperii; sed *Vere-
cundia* propriè dicitur per quam aliquis propter e-
undem timorem turpia faciens, vitat publicos con-
spectus. *Honestas* est quedam *Moralis pulchri-
tudo atq; decor*; & quia *Temperantia* excludit
turpe, idè *Honestas* turpitudini contraria pertinet
ad *Temperantiam*, & cum illa maximè identifi-
catur. *Temperantie* opponitur *Intemperantia*.
Partes subiectivæ, seu species *Temperantiæ* sunt
quatuor *Abstinentia*, *Sobrietas*, *Castitas* & *Pudi-
citia*.

Abstinentia est virtus, quâ moderamur ciborū
delectationes & in usu illorū debitam moderationē
servamus. Sunt autem duo cavenda in usu ciborū.
Primò nè propter se appetantur, vel sumantur seu
propter delectationem eorū, sed propter corporis
sustentationem vitæq; necessitatem. *Secundò* ut in
ea quantitate sumantur, quæ saluti est necessaria, &
ut corpus officiis animæ, mentisq; functionibus aptè
inserviat. Principalis *actus Abstinentiæ* est *Jejunium*:
quo ex alimento etiā non immoderato aliquid sub-
trahitur corpori: tū ad concupiscentias carnis re-
primendas tum etiam ut mens elevetur ad subli-
mia contemplanda, liberiusq; DEO adhaereat: tū
præterea ut per voluntariam corporis castigationē
peccata purgentur: tum propter alios honestos fines.
Est verò *duplex Jejunium*: *Naturale*, quod dicit
præcisè *Negationem* sumptionis cibi: & *Morale*,

quod importat mentis propositum abstinendi à multiplici comestione: & ab esu carnium, & similium, propter Pœnitentiam & mortificationem. *Vitium oppositum.* Abstinentiæ est *Gula*, *cujus* numerantur *quinque Species*, quæ hoc versiculo continentur.

Præproperè, lautè, nimis, ardentè, studiòse. *Præproperè*, dicit inordinationem comestionis ex parte temporis, cum nimis prævenitur tempus. *Lautè*, dicit inordinationem ex parte substantiæ ciborum quia sunt nimis pretiosi, aut delicati. *Nimis*, dicit indebitam quantitatem, cum plùs sumitur cibus, quàm oportet. *Ardentè*, dicit inordinationem ex parte modi comedendi, quando nimio affectu & nimis intentè vescimur. *Studiòse*, dicit excessum ex parte qualitatis cibi, ut quòd sit nimis accuratè præparatus. Præter has Species Gulæ assignantur ejus quinque Filiæ, quæ ex illa oriuntur: de quibus *par. 2. pag. 60.*

Secunda species Temperantiæ est Sobrietas. Quod nomen sumptum est ab observatione mensuræ: quod enim Latini *mensuram*, hoc Græci *briam* vocant: unde *Sobrius* idem est quòd *servans mensuram*. Est autem *Sobrietas* virtus, quæ affectum & usum potûs inebriare valentis debite moderatur. Vitium oppositum *Sobrietati* dicitur *Ebrietas*, quasi extra *briam* seu *mensuram*.

Tertia Species est Castitas, à castigando dicta, quia per ipsam concupiscentia carnalis castigatur & còdèretur. Estq; duplex: *Alia* quæ abstinet à delectationibus illicitis, quæ dividitur in *Castitatem*
Con-

Conjugalem & Vidualem & Juvenilem. Alia quæ abstinet perpetuò ab omnibus delectationibus etiam licitis, quæ vocatur *Virginitas* quæ est duplex: *Una Naturalis*, quæ præcisè dicit carnis integritatem: *alia Moralis*, quæ addit electionem & animum servandi illam; & hæc est propriè virtus.

Quarta species Temperantiæ dicitur *Pudicitia* à pudore dicta, quæ est propriè circa illa, de quibus homines maximè verecundantur: nec distinguitur propriè à Castitate, ad quam ordinatur, sicut exprimens Castitatis circumstantiam quandam.

Partes Potentiales Tèperantiæ sunt *Continentia*, *Mansuetudo*, *Clementia*, *Modestia*.

Nomen *Continentiæ* tripliciter sumitur *Primò Large*, pro qualibet abstinencia & retractione ab eo in quod appetitus fertur. *Secundò magis propriè* pro virtute refrænante passionem, quæ sunt circa delectationes carnis: quo pacto est idem quod *Castitas*: specialiterq; *Continentiæ* nomen tribuitur *Castitati Viduali*, & etiam *Juvenili*, ipsaq; *Virginitas* dicitur *perfectissima Continentia*. Sed neutro modo *Continentia* sumpta est, pars *Potentialis Temperantiæ*. Igitur *Tertiò* sumitur *Continentia* pro habitu quodâ, per quem *Voluntas* resistit passionibus concupiscibilibus, & ab eo firmatur & detinetur, ut passionum impetum non sequatur. Et quia hic habitus non compescit passiones sed immoderatas in appetitu relinquit, ex eo quod non perficit appetitum concupiscibilem, sed solum detinet voluntatem, nè sequatur

tur ipsius passiones; ideò *Continentia* non est simpliciter virtus quamvis ad genus Virtutis reducat, ut aliquid imperfectum.

Mansuetudo quæ *Militas* etiam dicitur, est virtus irarum moderatrix. Et quamvis existat in appetitu irascibili, tamen adiungitur Temperantiæ, ut ejus pars potentialis, propter modum perficiendi qui est refrænando iram, quam Mansuetudo ita componit & moderatur, ut non exurgat, nisi cùm oportet: & in ea mensura, in qua fuerit necessaria. Aliquando moderatè irasci, debitum & honestū est, & ad serviendum Justitiæ, & pro juvanda fortitudine, quæ utitur ira in suo actu aggressionis nunquam tamen ita iræ dandus locus, ut judicium rationis perturbet. *Mansuetudini opponitur duplex Vitium*: Aliud per defectum, quod dicitur *Iracundia vel Ira*, cujus sunt tres species, de quibus *suprà pag: 315*. Aliud per excessum, quod dicitur *Lentitudo*: quia per illud nimis lentè homo se habet circa malum irritans, nec debitam iram assumit ad illud repellendum, vel superandum, aut ulciscendum.

Clementia est virtus moderatrix pænæ & vindictæ, mitigando externam punitionem, quantum Justitia & communis boni ratio permittit, quæ virtus est propria Superiorum & Judicum. *Vitium oppositum Clementiæ* per excessum, est *Crudelitas*, quæ majorem pœnam instituit, quàm culpa meretur: quòd si aliquando, culpa non supposita vel nō attenta, pœna irrogatur, tunc *Feritas* dicitur. *Vitium*

tium verò Clementiæ oppositum per defectum est nimia Lenitas: per quod iudex pœnam, quam infligi oportet, imprudenter remittit, vel mitigat plûs quàm oportet. Qua in re quomodo nos gerere debemus, docet S. Gregor: lib: 20. Moral: cap: 8. Sit, inquit, amor, sed non emolliens: sit rigor, sed non exasperans; sit zelus, sed non plûs quàm expediat parcens.

Modestia est virtus exteriorum & interiorû hominis actionum moderatrix. Sic dicta à modo quasi modum sciens vel statuens, qui in humanis affectionibus & actionibus servari debet. Sub *Modestia* reliquæ partes potentiales Temperantiæ continentur quæ etiam Species modestiæ dicuntur v. *Humilitas*, *Philotimia*, *Studiositas*, *Modestia morum*, *Eutrapelia*, & *Modestia cultus*. Cujus ratio est; quia præter Passiones & affectus, quæ sunt materia aliarum virtutum, adhuc quinq; sunt à virtute moderanda, videlicet, Affectus Spei tendentis in excelsa; & hunc moderatur *Humilitas*. Cōcupiscentia mediocris honoris; quam moderatur *Philotimia* Studium sive appetitus cognoscendi; & hunc moderatur *Studiositas*. Motus & gestus corporales pertinentes ad exteriorē conversationem, tam in factis, quàm in dictis; pro quibus moderandis in rebus seriis ponitur *Modestia morum*; in ludicris autem *Eutrapelia*. Deniq; exterior apparatus vestium, utensilium, & divitiarum, & hujusmodi aliorum; quorum Moderatio spectat ad *Modestiam cultus*.

Humi-

Humilitas dicitur *ab humo*: quia per illam ad ima, & veluti ad humum usq; aliquis deprimitur. Unde secundum Isidorum. *Humilis* homo dicitur *quasi humi acclinis*, qui ex consideratione proprii defectus spontè se deprimit.

Est autem Humilitas Virtus, quâ cōderetur animus nē se ad altiora feratur: id est, *nē inordinatē extollatur*. Seu, secundum Sanctum Bernardum. *Est virtus, qua quis verissima sui cognitione sibi ipsi vilesceat*. Seu secundum S. Thom: *Est virtus, quâ quis considerans suum defectum, tenet se in infimis secundum modum suum*.

Hinc patet fundamentum *Humilitatis*, esse *veram cognitionem sui*, qua quis defectus suos considerans, reputat se indignum æstimatione & honore, dignumq; abiectione & despectu, quam considerationem & intellectus iudicium voluntas nostra sequens, talem abiectionem tanquam sibi condignā amplectitur. Tunc verò *cognitio sui vera habetur*, dum homo se ipsum sinē dissimulatione inspicit & sinē palpatione dijudicat: considerans attentè qualis sit tum animo, tum corpore: quàm ignorans, quàm ad malum pronus; ad bonum quàm difficilis & infirmus, quantis peccatis obnoxius, quantis miseriis subiectus, quàm in DEUM ingratus &c. Præcipuè verò considerare debet, quomodo ex se ipso nihil est, nihil potest, nihil habet, nisi miseriam, vanitatem, defectum: quidquid autem bonitatis, virtutis, scientiæ, & cujuslibet perfectionis in eo est, aut esse potest, omnino gratis sibi à DEO donari,

ab

ab ipsiusquæ voluntate in esse, fieri, & conservari prorsus dependere: ita ut suspendente illo suo concursu, in nihilum omnia redigantur

Hujus considerationis *cognitionis sui* est multiplex *Utilitas*. *Prima est*, quia qui se ita cognoscit, se ipsum vilipendit & contemnit; dum videt se esse ad omnia insufficientem & inutilem, atq; ipsis DEI muneribus esse indignum. *Secunda*, quia hujusmodi homo vult ab aliis talis judicari, æstimari, & haberi, qualem se in DEI oculis esse recognoscit, & qualem ipse se judicat & æstimat: proinde nequæ honorari ab aliquo, nequæ laudari cupit, sed contemni & vilipendi. *Tertia*, quia talis humilis dum se aliis comparat, censet se omnibus deteriore & viliores neq; ulli præferre se audet; sed potius in ordine ad DEUM, & propter dona quæ ab ipso alii habent, omnibus se subijcit.

Sed sciendum est *duplicem esse Humilitatem* secundum S. Bernardum. *Alia est imperfecta*, quæ *Humilitatem judicii vocat*: qua quis agnoscens suam vilitatem se apud se demittit; non tamen vult ab aliis contemni, aut vilis haberi, sed potius æstimari & honorari. *Alia est perfecta*, quæ quis etiam ab aliis talis haberi cupit, qualem se coram DEO cognoscit; *quam Humilitatē affectus vocat*.

Sunt quoq; *duo habitus Humilitatis*, quorum duplex est Subjectum. *Alius* qui refrænât passionē Spei circa propriam excellentiam absolutè sumptâ, sine respectu ad alterum: & hujus Subjectum est appetitus sensitivus irascibilis, in quo residet passio Spei.

Alius

Alius habitus est, qui moderatur affectum Voluntatis circa propriam excellentiam primario respectu DEI, & ex subiectione ad DEUM, tanquam ad supremum Excellentem: & secundario ex subiectione ad alios secundum id, quod ex DEO habent; cuius Humilitatis est Subiectum voluntas, prout est eminenter irascibilis, sicut & cæterarum virtutum, quæ sunt ad alterum.

Objectum quoque Humilitatis est id, quidquid nobis advenire potest, vile, probrosum, & abjectum. Materia vero Intrinseca Humilitatis est internus nimi motus & affectus, quem refrænat, ne tendat in sui celsitudinem, supra id, quod oportet.

Hæc virtus Humilitatis maxime est necessaria viris spiritualibus atque Christianis. Primo, quia per ipsam efficimur discipuli Christi, qui dicit Matthæ: 11. Discite à me, quia mitis sum & humilis corde. Secundo, quia hæc una virtus præ cæteris virtutibus Moralibus magis DEO placet: Qui humilia respicit in Cælo & in terra. Psal: 112. Sic & Beatissima Virgo ait: Quia respexit Humilitatem ancillæ suæ. Unde & humiles facile DEUS exaudit, de quo sic Propheta David testatur: Respexit in Orationem humilium, & non sprevit precem eorum. Psal: 121. Et Ecclesiasticus: Oratio, ait, humiliatis se penetrabit nubes. Eccl: 35. Tertio, quia Humilitas propriè meretur vitam æternam, ut patet ex verbis Prophetæ: Tu inquit, Domine, populum humilem salvum facies & oculos superborum humiliabis. Psal: 17. Hoc idem ipsemet Christus dicit.

dicit. Amen dico vobis nisi efficiamini sicut parvuli, non intrabitis in Regnum cœlorum *Matthæi* 18. *Quartò*, quia DEUS superbis resistit humilibus autem dat gratiam; ut loquitur *S. Petrus* 1. *Pet: 5.* *Quintò*, quia humilitas Spiritum Sanctum ad se quodammodo trahit: sic enim *Isaia ult: habetur:* Super quem requiescet Spiritus meus, nisi super humilem & quietum. *Sextò*, quia Humilitas exaltat. Sic enim Dominus *ait:* Qui se humiliat: exaltabitur, *Luc: 14.* Proinde *Petrus Apostolus*, qui ex humilitate Domino dixit: Exi à me Domine, quia homo peccator sum; factus est *teste D. Chrysost:* Princeps Pastorum, fundamentum Ecclesiæ, & Claviger Regni Cœlorum. *Septimò* quia per hanc virtutem citò veniam peccatorum nostrorū obtinemus, sicut expertus est Publicanus *Luce* 18. *Octavò*, quia sola hæc virtus facilè dæmonem, ejusq; tentationes vincit. Unde *S. Antonius Eremita teste S. Athanasio* dicere solebat: Dæmonem nihil pejùs odisse, quam humilem, & DEI amantem. Idemquè Sanctus cum per visum mundū laqueis plenum spectasset, Dominumq; rogasset, quomodò aliquis illos laqueos evadere posset; responsum accepit: *Per humilitatem.* *Nondò*, quia finè humilitate aliæ virtutes subsistere non possunt, secundum opinionem SS. Patrum. Unde *S. Gregorius sic ait:* Qui finè humilitate virtutes congregat, quasi in ventum pulverem portat. *Et iterum lib: 23. Moral: cap: 13 dicit:* Humilitas est Mater & Magistra virtutum. Cui *S. Thomas de Villa nova*

Conc:

Conc: 1. de S. Martino subscribit dum ait: Hæc Virtus plurimarum virtutum Mater est, & origo; ex hoc enim fonte innumeræ aliæ virtutes scaturiunt; inde Obedientia, timor, reverentia, patientia, modestia, mansuetudo, amicitia, pax. Et S. Bern: Serm: 1. de Nati: Humilitas, inquit, est fundamentum, cultusq; virtutum. Decimo, quia Humilitas hominem à multis tam culpæ, quàm pænæ malis præservat, secundum S. Bonaventurā. Qui commemorando verba Prophetæ David dicentis: Quoniam respexisti humilitatem meam, salvasti de necessitatibus animam meam. Psal: 30. De necessitatibus, inquit Seraphicus Doctor, Culpæ moralis, pænæ gehennalis, miseræ temporalis, Undecimo, quia per Humilitatē acquiritur amissorum meritum recuperatio. Sic enim Hugo de S. Victore hæc de re sentit: Vovisti DEO Virginitatem tuam, & post votum perdidisti? Virginitas autem semel amissa reparari, aut recuperari nunquam potest. Quid ergo reddes DEO pro eo, quod vovisti & irrecuperabiliter perdidisti? Audi, redde pœnitentiam tuam, redde contritionem, redde humilitatem: pro Virginitate carnis, redde humilitatē cordis; humilitatem cordis per se debueras, etiam si Virginitatem habueras, & tamen si Virginitatē reddere non potes, redde pro illa humilitatem, quæ satisfaciet tam pro se, quàm pro illa. Sic ille Tom: 2. Infit: Monast: serm: 53. Et S. Thomas de Villanova docet, quòd Humilitas omnes alias virtutes supplet. Neq; inquit, solum omnem gratiam

tiam & virtutem custodit Humilitas, sed etiam supplet: quidquid enim tibi obedientiæ, castitatis, patientiæ, sanctitatis deest, humilitate suppletur. *Duodecimò*, quia sine humilitate nec acquiritur, neq; conservatur Christiana perfectio: sicut *S. Basilus Filium Spiritualem instruit dicens*: Fili, præ omnibus humilitati stude, quod est omni virtute sublimius, ut ad perfectionis fastigium possis conscendere. Et *S. Dorotheus Serm: 2. de Cordis Humil.* Brevi, inquit, compendio, vel sola cordis humilitas ad perfectionis viam introducere nos poterit.

Ponuntur autem à SS. Patribus varia indicia Humilitatis, ex quibus quantum quisq; in humilitate proficit, facile cognoscat *S. Gregor: lib: 20. Moral: cap: 22. tria designat indicia humilitatis. Primum*, Si quis bona sibi data aut non agnoscat, aut certe aliena esse sciat, & eorum divulgationem metuat. *Secundum*, si libenter obediat, & aliorum imperio se submittat. *Tertium*, Si corrigentem patienter audiat, & grato animo correptionem subeat. *Trithemius Abbas lib: 2. Serm: 2. & 3. ad Monachos, triginta humilitatis signa recenset, ex quo breviter ab aliis hæc colliguntur.* I. Si iustus se omnibus inferiorem & viliorem agnoscat: II. Si omni tempore negligentias suas coram DEO, & hominibus fateatur. III. Si bona opera occultare desideret, & suum profectum abscondat. IV. Si sua mala consideret, & quæ bona alii fecerint manifestet. V. Si aliorum defectus taceat, & cum ratione officii tenetur, eos in humilitate spiritus corrigat.

VI. Si se ad increpandum non facilem, sed tardum, non ex pusillanimitate, sed ex propriæ vilitatis cognitione reperiatur. VII. Si correptiones & emendationes pro culpis & negligentis libenter suscipiat. VIII. Si correptus culpam non defendat, non neget, non palliet, non excuset, non murmuret, & accusatus se sinè causa accusari non clamet. IX. Si sit in voce dulcis, mitis, modestus, & non clamorosus. X. Si quæ de proximis audit, in meliorem partem interpretetur. XI. Si neminem quantumvis peccatorem despiciat. XII. Si laudari non appetat, & cum laudatur ingemiscens erubescat. XIII. Si laudes & favores in veritate contemnat, & ab his qui eum laudant, & magnificiunt se subtrahat. XIV. Si ex detractionibus & correptionibus quas patitur, gaudium concipiat, in Divino amore crescat, & se tanquam reum ex culpæ consideratione compungat. XV. Si correptus non recalcitret, nec crimina manifestissima corripientis obijciat, sed silentium servet. XVI. Si cuncta mundi hujus solatia deserat, & nullas mortalium amicitias requirat. XVII. Si hominum auxilia ad ascendendum non exquirat, sed in sua mediocritate consistat. XVIII. Si tribulatis ex corde compatiatur, aliorum defectibus patienter toleret, & pro delinquentibus oret. XIX. Si nulli DEI beneficia invidet, dona omnibus imprecetur & cupiat, & de fratrum profectu congaudeat. XX. Si multitudinem suorum peccatorum in cordis contritione in memoriâ revocet, & se omni DEI beneficio indignum putet. XXI. Si suū judi-
ci-

Temperantia.

483

cium & voluntatem abneget, & aliorum iudicio & voluntati se submittat. XXII. Si vestes novas, pulchras, pretiosas, despiciat. & indumenta vilia, & ab aliis projecta sibi dari concupiscat. XXIII. Si sit obsequiis aliorum deditus, & servitiis abjectissimis domus addictus. XXIV. Si viliora ministeria, quæ alii refugiunt & abominantur: facere delectetur. XXV. Si in congregatione sedem viliorē & posteriorem quærat, & nec æqualibus, nec inferioribus se præferat. XXVI. Si propter DEI amorē, quamvis fuerit doctus & eruditus, tamen suam scientiam & peritiam abscondat. XXVII. Si silentiū diligat, & nē offendat in sermone, aut nē lingua labatur, loqui paucissima consuecat. XXVIII. Si risum immoderatum, & omnes inordinatos cachinantium gestus evitet. XXIX. Si Dominum timeat, & ob timorem ejus omne peccatum declinare decernat. XXX. Si obedientiæ & subjectionis amator efficiatur, & in his omnibus, quæ proposita sunt mentis stabilitate firmetur.

Gradus quoq. Humilitatis à Patribus, & Theologis varii designantur. Primò ex parte ejus cui humilis se subdit, quatuor numerantur. 1. Subdere se majoribus, & non præferre se æqualibus. 2. Subdere se æqualibus, & non se præferre minoribus. 3. Non modò nulli se præferre, sed etiam omnibus minoribus se subijcere. 4. Universis etiam scelestissimis se subijcere.

Secundò ex parte actuum, quibus ad perfectionē Humilitatis pervenitur. D. Anselmus lib: de simili-

lit: ponit septem gradus. 1. Cognoscere se peccatorem & contemptibilem. 2. Dolere de suis peccatis, & imperfectionibus. 3. illa confiteri, etiam extra Sacramentum. 4. Velle, ut etiam alii defectus nostros cognoscāt, & in nobis esse credant. 5. Patienter sustinere, quando nobis obijciuntur ab aliis, & divulgantur. 6. Ferre patienter se pro sua culpa contemptibiliter tractari. 7. De hoc etiā gaudere.

Tertio S. Benedictus in sua Regula duodecim gradus Humilitatis assignat. Primus est, Cordo & corpore semper Humilitatem ostendere defixis in terram oculis: cui opponitur Curiositas, per quam aliquis curiosē ubiq; & inordinate circumspicit. Secundus gradus pauca verba & rationabilia loqui, & sinē ullo clamore: cui opponitur Levitas mētis, per quam scilicet homo superbē se habet in verbo. Tertius, ut non sit facilis & promptus in risu cui opponitur Inepta letitia. Quartus est Taciturnitas usq; ad interrogationem: cui opponitur Fastidia. Quintus est, tenere quod communis Regula aut observantia monasterii habet: cui opponitur Singularitas, per quā aliquis sanctior vult apparere. Sextus est, credere & pronūtiare se omnibus viliorē: cui opponitur Arrogantia, per quam homo sese aliis præsert. Septimus est, ad omnia inutilem & indignum sē confiteri & credere: cui opponitur Prasumptio, per quam aliquis reputat se sufficientē ad majora. Octavus est, Confessio peccatorum: cui opponitur Defensio eorum. Nonus est,

in duris & asperis patientiam amplecti: cui opponitur *Simulata Confessio*, per quam aliquis non vult subire poenam pro peccatis, quæ simulatè confitetur. *Decimus est*, Obedientia cui opponitur *Rebellio*. *Undecimus est*, ut homo non delectetur facere propriam voluntatem: cui opponitur *Libertas*, per quā homo delectatur liberè facere, quod vult. *Ultimus gradus Humilitatis est* Timor DEI: cui opponitur *peccanti consuetudo*, quæ implicat DEI contemptum. *Sciendum autem est*, aliquas operationes in prædictis Gradibus denotari, quæ magis spectant ad alias virtutes: tamen adscribuntur Humilitati propter aliquam specialem connexionem; vel quia ex ejus proprio actu originantur. Aliqui hos gradus Humilitatis tantum signa ejus, vel effectus esse dicunt.

Vitia Humilitati opposita sunt duo: Unum per defectum est Nimia demissio, seu Pusillanimitas. Alterum per excessum est Superbia: quæ sic definitur, quod sit appetitus immoderatus propriæ excellentiæ: unde superbire, est super alios ire. Ejus objectum est propria excellentia in omni materia: superbus enim hoc directè amat, ut, scilicet, super excellat, ima deferat, nulliq; subdatur: neq; alicujus etiam ipsius DEI jugo cervicem vult flectere. Hujus vitii superbiæ Species, & Gradus habentur supra pag. 312.

Philotimia est virtus, quæ ponit modum in appetendis honoribus: cujus Objectum est honor secundum se, ut est quoddam bonum amabile, &

delectabile. *Materia* ejus sunt passionēs concupiscibilis, *Amor*, *Desiderium* quas hæc virtus refrænât, nè immoderatè ad honorem ferantur. Vocatur autem *Philotimia* Latine *amor honoris*.

Studiositas est virtus, quæ moderatur affectum erga studium; nè homo plura, aut altiora scire velit, quàm oportet, & incitando eum ad sciendum, quæ scire oportet; nè propter laborem à studio retrahatur. *Per excessum* opponitur ipsi *Curiositas*: per quam aliquis adhibet superfluum diligentiam, ut aliquid sciat inutile, & quod nihil ad ipsum scire attinet, vel quod ejus captum superat, *Per defectum* opponitur *Negligentia*, quæ est quædam omissio, vel remissio animi in ordine ad discendum illa, quæ unusquisq; scire tenetur.

Modestia morum est virtus, quæ externos motus & gestus corporis in seriis ex rationis præscripto componit & temperat servatq; in illis decorum. Unde ejus *Objectum* est exterior gestus & omnes actiones corporales sensibus obviæ: v. incessus, statio, sessio, motus capitis, contractio & explanatio vultus, membrorum jactio, vox, risus, aspectus, & alia id genus, quæ internam animi dispositionem demonstrant. Hæc igitur omnia prædicta modestia morum componit, ut honestè fiant & juxta rationis præscriptum: habita ratione personæ, loci, temporis, negotiorum &c. *Ejus materia intrinseca* sunt passionēs concupiscibilis, prout circa dictos motus versatur. *Ad hanc virtutem pertinet moderatio Visus* quæ communiter dicitur *Modestia oculi*.

culorum, cujus studium meritorum est feracissimū propter frequentissimas occasiones, quæ se offerunt ad mortificandum visum. Huc etiam pertinet *moderatio lingvæ*, quæ cultus silentii vocatur. Hoc autem silentiū non consistit in eo, quod est præcisè non loqui: hoc enim pacto etiam lapides silent: sed in eo, quod est verba metiri, & reticere propter aliquod honestum motivum; ut ob amorem DEI, ob imitationem Christi, & Virginis Sanctissimæ, ad vitanda verba otiosa, ad conservandam internam recollectionem & devotionem, ad servandā observantiam Regulæ silentium servare præcipientis, & ob alios fines honestos, quibus multiplicatis multæ exercentur virtutes. Præterea ad *Modestiam morum* reducitur *Veritas* & *Affabilitas* seu *Amicitia* prout respiciunt exteriorem hominis conversationem, & externam interni conceptus manifestationem. *Vitium Modestiae morum* oppositum est *Immodestia*.

Eutrapelia est virtus, quæ in ludicris & jocos servat decorum: seu, quæ jocos & ludis modum rationis imponit. Ad hujus virtutis exercitium tria requiruntur. Primum est ut verba, aut facta in quibus quæritur delectatio, neq; sint turpia, neq; proximis nociva: immò neq; verba sacra, quibus ad jocos & facetias uti prohibet Conciliū Tridentinū. Secundum nè totaliter gravitas animi solvatur. Tertium ut ea quæ in laudem vel jocum assumuntur, competant personæ; ejusq; dignitati, & statui, congruantq; tempori, loco, & cæteris circumstantiis.

Hæc virtus est in appetitu concupiscibili, cujus passiones sunt materia intrinseca illius. *Duplex vitium* opponitur illi per excessum *Scurrilitas* & *Inepta latitia*: per defectum *Duritia* vel *Aggressitas*.

Ultima pars potentialis Temperantia & *Modestia Species*: est *Modestia cultus*: in corporis cultu rerumq; externarum apparatu mensurâ rationis, ac decorum servans. Hæc dividitur secundum Andronicum apud D. Thomam in tres species, nempe *Humilitatem*, per se sufficientiam, & *simplicitatem*, per quas triplex excessus in externo apparatu & cultu moderari debet. *Primus est excessus*, cum aliquis propter æstimationem, & gloriam ornatum adhibet majorem, aut pretiosiores quàm oportet: & hunc excessum reformat *Humilitas*, quæ est *Secundum Andronicum* habitus non superabundans in sumptibus & præparationibus. *Secundus est*: cum aliquis per superfluum ornatum quærit corporis delicias. Et hunc excessum tollit. *Per se sufficientia*, quâ *Andronicus* definit: Est habitus contentus quibus oportet, & determinativus eorum, quæ ad vivere conveniunt. *Tertius est*, quando in cultu & ornatu nimia cura adhibetur ob solam curiositatem finè alio pravo finè; & hunc aufert *Simplicitas* quæ est habitus contentus his, quæ cōtingunt, *Prædicti autē* excessus ex duobus capitibus contingere possunt: vel ratione quantitatis, quia plus expenditur, quàm oportet: vel ratione insolentiæ, quia præ-

ter consuetum patriæ morem, receptamq; proborū consuetudinem, novi usus & formæ vestium à peregrinis nationibus mutuuntur. *Ad Modestiam* cultus revocatur. *Liberalitas* quæ ponit modum circa pecunias & sumptus, quatenus hæc deserviant ad externum apparatus. *Ad eandem virtutem* reducitur *Paupertas Voluntaria* quæ prout est virtus refrænât appetitum à cupiditate & amore pecuniarum, redditq; animum ab eis liberum & expeditum. *Notandum autem est*, quod licet *Paupertas voluntaria* videatur non differre à *Liberalitate*: nihilominus satis probabiliter dici potest differre. Nam sicut circa honores ponuntur tres virtutes distinctæ: nempe circa Magnos *Magnanimitas*; circa mediocres *Philotimia*; & pro eorum totali abiectione *Humilitas* - ita circa divitias triplex est virtus; v. *Magnificentia* circa magnas *Liberalitas* circa moderatas; & circa earum totalem renuntiationem *Paupertas*.

Praxis Temperantie & aliarum virtutū ad eas spectantium habetur pag: sub titulis & nominibus propriis earum.

CAPUT XIII.

De Donis Spiritus Sancti,

De Beatitudinibus & Fructibus Spiritus S.

Post Tractatum de virtutibus Theologicis & Moralibus, etiam de Donis Spiritus Sancti tractandum est, quorum cognitionem viros Spirituales habere necesse est. *Sunt autem Dona Spiritus S. Habitus supernaturales perficiētes hominē,*

minem, ut promptè sequatur instinctum & motionem Spiritus S. seu, ut promptè obediat Spiritui S. quæ distinguuntur à virtutibus quia istæ perficiunt hominem, ut imperium atq; motionem rationis promptè sequatur, Dona verò Spiritus S. ad hæc homini sunt necessaria, ut homo efficaciter moveatur à DEO ad finem supernaturalem consequendum, seu ad vitam æternam obtinendam. Nā per virtutes Theologicas & Morales non ita perficitur homo in ordine ad ultimum finem, quin semper indigeat moveri quodam superiori instinctu Spiritus S. imperfectè enim cognoscimus & diligimus DEUM.

Septem verò sunt Dona Spiritus S. videlicet, *Sapientia, intellectus, Consilium, Fortitudo, Scientia, Pietas, & Timor Domini.* Ex quibus *Sapientia, Intellectus, Scientia, & Consilium* perficiunt Rationem; *Pietas*, voluntatem; *Fortitudo*, appetitum Irascibilem; *Timor*, appetitum concupiscibilem.

Præterea ex his Donis, Intellectus & Scientia correspondet *Fidei*, Sapientia *Charitati*; Timor primariò correspondet *Spei* Secundariò *Temperantiæ*, in quantum hoc Donum retrahit concupiscentias à delectationibus propter Timorem DEI; Consilium correspondet *Prudentiæ*; Pietas *Religioni*, quæ est pars potentialis *Iustitiæ*; Fortitudo correspondet *virtuti Fortitudinis*.

Et quia dantur nobis Dona Spiritus S. ut perficiantur Potentiæ nostræ, ut dictum est, ideo sciendum

endum est, quod *Sapientia perficit rationem* ad cognoscendum DEUM, ejusq; perfectiones: seu, ad rectè judicandum de Mysteriis Fidei, & de rebus Divinis per ipsum DEUM, de ipsius Bonitate Pulchritudine, Amabilitate &c. & ad sanā æstimationē perfectionū DEI, *Intellectus perficit rationē*, ad Mysteria Fidei sanè capienda & penetranda. Undè ad Fidem pertinet rebus Fidei assentiri; ad donum Intellectūs, ea penetrare.

Scientia perficit ad rectè judicandum de rebus Divinis per Creaturas, & de rebus creatis atq; terrenis, & ad rectè utendum illis in honorem DEI, nostramq; salutem.

Consilium ad inveniendum, quod fieri oporteat in rebus necessariis ad vitam æternam.

Fortitudo perficit voluntatem, ad persistendum in quocunq; bono opere inchoato, usq; ad finem vitæ, & evadendum quævis pericula salutis.

Pietas ad exhibendum cultum debitum, amorē & officium Domino DEO nostro, ut Patri amantissimo, & aliis Sanctis.

Timor perficit nos, ut revereamur DEUM ipsumq; offendere, & ab eo separari timeamus.

Et quoniam actus virtutum dicuntur quidam earū fructus Fructus enim est ultimū, quod expectatur, & quod cum suavitate percipitur: deinde quia aliæ sunt virtutes *Acquisitæ*, quæ procedunt ex principiis humanæ rationis: aliæ *Infusæ* quæ à Spiritu Sancto conferuntur: ideò duo sunt fructuum genera: Nam alii correspondent virtutibus *Aquisitiis*: qui

qui dicuntur *Fruetus Rationis*: alii virtutibus Infusus, & Donis, quos appellat Apostolus *ad Galat. 5 Fruetus Spiritus*: numeranturq; ab illò duodecim: *Charitas, Gaudium, Pax, Patientia, Benignitas, Bonitas, Longanimitas, Mansuetudo, Fides, Modestia, Continentia, Castitas.*

Beatitudines autem licet sint actus Donorum Spiritus S. tamen non vocantur fructus sed speciali nomine appellantur *Beatitudines*: quia per tales actus mens nostra aeternae Beatitudini valde appropinquat, quasi in spe, & inchoative incipiat jam illis beari. Recensentur autem *Octo beatitudines Matth. 5.* nempe *Paupertas Spiritus*, cui promittitur Regnum cœlorum. *Mititas*, sive *Mansuetudo*, cui promittitur terræ possessio. *Luctus*, cui consolatio. *Fames & sitis Iustitiæ*, cui saturitas. *Misericordia*, cui offertur misericordiæ consecutio. *Cordis mundities*, cui DEI visio, *Pax*, cui appellatio Filiorum DEI: deniq; *Beati propter iustitiam*, cui rursus promittitur Regnum cœlorum. Hæc tamen Beatitudo ultima non ponit in numero, sed est quædam manifestatio, & confirmatio præcedentium: & ideo solum septem sunt Beatitudines omnino distinctæ pro septem Donis, quibus correspondent. Nam *Sapientiæ* Dono correspondet Beatitudo septima, *videlicet Beati Pacifici*. Eidem Dono correspondent Fructus quinque, scilicet, *Charitas gaudium, pax, bonitas & benignitas.* Dono *Intellectus* correspondet Beatitudo sexta, *v. Beati mundo corde.* Ex Fructibus Spiritus S. correspon-

det

det *Fides*, quæ consistit in quadam speciali certitudine, quam de rebus Fidei per hoc Donum consequimur. *Dono Consilii*, correspondet Beatitudo quinta v. *Beati Misericordes. Fortitudinis* Dono respondet Beatitudo quarta v. *Beati qui esuriunt & sitiunt iustitiâ*. Fructus verò *Patientiæ* quæ est actualis sustinentia malorum: & *Longanimitas* quâ suffertur diuturna expectatio bonorum. *Dono Scientiæ* correspondet Beatitudo tertia v. *Beati qui lugent*. *Dono Pietatis* correspondet Beatitudo secunda v. *Beati mites*: eò quòd mititas & Mansuetudo valdè disponunt ad Divinam reverentiam, tolluntq; impedimenta actuum pietatis. *Dono Timoris* respondet Beatitudo prima v. *Beati Pauperes Spiritu*. Fructus verò respondent, : *Modestia, Continentia, & Castitas*. Et quamvis Fructus Spiritûs, nominibus virtutum vocentur, tamen ut fructus dicuntur, sumantur pro actibus virtutum excellentibus, ac delectabilibus, ipso Spiritu S. agente, productis.

Et quoniam ultra hæc dona & fructus Spiritus Sancti nihil ampliùs addetur; ideò ultimam manum huic Opusculo imponendo, supplex rogo eundem Spiritum S. ut dono ipsius & gratia, omnes, quicunq; hoc, & aliud Opusculum sequens legerint, fructum ad suarum animarum salutem singularem percipiant. Ego autem omnia in his opusculis contenta correctionis S. M. Ecclesiæ submitto.

SYNOPSIS

Eorum quæ in hoc libro docentur.

Pro faciliori memoria Tyronum Spiritualium.

Quatuor Partes Disciplinæ Monasticæ. Seu
Quatuor Exercitia Religiosa designantur in
Instruct: Novit: Carmel: videlicet. I. *Mor-*
tificatio Passionum: ad quod punctum reducitur
Motificatio sensuum. Amoris proprii, Voluntatis
propriæ & Judicii. II. *Acquisitio virtutum:* ad
quod punctum pertinent Vota Solemnia, Obser-
vantia Regulæ, Constitutionum, Ordinarii, Instru-
ctionum, Ordinationum, & omnium mandatorum
superiorum, quæ universa virtus Obedientiæ com-
prehendit. III. *Studium Orationis;* ad quod spe-
tat usus Præsentia DEI, five frequentes aspirati-
ones ad DEUM & Orationes breves Jaculatoriæ.
IV. *Actus vitæ Cœnobiticæ,* five omnibus com-
munes, five alicui peculiare.

Quæ Exercitia sunt vera Vitæ Spiritualis: quo-
rum tria tantum hic sunt posita: quia quartum, nē-
pe, Observantia Actuum communium, seu particu-
larium, ad exercitium virtutis Obedientiæ pertinet.
Idem autem est Finis vitæ Spiritualis, & Religio-
sæ, qui est duplex. *Unus est Finis ultimus:* &
hic est vita æterna, quæ consistit in clara visione
DEI: *Alter est Finis proximus, seu, non ultimus:*
& hic est Perfectio: quæ consistit in Charitate DEI &
proximi, per quā unimur DEO; ad quā Perfectiōne
omnes Religiosi semper tendere debent: quia *Status*
Reli-

Religionis secundum Sanctum Thomam, nihil est aliud, quam quedam disciplina, seu exercitium tendendi ad perfectionem: ad quam alii Religiosi tendunt per vitam Contemplativam: alii per vitam Activam: alii per Compositam ex his, seu, mixtam: Quemadmodum & nostra sacra Religio tendit ad perfectionem per vitam Contemplativam & Activam simul, ita tamen, ut potissima illius sit pars Contemplativa vita. Quomodo autem satisfacimus tam Contemplativæ Vitæ, quam Activæ habetur supra pagina 6.

Et quia tres sunt Gradus Charitatis: ideo etiam tres sunt Gradus Perfectionis: Incipientium, Proficientium, & Perfectorum. Et tres viae tendendi ad Perfectionem. Nempe, Via Purgativa, Illuminativa & Unitiva. Prima via est Incipientium Secunda Proficientium. Tertia Perfectorum. Unde alia sunt exercitia Viæ Purgativæ, seu Incipientium, per quæ Religiosi tendunt ad Perfectionem, de quibus agitur Par. 2. Pag. 1. Alia vitæ Illuminativæ seu Proficientium, Par. 2. p. 74. Alia Viæ unitivæ seu Perfectorum de quibus Par. 2. p. 119.

Exercitium primum Vitæ Spiritualis: est Oratio, quæ est duplex: Alia Vocalis, quæ externa voce exprimitur: & hæc dividitur in Publicam & Privatam, Publica est ab ipsa Ecclesia præscripta, & quæ fit nomine Ecclesiæ: vocaturq; Officiū Divinum. Privata est, quam quælibet persona nomine suo pro se, vel pro aliis facit: de quibus p. 3.

Alia est Oratio Mentalis, quæ sola mente pe-

ragitur: & quæ nihil est aliud quàm mentis in DEUM *elevatio*. Fit autem hæc elevatio per intellectum & voluntatem, quibus quasi duabus alis mens nostra supra terrena, ad superna, & cœlestia, & ad DEUM sustollitur: per intellectum quidem, dū DEUM & cœlestia, vel alia in ordine ad DEUM considerat: per voluntatem verò, dum per considerationem intellectus excitata DEUM amat, peccata ex amore DEI odio habet, vitia extirpare, virtutes exercere, & sanctè vivere desiderat.

Sunt autem sex partes Orationis Mentalis: Præparatio, Lectio, Meditatio, Gratiarum actio, Oblatio, & Petitio. Et quia hæc Oratio dividitur in Intellectivam, & affectivam: ideo in Meditatione est Oratio intellectiva, & in reliquis partibus est Affectiva.

Præparatio est duplex. Remota, & proxima, Remota consistit, tum in fuga distractionum, & abdicatione curarum: tum in continuo Præsentiae DEI exercitio: tum in puritate vitæ, ac munditiæ cordis cum intima compunctione. Proxima consistit in consideratione magnitudinis Divinæ Majestatis, & propriæ vilitatis. *Exemplum Præparationis habetur pag: 26.*

Secunda pars Orationis est Lectio, quæ adhibetur ad inveniendam Orationis materiam pro Meditatione faciendâ V. Pag: 27.

Tertia pars Orat: Ment: est Meditatio, quæ nihil est, quàm discursus intellectus voluntatem nostram ad bonum hortantis, & excitantis vel a malo

a malo debortantis, & retrahentis. Ideò enim illum discursum, seu considerationem Materiæ propositæ ad meditandum adhibere debemus, ut excitemus voluntatem nostram ad aliquod bonum amplectendum; & retrahamus eam ab aliquo malo; ita ut *Incipientes* excitentur ad odium & fugam peccati, ad pœnitentiam & verum dolorem de peccatis, ad vitia extirpanda, ad mortificandos sensus, & inordinatos affectus ex quibus vitia nascuntur. *Proficientes* verò ad exercendas virtutes. *Perfecti* autem ad amorem DEI. Itaq; in Meditatione excitandi sunt hi affectus voluntatis nostræ, videlicet, *Odium mali & Desiderium boni*: quos affectus in quacunq; Oratione exercere debemus; *primò* Odii alicujus vitii; *deinde* Amoris & Desiderii virtutis contrariæ illi vitio. Unde *Incipientes*, quorum munus est purgatio animæ, debent in suis Meditationibus concitare Odium peccatorum atq; dolorem; postea Desiderium emendationis, fugæ peccatorum, & pœnitentiæ, tandem gratias agere DEO, quòd eos tandiu toleraverit; & emendationem offerre. *Proficientes* quoq; hoc idem facere debent, qui considerando humilitatem, obedientiam, & alias virtutes Christi Domini nostri, agnoscentes quod ipsi sint superbi, inobedientes &c. tunc concipiendum est eis Odium istorum vitiorum: deinde amor & desiderium illarum virtutum, quas in Christo cognoverunt. Hinc gratiarum actionem Redemptori nostro instituere pro illius humilitate, obedientia, & aliis virtutibus, qua-

rum nobis exemplū reliquit, & pro omnibus aliis beneficiis. *Similiter & perfecti*, suas imperfectiones advertentes, habebunt justā causam ad odium illarū, & ad desiderium vitandi ea, quæ DEO displicent. Ut autem magis efficax odium vitii alicujus sit ante ipsam actum odii præmittantur ipsi alii Actus, Videlicet, *Accusatio sui, Admiratio, Confusio, Reprehensio, Expostulatio, Execratio, Abominatio* quæ est ipsum odiū, quod subsequitur *Dolor, Spes, & Propositū vitandi illud vitium, Modi accusationis & aliorū habentur sup: 53.* Deinde post tale exercitium affectus odii, exercendi erunt affectus amoris, & desiderii virtutis illi vitio oppositæ, quam desiderare debemus, quia est honesta, necessaria, utilis, jucunda, & DEO placens, & propter exemplum Sanctorum, præsertim Christi Domini nostri. *De his omnibus v. p. 51. & seq: & p. 63. & seq:*

Modus verò meditandi habetur p. 33. & seq: *Quarta Pars Orat: Ment: est Gratiarū actio*, quæ consistit in affectibus Gratitude, Amoris, & Laudis DEI. Debemus autem gratias agere primò pro illo beneficio, quod in Meditatione occurrir: deinde pro aliis beneficiis DEI. *Modum Gratiarum actionis vide p. 60. & 72.*

Quinta Pars est Oblatio, per quam homo gratiam Domino DEO pro beneficiis ejus rependere conari debet: *Modum Oblationis vide p. 61.*

Sexta Pars Orat: Ment: est Petitio, in qua petendum est auxilium DEI, ad acquirendam virtutem propositam, & passionem superandam, *Modus Petitionis habetur p. 81. 82. & 97.* Ne

Nè verò alicui difficilis Oratio mentalis videatur, procuret omninò modos hîc positos mandare memoriae, *Gratiarum actionis*, p. 72. *vel* 95. & *Oblationis* p. 78. *vel* 96. & *Petitionis* p. 81. *vel* 97. quod cum fecerit, nihil in Oratione Mentali in istis Partibus dictis difficultatis habebit: in Meditatione tantummodò aliquid laboris erit, inquirendo, quid sibi fugiendum est, & quid boni faciendum. Sed ultra hoc debet addiscere memoriter exemplum *Præparationis*, quod habetur pag: 26. *Modum Orationis Mentalis faciendæ* V. p. 64. & seq: *Præterea Modū breviorē* p. 92. & seq:

Et quoniam ad Exercitium Orationis spectat usus Præsentiaē DEI: idèò sciendum est, quòd *Præsentia DEI nihil est aliud, quàm pia applicatio mentis & affectus ad DEUM*: Et hæc est duplex; alia dicitur *Imaginaria*: alia *Intellectualis*. *Imaginaria est*, in qua per imaginationem rerum corporalium, efformantur imagines; ut Christi Domini nostri. *Intellectualis est*, in qua sinè ulla imagine per intellectum cogitamus de DEO; videlicet, ubiquè existentem DEUM, nobisq; adesse, & intimū esse utraq; cōstitit. *Primò* in DEI, *vel* Humanitatis Christi repræsentatione, seu consideratione, *vel* cogitatione: *deinde* in pia mentis & affectus ad Deū, *vel* Christum applicatione, seu in exercitio variorū affectuum ad DEUM, *vel* Christum Dominum, quod est potissimum in Præsentia DEI. *De quo v. p. 241.* & seq: Et quia frequentior est usus, apud FF. NN. Novitios Præsentiaē DEI Imaginariae, idèò

de hac videant Praxim p. 249. quam tradere memorie omnino procurent. *Secundum exercitium vite Spiritualis est Mortificatio:* quæ est virium animæ nostræ interiorum & exteriorum ad illicita, & terrena proclivium debita moderatio. *Vires exteriores* sunt sensus externi: & *interiores* sunt sensus interni, Appetitus concupiscibilis, & Irascibilis, Intellectus & Voluntas.

Ad quorum intelligentiam sciendum hominem esse animal rationale: quia quod habet Animal videlicet, sensus externos, & internos, per quos cognoscit ad vitam suam sustentandam & conservandam necessaria; habet & Appetitum, quo appetit illa; hoc idem habet homo; & ideo dicitur animal. *Est præterea homo Rationalis* per quod differt ab animalibus. Ac propterea homo est compositus ex duabus partibus, quarum una dicitur *pars sensitiva, seu inferior:* altera pars *Rationalis seu superior.* Unde *Pars sensitiva, seu inferior,* complectitur in se omnes sensus externos ac internos, & Appetitum ex parte concupiscibili ac Irascibili compositum cum suis motibus, qui passiones vocantur. Jam verò *Pars Rationalis seu superior* complectitur Intellectum, Voluntatem & Memoriam intellectivam. Hic *intellectus*, prout unam notitiam ex alia deducit, *Ratio dicitur*, quæ dividitur in duas portiones, seu partes. Dum enim considerat temporalia, & secundum rationes humanas *Ratio inferior nominatur:* si autem æterna vel temporalia *Ratio superior nuncupatur*, quæ etiam Spiritus dicitur.

dicitur. Ad hanc Rationem superiorem pertinet regere Ratione inferiorem, & partem totā sensitivam, ipsiusq; motus inordinatos moderari, quæ moderatio dicitur Mortificatio, & Abnegatio.

Est autem *Mortificatio duplex* una *Exterior*, qua sensus exterior & corpus mortificantur. Alia *Interior* quæ sensus internos, & motus appetitus, voluntatem propriam, & amorem & iudicium moderatur.

Utraq; Mortificatio vel est *Communis*, quæ est in illicitis, per quam à prohibitis abstinemus. Alia *Specialis*, quæ est inlicitis per quā à non prohibitis ob amorem DEI, & perfectionis adeptionem nos continemus, videlicet, à cibo, potu, somno, sermone, visu, auditu, recreatione, & aliis similibus. Et hæc Mortificatio specialis est Religiosis propria, & omnibus, qui ad perfectionem aspirant.

Sensus externi, ut, visus, auditus, gustus, odoratus, & tactus quomodo sunt mortificandi v. p. 272. Et seq: Quomodo sensus Interni sunt moderandi, qui sunt quatuor, nempe sensus Communis, *Imaginativa* seu *Phantasia*, *Æstiativa*, quæ in homine dicitur *Cogitativa*, & *Memoria* quæ in homine dicitur *Reminiscentia* v. p. 278. & seq:

Et quoniam Motus appetitus ad interiorem mortificationem pertinet; ideo sciendum est duplicem esse appetitum v. *Sensitivum* & *Rationalem*. Dicitur autē appetitus *Sensitivus*: quia sequitur sensuū cognitionem. *Rationalis* verò quia sequitur cognitionem Rationis; & hic appetitus est *Voluntas*.

Est autem appetitus sensitivus nihil aliud, quam inclinatio ad id, quod sensus judicat conveniens, seu bonum, vel inconveniens seu malum: quod judicium fit per imaginativam & Aestimativam. Ideo verò conveniens, seu bonum hic dicitur; quia est delectabile, vel utile, vel honestum, seu honorificum: disconveniens autem, seu malum; quia est vel contritabile & molestum, vel nocivum, vel inhonestum.

Hic appetitus sensitivus est duplex Concupiscibilis & Irascibilis quorum actus seu motus dicitur Passio: quia fit cum aliqua corporis immutatione; & propter hoc, quia actus, seu motus Voluntatis nostrae non fiunt cum immutatione corporis, licet nominibus Passionum appellentur, tamen non Passiones, sed Affectus, vel actus simplices voluntatis dicuntur.

Passio est motus appetitus sensitivi ad imaginationem boni vel mali cum aliqua corporis immutatione, quo, scilicet, fertur ad bonum, & fugit malum. Sunt autem undecim Passiones. Amor, Desiderium, seu concupiscentia, Gaudium seu delectatio, odium, Fuga, Tristitia seu dolor, Spes, Desperatio, Audacia timor & Ira: ex quibus sex priores Passiones sunt appetitus Concupiscibilis. quae versantur circa bonum & malum absolute sumptum; & quinque posteriores sunt appetitus Irascibilis, quae versantur circa bonum & malum arduum & difficile.

Est autem Amor nihil aliud, quam conversio ad bonum: seu complacentia boni.

Desi-

Synopsis.

303

Desiderium, est amoris extensio: seu progressio ad bonum absens.

Gaudium, est ipsa boni præsentis possessio & fructio.

Odium, est aversio à malo cognito: seu displicentia mali.

Fuga est recessus à malo futuro.

Tristitia, est oppressio appetitus à malo præsentis.

Spes est appetitus & cordis erectio in bonum arduum possibile.

Audacia, est Spei quædam extensio vel est contra malum arduum progressio.

Desperatio, est spei amissio: seu appetitus dejectio.

Timor, est recessus à malo arduo futuro inevitabili.

Ira, est motus appetitus ad vindictam.

Circa quas Passiones mortificandas semper invigilare debemus quia immortificatæ vitia generant; mortificatæ verò produciunt virtutes: pro quibus *Passionibus refrænantis necessaria est*. I. Mortificatio sensuum. II. Proponenda sunt appetitui vera, & meliora bona; & mala vera. III. Notanda Passio, quæ nos magis infestat, & illa primò impugnanda. IV. Adhibendi sunt Mortificandarum Passionum Actus interni & externi. V. Implorandum in Orationibus nostris DEI auxilium. Sed qui vult de omnibus passionibus citò victoriam reportare, amorem imprimis studeat moderari & mortificare; quia propter hunc, & aliæ moventur Passiones.

H h 4

Quo-

Quomodo autem moderari Passiones debeamus
v. p. 292. & seq:

Etiā quomodo Appetitus rationalis, seu voluntas
propria sit mortificanda v. p. 298. & seq:

Quomodo amor proprius v. p. 302. & seq:

Item Iudicium proprium v. p. 306. & seq:

Tertium Exercitium vite spiritualis est Vir-
tus, quæ sic definitur; quod sit habitus bonus, quod
recte vivitur, quod nullus male utitur: quia vir-
tutis habitus inclinat semper ad bonum, nunquam
ad malum.

Dividitur autem virtus primò in Acquisitam
& Infusam. *Acquisita* dicitur illa, quæ nostris a-
ctibus acquiritur. *Infusa est*, quæ à solo DEO in-
funditur: & tales sunt virtutes Theologicæ, & a-
liæ virtutes Morales, quæ in instanti justificationis
cum gratia sanctificante infunduntur.

Secundo dividitur in Theologicam, Intellectu-
alem, & Moralem. Acquiruntur autem virtutes.
Primò cognoscendo virtutis necessitatem, propter
quod necessaria est frequens de virtutibus lectio, *Se-*
cundò magni æstimando & desiderando virtutem.
Tertiò proponendo sæpiùs ob oculos mentis virtu-
tes Christi Domini nostri, & sic nos ad eum imi-
tandum excitando. *Quartò* actus tam internos quàm
externos virtutum exercendo. *Quintò* ferventer à
DEO virtutes postulando. *Ultimò* uni virtuti sibi
magis necessariæ exercitio operam dando, præci-
pue verò Humilitati, secundum monitū & doctrinā
Christi Domini dicentis: Discite à me; quia mitis sum

& humilis corde *qua de re v. pag: 325. & seq:*

Quomodo autem per unū actum unius virtutis plures virtutes exercere possumus *v. p. 336.*

Theologicae virtutes sunt tres. Fides, Spes, & Charitas: dicuntur Theologicae, id est Divinae, tū quia habent DEUM pro Objecto; tum quia à solo DEO nobis infunduntur. Fidem S. Paulus sic definit: *Fides est substantia sperandarum rerum, argumentum non apparentium:* ac si diceret: Fides est fundamentū eorum, quæ videnda speramus in cœlo, & persuasio illorum, quæ visa non sunt. Ab aliis definitur sic: *Est Habitus, seu virtus supernaturalis à solo DEO infusa, per quam rebus Fidei assentimur, propter auctoritatem DEI revelantis:* Cujus Objectum Materiale est id, quod à fidelibus creditur. *Formale verò,* Est prima veritas DEI revelantis, *Subjectum* autem Fidei, est Intellectus, in quo residet.

Dividitur autem Fides in *Fidem vivam ac Mortuam.* *Fides viva est,* quæ gratiæ sanctificanti & Charitati est conjuncta, qualis est in justis. *Fides Mortua est,* quæ est à gratia & Charitate separata.

Actus Fidei est duplex. Interior, qui est credere, seu est internus assensus: nā credere nihil aliud est, quàm cū assensu cogitare. Et *Exterior* qui est ipsa confessio Fidei quæ fit ore, aut aliis signis exterioribus: *Actus internus Fidei dividitur per hoc, quod est: Credere DEUM, Credere DEO, & Credere in DEUM:* *qua de re S. Augustinus sic dicit:*

dicit: *Credere DEUM*, est credere, quia est: hoc est, quia est unus in essentia & trinus in Personis, quia est Omnipotens, summè Bonus, Misericors, &c *Credere DEO*, est credere illa esse vera, quæ DEUS loquitur *Credere DEUM* est eum simul diligere.

Effectus Fidei, secundum S. Thomam sunt duo: *Timor & Puritas cordis*. Quidam addunt *Contemptum mundi*. Est verò *Timor duplex* Servilis, quo quis timet, nè à DEO puniatur. Et *Filialis*, quo quis timet offensam DEI, & nè ab illo separatur. *Puritas Cordis* Est Cogitationū, affectionū, sermonū operumq; munditia. *Contemptus mundi*. Est Abrenūtiatio omniū visibiliū propter amorē Dei.

Spes est Habitus à DEO infusus, per quem voluntas firmiter tendit in DEUM, ut in bonum arduū futurū consequi possibile, ipsius DEI auxilio. *Seu: Spes Est virtus per quam firmiter speramus beatitudinem æternam DEI auxilio, & per bona opera ex gratia DEI facta obtinendam*. Estq; duplex; *Spes viva, & Perfecta*, quam habent iusti: Et *Spes mortua, ac imperfecta*, quam peccatores habent. *Subiectum*. Est *Voluntas*, in qua refidet, in quantū est eminenter irascibilis. *Objectum* verò *Spei Materiale Primarium*, est Beatitudo nostra æterna: seu est DEUS, ut est Beatitudo nostra. *Secundarium*, est omne id, quod potest pertinere ad Beatitudinem æternam. *Formale Objectum Spei*, est Auxiliū DEI, ratione cuius speramus Beatitudinē æternā; speramus quoq; bona opera vitæ æternæ meritoria à nobis facienda. *Actus*

Actus Spei, est sperare Beatitudinem æternam, seu vitam æternam, ex auxilio DEI, & bonis operibus gratia DEI præstitis obtinendam. Debemus vero sperare *Primariò* in Gratia & Misericordia atq; auxilio DEI, ac meritis Christi: *Secundariò*, in bonis operibus nostris gratiâ DEI factis.

Charitas est virtus divinitus infusa, quâ homo diligit DEUM propter ipsum & proximum propter DEUM. Seu. Est Habitus supernaturalis inclinans voluntatem ad amandum DEUM supra omnia propter se amore amicitie. Dicitur propter se: hoc est, non propter bonum nostrû; quia tunc non esset amor amicitie, sed concupiscentie. Unde in *Spe* est amor *Concupiscentie*; in *Charitate* autem est amor *amicitie*. Est autem Charitas virtus omnium virtutum excellentissima, & omnium virtutum forma, & Regina, & Mater sine qua nulla virtus tam infusa, quàm Acquisita est perfecta, & meritoria vitæ æternæ. *Subiectum Charitatis* est voluntas, in qua residet, in quantum est eminenter concupiscibilis *Objectum* autem *Formale* Charitatis, est Bonitas Divina super omne diligibilis. *Materiale verò*, est illud quod habet bonitatem Divinam: vel essentialiter, ut est DEUS: vel participative, ut est Proximus: de quo v. p. 389.

Actus Charitatis principalis est *Dilectio*, quâ diligimus DEUM propter se ipsum. Debemus autem diligere eum totaliter *Totalitate Objecti*, ita ut totum, quod est in DEO, diligamus: & *Totalitate Subiecti*, ita ut nihil sit in amante, quod non tendat

tendat in amorem DEI: quem non possumus, nec obligamur *totalitate Modi*, ita ut tantum DEUM diligamus, quantum est amabilis; & quia est infinite amabilis ideo infinite est diligendus, quod nulla creatura præstare potest.

¶ *Effectus Charitatis* sunt duplices: *alii Interiores*: V. *Gaudium. Pax. Misericordia.* *Alii Exteriores*: V. *Beneficentia, Eleemosyna, Correctio fraterna.*

Est autem Gaudiū, Affectio, seu hilaritas quædam animi interior, ex amati desideratiq; boni possessione concepta.

Pax, est quædam unio voluntatis propriæ cum voluntate alterius.

Misericordia, est alienæ miseriæ in corde nostro compassio: *Compassio* verò dicitur, quædam tristitia, & dolor animi de malo alterius. Sunt autem *Misericordiæ actus quatuordecim* septem corporales, qui in hoc versu continentur.

Visito, poto cibo, redimo, castigo, condo.

Alii sunt septem spirituales, qui hoc versu comprehenduntur.

Consule, Castiga, solare, remitte, fer, ora.

Ita ut sub primo verbo intelligatur *Consilium & Doctrina.*

Beneficentia, est Actus Charitatis, quo alicui bonum ipso facto, & re ipsa exhibemus.

Eleemosyna, est opus, quod datur indigenti ex compassione propter DEUM.

Correctio, est Actus Adhortationis, quem im-

pendi-

pendimus proximo nostro ad emendationem ejus.

De virtutibus Intellectualibus lege doctrinā
p. 417.

Morales virtutes dicuntur illæ, quæ perficiūt vim appetitivam (hoc est appetitū rationalem seu volūtatem, & appetitum sensitivum) ad producendos actus humanos Legi Divinæ & rationi conformes. *Sunt autem quatuor virtutes Morales Cardinales, seu Principales, sub quibus aliæ virtutes Morales continentur; Videlicet: Prudentia, Justitia, Fortitudo, Temperantia. Prudentia, quidem, quæ residet in intellectu, Secundum essentiam est intellectualis virtus: tamen inter Morales connumeratur; quia est moderatrix, & directrix aliarum virtutum moralium.*

Præcipue tamen sunt tres virtutes Morales quæ resident in appetitu. Dicuntur enim Morales à More, quod nomen significat inclinationem ad aliquid: & quia Appetitus nihil est aliud quàm inclinatio: ideo illæ virtutes propriè debent dici Morales, quæ appetitum perficiunt, videlicet, Justitia, quæ perficit appetitum rationalem, seu voluntatem. Fortitudo, quæ perficit appetitum Irascibilem. Temperantia, appetitum concupiscibile: ad quas tres virtutes tanquam principales, reducuntur omnes aliæ virtutes Morales, vel ut partes integrantes: vel ut subjectivæ: vel ut potentiales.

Prudentia definitur sic: *Est recta ratio agibilium, seu Est Habitus rectificans intellectū circa agibilia: V. ad rectam electionem agibilium secundum*

dum Regulas Morum (*sunt autem Regulae Morum*: Diſtamen rationis, & Lex Divina, atq; humana) *Objeſtum Prudentiæ* eſt Omne agibile: ſeu omne, quod cadit ſub electione, & libero arbitrio: agibile enim idem eſt atq; Eligibile & Arbitrabile.

Et quoniam Prudentia reſidet in Intellectu Practico, cujus Actus ſunt, *Conſilium, Judicium, & Imperium*: ideo iſti quoq; ſunt tres actus Prudentiæ; inter quos Imperiũ eſt principalis actus, ad quod tam Conſilium, quam Judicium ordinantur. Eſt autem *Prudentiæ munus proprium*, propoſito ſine virtutis per ſyndereſim, media ad illum conſequendũ per Conſilium inquirere, & per Judicium invenire; & per Imperium executioni mandare. Unde dum ſyndereſis, ſeu Ratio practica hunc finem Temperantiæ proponit, nempe, Temperatẽ, ſeu cum mediocritate comedere: tunc Prudentia debet media invenire, & præſcribere, quibus ad hanc mediocritatem perveniatur: V. tantũ, tali horã toties per diem, comedere.

Ut verò notitia habeatur Intellectũs, ſeu Rationis practiciæ *Sciendum eſt*, quod licet *Intellectus* ſit potentia una, tamen propter diverſos fines appellatur Intellectus *Speculativus & Practicus*. Nam Intellectus *ſpeculativus* dicitur qui ſolam cognitionem veritatis intendit: *Practicus* verò, qui ſuam cognitionem veritatis ordinat ad opus.

Juſtitia definiſtur ſic: *Eſt conſtans & perpetua voluntas juſ ſuum unicuiq; tribuens*. *Objeſtu Juſtitiae*. Eſt Juſ ſive *Juſtum*. *Subjeſtum* verò, eſt *Volun-*

Voluntas, in qua refidet: & est specialiter ad alterum; cujus actus est ponere æqualitatem secundum rem, ut tantum reddatur alteri, quantum re ipsa debetur.

Virtutes quæ sub Justitia continentur sunt istæ. Religio, Pœnitentia, Pietas, Observantia. Gratitude, Vindicativa, Amicitia, & Liberalitas.

Religio, quæ etiam *Latria* vocatur; Est virtus quæ cultum debitum tribuit DEO, tanquam primo omnium Principio. Cujus Objectum Est Divinus cultus; ad quem cultum pertinent Sacrificia, Oblationes, Laudes, Adorationes, Vota, Juramenta, Imagines, Ritus, Cereemoniæ sacræ.

Actus Religionis sunt: Devotio, Oratio, Sacrificium, Oblatio, Votum, Juramentum, Adjuratio Divini Nominis, ejusque per laudem Assumptio.

Pœnitentia est virtus offerens DEO debitam satisfactionem, & dolorem pro peccatis.

Pietas est virtus, quâ quis exhibet officium, & cultum debitum parentibus, patriæ, & cōsanguineis.

Observantia est virtus, per quam homines, aliqua dignitate antecellentes cultu quodam & honore dignamur. Hac virtute coluntur omnes aliqua dignitate, virtute, Sapientiâ. & sanctitate præcellentes, ut sunt Superiores, Doctores, Magistri, Sancti &c. Unde sub Observantia continentur aliæ virtutes V. Observantia specialis, seu, Urbanitas quâ honoramus Magistros. Dulia quâ colimus Sanctos, & DEO consecratos. Hyperdulia qua honoramus Sanctos specialinexu Divinitati conjunctos:

uti est Beatissima Virgo; & Humanitas Christi. *Obedientia* per quam Superiorum DEI personam gerentium jussis obtemperamus. *Obedientia* quæ nam sit perfecta; quod genera ipsius. quæ circumstantiæ; quot gradus ejus v. p. 453.

Gratitudo est virtus, quæ respicit debitum ortum ex beneficio, utq; illi satisfaciat, rependit aliquid benefactori; ut *Gratiarum actionem*, *Obsequium*, *Cultum*, vel aliud beneficium. Sunt autem quinque *Officia Gratitude* 1. Est accepti beneficii æstimatio. 2. Est benigna acceptatio. 3. Est gratiarum actio. 4. Est beneficii grata commemoratio. 5. Est redditio seu repensio, quando vicissim re, vel obsequio redditur beneficium.

Vindicta est delicti punitio.

Veritas seu *veracitas* est virtus, quæ nos facit dicere verum. *Ad hanc virtutem tria spectant.*

1. Amare veritatē in dictis & factis. 2. Cavere ne contra judicium mentis aliquid dicatur. 3. Patefacere judicium mentis, per verba, aut alia signa. *Ad veritatem revocatur Fides* seu *Fidelitas*, quæ servat proximo fidem in promissis.

Amicitia est virtus, quæ facit ut conservatio nostra cum proximis sit grata. Hæc virtus propriè vocatur *Affabilitas*.

Liberalitas est virtus, quæ versatur circa pecunias, ut decet, illas expendendo; ubi sub pecuniis intelliguntur omnes divitiæ externæ: Est autē *Liberalitas duplex*. Alia quæ pertinet ad Temperantiam. Alia quæ ad Justitiam de quo v. p. 460.

Ad

Ad Liberalitatē reducitur *Magnificentia*, quæ est circa magnos sumptus in ordine ad alterum.

Fortitudo est virtus existens in irascibili cōdercitiva timoris, & audaciæ moderativa instantibus periculis. Cujus sunt duo actus, nempe *Aggredi* & *Sustinere*; inter quos principalior est *Sustinere*. Sub *Fortitudine* continentur *Magnanimitas*, *Magnificentia*, *Patientia* & *Perseverantia*.

Magnanimitas est virtus inclinans ad opera magna & heroica, in omni genere virtutum: V. ad magnam patientiam, ad magnam & profundā humilitatem &c. Ad *Magnanimitatem* pertinet *Fiducia*, quæ dicit spem consequendi magna. Et *Securitas animi* quæ oritur ex ablatione timoris.

Magnificentia est virtus magnorum operum factiva in ordine ad bonum ipsius Magnifici.

Patientia est virtus,, quæ moderatur tristitias, ut omnia adversa, & hujus vitæ mala æquo animo tolerantur: Ad *Patientiam* reducitur *Longanimitas*, per quam sustinemus æquo animo diuturnam dilationem boni desiderati.

Perseverantia est virtus, quā sustinemus difficultates ex operis continuatione & diuturnitate provenientes. Ad *Perseverantiam* reducitur *Constantia*, per quam adversus difficultates, vel impedimenta occurrentia, in bono constanter persistimus. Differt verò à *Perseverantia*: quia hæc non desistit à bono propter diuturnitatem. *Constantia* autem non desistit propter quæcunq; alia impedimenta.

Temperantia est virtus refrænans appetitum sensitivum in Concupiscentiis & delectationibus corporalibus, quæ maximam vim habent deducendi à bono rationis. Sub *Temperantia* continentur *Abstinencia*, *Sobrietas*, *Castitas*, *Pudicitia*, *Continentia*, *Mansuetudo*, *Clementia*, *Modestia*. Ad quam reducuntur *Humilitas*, *Philotimia*, *Studiositas*, *Modestia* morum, *Eutrapelia*, & *Modestia cultus*.

Abstinencia est virtus, quâ moderamur ciborum delectationes, & in usu illorum debitam moderationem servamus.

Sobrietas est virtus, quæ affectum & usum potûs inebriare valentis debitè moderatur.

Castitas est virtus, per quam concupiscentia carnalis castigatur & coërcetur.

Pudicitia propriè est circa illa, de quibus homines maxime verecundantur.

Continentia est Habitus per quem voluntas resistit Passionibus concupiscibilibus, & ab eo firmatur & detinetur, ut Passionum impetum non sequatur.

Mansuetudo, quæ *Mititas* etiam dicitur; Est virtus Iræ moderatrix.

Clementia est virtus Moderatrix pænæ & vindictæ, mitigando externam punitionem, quantum iustitia, & communis boni ratio permittit: quæ virtus propria est Superiorum & Judicum.

Modestia est virtus exteriorum & interiorum hominis actionum moderatrix. Sic dicta à modo, quasi modum statuens, qui in humanis affectionibus & actionibus servari debet.

Humi-

Humilitas est virtus quâ coërceretur animus, nè se ad altiora feratur: id est nè inordinate extolatur. *Seu secundum S. Bernardum:* est virtus, quâ quis verissima sui cognitione sibi ipsi vilescit. *Plura de hac Humilitatis virtute V. Quotuplex est Humilitas, & qui gradus ipsius v. p. 477.*

Philotimia est virtus, quæ ponit modum in appetendis honoribus.

Studiositas est virtus, quæ moderatur affectum erga studium; nè homo plura, aut altiora scire velit, quàm oportet, & incitando eum ad sciendum, quæ scire oportet, nè propter laborem à studio retrahatur.

Modestia morum est virtus, quæ externos motus & gestus corporis ex rationis præscripto componit & temperat, servatq; in illis decorum. *Ad hanc pertinet Moderatio visus*, quæ dicitur *Modestia oculorum*. Et *Modestia lingvæ*, quæ cultus silentii vocatur: præterea *Veritas*, & *Affabilitas*, seu *Amicitia*, prout respiciunt exteriorem hominis conversationem.

Eutrapelia est virtus, quæ in ludicris & jocis servat decorum: seu, quæ jocis & ludis modum rationis imponit.

Modestia cultûs est virtus, quæ in corporis cultu, rerumq; externarum apparatu mensuram rationis ac decorum servat. *Ad quam revocatur Liberalitas*, quæ ponit modum circa pecunias & sumptus, quatenus hæc deserviant ad externum apparatus, & *Paupertas voluntaria*, quæ est tota-

lis renuntiatio divitiarum; & quæ, prout est virtus, refrænât appetitum à cupiditate & amore pecuniarum, redditq; animum ab illis liberum & expeditum.

Ultimò data est, doctrina De donis Spiritus Sancti, qui nihil aliud sunt, quàm Habitus supernaturales perficientes hominem ut promptè sequatur instinctum, & motionem Spiritus S. seu, ut promptè obediat Spiritui S. quæ distinguuntur à virtutibus, quia istæ perficiunt hominē, ut imperiū, atq; motionem rationis promptè sequatur. Dona verò Spiritus S. ad hoc sunt homini necessaria ut homo efficaciter moveatur à DEO ad finem supernaturalem consequendum, sed ad vitam æternam obtinendam. Sunt autem dona Spiritus S. septem: Sapientia, Intellectus, Consilium, Fortitudo, Scientia, Pietas, & Timor Domini. De quibus V. Cap: XIII. quod est ultimum.

Ad M. D. T. O. M. G. B. V. M. S. L. O. C. H.



I N D E X

Rerum Memorabiliū in hac parte prima contentarū.

A.

Abſtinentia quid eſt & quis actus ejus.	471.
Acedia quid eſt & quæ filie ejus.	315.
Actus anagogici cū Præſentia Dei exercēdi.	243.
Actus humani & actus hominis qui dicuntur.	425.
Adjuratio Divini Nominis quid eſt & quotu- plex.	450.
Adulatio in quo conſiſtit.	460.
Affectus quid eſt & quotuplex.	50.
Affectus voluntatis qui ſunt.	Ibid:
Affectus in meditatione qui ſunt excitandi.	51.
Affectus Incipientium, Proſcientium & Per- ſectorum.	Ibid:
Affectus Odii contra vitium quomodo dilatan- dus.	52.
Affectus amoris & deſiderii Virtutis quo pacto dilatabuntur.	53. 58. 59.
Affectuum dilatandorum praxis.	53 & ſeq:
Amor proprius quid eſt.	302.
Amoris proprii quæ ſunt ſigna.	303.
Amor proprius quibus modis mortificandus.	304.
Amor eſt duplex amicitie & Concupiſcētie.	382.
Amicitia quæ requirit.	Ibid,
Amicitia ut eſt virtus quid eſt.	459.
Amicitia dividitur in tres portiones, Inſi- mam, mediam & ſupremam.	284.
Appetitus eſt duplex ſenſitivus & Rationa- lis.	226.
Appetitus ſenſitivus quid eſt & quotuplex	Ibid:
& ſeq:	41.

Index rerum

<i>Appetitus in homine quoduplex.</i>	-	50.
<i>Appetitus motus dicitur Passio & quare.</i>	-	287.
<i>Arrogantia quid est.</i>	-	484.
<i>Ars quid est & quomodo dividitur.</i>	-	420.
<i>Aspirationum pro incipientibus praxis.</i>	-	244.
<i>Aspirationum pro Proficientibus praxis.</i>	-	246.
<i>Attentio in Officio Divino servanda quoduplex est.</i>	-	18.
<i>Attentio quomodo paranda.</i>	-	19.
<i>Avaritia quid est, & quæ sunt Filia ejus.</i>	-	314.

B.

<i>Beatitudo æterna est ultimus finis noster quam per Spem Theologicam speramus.</i>	-	367.
<i>Beatitudo vera in quo consistit non omnes sciunt.</i>	-	Ibid:
<i>Beatitudo vera est illa quæ est bonum perfectum quod totaliter voluntatem nostram explet & satiat.</i>	-	Ibidem.
<i>Beatitudo duplex objectiva & formalis.</i>	-	368.
<i>Ad Beatitudinem pertinent tres dotes anime & quatuor dotes corporis.</i>	-	371.
<i>Beatitudines quid & quot sunt, & quibus Donis Spiritus Sancti correspondent.</i>	-	492.
<i>Beati quomodo vident DEUM.</i>	-	369.
<i>Beati videntes DEUM nullo modo comprehendunt eum.</i>	-	370.
<i>Beati quare in Cælo comprehensores dicuntur.</i>	-	Ibid:
<i>Beati videntes DEUM quid aliud vident.</i>	-	Ibid: & seq:
	-	Bene-

Memorabiliū.

Beneficia DEI quæ sunt pro quibus in oratione mentali gratias agere Divine Majestati debemus.	72.
Beneficentia quæ est effectus Charitatis, quid est.	404.
Blasphemia quid est & quotuplex.	354.
Blasphemie seu peccati in Spiritum Sanctum sunt species sex.	355.
Bellum quid est & quotuplex & quando est licitum.	411.
Bonitas moralis quid est.	318.
Bonum est triplex.	286.
Bonum perfectum est solus DEUS.	368.

C.

Castitas quid est & unde dicta & quomodo dividitur.	472.
Charitas alia est de præcepto alia de consilio in qua duplici Charitate perfectio Religiosorum consistit.	3.
Charitatis tres gradus.	Ibidem.
Charitas virtus Theologica quid est.	382.
Charitas qua diligimus DEUM & proximum qualis est.	383.
Charitas est quadam amicitia perfectissima inter DEUM & hominem.	382.
Charitas est virtus excellentissima & omnium virtutum forma, & Regina & Mater sine qua nulla virtus est perfecta & meritoria vite æternæ.	383.
Charitatis causa est Ipsemet DEUS.	385.
Cha-	

Index rerum

Charitas perfecta qualis in hac vita haberi potest.	387.
Charitas totaliter amittitur per peccatum mortale.	388.
Charitas non datur informis.	389.
Charitatis objectum formale & materiale quod est.	Ibid.
In Charitate quis ordo servandus.	396.
Quare sunt duo præcepta Charitatis cum sit una virtus.	399.
Charitatis effectus qui sunt.	402.
Charitati vitia opposita.	408.
Charitatis DEI praxis in quo consistit.	413.
Ex Charitate quatuor diligenda sunt.	389.
Ex Charitate diligendi sunt omnes proximi etiam Inimici.	390. & sequi.
Quæ signa Charitatis exhibenda sunt inimicis nostris.	391.
Ex Charitate quilibet se ipsū diligere debet.	394.
Christianis cum Infidelibus prohibetur communicatio.	353.
De Christi Passione quæ circumstantiæ sunt Examinandæ.	204.
Clementia quid est.	474.
Cogitatio bona est oratio incipientium.	31.
Cogitatio quid est.	32.
Cognitio sui necessaria nobis.	114.
De Cognitione sui orationis exemplum.	144.
Cognitioni vires servientes sunt sex.	283.
Contemptus sui quomodo haberi potest.	114.
De	

Memorabiliū.

De Contemptu sui orationis exemplum. Ibidem.

Compassionis Christi Exemplum orationis. 204.

Contentio quid est, & quotupliciter contingit. 410.

Contentio & discordia unde oriuntur. 411.

Contentia quot modis sumitur. - 473.

Constantia quid est & in quo differt à Perseve-
rantia. - - 467.

Corporis mortificandi necessitas. - 276.

Correctio fraterna & effectus Charitatis. 406.

Correctio quid est. - Ibidem.

Correctio & correptio quomodo differunt. Ibid:

Correctionis omisso quando est peccatum mor-
tale. - - 407.

Correctio fraterna quando est facienda. Ibid:

Correctio quare dicitur actus Charitatis. 406.

Correctionis modus triplex. - 407.

Ad Correctionē fraternā quomodo obligemur. 407.

Crudelitas quid est, & quomodo à feritate dif-
fert. - - 474.

Curiositas quid est. - 484. & 486.

D.

Desperatio quid est & quotuplex & unde ori-
tur. - - 366.

Desperationis cause sunt sex. - Ibid:

Devotio quid est. - - 446.

DEI visio in quo consistit. - 368.

DEUS quomodo videtur à Beatis. 369.

DEUM videntes Beati non comprehendunt
eum. - - 370.

Solus DEUS tale est bonum in quo vera Bea-
tudo consistit. - - 368.

Index rerum

DEUS quomodo diligendus est a nobis.	390.
DEUS quomodo diligendus est objectivè, ap- pretiativè, & intensivè.	396.
Deus diligendus est propter se, licetè tamen po- test diligì propter mercedem eternam.	397.
Deus quomodo diligendus est totaliter & sine modo.	398.
Deus quomodo diligendus est ex toto corde &c.	400.
Dilectionis actum quando elisere tenemur.	401.
Diligere Proximum sicut se ipsum quid est. Ibid:	
Discordia quid est.	410.
Dona Spiritus Sancti quid sunt, & quot, & ad quid sunt necessaria.	489. & seq:
Duellū unde dicitur quod semper est illicitū.	412.
E.	
Eleemosyna quid est & qui sunt effectus ejus.	404.
- - - - -	& sequ.
Eleemosynam facere quomodo obligamur.	406.
Erubescencia quid est.	471.
Eutrapelia quid est & quæ requiruntur ad il- lam.	487.
Exemplum preparationis pro oratione men- tali.	26.
Exemplum Gratiarum actionis.	60. & 72.
Exemplum Oblationis.	61. & 78.
Exemplum Petitionis.	63. 81. 82.
Exemplum Orationis de odio peccati.	64. 93.
Exempla orationis pro Proficientibus.	192.
Exempla de aliis materiis & virtutibus variis in principio hujus libri recensentur.	F.

Memorabilium.

F.

- Fides inter virtutes Theologicas est prior*
ordine generationis. - 339.
Fides quid est & quod objectum ejus materiale
& formale. - - Ibid.
Fides Divina & humana in quo distinguun-
tur. - - Ibidem.
Ad Fidem quæ conditiones requiruntur. 340.
Fides nostra & illa quæ ab orbe condito fuit
est una. - - 342.
Principia Fidei sunt duo. - 343.
Res quæ creduntur cur in duodecim articulos
dividuntur. - - 340.
Fides dividitur in Fidem vivā & mortuā. 343.
Fides mortua est vera Fides. Ibidem.
Qualem Fidem habent Peccatores demones
atque damnati. - 344.
Fidei confessio quomodo & quando est necessaria. 348.
Ille qui aliquem Articulum Fidei non credit
nullam habet Fidem. - 344.
Credere implicite & explicite quid est. 346.
Fidei actus est duplex Interior & exterior. 345.
Fidei actus internus quomodo dividitur. Ibid.
Quæ sunt explicite & quæ implicite creden-
da. - - 336. & 347.
Fidei actus internus quomodo ad Salutem est
nobis necessarius. - 345.
Fidei actum internum quando homo elicere
Obligatur. - - 347.
Fidem aliud est negare aliud occultare. 349.
Fi-

Index rerum

Fidei viva causa Principalis est DEUS.	350.
Fidei effectus qui sunt.	351.
Fidei quod vitium opponitur.	352.
Fidei praxis quæ est.	356.
Fideles in Purgatorio habent Fidem.	344.
Fideles quæ tenentur scire.	347.
Fortitudo quotupliciter sumitur.	462.
Fortitudo quid est, qui actus ejus quæ partes integrates & potentiales.	Ibid: & seq.
Sub Fortitudine quæ virtutes continentur.	463.
Fortitudinis praxis.	467.
Fructus Spiritus Sancti qui dicuntur & quot sunt.	491. & seq.

G.

Gaudium quid est & quomodo à dilectione differt.	402.
Gaudium erga DEUM est duplex.	Ibidem.
Gratiarum actio in quo consistit & modus ejus.	60. & 72.
Gratiarum actio pro quibus beneficiis DEI in oratione debet fieri.	72.
In gratiarum actione actus Gratitude Laudis & amoris DEI sunt exercendi.	73.
Gratitude quid est.	456.
Gratitude quæ sunt officia.	Ibidem.
Gula quid est, quæ Species ejus & filie.	314.

H.

Hominis nomen unde est desumptum.	43.
Homo cur est animal rationale.	Ibid:
Homo est compositus ex parte inferiori & su- periori.	46. & 263.

Memorabilium

50.	<i>Hominis pars inferior & superior quid con-</i>	
51.	<i>tinet.</i>	264.
52.	<i>Hominis actus qui sunt proprii.</i>	47.
56.	<i>Hominis proprietates quæ sunt. Dignitas &</i>	
44.	<i>conditio quæ.</i>	Ibidem.
47.	<i>Honestas quid est.</i>	471.
62.	<i>Horæ Canonice cur sunt septem & quare sic</i>	
seq.	<i>vocantur.</i>	8.
63.	<i>Horas Canonicas melius est in choro recita-</i>	
67.	<i>re, quam separatim.</i>	Ibidem.
	<i>Humilitas quid est & unde dicta.</i>	476.
seq.	<i>Humilitatis fundamentum quod est.</i>	Ibid.
	<i>Humilitas quotuplex est.</i>	477.
	<i>Humilitas cur est necessaria.</i>	478.
02.	<i>Humilitatis quæ sunt indicia.</i>	481.
em.	<i>Humilitatis gradus quot sunt.</i>	483. & seq.
	I.	
72.	<i>Ieiunium quid est & quotuplex est.</i>	471.
	<i>Infidelitas duplex.</i>	352.
72.	<i>Cum Infidelibus communicatio cur prohibe-</i>	
	<i>tur.</i>	353.
73.	<i>Ingratitudinis sex modi</i>	457.
56.	<i>Inimici ex Charitate sunt diligendi.</i>	391.
em.	<i>Inimicis quæ signa Charitatis sunt exhiben-</i>	
14.	<i>da.</i>	Ibid.
45.	<i>In condonanda inimicorum injuria quis mo-</i>	
id:	<i>do servandus.</i>	393.
63.	<i>Intellectus à ratione per quid distinguitur.</i>	264.
	<i>Intellectus noster & judicium proprium quo-</i>	
	<i>modo mortificandum.</i>	306.
		In-

Index rerum

Intellectus alius est speculativus alius pra-	
eticus.	434.
Intellectus speculativi & practici actus qui	
sunt.	Ibid.
Inter Intellectum & voluntatem qualis ordo	
fieri solet.	436.
Invidia quid est & quæ sunt filie ejus.	314.
Ira quid est & quæ species ejus & filie.	315.
Irreligiositas quæ vitia continet.	451.
Juramentum quid est & quotuplex.	449.
Justitia quot modis sumitur.	442.
Justitia quid est & quod Objectum ejus.	442.
Justitiæ partes integrales sunt duæ.	443.
Justitiæ partes subjectivæ sunt tres.	Ibid.
Justitiæ commutativa, distributiva & lega-	
lis quid sunt, & quæ vitia ipsis opponun-	
tur.	Ibid. & seq.
Justitiæ partes potentiales quæ sunt.	445.
Justitiæ praxis.	461.

L.

Leetio pro oratione mentali qualis debet esse.	27.
Lectionis librorum Spiritualium necessitas.	28.
Lectionis Spiritualis fructus.	30.
Levitas mentis quid est.	484.
Liberalitas quid est & quotuplex.	460.
Libertatis causa quæ est.	426.
Libertas in qua est potentia animæ.	Ibid.
Longanimitas quid est & quare reducitur ad	
patientiam.	466.
Luxuria quid est & quæ sunt filie ejus.	314.

Memorabilium.

M.

434.	Magnanimitas quid est & quas passiones moderatur.	463. & 464.
Ibid.	Sub Magnanimitate continetur fiducia & securitas.	Ibid.
436.	Magnificencia quid est.	460. & 464.
314.	Magnificencia quomodo differt à Magnanimitate.	464.
315.	Mansuetudo seu mititas quid est.	474.
451.	Materia quæ singularis, & quæ sensibilis & quæ intelligibilis vocatur.	420.
449.	MARIÆ Virginis compassionis Exemplum.	213.
442.	Congratulationis B. V. M. Exemplum.	221.
442.	Imitationis B. V. Exemplum.	226.
442.	Meditatio quid est & quomodo exercetur.	33.
443.	Meditationis necessitas.	34.
Ibid.	Meditandi modus duplex.	35.
seq.	Meditandi modus de DEO.	36.
445.	Meditandi modus de Christo Domino nostro.	38.
461.	Meditandi modus de Sanctis quibuscunque.	39.
27.	Meditandi modus de virtutibus.	40.
28.	Meditandi modus de vitiis.	43.
30.	Meditandi modus de se ipso.	45.
484.	Meditandi modus Sacram Scripturam.	48.
460.	Meditandi Passionem Christi quæ sunt circumstantie.	194.
426.	Mendacium quid est & quotuplex.	459.
Ibid.	Misericordia quid est.	493.
d	Misericordia est distincta virtus à Charitate.	Ibid.
466.	Misericordie actus duplices corporales & spirituales.	404.
314.	Modestia quid est & quæ virtutes sub ipsa continentur.	475.
M.	Modestia morum quid est.	486.
	Sub hac cōtinetur moderatio linguae & visus.	486. & seq.
	Modestia cultus quid est.	488.
	Ad hanc reducitur liberalitas & paupertas.	489.
	Mortificatio quid est.	262.
	Mortificatio quot nominibus vocatur.	264.
	Mortificatio est duplex interior & exterior. Præterea alia est communis, alia specialis.	265.

Index rerum

Mortificationis gradus sunt tres.	270.
Mortificatio exterior quæ est.	211.
Mortificari quomodo debent sensus externi & corpus nostrum.	272.
Mortificatio sensuum quantum placet Christo.	276.
Modus mortificandi sensus internos.	278.
Abiis pro mortificandis sensibus internis.	282.

N.

Necessitas duplex mediæ & præcepti.	346.
Necessitas hac utraq; quomodo est necessaria nobis.	Ibidem.
ad Salutem.	Ibidem.
Negligentia quid est.	486.

O.

Obedientia quid est & quot ejus genera & quæ circumstantia.	453.
Obedientia heroica qui sunt gradus.	454.
Oblationis modus.	61 78.
Oblatio ut est actus Religionis quid est.	447.
Oblatio quomodo differt à Sacrificio.	446.
Oblatio est duplex.	448.
Observantia quid est & quæ species ejus.	452.
Odium Dei quid est & quotuplex.	409.
Odium proximi quid est & quando est peccatum.	410.
Odium est oppositum vitium dilectioni.	409.
Officium Divinum quomodo pie & fructuose persolvendum.	9.
Ante Officium Divinum qualis preparatio faciendæ.	10.
In Officio Divino quæ sunt servanda.	16.
Post Officium Divinum quid faciendum.	21.
Oratio dividitur in vocalem & mentalem.	7.
Oratio vocalis dividitur in publicam & privatam.	8.
Oratio publica quid est & cur vocatur Officium Divinum & hora Canonica.	Ibid.
Oratio mentalis quid est.	24.
Orationis mentalis quot sunt partes.	25.
Oratio mentalis ut alicui bene succedat.	27.
Orationis mentalis pars prima est preparatio.	23.
Pars secunda Lectio.	27.
Tertia meditatio.	31.

Memorabilium.

278.	Quarta gratiarum actio.	49.
211.	Quinta & Sexta Oblatio & Petitio.	61.
ir.	In Ratione mentali affectus quomodo exercendi	53.
272.	Post Orationem mentalem quæ sunt servanda.	63.
276.	Orationis mentalis exercendæ modus facilis.	65.
278.	Orationis mentalis Exempla pro Proficientibus.	192.
282.	Oratio continua quomodo fieri potest.	329.
346.	Orationes jaculatoriæ & actus Anagogici & aspi-	
is.	rationes ad DEUM quid sunt.	243.
idem.	Oratio ut est actus Religionis quid est, & qui sunt	
486.	fructus ejus.	446.
	P.	
ir-	Passio quid est.	287.
433.	Passiones quare undecim numerantur.	288.
434.	Passiones quomodo definiuntur.	289.
1 78.	Passio quæ est motus appetitus Sensitivi in quo di-	
447.	stinguitur à motu voluntatis.	287.
446.	Passiones ad quid datæ sunt nobis à DEO.	290.
448.	Passionum mortificandarum quæ necessitas.	291.
452.	Passiones quomodo sunt mortificandæ.	292.
409.	Passionum moderatio potest fieri tripliciter.	Ibid.
410.	Pro Passionibus moderandis modus triplex proponi-	
409.	tur.	293.
	Patientia quid est & quare pertinet ad fortitudi-	
9.	nem.	465.
12. 10.	Ad Patientiam reducitur longanimitas & toleran-	
16.	tia.	466.
21.	Paupertas voluntaria quid est.	489.
7.	Perjurium quid est.	452.
nm. 8.	Perfectio Christiana in quo consistit.	2.
Di-	Ad Perfectionem hominum aspirantium sunt tres	
Ibid:	status.	4.
24.	Perfectionis via triplex.	5.
25.	Ad Perfectionem omnes Religiosi tendere semper	
27.	tenentur.	2.
23.	Perseverantia quid est.	467.
27.	Pertinacia definitur.	Ibid.
31.	Pietas quid est.	452.
uer-	Petitio in oratione mentali quomodo instituenda.	62.
	8 l.	K k
		Pe-

Index rerum

Petitionis Exempla, & quæ sunt petenda.	81	82.
Philotimia quid est.	-	485.
Pœnitentiæ virtutis definitio.	-	452.
Pœnitentiæ actus.	71.	132.
De Pœnitentiâ & mortificatione orationis exem- plum.	-	128.
Pœnæ damnatorum sunt duæ.	-	129.
Præceptum duplex affirmativum & negativum & quomodo hæc obligant.	-	348.
Præparatio pro oratione mentali duplex.	-	26.
Præparationis exemplum.	-	Ibid.
Præsentia DEI quid est & quotuplex.	-	239.
Præsentia DEI multiplex utilitas.	-	Ibidem.
Præsentia DEI Imaginaria & intellectualis quid est.	-	240.
Præsentia Dei incipientibus quæ magis convenit.	-	241.
Præsentia Dei intellectualis praxis pro Incipien- bus.	-	241.
Præsentia Dei intellectualis serviens Proficienti- bus.	-	245.
Præsentia Dei Imaginaria quæ dicitur & praxis ejus.	-	249.
Præsentia Dei Imaginaria praxis serviens profi- cientibus.	-	251.
Præsentia Dei diversis temporibus accommodata.	-	256.
Pro Præsentia Dei varii actus Sanctorum.	-	257.
Præsentia Dei pro Festivitatibus B. V.	-	260.
Præsentia Dei ex variis creaturis.	-	262.
Præsumptio quid est.	-	484.
Proximi nostri qui dicuntur.	-	390.
Proximus cur est diligendus.	-	Ibid.
Proficientes qui dicuntur.	-	192.
Prudentia quid est & quod objectum ejus.	-	430.
Prudentia partes integrantes sunt octo.	-	Ibid.
Prudentiæ partes subjectivæ quæ sunt.	-	431.
Prudentiæ munus proprium quod est.	-	433.
Prudentiæ vitia opposita.	-	438.
Prudentiæ praxis in quo consistit.	-	439.
Pudicitia describitur.	-	473.

Memorabilium

Puritas cordis quomodo acquiritur. - 137.

R.

Ratio dividitur in Rationem Inferiorem & Superiorem. 264.

Religionis Status quid est & quis finis ejus. 2.

Religiosi ad quid tenentur. - Ibid:

Religio Sancta Carmelitarum per viam contem-

plativam & Activam tendit ad perfectionem. 6.

Religio virtus quid est. - 445.

Religionis actus qui sunt. - 446.

Religioni quæ vitia opponuntur. - 451.

Rixa quid est & quomodo à contentione differt. 412.

S.

Sacrificium ut est actus Religionis quid est. 446.

Sacrificium quotuplex est. - 447.

Sacrificium quid est. - 446.

Salus prima & secunda quæ est. - 346.

Salutis signa duodecim. - 372.

De Sanctis Exemplum Orationis. - 39.

Sapientia quid est. - 418.

Schisma, Bellum, Rixa, Seditio sunt vitia opposita

Paci

Schisma quid est. - 409.

Scandalum quid & quotuplex est. - 411.

Scientia quid est & quotuplex. - 419.

Scientia quæ speculativa & quæ practica vocatur. Ibid

Scientia speculativa est triplex. - Ibid

Scientia alia est mundana, alia terrena, alia animalis, alia diabolica, alia cœlestis. 423.

Scriptura Sacra multiplex sensus. 48.

Seditio quid est. - 412.

Sensus externi quomodo mortificandi. 272.

Sensus interni quot sunt. 277.

Silentium in quo consistit. - 487.

Simonia quid est. - 452.

Singularitas definitur. - 484.

Sobrietas quid est & unde dicta. - 472.

Spes Theologica virtus quid est. - 362.

K k2

Spei

Index rerum

<i>Spei Subiectum & obiectum tam materiale quam formale quod est.</i>	-	-	363.
<i>Actus Spei quis est.</i>	-	-	Ibid:
<i>Spei actum quando elicere tenemur.</i>	-	-	364.
<i>Vitia Spei opposita quæ sunt.</i>	-	-	364.
<i>Spei heroica quæ est.</i>	-	-	278.
<i>Spei virtutis Theologica praxis.</i>	-	-	375.
<i>Superbia quid est & quotupliciter sumitur.</i>	-	-	312.
<i>Superbiæ species quæ & quot sunt</i>	-	-	Ibid:
<i>Ex Superbia oritur vana gloria & quomodo differunt.</i>	-	-	313.
<i>Superstitio quid est & quotuplex.</i>	-	-	451.
<i>Studiositatis definitio.</i>	-	-	486.

T.

<i>Tentatio DEI quomodo fiat.</i>	-	-	452.
<i>De S M. N. Theresia Exemplum Orationis.</i>	-	-	232.
<i>Temperantia quid est & unde dicitur</i>	-	-	470.
<i>Temperantia partes integrales quæ sunt.</i>	-	-	Ibid:
<i>Temperantia species quatuor</i>	-	-	471.
<i>Temperantia partes potentiales seu virtutes ad eam pertinentes.</i>	-	-	473.
<i>Theologia est vera Sapientia & est eminenter practica & Speculativa.</i>	-	-	419.
<i>Theologica virtutes quot sunt & quare ita vocantur.</i>	-	-	338.
<i>Timor Dei unde nascitur in nobis.</i>	-	-	5.
<i>Timor Dei duplex.</i>	-	-	121.
<i>De Timore Dei exemplum Orationis.</i>	-	-	122.

V.

<i>Vana gloria in quo differt à Superbia.</i>	-	-	313.
<i>Ex Vana gloria quæ vitia oriuntur.</i>	-	-	Ibid:
<i>Verecundia quid est.</i>	-	-	470.
<i>Veritas seu veracitas quid est.</i>	-	-	458.
<i>Virginitas quid & quotuplex est.</i>	-	-	473.
<i>Vindicatio quid est & quotuplex ipsius finis.</i>	-	-	457.
<i>Virtus unde dicitur, natura, causa: effectus & proprietates ejus.</i>	-	-	40.
<i>Virtus est honesta, utilis, necessaria, delectabilis & pulchra.</i>	-	-	Ibidem.
	-	-	Vir.

Memorabilem.

	<i>Virtutis subiectum quod est</i>	317.
	<i>Virtus cur dicitur complementum & perfectio potentie.</i>	317.
	<i>Virtus ad quid ponitur in potentia humana.</i>	318.
	<i>Virtus quomodo definitur.</i>	Ibid.
	<i>Virtutis habitus quomodo acquiritur.</i>	Ibid.
	<i>Virtus quomodo dividitur.</i>	319.
	<i>Virtus acquisita & infusa quæ dicitur.</i>	Ibid.
	<i>Inter Virtutes acquisitas & infusas quod est discrimen.</i>	320.
	<i>Virtus quæ dicitur politica purgatoria & animi purgati & exemplaris.</i>	322.
	<i>Virtus dividitur in Theologicam Intellectualem & moralem.</i>	323.
	<i>Virtutes quomodo acquiruntur.</i>	Ibid.
	<i>Virtus perfecta non potest haberi sine aliis.</i>	325.
	<i>Virtutem unam exercendo simul & aliis exercere possumus</i>	326.
	<i>In Virtute humilitatis nos potissimum exercere debemus.</i>	329.
	<i>Virtutis unius unum actum quomodo possumus exercere ex motivo plurium virtutum, aut omnes actus ex motivo unius virtutis.</i>	336.
	<i>In Virtutibus an aliquis proficiat quæ sunt indicia.</i>	Ibid.
	<i>Virtutes Theologicæ sunt tres, & cur ita vocantur.</i>	338.
	<i>Inter omnes virtutes quare Theologicis primus locus datur.</i>	Ibid.
	<i>Virtus intellectualis quæ vocatur & quomodo dividitur.</i>	418.
	<i>Virtutum intellectualium praxis.</i>	422.
	<i>Virtutes morales quæ sunt, & quæ est necessitas illarum.</i>	427.
	<i>Virtutes morales quæ dicuntur cardinales seu principales.</i>	Ibid.
	<i>Virtutum cardinalium aliæ sunt partes integrantes, aliæ subiectivæ, aliæ potentiales.</i>	428.
	<i>Ad Virtutes morales cardinales omnes aliæ virtutes morales reducuntur.</i>	Ibid.

Index rerum Memorabilium.

<i>Virtutes morales unde dicuntur tales, &</i>	
<i>quæ sunt.</i>	427.
<i>Virtutes morales quæ dicuntur.</i>	428.
<i>Virtutum moralium praxis.</i>	429.
<i>Vita Spiritualis in quo consistit.</i>	1.
<i>Vita Spiritualis finis ultimus quis est.</i>	2.
<i>Vita Spiritualis finis intrinsecus seu proximus quid est.</i>	Ibid:
<i>Vita Spiritualis exercitium proprium est oratio.</i>	7.
<i>Vita Spiritualis cur desideranda.</i>	2.
<i>Vita Spiritualis exercitium secundum est Mortificatio.</i>	262.
<i>Vita Spiritualis exercitium tertium est virtus.</i>	316.
<i>Vita humane miserie recensentur</i>	106.
<i>Vitium unde dicitur & quæ est natura causa, effectus, & proprietas vitiorum.</i>	43.
<i>Vitium est malum inhonestum, inutile & amarum.</i>	44.
<i>Vitium quid est & quomodo extirpatur.</i>	308.
<i>Vitia unde generantur in nobis.</i>	309.
<i>Vitium est effectus & causa peccatorum.</i>	Ibid:
<i>Vitia quot modis eradicari possunt.</i>	310.
<i>Vitia capitalia sunt septem.</i>	312.
<i>Vitium capitale quod dicitur.</i>	313.
<i>Vitiorum eradicatorum quæ sunt signa.</i>	315.
<i>Voluntas humana quid est.</i>	297.
<i>Voluntas ordinata & inordinata quæ dicitur.</i>	Ibid:
<i>Voluntatis propriæ mortificandæ multiplex necessitas.</i>	298.
<i>Voluntatis propriæ abnegatio est fundamentum vitæ Spiritualis & perfectionis.</i>	300.
<i>Voluntas propria quomodo est abneganda.</i>	301.
<i>Voluntatis actus qui sunt.</i>	434.
<i>Inter voluntatis actus & intellectus qualis ordo fieri solet.</i>	436.
<i>Votum quid est & quotuplex est.</i>	448.
<i>Quod vitium opponitur alicui virtuti videatur nomen cuiuslibet virtutis.</i>	

AdM. D. T. O. M. G. B. V. M. S. L. O. C. H.

ERRATA sic CORRIGE.

Pag: 8. v. 14. Ecclesia l. Ecclesiæ.

p. 11. v. 5. in gratiarum actione. l. in gratiarū a-

p. 13. v. 2. 418. l. 381. (tionem.

p. 31 v. 29. in contemplatione. l. in contēplatione.

p. 50. v. 25. Ita. l. Ira.

p. 56. v. 11. opprobia. l. opprobria.

p. 63. v. 27. det industriā. l. de industria.

Ibid: 28. prout. l. prout.

p. 64. v. 18. mortificatio. l. mortificatio.

p. 177. v. 5. summendo. l. fumendo. (batur.

p. 181. v. 17. non commitabantur. l. non commina-

p. 182. v. 4. non apperuiſti. l. non aperuiſti.

p. 186. v. 4. mea. l. à me.

p. 192. v. 18. viam. l. vivam.

p. 193. v. 24. Accasatione. l. occusatione.

p. 195. v. 1. meſerrimis. l. miſerrimis.

p. 196. v. 30. patientiæ. l. patientiæ.

p. 207. v. 13. aſſetum. l. aſſetum.

Ibid: v. 22. commiſerationis. l. commiſeratione.

p. 213. v. 29. ante Religioſi ad de ſi.

p. 216. v. 3. aſſiſtionicus. l. aſſiſtionibus.

p. 239. v. 4. Paulos. l. Paulus.

Ibid: v. 6. meditatantes. l. meditantes.

p. 254. v. 18. Os jam. l. o ſi jam.

p. 260. v. 25. immaculata. l. iuſmaculate.

p. 283. v. 17. ſacundum. l. ſecundum.


p. 301. v. 9. coſſulo. l. conſulo.

Ibid: v. 20. obnegare. l. abnegare.

ERRATA.

- p. 302. v. 13. allæquitud. l. alloquitur. (tare.
p. 307. v. 30. opinione putarem. l. opinionem pu-
p. 338. v. 26. amabile. l. amabile.
p. 339. v. 21. definit. l. definit.
p. 352. v. 1. sft. l. est.
p. 371. v. 8. homines. l. hominum.
p. 396. v. 29. magi. l. magis.
p. Ibid: v. 30. causas. l. causa.
p. 408. v. 11. veru. l. verò.
p. 412. v. 16. etq; l. estq;
Ibid: Ecclesiastico. l. Ecclesiastico.
p. Ibid: v. 29. aliterius l. aliterius.
p. 414. v. 1. totaliter. l. totaliter.
p. 419. v. 25. regimen. l. regimen.
p. 421. v. 17. Luna. l. Lana.
p. 428. v. 13. integrates. l. integrantes.
p. 438. v. 9. ia. l. ita.
p. 446. v. 23. significatur. l. significatur.
p. 456. ult. iga. l. gratz.
p. 478. v. 12. nimi. l. animi.
p. 493. v. ult. correctionis. l. correctioni.
p. 495. v. 21. vitæ. l. viæ.
p. 501. v. 2. Ratione. l. Rationem.
p. 504. v. 27. uni virtuti. l. unius virtutis.
Ibid: v. 29. humilitati. l. humilitatis.
p. 515. v. 1. còerceretur. l. coeretur.
p. 516. v. 14. sed. l. seu,

are.
pu.



KSIĘGARNIA

ANTYKWARIAT



403217 F

XXXXXXXXXXXXXXXXXXXXXXX

Biblioteka Jagiellońska



stdr0026225

